

လုကာ

လုကာ ရေးဟောင်းဟူ ခရစ်တော်ရဲ့ ဒန်းကောင်း

နိဒါန်း

လုကာ ရေးဟောင်းဟူ ခရစ်တော်ရဲ့ ဒန်းကောင်းဟော ယေရှု ခရစ်တော်ရဲ့ သတ်တော်စဉ်ဟို့ ဖော်ပြဟောင်းဟူ ဓမ္မသစ် ကျမ်းထဲမှာ ကျမ်းလေးစောင်ထဲဟူ တစောင်ဖြစ်ဟယ်။ အယ်ကျမ်းတစောင်စီဟို့ “ဧဝဂေလိ” ဆိုဘီး ခေါ်ဟယ်။ “ဒန်းကောင်း” ဆိုဘီး ဓိပါယ်ရဟယ်။ ယေရှုသေဆောင်း ဘီးန အယ်ကျမ်းလေဟို့ မသဲ၊ မာကု၊ လုကာန ယော ဟန်ဟူ ရေးဟောင်းဟယ်။ လုကာဟော ယေရှုရဲ့ သတ်တော် စဉ်ကြောင်းဟို့ ရေးဟောင်းရုံမျှမူဘဲ သူဟော ကိုယ်တော်ရဲ့ သေဆောင်းဇာန ထမြော့-က်ဘီးန ယေရှုရဲ့ တမဲ့တော်လေ လောက်ဆောန်ဟောင်းဟူ ကြောင်းရာလေဟို့လည်း ရေးဟောင်း သေးဟယ်။ အယ်ကျမ်းဟို့ တမန်တော်လေရဲ့ လောက် ဆောန်မှုကျမ်း ဆိုဘီး ခေါ်ဟယ်။ လုကာရေးဟောင်းဟူ ဒန်း ကောင်းဟော ရေးဟောင်းဟူ ခိနာရီတိကုလန နေရာဟို့ ဖယ်လူ လည်း သိဂေဟူ။ အယ်ဘေမဲ့ အယ်ကျမ်းဟော ခရစ်တော် မိုးဘီးန ၇၀ ခုနှစ်လော့-က်ဟူ ရေးဟောင်း ဖြစ်မယ် ဆို ဘီး ကျမ်းစာပညာရှင် များစုဟူ ဘောတူဂေဟယ်။

ကျမ်းရေးသူဖြစ်သူ လုကာဟာ ဆရာဝန် တယော့-က် လည်း ဖြစ်ဟုတ်။ သူဟာ ပညာတတ် တယော့-က် ဖြစ်ဟုတ် ဆိုရာကို သူ့ရဲ့ စာရေးသားဟန်နဲ့ သောင်းပြုဟောင်းဟူ ဘာသာစကားဟု ပြသနေဟုတ်။ လုကာဟာ ယေရှုသတ် တော်စဉ်ရဲ့ ဖော်ပြချစ်မှန်မှုကို ရေးဖွဲ့တွင် လိုရှင်ဟုတ်။ အယ်ကြောန် သုံးနှစ်လ တွင်ကြောင့်ဟောင်းဟူ ဖြစ်ပျစ်လေဟူ ပြောပြနေဟူ ဖြစ်ဟုတ်။ အယ်မျိုးမှဘဲ အယ်ကျမ်းဟူ ဖတ်ဟူ တခြားလူလေဟာ ကျိုးကျေးဇူးရနိုင်မယ် (၁.၁-၃)။ သူဟာ ယုဒလူမျိုး တယော့-က် မှဟူ။ (ကော ၄.၁၀-၁၄) အယ်ဘီးဟာ သူဟာ ယုဒလူမျိုးမှဘဲဟူ လူလေ နားလည် နိုင်အောင် ဆိုဘီး အယ်နည်းလမ်းနဲ့ ရေးဟောင်းလေဟုတ်။ သူဟာ ယုဒလူမျိုးရဲ့ ထောင်းဇီလေဟူ ရှင်းပြဟောင်းဟူထဲ မာ အယ်မူကြောင်းဟူ ရှင်းရှင်းလင်းလင်းဟောင်း တွဲရဟုတ် (၁.၈)။

လုကာရေးသူ ဒန်းကောင်းဟာ မသန် မာကုရဲ့ ကျမ်း လေန ရရာတိုင်း တူညီလေဟုတ်။ ဖြားဖြစ်ကြောင့်နူးဆို ဟာ သုံးနှစ်ဟာ တူညီဟူ ကြောင်းရာလေန တူညီဟူ နည်း လမ်းဟူ ဖော်ပြဟောင်းဟူကြောင့် ဖြစ်ဟုတ်။ အယ်သောင်း ယော့-က်ထဲမာ လုကာဟာ ဗတုတိဇီယောဟန်ရဲ့ မိုးဖွား ဇာန ဆိုင်ဟူကြောင်းဟူ သေးဇီ ဖော်ပြဟောင်းဟုတ်။ လုကာ ဟာ ပြစ်လွတ်ဇာန (ခန်းဂီး ၃.၃; ၁၁.၄; ၁၇.၃-၄; ၂၃.၃၄; ၂၄.၄၇) ဆုတောင်းဇာ (၃.၂၁; ၅.၁၆; ၆.၁၂; ၁၁.၁-၁၂; ၂၂.၃၂) ဟူလည်း လေးထားဘီး ဖော်ပြဟောင်းဟုတ်။

ကြောင်းရာ ကျဉ်းချောက်

၁။ လုကာဟာ သူ့ရဲ့ ဒန်းကောင်းဟို့ မိတ်ဆစ်ဟွားဘီး သူဟာ အယ်ကျမ်းဟို့ ဖြားဖြစ်ကြောန့် ရေးဟယ် ဆိုဘီး ရှင်းပြဟွားဟူကြောင်း (၁.၁-၄)

၂။ အယ်ဘီးန သူဟာ ယေရှုရဲ့ မွီးဖွားဇာဟို့ ဖော်ပြဟွားဘီး ကိုယ်တော်ဟာ သာသနာတွပ် ဖယ်မျိုး ပြင်ဆင်ဟွားဟူကြောင်း (၁.၅-၄.၁၃)

၃။ ဒန်းကောင်းရဲ့ ကျန်သေးဟူ စိပိုင်းများစုမာ လုကာဟာ ထူးသဖြင့် ယေရှုလောက်ဆောန်ဟွားဟူ နိမိတ်လတ်ခဏာကြောင်းန ကိုယ်တော် သွန်သန်ဟွားဟူ ဇာလေဟို့ ပြောပြဟွားဟူကြောင်း (၄.၁၄-၂၁.၃၈)

၄။ နိဂေါင်းမာ သူဟာ ယေရှုဟာ ဖယ်မျိုး သေဆောင်းဟွားဟယ်၊ ဖယ်မျိုး သံဂြိုဟ်ဟွားဟယ်၊ အယ်ဘီးဟာ ဖယ်မျိုး သေရာဟုနေ ထမြော့-က်ဟွားဟယ် ဆိုဇာဟို့ နှော့-က်ဆောင်းခန်းဂီး နှော့ခန်းမာ ဖော်ပြဟွားဟူကြောင်း (၂၂.၁-၂၄.၅၃)

¹ ရှစ်ရဟူ သော်ဖိလု၊

ကျွန်တော့်ဟွားလေထဲမာ ဖြစ်ပျစ်နေဟူ ကြောင်းရာလေဟို့ ကောင်းဆောင်း ရေးသားဟွားဟူ လူလေဘောင်ဂီး ရှိဟယ်။

² သူးနီလေဟာ အယ်ဖြစ်ပျစ်ဇာလေဟို့ စစဒူးဟု မြင်ဟူလူလေန ဒန်းကောင်းဟို့ ဟောပြောဟူ မှုဆောန်လေ ပု

လန်ပြောပြဇာလေဟို့ ကျမ်းပြု ပေါက်ကိုလေဟု ရေးသား
ဟူးဟယ်။

³ သော်ဖိလု၊ ကျွန်တော်ဟာ အယ်ကြောန်းရာလေဟို့
ဖြစ်ပျစ်ခီဟုနေ စဘီး သေးသေချားချာ လေ့လာဟူးဟူ
လူဖြစ်ကြောန့် သင်ဖတ်ရှုနိုင်ဟို့တွပ် စီစဉ်ကုလကုလန
ကျမ်းစာဟို့ ရေးသားမယ် ဆိုဟာ ကောင်းဆောင်း ဖြစ်
မယ် ဆိုဘီး ယူဆဟယ်။

⁴ အယ်ကြောန့် သင်ကြားသိဟူးဟူ ကြောန်းရာလေဟို့
သေးသေချားချာန သင့်ဟို့ သိစေရှင်ကြောန့် အယ်ကျမ်း
စာဟို့ ရေးသားဟူးဇာ ဖြစ်ဟယ်။

ဗတုတိဇိယောဟန်ဟို့ မိုးဟို့ကြောန်း

⁵ ယုဒပြည်* ဟို့ အောက်ချောက်ရဟူ ဟေရုဒ်မန်းဂီး
လတ်ထတ် အဘိယသင်းဝမ် ဖြစ်ဘီး ဇာခရိ နာမယ်ရှိ
ဟူ ယဇ်ပုရောဟိတ် တယော့-က်ရှိဟယ်။ သူ့မီးမ နာမယ်
ဟာ လေိရှဗက် ဖြစ်ဘီး သူဟာ အာရုန်ရဲ့ မျိုးနွယ်လည်း
ဖြစ်ဟယ်။

⁶ သူးနို့ နှေ့ယော့-က်ဟာ ဘုရားသခင်ရဲ့ ရှေ့တော်မာ
ပြောန့်မတ်သူလေဖြစ်ဘီး ကိုယ်တော်ရဲ့ ပညတ်တော်လေ
န မိန့်တော်လေ ဂူလောင်းဟို့ ကျင့်ဆောက်ဟူကြောန့် ပြစ်
တန်ဇာမေ့ဟယ်။

* 1:5 ၁.၅ ယုဒပြည်၊ အယ်ဝေါဟာရဟာ ပါလတိနပြည် (ပါလက်စတိုင်း)
တခုလောင်းဟို့ ရည်ညွှန်းဟယ်။

⁷ ဧလိရှဗက်ဟာ မှလုံနေဟူကြောင့် သူးနှိမာ သားမီးမေ့ဟု။ အခရိန် သူးမီးမ နှော့ယော့-က်လောင်းဟာ ရရာတိုင်း အိုနေဘိ။

⁸ တရစ်မာ အခရိဟာ သူမဆောန်ရဟို့ လှည့်ရော့-က်ကြောင့် ဘုရားသခင်ရှေ့မာ ယဇ်ပုရောဟိတ်လောက်ဟို့ လောက်နေဟယ်။

⁹ ယဇ်ပုရောဟိတ် လေ ရဲ့ ထောင်း ဇံ တိုင်း သူ ဟာ ယဇ်ပလ္လင်ထတ်မာ နံ့သာပေါင်းဟို့ မီးရှို့ဟို့ ဝီးကော့-က်ခံရဟယ်။ အယ်ကြောင့် သူဟာ သခင်ဘုရားရဲ့ ဗိမာန်တော်ထဲဟို့ ဝမ်ဟူးဘီး၊

¹⁰ နံ့သာပေါင်းဟို့ မီးရှို့နေခီမာ ပုလန်မာနေဟူ လူလေ ဂူလောင်းဟာ ဆုတောင်းဘီး နေဂေဟယ်။

¹¹ အယ်ခီမာ သခင်ဘုရားရဲ့ ကောင်းဂန်တမန်ဟာ သူ့ရှေ့မာ ပေါ်လာဘီး နံ့သာပေါင်းဟို့ မီးရှို့ဟူ ယဇ်ပလ္လင်ရဲ့ ညာဖတ်မာ ရပ်နေဟယ်။

¹² အခရိဟာ ပြင်လိုက်ခီမာ ကြော့-က်ရှို့ ထိလန့်ဟူးဟယ်။

¹³ အယ် ဘေ မဲ့ ကောင်းဂန် တမန် ဟု “အခရိ၊ ကြော့-က်နု! ဘုရားသခင်ဟာ နန့်ရဲ့ ဆုတောင်းသံဟို့ ကြားဘီး နန့်ရဲ့ မီးမ ဧလိရှဗက်ဟာ သားမွီးရလေ့မယ်။ အယ်သားဟို့ ယောဟန်နာမယ်န မှတ်ရမယ်။

¹⁴ အယ်သားဟို့ မွီးခီမာ နန့်ဟာ ရရာတိုင်း ဝန်းသာဘီး လူလေဟာလည်း ဝန်းသာလေ့မယ်!

15 ယောဟန်ဟာ ဘုရားသခင်ရှေ့တော်မှာ ရရာတိုင်း ကီးမြတ်ဟူ လူဖြစ်လေ့မယ်။ သူဟာ ဝိုင်န ယစ်သေဇာ ဟို့ လောင်းဝသော့-က်ဟူ။ မိုးဂဒဲဟု သူဟာ သန်ရှင်းဟူ ဝိညာဉ်တော်န ပုလဲဝနေဘီး

16 သူဟာ ကုသရေလလူမျိုး များစုဟို့ သူးနို့ရဲ့ သခင်ဖြ စ်ဟူ ဘုရားသခင်နားဟို့ ပုလန်ခေါ်ဆောန်လာလေ့မယ်။

17 သူဟာ ပရောဖက်ဇလိယမျိုး ခွန်အားန တဂိုးကီးဘီး သခင်ဘုရားရှေ့တော်ဟို့ သွားလေ့မယ်။ သူဟာ ဖခင်လေ ရဲ့ စိန်လောင်းဟို့ သားမီးလေဖတ်ဟို့ ပုလန်လှည့်စေဘီး သူဟာ နားထောန်ဘဲဟူ လူလေဟာ ပြောန့်မတ်ဟူလမ်းဟို့ ပုလောန်းလဲစေဘီး သခင်ဘုရားတွပ် ဆင်သင့်ဖြစ်နေဟို့ ကိုယ်တော့် လူမျိုးဟို့ ပြင်ဆင်ဟွားဟယ်” ဆိုဘီး ဇာခရိ ဟို့ ပြောလေဟယ်။

18 ဇာခရိဟု “အယ်မျိုးဖြစ်မယ် ဆိုဇာဟို့ ကျွန်တော် ပြားမျိုးသိရနူး။ ကျွန်တော်ဟာ ဖိုးသန်ဂီးဖြစ်နေဘိ။ ကျွန် တော့် မီးမဟုလည်း ဖွားသန်မဖြစ်နေဘိ” ဆိုဘီး ကောန်း ဂန်တမန်ဟို့ ပြောလေဟယ်။

19 ကောန်းဂန်တမန်ဟု “ငါဟာ ဂါဗြေလဖြစ်ဟယ်။ ငါ ဟာ ဘုရားသခင်ရဲ့ ရှေ့တော်မှာ ရပ်နေသူဖြစ်ဘီး နန့်ဟို့ အယ်ဒန်းကောန်း ပြောဟို့တွပ် ငါဟို့ စေလွှတ်လိုက်ဟယ်။

20 နန့်ဟာ ငါ့ပြောဟူ အယ်ဒန်းကောန်းဟို့ ယောင်ကြည် ဘဲ ဖြစ်နေဘေမဲ့လည်း သတ်မှတ်ဟွားဟူ ခီရော့-က်ဟာ ပုလဲဇောင်လာလေ့မယ်။ နန့်ဟာ ငါ့ပြောဟူ ဒန်းကောန်းဟို့

ယောင်ကြည်ဘဲဟူကြောင့် ငါ့ဂဒိတော်လေဟာ နန်းမာ ပုလဲ
 ဇောင်ခန်နေထိ စကားပြောနိုင်ဘဲ အဘီး နေရလေ့မယ်”
 ဆိုဘီး ပြောလေဟယ်။

21 လူလေဟာ ဇာခရိဟို စောန့်မျှော်နေဘီး ဗိမာန်တော်
 ထဲမှာ ကြာဂီးနေဇာဟို အံ့ဩနေဟယ်။

22 ဇာခရိဟာ ထွပ်လာဟူ ခီမာ စကားပြောနိုင်ဘဲဟူ
 ကြောင့် ဗိမာန်တော်ထဲမှာ ရှုပါရောင် မြင်ရကြောင်းဟို သူး
 နို့ သိဂေဟယ်။ စကားတလောင်းလည်း ပြောနိုင်ဘဲကြော
 နဲ့ သူဟာ သူးနို့လေဟို လတ်ရိလတ်ခေဘဲ ချစ်ပြလိုက်
 ဟယ်။

23 ဗိမာန်တော်ထဲမှာ ယဇ်ပုရောဟိတ်မှုဟို ဆောန်ရွက်ရ
 ဟို ခီပီးဆောင်းဟူးကြောင့် ဇာခရိဟာ အီဟို ပုလန်ဟူး
 ဟယ်။

24 အယ်ဘီးန သူးမီးမ ဇေလိရှဗက်ဟာ ဗိုက်ပိုက်နေဟူ
 ကြောင့် ငါးလလောင်းလောင်း အီပုလန်ဟို ထွပ်ဘဲနေဟ
 ယ်။

25 အယ်မီးမဟု “ခု သခင်ဘုရားဟာ ငါ့ဟို မဇတော်မှု
 လိုက်ဘီ။ ကိုယ်တော်ဟာ ငါ့ဟို လူလေကဲ့ရဲ့ ဝေဖန်နေဇာ
 လေဟို ပယ်ရှင်းပေးတော်မှုလိုက်ဘီ!” ဆိုဘီး ပြောလေ
 ဟယ်။

ယေရှုဟို မိုးဟိုကြောန်း

26 ဇေလိရှဗက်ရဲ့ ဗိုက်ဟာ ခြော့-က်လဟို ရော့-က်လာ
 ဟူ ခီမာ ဘုရားသခင်ဟု ကောင်းဂန်တမန် ဂါမြေလဟို ဂါ

လိလဲပြည် နာဇရက် နာမယ်ရှိဟူ မြို့ဟို့ လွတ်လိုက်ဟယ်။

27 ဒါဝိဒ်မန်းဂီးရဲ့ သားမှလေးဖြစ်ဘီး ယောသပ် နာမယ် ရှိဟူ လူတယော့-က်န လတ်ထပ်ဟို့ စေ့စပ်ဟူးဟူ မီးမ ပျိုတွပ် သူမာ ဒန်းစကား ရှိဟယ်။ အယ်မီးမပျိုရဲ့ နာမယ် ဟာ မာရီ ဖြစ်ဟယ်။

28 ကောန်းဂန်တမန်ဟာ ရော့-က်လာဘီး “နန်နတူးဒူ ငြိ သတ်မှုရှိပါစေ! နန်နတူးဒူ သခင်ဘုရား ရှိဘီး နန်ဟာ ရ ရာတိုင်း မင်္ဂလာရှိဟယ်!” ဆိုဘီး ပြောလေဟယ်။

29 ကောန်းဂန်တမန်ရဲ့ စကားကြောန့် မာရီဟာ စိန်လော င်းငြိသတ်ဘဲ ဖြစ်ဟူးဘီး သူ့စကားလေဟာလည်း အံ့ဩ သွယ် ဖြစ်ဟယ်။

30 ကောန်းဂန်တမန်ဟ “မာရီ၊ ကြော့-က်န။ နန်ဟာ ဘုရားသခင်ရှေ့မာ မျစ်နှာသာရဟူးဘိ။

31 နန်ဟာ ဝန်းရှင်မဖြစ်လာဘီး သားဟို့ မွီးရလေ့မယ်။ အယ်သားဟို့ ယေရှု ဆိုဘီး နာမယ်ပေးရလေ့မယ်။

32 သူဟာ ကီးမြတ်ဟူ သူဖြစ်ဘီး မြစ်ဆောင်းဟူ ဘုရားသခင်ရဲ့ သား ဆိုဘီး ခေါ်ဇာဟို့ ခံရလေ့မယ်။ သူ ဘိုးဘေ ဒါဝိဒ်ရဲ့ ရာဇပလ္လင်ဟို့ ထာဝရသခင် ဘုရားသ ခင်ဟာ သူဟို့ ပေးအပ်လေ့မယ်။

33 သူဟာလည်း ယာကုပ်ရဲ့ မျိုးနွယ်ဟို့ မြဲဒမ်း အောက် ချောက်လေ့မယ်။ သူ့နိုင်ငံတော်ဟာ လောင်းဝ ဆောင်းမွေ ဟု!” ဆိုဘီး အယ်မီးမဟို့ ပြောလေဟယ်။

34 မာရိဟု ကောန်းဂန်တမန်ဟို့ “ကျွန်မဟာ မီးမပျို ဖြစ်ဟယ်။ အယ်မျိုးဆိုဟာ ဖယ်မျိုးလောက်ဘီး သားမွီးနိုင်ဟို့နူး။” ဆိုဘီး မေးလေဟယ်။

35 ကောန်းဂန်တမန်ဟာ “သန့်ရှင်းဟူ ဝိညာဉ်တော်ဟာ နန့်ထတ်မာ သတ်ရော့-က်ဘီး ဖြစ်ဆောင်းဖြစ်ဟူ ဘုရားသခင်ရဲ့ တဂိုးတော်ဟာလည်း နန့်ထတ်မာ လွမ်းမိုးနေလေ့မယ်။ အယ်ကြောင်းကြောန့် သန့်ရှင်းဟူ သားတော်ဟာ ဘုရားသခင်ရဲ့ သားဆိုဘီး ခေါ်ဇာဟို့ ခံရလေ့မယ်။

36 နန့်ရဲ့ ဆွေမျိုး ဇေလိရှဗက်ဟို့ ဒီရဂေ။ မြို့မ ဆိုဘီး ခေါ်ခဲနေရဟူ သူဟာ ဖွားသန်မ ဖြစ်နေဘေမဲ့ ခု ဝန်းရှင်မ ဖြစ်နေဇာ ခြွဲ-က်လရှိနေဘိ။

37 အယ်ကြောန့် ဘုရားသခင်မာ လောက်နိုင်ဘဲဇာ ဖြားလည်းမဟူ” ဆိုဘီး မိန့်တော်မူလိုက်ဟယ်။

38 မာရိဟု “ကျွန်မဟာ သခင်ဘုရားရဲ့ စေခံဖြစ်ဟယ်။ ကိုယ်တော်ပြောဟူးတိုင်း ကျွန်မမာ ပုလဲဇောင်ပါစေ” ဆိုဘီး ပြောဟယ်။ အယ်ဘီးန ကောန်းဂန်တမန်ဟာ မာရိနားဟု ထွပ်ဟူးဟယ်။

ဇေလိရှဗက်နားဟို့ မာရိအီးခုလယ်သွားဟူကြောင်း

39 အယ်မျိုးဖြစ်ဘီး ကြာခန်မာဘဲ မာရိဟာ သင့်ပြင်ဘီးန တောန်ထတ်ဒေသမာရှိဟူ ယုဒပြည် မြို့တမြို့ဟို့ ဗြန်းဗြန်သွားလိုက်ဟယ်။

40 ဇာခရီရဲ့ အိဟို့ ဝမ်ဘီး ဇေလိရှဗက်ဟို့ နှောက်ဆစ်လေဟယ်။

41 မာရီရဲ့ နှောက်ဆစ်စကားဟို့ လေဝိရှုဗက်ကြားဟူ ခီ
မာ ဗိုက်ထဲဟု သားဂန်ဟားဟာ ထခူလေဟယ်။ လေဝိရှုဗ
က်ဟာ သန်ရှင်းဟူဝိညာဉ်တော်န ပုလဲနေဘီး

42 သံကုလယ်ဂီးန “နန်ဟာ မီးမလေ ဂူလောင်းထတ်
မင်္ဂလာရှိဆောင်း ဖြစ်ဘီး နန်မွီးမယ့် သားဟာလည်း
မင်္ဂလာရှိဆောင်း ဖြစ်ဟယ်။

43 ငါ့သခင်ရဲ့ မိခင်ဟာ ငါ့နားဟို့ အီးဒုလယ်လာကြောန့်
အယ်မျိုးကီးမားဟူဇာလေ ဖြစ်နေဇာလော။

44 နန်ရဲ့ နှောက်ဆစ်စကားဟို့ ကြားလိုက်ဟူန ရှင်းရှင်း
ဘဲ ငါ့ဗိုက်ထဲဟု သားဂန်းဟားဟာ ဝန်းသာအားရ ထခူ
လေဟယ်။

45 သခင်ဘုရားရဲ့ ဒန်းစကားဟာ နန်မာ ပုလဲဇောင်လေ့
မယ် ဆိုဇာဟို့ ယောင်ကြည်ဟူ မီးမဟာ မင်္ဂလာရှိဟယ်။”
ဆိုဘီး ပြောလေဟယ်။

မာရီရဲ့ ချီးမွမ်းချင်းကြောန်း

46 မာရီဟု၊

“ငါ့ရဲ့ စိန်လောင်းဟာ သခင်ဘုရားဟို့ ချီးမွမ်းဘီး၊

47 ငါ့ရဲ့ ကယ်တန်ရှင် ဘုရားသခင်ကြောန့် ငါ့ရဲ့ ဝိ
ညာဉ်ဟာ ဝန်းသာအားရဘီး၊

48 ကိုယ်တော်ဟာ သူ့စေခံရဲ့ နှိဒုလနေဇာဟို့
အော့-က်မေ့တော်မူဘိ!

ခုဟုစဘီး လူလေ ဂူလောင်းဟာ ငါ့ဟို့ မင်္ဂလာရှိသူ ဆိုဘီး
ခေါ်ဂေ့လေ့မယ်။

49 ဖြားဖြစ်ကြောင့်နူးဆိုဟာ တဂိုးန ပုလဲဇောင်တော်
မူဟူ ဘုရားသခင်ဟု ရရာတိုင်း ကီးမားဇာလေဟို
ငါ့တွပ် ပြုတော်မူကြောင့် ဖြစ်ဟယ်။

ဘုရားသခင်ရဲ့ နာမတော်ဟာ သန့်ရှင်းတော်မူဘီး၊

50 မျိုးဆစ် ဆစ်ဘီးဆစ်

ကိုယ်တော်ဟို ကိုးကွယ်သူလေဟို ကိုယ်တော်ဟာ က
ရုဏာဟို ပြုတော်မူဟယ်။

51 ကိုယ်တော် လတ်ရောင်းတော်ဟို ဆန့်တန်းဘီး

သူးနှိစိနှလောင်းထဲဟု ကြံစည်လေန မာနထောန်လွှား
နေဟူ လူလေဟို ဖုလဲဖုလဲစင်စေမယ်။

52 မန်းဂီးလေဟို သူးနှိရာဇပလ္လင်ထတ်ဟု ခုလဘီးန

နှိခုလဟူ လူလေဟို မလော့-က်စားတော်မူဟယ်။

53 ငတ်နေဟူ လူလေဟို ကောန်းဟူ ဇာလေန ကျွေးဘီးန

ကြွယ်ဝဟူ လူလေဟို လတ်ခဲခဲ လွတ်လိုက်တော်မူဟ
ယ်။

54 ကိုယ်တော်ဟာ နို့လေရဲ့ ဘိုးဘေးလေဟို ပေးဟွားဟူ
ဂဒိတော်တိုင်း

ကိုယ်တော်ရဲ့ စေခံ ဖြစ်ဟူ ဣသရေလလူမျိုးဟို
ကရုဏာပြဟို ကြွလာတော်မူဟယ်။

55 ကိုယ်တော်ဟာ အာဗြဟံန သူ့မျိုးနွယ် ဂူလောင်းဟို

ကရုဏာ ကျေးဇူးတော်ဟို

မြဲဒမ်းပြဟို အော့-က်မေ့တော်မူဘီး!” ဆိုဘီး ပြော
လေဟယ်။

56 မာရိဟာ ဇလိရုဗက်နတူးဒု သောင်းလနီးပါး နေဘီးမှ မိမိအီဟို ပုလန်ဟားလေဟယ်။

ဗတုတိဇယောဟန် မွီးဟိုကြာန်း

57 ဇလိရုဗက်ဟာ ဖွားခီရော-က်လာဘီး သားဂန်းဟို မွီး လေဟယ်။

58 အီဇနီးရှင်းလေန ဆွေမျိုးလေဟု သခင်ဘုရားဟာ အံ့ဩဘွယ် ကောင်းအော် ကရုဏာ ပြတော်မူကြာန်းဟို ကြားဘီးန သူးနို့ ဂူလောင်းဟာ သူနတူးဒု ဝန်းသာဂေဟယ်။

59 ရှစ်ရစ်ပုလဲဟူ ခီမာ သူးနို့ဟာ သားဂန်းရဲ့ ရေဖျား လွီးဟို လာဂေဘီးန သူးနို့ဟာ သူဖရဲ့ နာမယ်တိုင်း ဇာခရိ ဆိုဘီး နာမယ်ပေးလေဟယ်။

60 အယ်ဘေမဲ့ သူမိဟု “အယ်နာမယ် ပေးန! သူနာမယ် ဟို ယောဟန် ဆိုဘီး ပေးရမယ်” ဆိုဘီး ပြောလေဟယ်။

61 သူးနို့ဟု “ယောဟန်နာမယ်န နန်းနို့ဆွေမျိုးထဲမာ မေ့ဟု!” ဆိုဘီး သူဟို ပြောလေဟယ်။

62 အယ်ဘီးန သူးနို့ဟာ သူဖဟို လတ်ရိလတ်ခေပြဘီး သားဂန်းနာမယ်ဟို ဖယ်မျိုးပေးရဟို ဆိုဘီး မေးဟယ်။

63 ဇာခရိဟာ သန်းဖူးကီးဟို တောင်းဘီးန “သားဂန်း ဟား နာမယ်ဟာ ယောဟန် ဖြစ်ဟယ်” ဆိုဘီး ရေးပေးလိုက်ဟယ်။ သူးနို့ ဂူလောင်းဟာ အံ့ဩဟားဂေဟယ်!

64 အယ်ဒီမာဘဲ အခရိဟာ ပုလန်ဘီး စကားပြောနိုင်
ဟူးဘီးန သူဟာ ဘုရားသခင်ရဲ့ ကျေးဇူးတော်ဟို့ စဘီး
ချီးမွမ်းလေဟယ်။

65 အီဇနီးရှင်းလေ ဂူလောင်းဟာ ကြော့-က်ရွံ့မှုလေန ပု
လဲနဘီး အယ်ဖြစ်ပျစ်ဇာန ဆိုင်ဟူဒန်းလေဟို့ ယုဒပြည်
တောန်ကြားနေရာ နှံ့ပုလားမာ လူလေဟာ ပြောနေလေဟ
ယ်။

66 အယ်ဒန်းဟို့ ကြားရဟူ လူလေဂူလောင်းဟာ စိထမာ
စဉ်းစားဘီးဟာ မေးနေဇာဟု “အယ်သားဂန်းဟု ဖယ်မျိုး
သားဂန်းနူး။” သခင်ဘုရားရဲ့ တဂိုးတော်ဟာ အယ်သား
ဂန်ထတ်မာ ရှိနေကြောန် ဖြစ်ဟယ်။

အခရိရဲ့ ပရောဖက်ပြုချစ်ကြောန်း

67 ယောဟန်ရဲ့ဖ အခရိဟာ သန်ရှင်းဟူဝိညာဉ်တော်န
ပုလဲဝဘီး ပရောဖက်ပြုဟူဇာဟု။

68 “ဣသရေလလူမျိုးရဲ့ ဘုရားသခင်၊ သခင်ဘုရားဟို့ နို့
လေချီးမွမ်းဂေဇို!
ကိုယ်တော်ဟာ ကိုယ်တော်ရဲ့ လူမျိုးနားဟို့ ကြွလာ
ဘီး သူးနို့ဟို့ လွတ်မြော့-က်စေတော်မူဘီ။

69 ကိုယ်တော်ရဲ့ စေခံဒါဝိဒ်ရဲ့ မုလေးမုလစ် တယော့-က်
ဟို့၊
ကိုယ်တော်ဟာ တဂိုးကီးမားဟူ ကယ်တန်ရှင်ဟို့ နို့
လေတွပ် ပေါ်ပေါ့-က်စေဟယ်။

70 ကိုယ်တော်ဟာ ကိုယ်တော်ရဲ့ ရှေးသန့်ရှင်းဟူ ပရော
ဖက်လေ ဟုနေတဆင့် ဂဒိပေးဟူးဇာဟု

71 ကိုယ်တော်ဟာ နို့လေရဲ့ ရန်သူလတ်ဟုရော၊
နို့လေဟို့ မူးဟူသူ ဂူလောင်းရဲ့ တဂိုးဟုရော နို့လေဟို့
ကယ်တန်တော်မူလေ့မယ်။

72 ကိုယ်တော်ဟာ နို့လေရဲ့ ဘိုးဘေးလေဟို့ ကရုဏာတော်
ပြဘီးဟာ
ကိုယ်တော် ရဲ့ သန့်ရှင်း ဟူ ပဋိညာဉ် တော် ဟို့
အော့-က်မေ့ပါ ဆိုဘီး ပြောဟူးဟယ်။

73 နို့လေရဲ့ ဘိုးဘေး အာဗြဟံဟို့ လေးနတ်ဟူ ဂဒိသစ်စာ
ပြဟူးဇာဟု၊

74 ကိုယ်တော်ဟာ နို့လေရဲ့ ရန်သူလေ လတ်ထဲဟုနေ နို့
လေဟို့ ကယ်တန်ဟို့န
ကြော့-က်လန်မှုမေ့ဘဲ ကိုယ်တော့်ဟို့ စေခံဟို့ နို့လေ
ဟို့ ခွမ်ပြုမယ် ဆိုဘီး ဖြစ်ဟယ်။

75 အယ်ကြောန် နို့လေ ဟာ ကိုယ်တော့်ရှေ့တော် မာ
သန့်ရှင်းရှင်းန ပြောန့်မတ်ရှင်းဟို့
တသတ်လောင်းရဟယ်။

76 “သားဂန်းဟူး၊ နန့်ဟို့လည်း ဗြစ်ဆောင်းဖြစ်ဟူ ပရော
ဖက်ဆိုဘီး ခေါ်ဇာဟို့ ခံရလေ့မယ်။

နန်ဟာ သခင်ဘုရားရဲ့ လမ်းဟို့ ပြင်ဆင်ဟို့
ရှေ့တော်ပုလေး သွားရလေ့ဘီး၊

77 ကိုယ်တော်ရဲ့ လူလေဟို သူးနို့ရဲ့ ပြစ်လေ ဖြေလွှတ်ပေး
ဇာခံရကြောနဲ့

ကယ်တန်ခံရလေ့မယ် ဆိုဘီး ပြောလေ့မယ်။

78 နို့လေရဲ့ ဘုရားသခင်ဟာ သနားကြင်နာမှုနဲ့ ကရုဏာ
တော် ဖြစ်ဟူကြောနဲ့

ကိုယ်တော်ဟာ ကယ်တန်မူရဲ့ မိုးလန်းဇေယျာ နို့လေထတ်
မာ သတ်ရော့-က်စောဘီး

79 မှောန်မိုက်န သေမန်းရဲ့ ရိတ်မာ ရှိနေဟူ လူလေ ဂူ
လောင်းထတ်မာ ကောင်းဂန်ဟုနေ လန်းရောန်ထွန်း
လန်းဟို့န၊

ငြိသတ်ရှင်းလမ်းထဲမာ နို့လေရဲ့ ခေလှမ်းလေဟို့ ပြ
ဟို့ဖြစ်ဟယ်” ဆိုဘီး ဘုရားသခင်ရဲ့ စကားတော်
ဟို့ ပြောလေဟယ်။

80 အယ်သားဂန်းဟာ ကီးဒတ်လာဘီး ခန္ဓာန ဝိညာဉ်
လည်း အားကီးလာဟယ်။ သူဟာ ဣသရေလ လူမျိုးလေ
ရဲ့ ရှေ့မာ ထန်းထန်ရှားရှား ပေါ်လာခန့်ဒူးဟု ဆိုဟာ တော
ကန္တရထဲမာ နေလေဟယ်။

2

ယေရှုမိုးဖွားဟူကြောနဲ့

(မသံ ၁.၁၈-၂၅)

1 အယ်ခီမာ ကဲသာမန်းဂီး ဩဂုတုတုဟာ ရောမအင်
ပါယာ တခုလောင်းဟို့ သန်းဂေါန်စာရင်း ကော့-က်စောဟို့
မိန့်ပေးလိုက်ဟယ်။

2 ကုရေနီဟာ ရှုရိပြည်မှာ မြို့ဝန်ဖြစ်ခီမာ အယ်သန်းဂေါန်စာရင်း ကော့-က်ဇာဟာ ဦးဆောင်း ဖြစ်ဟယ်။

3 အယ်ဘီးန လူတိုင်းဟာ ကိုယ်တိုင် သန်းဂေါန်စာရင်းဝမ်ဟို့ သူးနို့ရဲ့ ဇာတိမြို့ဟို့ သွားဂေ့ဟယ်။

4 ယောသပ်ဟာ ဂါလိလဲပြည် နာဇရက်မြို့ဟုနေ ဒါဝိဒ်မန်းရဲ့ ရှစ်မှလောက်နေရာဖြစ်ဟူ ယုဒပြည် ဗက်လင်မြို့ဟို့ သွားဟယ်။ ယောသပ်ဟာ ဒါဝိဒ်ရဲ့ မှလေးမှလစ်ဖြစ်ကြောန့် အယ်နေရာဟို့ သွားရဟယ်။

5 သူဟာ လတ်ထပ်ဟို့ စေ့စပ်ဟူးဟူ မာရိနတူးဒူ သန်းဂေါန်စာရင်းဝမ်ဟို့ သွားဟူ ခီမာ မာရိဟာ ဝန်းရှင်မ ဖြစ်နေဘီး၊

6 သူးနို့ဟာ ဗက်လင်မြို့ မာ ရှိနေဒူးမာ သားမွီးခီ ရော့-က်လာဟယ်။

7 သူဟာ သားဦးဟို့ မွီးဘီး ဝတ်န ပတ်ဘီးဟာ တည်းခိုဟူ နေရာမာ သူးနို့တွပ် ခန်းမွေ့ဘဲကြောန့် သားဂန်းဟူးဟို့ နွားစားခွပ်ထဲမာ အိခိုင်းဟူးဟယ်။

သိုးထီးမားလေန ကောန်းဂန်တမန်လေကြောန်း

8 အယ်ရပ်ဟု သိုးထီးမားတချို့ဟာ တညဉ်လောင်း ကွမ်းပုလန်မာနေဘီး၊ သူးနို့ရဲ့ သိုးလေဟို့ ကေ့ရှုဟယ်။

9 သခင်ဘုရားရဲ့ ကောန်းဂန်တမန်ဟာ သူးနို့နားမာ ပေါ်လာဘီး ဘုရားသခင်ရဲ့ ဖောင်းသရေတော်ဟာ သူးနို့ထတ် မာ လန်းထီလာဟယ်။ သူးနို့ဟာ ရရာတိုင်းကြော့-က်လန်ဟူးဟယ်။

10 အယ်ဘေမဲ့ ကောန်းဂန်တမန်ဟာ သူးနို့ဟို ပြောလိုက်
ဇာဟု၊ “ကြော့-က်ဂေန်၊ ငါဟာ လူမျိုးအားလောင်းတွပ်
ရရာတိုင်း ဝန်းသာဇာ ဒန်းကောန်းဟို သယ်ဆောင်လာဟု
ယ်။

11 အယ်နေမာ ဒါဝိဒ်မြို့နှိုက် သခင်ခရစ်တော် ဆိုဘီး
နန်းနို့ရဲ့ ကယ်တန်ရှင်ဟို မွီးလေဘီ!

12 နန်းနို့ဟာ ဖယ်မျိုးသတ်သေန သိရဟို ဆိုဟာ သားဂ
န်းဟားဟို ဝတ်စန ပတ်ဘီး နွားစားခွပ်ထဲမာ အိခိုင်းဟား
ဇာဟို တို့လေ့မယ်။”

13 ရောက်တရစ် ကောန်းဂန်ဘောင်ရဲ့ ကောန်းဂန်တမန်
နတူးဒ ကောန်းဂန်ဗိုလ်ခေ ဘောင်ဂီးဟာ ရှစ်ရှင်းထန်ရှား
ဘီး ဘုရားသခင်ဟို

14 “မြင့်ဆောင်းကောန်းဂန်မာ ဘုရားသခင်ဟာ ဖောင်း
သရေတော်ရှိဘီး၊

မှလေဂီးမာ ကိုယ်တော်မြတ်နိုးဟူ လူလေဟာ ငြိ
သတ်မှုရှိပါစေ!” ဆိုဘီး ချီးမွမ်းချင်းဟို ဆိုဂေ
ဟယ်။

15 ကောန်းဂန်တမန်လေဟာ သူးနို့နားဟုနေ ကောန်းဂန်
ဘောင်ဟို ပုလန်ဟားခီမာ သိုးထီးမားလေဟာ ယော့-က်
နယော့-က် “ဗက်လင်မြို့ဟို သွားဘီး ဘုရားသခင်ဟာ နို့
လေဟို ပြောပြဟူ ကြောန်းရာလေဟို ကေ့ကေ့ရအောက်”
ဆိုဘီး ပြောလေဟယ်။

16 အယ်ကြောန် သူးနို့ဟာ မြန်းမြန်ဟားသွားဘီးန မာရိ

န ယောသပ်ဟို့ရော၊ နွားစားခွပ်ထဲမှာ အိနေဟူ သားဂန်း
ဟွားဟို့ရော တို့ရဟယ်။

17 သိုးထီးမားလေဟာ သားဂန်းဟွားဟို့ တို့ဟူ ခီမာ သူး
နို့ဟို့ ကောန်းဂန်တမန်ဟု သားဂန်းဟွားကြောင်းဟို့ ဖယ်
မျိုးပြောဟွားဟယ် ဆိုဇာဟို့ သူးနို့ဟို့ ပြောပြဟယ်။

18 သိုးထီးမားလေပြောဟူ စကားဟို့ ကြားဟူလူလေ ဂူ
လောင်းဟာ အံ့ဩဟွားဂေဟယ်။

19 မာရိဟာ ကြောင်းရာလေ ဂူလောင်းဟို့ အော့-က်မေ့
လာဘီး အယ်စကားလေဟို့ လေးလေးနတ်နတ် စိတ်မာ
ဆင်ခြင်နေလေဟယ်။

20 သိုးထီးမားလေဟာ သူးနို့ဟို့ ကောန်းဂန်တမန် ပြော
ဟွားတိုင်း သူးနို့မြင်ရ ကြားရဇာလေ ဂူလောင်းတွပ်
ဘုရားသခင်ဟို့ ချီးမွမ်းချင်းဆိုဘီး ပုလန်ဟွားဂေဟယ်။

ယေရှု ဆိုဘီး နာမယ်ပေးဟူကြောင်း

21 တဘတ်ကြားဘီးန သားဂန်းဟွားတွပ် ရေဖျားလှီး
ပေးရဟို့ ခီရော့-က်လာဘီး ဗိုက်မေ့ခန်ဟု ကောန်းဂန်
တမန် ပေးဟွားဟူတိုင်း သူးဟို့ ယေရှုနာမယ်ဖြစ် မှည့်ခေါ်
ဂေဟယ်။

ယေရှုဟို့ ဗိမာန်တော်မှာ ဆစ်ကပ်ကြောင်း

22 မောရှေရဲ့ ပညတ်တရားတိုင်း ယောသပ်န မာရိ
တွပ် စင်ကြယ်မှု ခမ်းနားလောက်ဟို့ ခီရော့-က်လာဟယ်။

အယ်ကြောန့် သူးနို့ဟာ သားဂန်းဟားဟို ဘုရားသခင်နား
မာ ဆစ်ကပ်ဟို့ ယေရုရှလင်မြို့ဟို့ ခေါ်ဟားဘီး၊

23 ဘုရားသခင်ရဲ့ ပညတ်တရားထဲမာ “သားဦးတိုင်း
ဟာ ဘုရားသခင်ဟို့ သန်ရှင်းရမယ်” ဆိုဘီး ရေးဟားလေ
ဟယ်။

24 ခိုငှတ်ဟားနွေ့ကောန် အယ်မျိုးမူဘဲနေဟာ ချိုးငှ
တ်ဟားနွေ့ကောန်ဟို့ ပူဇော်ရမယ် ဆိုဘီး ဘုရားသခင်ရဲ့
ပညတ်တရားတိုင်း ပူဇော်ဟို့ သူးနို့လည်း သွားလေဟယ်။

25 အယ်ခီမာ ယေရုရှလင်မြို့မာနေဟူ ရှုမောင်နာမယ်
ရှိဟူ လူတယော့-က်ရှိဟယ်။ သူဟာ ဖြောင့်မတ်ဟူလူ၊
ဘုရားသခင်ဟို့ ကြော့-က်ဟူလူန ကူသရေလလူမျိုးဟို့
ကူညီဟို့တွပ် စောန်နေဟူ လူဖြစ်ဟယ်။ သန်ရှင်းဟူဝိညာဉ်
တော်ဟာ သူနတူးဒုရှိဘီး

26 သူဟာ ဘုရားသခင်ရဲ့ ဂဒိပေးဟားဟူ မေရှိယဟို့
သူမြင်လိုက်ရဘဲန သေရလေ့ဟို့ မူဟာ ဆိုဘီး သန်ရှင်းဟူ
ဝိညာဉ်တော်ဟာ သူဟို့ ဖွမ်ပြဟားဟယ်။

27 ဘုရားသခင်ရဲ့ ဝိညာဉ်တော်အားဖြင့် ရှုမောင်ဟာ
ဗိမာန်တော်ထဲဟို့ ဝမ်ဟားဟယ်။ မိဖလေဟာ ပညတ်
တရားတိုင်း သူတွပ်လောက်ဟို့ သားဂန်းဟား ယေရုဟို့
ဗိမာန်တော်ထဲဟို့ ခေါ်ဟားခီမာ

28 ရှုမောင်ဟာ သားဂန်းဟားဟို့ သူရဲ့ လတ်ထဲမာယူ
ဘီး၊ ဘုရားသခင်ဟို့ ချီးမွမ်းဘီး၊

29 “ဘုရားသခင်၊ ကိုယ်တော်ရဲ့ စကားတော်ဟာ ပုလဲဇော

င်ဟူးဘီ။

ခု ကိုယ်တော်ဟာ ကိုယ်တော်ရဲ့ ကျွန်တို့ ငြိသတ်မှုထဲ
သွားခွင့်ပေးလေဘီ။

30 ကိုယ်တော်ရဲ့ ကယ်တန်ရှင်းတို့ ကျွန်တော်ရဲ့ မျစ်စိန် ဗြ
င်ရပီးဘီ။

31 ကိုယ်တော်ဟာ အယ်ကယ်တန်ရှင်းတို့ လူမျိုးဂူ
လောင်းရဲ့ ရှေ့မှာ ပြင်ဆင်ဟူးပီးဘီ။

32 ကိုယ်တော်ရဲ့ လိုတော်ဟာ လူမျိုးခြားလေတို့ လန်းဖွယ်
ပြဘီး
ကိုယ်တော် ရဲ့ လူမျိုး ဖြစ် ဟူ က္လသရေလနား တို့
ဖောင်းသရေတော်တို့ ယူလာဟယ်” ဆိုဘီး ပြော
လေဟယ်။

33 သားဂန်းဟူးရဲ့ မိန ဖဟာ သားဂန်းကြောင်းလေတို့
ရှုမောင် ပြောလိုက်ဟူ ခီမာ အံ့ဩဟူးဂေဟယ်။

34 ရှုမောင်ဟာ သူးနို့တို့ ကောင်းဂျီးပေးဘီးန သူးရဲ့မိ မာ
ရီတို့ “အယ်သားဂန်းဟူးဟာ က္လသရေလလူမျိုး ဘောင်
ဂီးတို့ လဲကုလဟို့န ထမြေ့-က်တို့တွပ် ဘုရားသခင် ဝီး
ကော့-က်ဟူးဇာ ဖြစ်ဟယ်။ သူဟာ ဘုရားသခင်နားဟု
နိမိတ်လတ်ခဏာ တခုဖြစ်ဘီး လူဘောင်ဂီးဟာ ဆန့်ကျင်
ပြောလေ့မယ်

35 အယ်ကြောန့် သူးနို့ရဲ့ လျှို့ဝှပ်ဟူးဟူ ကြံစည်လေ
တို့ ဖွယ်ပြလေ့မယ်။ ဝန်းနဲမှုဟာ ထတ်ဟူ သန်လျက်မျိုးဘဲ

နန်းရဲ့ စိန်လောင်းဟို့ ထိုးဖော့-က်လေ့မယ်” ဆိုဘီး ပြောလေဟယ်။

36 အယ်နေရာမာ အာရှာမျိုးဖြစ်ဟူ ဖနွေလရဲ့မီး၊ အနနနာမယ်ရှိဘီး သတ်ကီးဟူ ပရောဖက်မ တယော့-က် ရှိဟယ်။ သူဟာ ပျိုရွယ်ဟူ ခီဟုစဘီး လန်နတူးဒ ခွန်နစ်နှစ်ဘဲ ပေါင်းသန်းရဘီး

37 ခု သတ် ၈၄ နှစ်ရွယ် မောက်ဆိုးမ ဖြစ်ဟွားဘီ။* သူဟာ ဗိမာန်တော်ဟုနေ လောင်းဝ ခွာဘဲန သူဟာ ဆုတောင်းရှင်းန စာရှောန်ရှင်းအားဖြင့် နေ့ညဉ့်မပြတ် ဘုရားသခင်ဟို့ ကိုးကွယ်လေဟယ်။

38 အယ်ခီနာရီမာဘဲ သူဟာ ရော့-က်လာဘီးန ဘုရားသခင်ဟို့ ချီးမွမ်းဘီးဟာ ယေရုရှလင်မြို့ လွတ်မြော့-က်ဟို့တွပ် ဘုရားသခင်ဟို့ စောန်နေဟူ လူလေဂူလောင်းဟို့ သားဂန်းဟွားကြောန်း ပြောလိုက်ဟယ်။

နာဇရက်မြို့ဟို့ ပုလန်ဟူကြောန်း

39 ယောသပ်န မာရီဟာ ဘုရားသခင်ရဲ့ ပညတ်တရားတိုင်း ဂူလောင်း လောက်ပီးဟွားဟူ ခီမာ သူးနှိဟာ သူးနှိရဲ့ မွီးရပ်မှလေဖြစ်ဟူ ဂါလိလဲပြည် နာဇရက်မြို့ဟို့ ပုလန်ဟွားဟယ်။

* 2:37 **၂-၃၇** ခု သတ် ၈၄ နှစ်ရွယ် မောက်ဆိုးမ ဖြစ်ဟွားဘီ၊ အယ်မျိုးမှုဘဲနေဟာ မောက်ဆိုးမဖြစ်ဟွားဇာ ၈၄ နှစ် ရှိဟွားဘီ။ 2:39 **၂-၃၉** မ ၂-၂၃

40 အယ်သားဂန်းဟူးဟာ ကီးဒတ်လာဘီး သန်မာလာဟယ်။ သူဟာ ဉာဏ်ပညာပုလုံလာဘီးန ဘုရားသခင်ရဲ့ ကျေးဇူးတော်ဟာ သူ့ထတ်မာ ရှိနေဟယ်။

ဗိမာန်တော်ထဲဟု ကောန်သားဟူး ယေရှုကြောန်း

41 ယေရှုရဲ့ မိဖလေဟာ နှစ်စဉ်နှစ်တိုင်း ပသခါပွဲတော်တွပ် ယေရုရှလင်မြို့ဟို့ သွားဂေ့ဟယ်။

42 ယေရှုဟာ သတ်ဆယ့်နှေ့နှစ် ရှေး-က်လာဟူ ခီမာ သူးနို့ဟာ ရင်းရင်ဒူးဟု သွားနေမျိုးဘဲ ပွဲတော်ဟို့ သွားဂေ့ဟယ်။

43 ပွဲတော်ပီးဟူးဟူ ခီမာ သူးနို့ဟာ အီဟို့ ပုလန်ဂေ့ဟယ်။ အယ်ဘေမဲ ကောန်သားယေရှုဟာ ယေရုရှလင်မြို့မာ နေရစ်ဟယ်။ အယ်မျိုး နေရစ်ဇာဟို့ သူ့မိဖလေ သိဂေ့ဟု။

44 သူဟာ အောက်စုနတူးဒု ရှိဟယ် ဆိုဘီး သူးနို့ထန်ကြောန့် သူးနို့ဟာ တနေ့လောင်း ခရီးသွားဘီးန သူးနို့ရဲ့ ဆွေမျိုးလေန ငယ်ဂျင်းလေကြားထဲမာ သူ့ဟို့ လိုက်ရှာဂေ့ဟယ်။

45 သူးနို့ဟာ သူ့ဟို့ ရှာတို့ဂေ့ဟု။ အယ်ကြောန့် သူးနို့ဟာ သူ့ဟို့ ရှာဟို့တွပ် ယေရုရှလင်မြို့ဟို့ ပုလန်သွားလိုက်ရဟယ်။

46 တတိယနေ့မာ သူးနို့ဟာ သူ့ဟို့ ဗိမာန်တော်ထဲမာ တို့ဟူးဘီး၊ ယုဒဆရာလေနတူးဒု ထိုင်ဘီး၊ သူးနို့ပြောဇာဟို့ နားထောန်ဘီး မေးခွန်းလေ မေးနေဟယ်။

47 သူ့စကားကို ကြားဟူ လူလေဂူလောင်းဟာ သူ့ရဲ့ ထတ်မြတ်ဟူ ဖြေဟူ အံ့ဩဂေဟယ်။

48 သူ့ရဲ့ မိဖလေဟာ သူ့ကို တို့လိုက်ဟူ ခီမာ အံ့ဩဟား ဘီး သူ့မိဟာ “ဖစ၊ နန့်ဟု ဖြားဖြစ်ကြောန့် နို့လေဟူ အယ် မျိုးလောက်ရနူး။ နန့်ဖန့် ငါဟာ ရရာတိုင်း စိပူဘီး နန့်ဟူ လိုက်ရှာနေဟယ်” ဆိုဘီး သူ့ကို ပြောလေဟယ်။

49 ကောန်သားဟားဟု “ဖြားဖြစ်ကြောန့် နို့မိဟု နို့ဟူ လိုက်ရှာနေရနူး။ နို့ဟု နို့ဖရဲ့ အီမာရှိနေဇာဟူ နို့မိ သိဟု လော။” ဆိုဘီး သူးနို့ဟူ ပုလန်ပြောလေဟယ်။

50 အယ်ဘေမဲ့ သူးနို့ဟာ ကောန်သားဟားရဲ့ စကားကို နားလည်ဂေဟူ။

51 အယ်ကြောန့် ယေရှုဟာ သူးနို့တူးဒု နာဇရက်မြို့ဟူ ပုလန်လိုက်ဟားဘီး အယ်နေရာမာ သူဟာ သူးနို့စကား ဟူ နားထောန်ဘီးနေဟယ်။ ကောန်သားဟားရဲ့ မိခင်ဟာ အယ်ဖြစ်ပျစ်ဇာလေ ဂူလောင်းဟူ စိန့်လောင်းထဲမာ သီး ဟားဟယ်။

52 ယေ ရှု ဟာ ကာယ ညာ ဏ ကီး ဒ တ် လာ ဘီး ဘုရားသခင်ရှေ့န လူလေရှေ့မာ မျစ်နှာသာရလေဟယ်။

3

ဗတုတိဇယောဟန် တရားဟောဟူကြောန်း

(မသဲ ၃.၁-၁၂; မာကု ၁.၁-၈; ယောဟန် ၁.၁၉-၂၈)

1 ကဲသာမန်းဂီး တိဗေရီ အောက်စိုးဇာဟာ ဆယ့်ငါးနှစ် မြေ-က်ဟူ ခီမာ ယုဒပြည်ဟူ အောက်ချောက်ဟူ လူဟာ

ပုန့်တိပိလတ်၊ ဂါလိလဲပြည်ဟို့ အောက်ချောက်ဟူ လူဟာ
ဟေရုဒ်၊ ဣတုရဲပြည်န တရာခေါနိပြည်လေဟို့ အောက်
ချောက်ဟူ လူဟာ ဟေရုဒ်ရဲနောန် ဖိလိပ္ပု၊ အဘိလင်ပြ
ည်ဟို့ အောက်ချောက်ဟူ လူဟာ လုသာနိန၊

² အနန၊ ကယာဖ လေဟာ ယဇ်ပုရောဟိတ်ဂီးလေ ဖြ
စ်ဟယ်။ အယ်ခီမာ တောကန္တရထဲမာရ်ဟူ အခရိရဲသား
ယောဟန်နားဟို့ ဘုရားသခင်ရဲ စကားတော် ရော့-က်လာ
ဟယ်။

³ အယ် ကြော နဲ့ ယောဟန် ဟာ ယော်ဒန်မှ လစ်ရဲ
ပတ်ဝန်းကျင် တခုလောင်းသွားဘီး “နောန်ဒရဘီး ဗတု
တိဇိခဲဂေ။ ဘုရားသခင်ဟာ နန်းနို့ရဲ ပြစ်လေဟို့ ခွမ်လွတ်
လေ့မယ်” ဆိုဘီး ကြေညာဟယ်။

⁴ ပရောဖက်ဟေရှာယရဲ့ ကျမ်းထဲမာ၊
“လူတယော့-က်ဟာ တောကန္တရထဲမာ အော်ဘီးပြောနေ
အဟုံ
‘ဘုရားသခင်ရဲ လမ်းဟို့ ပြင်ဆင်ဟားဂေ၊
ကိုယ်တော်ကြွဟို့တွပ် လမ်းဟို့ ဖုလောန်အောန်လော
က်ဂေ၊

⁵ ချိုင့်ဝှမ်းလေ ဂူလောင်းဟို့ ဖုလဲဘီး၊
တောန်ဂီးတောန်ငယ် ဂူလောင်းဟို့ ဖြိုခုလရမယ်။
လမ်းကော့-က်လေဟို့ ဖုလောန်အောန်လောက်ဘီးန၊
လမ်းကြမ်းလေဟို့ ချောအောန်လောက်ရမယ်။

⁶ လူသားမျိုးနွယ်စု တခုလောင်းဟာ ဘုရားသခင်ရဲ ကယ်

တန်တော်မူရှင်းဟို့ မြင်ရလေ့မယ်!” ဆိုဘီး ရေးဟူးဟယ်။

7 ယောဟန်ဟာ သူနားဟို့ ဗတုတိဇံခံဟို့ ရော့-က်လာဟူ လူအောက်ဂီးဟို့ “ဝေ့ မွဲဗွေးမျိုးလေ! ကုလရော့-က်လာမယ့် ဘေးဒန်ဟု လွတ်ဟို့တွပ် နန်းနို့လေဟို့ ဖယ်သူဟု ဒီပေးလိုက်နူး။

8 နောက်ဒန် ထိုက်တန်ဟူ ကျင့်ဟို့ ကျင့်ဂေ့။ အာဗြဟံဟု နို့လေရဲ့ ဖဖြစ်ဟယ် ဆိုဘီး ပြောရောင်န နန်းနို့လေ ပြစ်ဒန်ဟု လွတ်လေ့မယ် ဆိုဘီး ထန်ဂေ့န။ နန်းနို့ဟို့ ငါပြောမယ် ဘုရားသခင်ဟာ အယ်ကုလော့-က်ခဲလေဟုနေဘီး အာဗြဟံရဲ့ မလေးမလစ်လေဟို့ ဖန်ဆင်းနိုင်ဟယ်!

9 သစ်ပန်လေရဲ့ ပြစ်လေနားမာ ကတ်ပထားဟူးကြောနို့ သီးကောန်းဟို့ သီးဘဲဟူ သစ်ပန်တိုင်းဟို့ ခွတ်ပစ်ဘီးဟာ မီးထဲဟို့ ပစ်ခွလလေ့မယ်” ဆိုဘီး ပြောလေဟယ်။

10 လူလေဟာ “အယ်ဆိုဟာ နို့လေဟု ဖြားဇာလေလောက်ရနူး။” ဆိုဘီး သူဟို့ မေးဂေ့ဟယ်။

11 သူဟု “ဖယ်လူဘဲဖြစ်ဖြစ် အန်းဂီနွေထည်ရှိဟယ် ဆိုဟာ အန်းဂီမော့ဘဲဟူ လူဟို့ တထည်ပေးရမယ်။ ဖယ်လူဘဲဖြစ်ဖြစ် စားဇာရှိဟယ် ဆိုဟာ အယ်စားဇာဟို့ ဝီပေးရမယ်” ဆိုဘီး ပြောလေဟယ်။

12 ခွန်ကော့-က်မားလေ တချို့ဟာ ဗတုတိဇံခံဟို့ လာဘီးန သူးနို့ဟာ “ဆရာ၊ ကျွန်တော့်ဟူးလေဟု ဖြားဇာ

လောက်ရမယ်နူး။” ဆိုဘီး သူ့ဟို မေးဂေဟယ်။

¹³ သူဟု “ဥပဒေဟု သတ်မှတ်ဟူးဇာထတ် ပိုဘီး ခွန်ဟို ကော့-က်ဂေန်” ဆိုဘီး သူးနို့ဟို ပြောလေဟယ်။

¹⁴ စစ်သားတချို့ဟုလည်း “ကျွန်တော့်ဟူးလေတွပ် ဟုမား။ ကျွန်တော်ဟူးလေဟု ဖြားဇာလောက်ရနူး။” ဆိုဘီး သူ့ဟို မေးဂေဟယ်။

“ဖယ်လူဟိုလည်း မှုဘဲန စွပ်စွဲဂေန်၊ ဖယ်လူနားဟုဘဲ ဖြစ်ဖြစ် နိုင်ကျင့်ဘီး ကပ်ဟို ယူဂေန်။ နန်းနို့ရဲ့ လစာနဘဲ ရောန့်ရဲဂေ” ဆိုဘီး သူးနို့ဟို ပြောလေဟယ်။

¹⁵ လူလေရဲ့ မျှော်လင့်ချစ်လေ ဗြင့်လာဘီး ယောဟန်ဟု မေရှိယ ဖြစ်နိုင်ဟယ် ဆိုဘီး သူးနို့ နှလောင်းထဲမာ အံ့ဩလာဂေဟယ်။

¹⁶ အယ်ကြောန့် ယောဟန်ဟု “ငါဟု နန်းနို့ဟို ရေနဗတုတိဇိပေးဟယ်။ အယ်ဘေမဲ့ ငါ့ထတ် ရရာတိုင်း ကီး မြတ်ဟူလူဟု လာနေဘီ။ ငါဟု အယ်လူရဲ့ ခေနပ်ကြိုးဟို ဖြေဟို့ဟို့မှ ထိုက်ဟု။ အယ်သူဟု သန်ရှင်းဟူဝိညာဉ်တော်န၊ မီးန နန်းနို့ဟို ဗတုတိဇိပေးလေ့မယ်။

¹⁷ လတ်ထဲမာ ဂေါဟို ကိုင်ဟူးဘီး သူ့ဗားလန်းပုလန်ဟို ရှင်းလန်းစေဘီး ဗားလေဟို ဗားဂတ်ထဲဟို ထဲဘီးဟု ဗားဖျင်းလေဟို သေနိုင်ဘဲဟူမီးန ရှို့လေ့မယ်” ဆိုဘီး သူးနို့ဟို ပြောလေဟယ်။

¹⁸ ယောဟန်ဟု နည်းလမ်းဘောင်းဇောင်န လူလေဟို ဒန်းကောင်းဟောဘီး သူးနို့ရဲ့ နည်းလမ်းလေ ပုလောင်း

ဟူးဟို့ သူးနို့ဟို့ တိုက်တွန်းလေဟယ်။

19 ဟေရုဒ်ဟာ သူ့နောက်ရဲ့ မီးမ ဟေရောဒိန ပတ်သတ်
ဇာတိရော၊ သူ့ကိုယ်တိုင် ကျူးလွန်ဟူးဟူ ကောင်းဘဲဟူမှု
လေ ဇာတိရော ယောဟန်ဟု သူ့ဟို့ ဆောင်းမဟူးဟယ်။

20 အယ်မျိုး ဆောင်းမလိုက်ကြောန့် ဟေရုဒ်ဟာ ယော
ဟန်ဟို့ ထောန်ထဲမာ လောန်ဟူးလိုက်ဟယ်။ အယ်မျိုး
လောက်ရှင်းအားဖြင့် ပိုဘီး ဆိုးဝါးဟူ ပြစ်ဟို့ ထပ်လောက်
လိုက်ဟယ်။

ယေရှု ဗတုတိဇံ ခံဟူကြောန်း

(မသံ ၃.၁၃-၁၇; မာကု ၁.၉-၁၁)

21 လူလေ ဂူလောင်းဟာ ဗတုတိဇံခံဂေဘီးန ယေရှု
လည်း ဗတုတိဇံခံတော်မူဟယ်။ ကိုယ်တော်ဟာ ဆုတော
န်းနေဟူ ခီမာ ကောင်းဂန်ဘောင် ပွမ့်ဟူးဘီး

22 သန့်ရှင်းဟူဝိညာဉ်တော်ဟာ ချိုးငှတ်မျိုး ခန္ဓာန
ကိုယ်တော်ထတ်ဟို့ ဆင်းလာဟယ်။ အယ်ဘီးန ကောင်း
ဂန်ဘောင်ဟုနေ “အယ်သူဟာ ငါနှစ်သက်မြတ်နိုးဟူ ငါ့ရဲ့
ရှစ်ဟူသား ဖြစ်ဟယ်” ဆိုဘီး သံတော်ထွပ်လာဟယ်။

ယေရှုရဲ့ ဘိုးဘေးလေကြောန်း

(မသံ ၁.၁-၁၇)

23 ယေရှုဟာ မူတော်မြတ်ဟို့ စဘီး လောက်ဟူ ခီမာ
ကိုယ်တော်ဟာ သတ်တော်သောင်းဆယ်လော့-က်ဘဲ့ ရှိဟု

ယ်။ အယ်ကြောန့် လူလေထန်ဇာဟု ကိုယ်တော်ဟု ယော
သပ်ရဲ့သား၊ ယောသပ်ဟု ဇေလိရဲ့သား၊

24 ဇေလိဟု မဿတ်ရဲ့သား၊ မဿတ်ဟု လေဝိရဲ့သား၊
လေဝိဟု မေလခိရဲ့သား၊ မေလခိဟု ယနနရဲ့သား၊ ယန
နဟု ယောသပ်ရဲ့သား၊

25 ယောသပ်ဟု မတ္တသိရဲ့သား၊ မတ္တသိဟု အာမုတ်ရဲ့
သား၊ အာမုတ်ဟု နာဟုံရဲ့သား၊ နာဟုံဟု ဒေလိရဲ့သား၊
ဒေလိဟု နဂုဂဲရဲ့သား၊ နဂုဂဲဟု မာအတ်ရဲ့သား၊

26 မာအတ်ဟု မတ္တသိရဲ့သား၊ မတ္တသိဟု ရှေမိရဲ့သား၊
ရှေမိဟု ယောသပ်ရဲ့သား၊ ယောသပ်ဟု ယုဒရဲ့သား၊ ယု
ဒဟု ယောဟနနရဲ့သား၊

27 ယောဟနနဟု ရေသရဲ့သား၊ ရေသဟု ဇေရုဗဗေ
လရဲ့သား၊ ဇေရုဗဗေလဟု ရှာလသေလရဲ့သား၊ ရှာလ
သေလဟု နေရိရဲ့သား၊

28 နေရိဟု မေလခိရဲ့သား၊ မေလခိဟု အဒုဒိရဲ့သား၊
အဒုဒိဟု ကောသံရဲ့သား၊ ကောသံဟု ဇေလမောဒိရဲ့သား၊
ဇေလမောဒိဟု ဧရရဲ့သား၊

29 ဧရဟု ယောရှုရဲ့သား၊ ယောရှုဟု ဇလျဇာရဲ့သား၊
ဇလျဇာဟု ယောရိမ်ရဲ့သား၊ ယောရိမ်ဟု မဿတ်ရဲ့
သား၊ မဿတ်ဟု လေဝိရဲ့သား၊

30 လေဝိဟု ရှိမောင်ရဲ့သား၊ ရှိမောင်ဟု ယုဒရဲ့သား၊
ယုဒဟု ယောသပ်ရဲ့သား၊ ယောသပ်ဟု ယောနန်ရဲ့သား၊
ယောနန်ဟု ဇလျာကိမ်ရဲ့သား၊

31 ဧလျာကိမ်ဟာ မေလေရဲ့သား၊ မေလေဟာ မဲနန်ရဲ့သား၊ မဲနန်ဟာ မတ္တသရဲ့သား၊ မတ္တသဟာ နာသန်ရဲ့သား၊ နာသန်ဟာ ဒါဝိဒ်ရဲ့သား၊

32 ဒါဝိဒ်ဟာ ယေရှဲ့ရဲ့သား၊ ယေရှဲ့ဟာ သြဗက်ရဲ့သား၊ သြဗက်ဟာ ဗောဇရဲ့သား၊ ဗောဇဟာ စာလမုန်ရဲ့သား၊ စာလမုန်ဟာ နာရှန်ရဲ့သား၊

33 နာရှန်ဟာ အမိနဒပ်ရဲ့သား၊ အမိနဒပ်ဟာ အဒိမိန်ရဲ့သား၊ အဒိမိန်ဟာ အာရ်နိရဲ့သား၊ အာရ်နိဟာ ဟေဇရုံရဲ့သား၊ ဟေဇရုံဟာ ဖာရက်ရဲ့သား၊ ဖာရက်ဟာ ယုဒရဲ့သား၊

34 ယုဒဟာ ယာကုပ်ရဲ့သား၊ ယာကုပ်ဟာ က္လဇက်ရဲ့သား၊ က္လဇက်ဟာ အာဗြဟံရဲ့သား၊ အာဗြဟံဟာ တေရရဲ့သား၊ တေရဟာ နာခေါရဲ့သား၊

35 နာခေါဟာ စေရောက်ရဲ့သား၊ စေရောက်ဟာ ရာဂေါရဲ့သား၊ ရာဂေါဟာ ဖာလက်ရဲ့သား၊ ဖာလက်ဟာ ဟေဗာရဲ့သား၊ ဟေဗာဟာ ရှာလရဲ့သား၊

36 ရှာလဟာ ကာကုန်ရဲ့သား၊ ကာကုန်ဟာ အာဖာဒ်ရဲ့သား၊ အာဖာဒ်ဟာ ရှေမရဲ့သား၊ ရှေမဟာ နောဇရဲ့သား၊ နောဇဟာ လာမက်ရဲ့သား၊

37 လာမက်ဟာ မသုရှလရဲ့သား၊ မသုရှလဟာ ဧနောက်ရဲ့သား၊ ဧနောက်ဟာ ယာရက်ရဲ့သား၊ ယာရက်ဟာ မဟာလေလရဲ့သား၊ မဟာလေလဟာ ကာကုန်ရဲ့သား၊

38 ကာကုန်ဟာ ဇနုတ်ရဲ့သား၊ ဇနုတ်ဟာ ရှေသရဲ့သား၊ ရှေသဟာ အာဒိရဲ့သား၊ အာဒိဟာ ဘုရားသခင်ရဲ့သားဖြစ်

စ်ဟယ်။

4

ယေရှုဟို သွီးဆောန်ဟူကြောင်း

(မဿဲ ၄.၁-၁၁; မာကု ၁.၁၂-၁၃)

¹ ယေရှုဟာ သန်ရှင်းဟူဝိညာဉ်တော်န ပုလဲဝဘီး ယော်
ဒန်မုလစ်နားဟုနေ ပုလန်လာဘီးန ကိုယ်တော်ဟာ ဝိညာဉ်
တော်အားဖြင့် တောကန္တရယ်ဟို ပို့ဆောန်ရှင်းဟို ခံတော်မူ
ဘီး၊

² အယ်နေရာမာ ကိုယ်တော်ဟာ ရစ်လေးဆယ် လောင်း
လောင်း နေဘီး မာရ်နတ်ရဲ့ သွီးဆောန်ရှင်းဟို ခံရဟု
ယ်။ အယ်နေရစ်လေးမာ ကိုယ်တော်ဟာ ဖြားလည်းစား
ဘဲကြောနဲ့ အယ်နေရစ်လေး ပီးဆောင်းဟူးဟူ ခီမာ ကိုယ်
တော်ဟာ ရရာတိုင်း ဗိုက်ဆာတော်မူဟယ်။

³ မာရ်နတ်ဟု “သင်ဟာ ဘုရားသခင်ရဲ့ သားဖြစ်ဟယ်
ဆိုဟာ အယ်ကုလော့-က်ခဲဟို မုဖြစ်လာအောန် မိန့်ပေး
ကော့” ဆိုဘီး ကိုယ်တော်ဟို ပြောဟယ်။

⁴ အယ်ဘေမဲ့ ယေရှုဟု “လူဟာ စားဇာတခုဒဲန သတ်
ရှင်ရဟို မူဟု’ ဆိုဇာ ကျမ်းစာဟု ပြောဟူးဟယ်” ဆိုဘီး
မိန့်တော်မူဟယ်။

⁵ အယ်ဘီးန မာရ်နတ်ဟာ ကိုယ်တော်ဟို ရရာတိုင်း ဗြ
စ်ဟူ တောန်ထတ်ဟို ခေါ်ဆောန်ဟူးဘီး အယ်လောကရဲ့
နိုင်ငံလေဟို တခဏရှင်းမာ ကိုယ်တော်ဟို ပြလိုက်ဟယ်။

6 မာရ်နတ်ဟု “ငါဟာ ကိုယ်တော့်ဟို့ အယ်ခွမ်အာဏာ ဂူလောင်းန အယ်ဖောင်းစဉ်းဇိမ် ဂူလောင်းပေးမယ်။ အယ်ဇာလေ ဂူလောင်းဟာ ငါ့ဟို့ အပ်ဟားပီးဘီ။ ငါဟာ အယ်ဇာလေဟို့ ငါဝီးကော့-က်ဟားဟူ ဖယ်လူဘဲဖြစ်ဖြစ် ငါပေးနိုင်ဟယ်။

7 ကိုယ်တော်ဟာ ငါ့ဟို့ ကိုးကွယ်မယ် ဆိုဟာ အယ်မူဇာလေ ဂူလောင်းဟာ ကိုယ်တော်ရဲ့ အောက်စာလေ ဖြစ်ဟားလေ့မယ်” ဆိုဘီး ကိုယ်တော့်ဟို့ ပြောဟယ်။

8 ယေရှုဟု “ကျမ်းစာမာ ‘နန့်ရဲ့ ဘုရားသခင် တပါးဒဲဟို့ဘဲ ကိုးကွယ်ရမယ်။ အယ်သခင် တပါးဒဲဟို့ဘဲ စေခံရမယ်!’ ဆိုဇာ ပြောဟားဟယ်” ဆိုဘီး မိန့်တော်မူလေဟယ်။

9 အယ်ဘီးန မာရ်နတ်ဟာ ကိုယ်တော့်ဟို့ ယေရှုရှလင် မြို့ဟို့ ခေါ်ဟားဘီး မိမာန်တော်ရဲ့ ထိဖျားမာ တန်ဟားဘီးဟာ “ကိုယ်တော်ဟာ ဘုရားသခင်ရဲ့ သားဖြစ်ဟယ် ဆိုဟာ အယ်နေရာဟုနေ အော့-က်ဟို့ ခုခလလိုက်။

10 ပြားဖြစ်ကြောန့်နူးဆိုဟာ ‘ဘုရားသခင်ဟာ ကိုယ်တော့်ဟို့ စောန့်ရှော့-က်ဟို့တွပ် ကောန်းဂန်တမန်လေဟို့ မိန့်ပေးဟားလေ့မယ်။

11 ကိုယ်တော်ရဲ့ ခေဟို့ ကုလော့-က်န ထိခိုက်ဘဲနေ အောန် သူးနို့ဟာ ကိုယ်တော့်ဟို့ လတ်န ခီမဟားလေ့မယ်’ ဆိုဇာ ကျမ်းစာမာ ပြောဟားဟယ်” ဆိုဘီး ပြောလေဟယ်။

12 အယ်ဘေမဲ့ ယေရှုဟု “ ‘နန့်ရဲ့သခင်၊ ဘုရားသခင်ဟို
စောင်ဇမ်းန’ ဆိုဇာ ကျမ်းစာဟု ပြောဟူးဟယ်” ဆိုဘီး
မိန့်တော်မူဟယ်။

13 မာရ်နတ်ဟာ သွီးဆောန်ရှင်း ဘောန်းဇောင် လောက်
ဘီးန ယေရှုနားဟု ထွပ်ဟူးဘီး ခွမ်ကောန်းဟို စောန်နေ
လေဟယ်။

မူတော်မြတ် စပြုဟူကြောင်း

(မဿဲ ၄:၁၂-၁၇; မာကု ၁:၁၄-၁၅)

14 အယ်ဘီးန ယေရှုဟာ ဂါလိလဲပြည်ဟို ပုလန်ဟူး
ဘီး ဘုရားသခင်ရဲ့ ဝိညာဉ်တော်တဂိုးဟာ ကိုယ်တော်န
တူးဒူ ရှိတော်မူဟယ်။ ကိုယ်တော်ဒန်းဟာ အယ်ဒေသ တ
ခုလောင်း ပုလန်နွံဟူးဟယ်။

15 ကိုယ်တော်ဟာ ဝါလယ်ဇရပ်လေမာ သွန်သန်ဘီး ကို
ယ်တော်ဟို လူတိုင်းချီးမွမ်းဂေဟယ်။

ယေရှုဟို နာဇရက်မြို့ဟု ငြင်းပယ်ဟူကြောင်း

(မဿဲ ၁၃:၅၃-၅၈; မာကု ၆:၁-၆)

16 အယ်ဘီးန ယေရှုဟာ နာဇရက်မြို့ဟို ကြွဟူးတော်
မူဟယ်။ အယ်မြို့ဟာ ကိုယ်တော် ကီးဒတ်လာဟူ မြို့
ဖြစ်ဘီး ဒန်းနေမာ ကိုယ်တော်ဟာ ခါတိုင်းသွားနေမျိုးဘဲ
ဝါလယ်ဇရပ်ဟို ကြွဟူးတော်မူဟယ်။ ကိုယ်တော်ဟာ
ကျမ်းစာဖတ်ဟို မတ်တတ်ထလိုက်ဘီးန

17 ကိုယ်တော်ဟာ ပရောဖက် ဟေရှာယရဲ့ ကျမ်းဟို့ လှမ်းယူလိုက်ဘီး ကျမ်းစာဟို့ ဖွင့်လိုက်န အယ်ကျမ်းမာ

18 “သခင်ဘုရားရဲ့ ဝိညာဉ်တော်ဟာ ငါ့ထတ်မာ ရှိတော်မူဟယ်။

ဖြားဖြစ်ကြောန်နူးဆိုဟာ ကိုယ်တော်ဟာ ဆင်းရဲသားလေးနားဟို့ ဒန်းကောန်းသယ်ဆောန်ဟို့ ငါ့ဟို့ ဝီးကော့-က်တော်မူဟယ်။

ကိုယ်တော်ဟာ ခယ်ဟားဇာခံရဟူ လူလေးနားဟို့ လွတ်မြော့-က်စေဟို့န

မျှစ်စိကန်းဟူ လူလေးဟို့ လန်းပုလန်ရစေဟို့၊

ညဉ်းဆဲခံရဟူ လူလေး လွတ်မြော့-က် စေဟို့ကြောန်းကြေညာဘီးန

19 သခင်ဘုရားဟာ ကိုယ်တော်ရဲ့ လူလေးဟို့ ကယ်တန်ဟို့

ခီဟာ ရော့-က်လာဘီ ဖြစ်ကြောန်းဟို့ ကြေညာဟို့ ငါ့ဟို့ စေလွတ်ဟယ်” ဆိုဘီး ရေးဟားလေဟယ်။

20 ယေရှုဟာ ကျမ်းစာဟို့ လိဘီး ဇရပ်စောန်ဟို့ ပုလန်ပေးဘီးန ထိုင်လိုက်ဟယ်။ ဝါလယ်ဇရပ်ထဲဟာ လူလေး ဂူလောင်းရဲ့ မျှစ်လောင်းလေဟာ ကိုယ်တော့်ဟို့ဘဲ စေ့စေ့ကော့နေဟယ်။

21 အယ်ကြောန် ယေရှုဟာ သူးနို့ဟို့ “နန်းနို့ ကြားဟားမျိုးဘဲ အယ်ကျမ်းပိုင်ဟာ အယ်နေဘဲ မှန်ဖြစ်လာဘီ” ဆိုဘီး မိန့်တော်မူလေဟယ်။

22 လူလေ ဂူလောင်းဟာ ကိုယ်တော်ဟို့ ရရာတိုင်း ထော့-က်ခံဂေ့ဘီး ကိုယ်တော်ရဲ့ ဆွဲဆောန်အားကောင်း ဟူ စကားလေကြောန့် အံ့ဩဂေ့ဟယ်။ သူးနို့ဟု “သူဟာ ယောသပ်ရဲ့ သား မှုဟုလော” ဆိုဘီး ပြောနေဂေ့ဟယ်။

23 ကိုယ်တော် ဟာ “နန်း နို့ ဟာ ငါ့ဟို့ အယ် မျိုး ဆိုရိုးစကားန ကိုးကားလေ့မယ် ‘ဆရာဝန်၊ ကိုယ့်ကိုယ် ကိုယ် နာပျော့-က်အောန်ကု’ ဆိုဘီး ပြောမယ် ဆိုဇာဟို့ ငါတိကုလ သိဟယ်။ ကပေရနောင်မြို့မာ လောက်ဟား ဇာဟို့ နန်းနို့ ကြားဟားပီးဘီ အယ်မျိုးဇာလေဟို့ ငါ့ရဲ့ မွီး ရပ်မြို့မာလည်း နန်းနို့ဟာ ငါ့ဟို့ လောက်ပြဟို့ ပြောလေ့ အူးမယ်။

24 နန်းနို့ဟို့ ငါ မှန်တိုင်းပြောမယ်၊ ပရောဖက်လေဟာ သူးနို့ရဲ့ မြို့မာ ကြိုဆိုရှင်းဟို့ လောင်းဝ ခံရဟူ။

25 ငါ မှန်တိုင်းပြောမယ်၊ နားထောန်ဂေ့။ ဧလိယ လတ် ထတ်ဟု က္လသရေလနိုင်ငံမာ သောင်းနှစ်ခွဲ ကောင်းဂန်ပိ ဟားဘီး တနိုင်ငံလောင်း စာရေဇာ ခေါင်းပါးနေခီမာ က္လ သရေလနိုင်ငံမာ မောက်ဆိုးမလေ ဘောင်ဂီးရှိဟယ်။

26 ဧလိယဟာ က္လသရေလနိုင်ငံထဲဟု ဖယ်မောက်ဆိုးမ တယော့-က်နားဟို့လည်း စေလွတ်ရှင်းခံရဘဲ ဇိဒုန်ပြည် ဇေတုတမြို့မာနေဟူ မောက်ဆိုးမ တယော့-က်နားဟို့ဘဲ စေလွတ်ဟယ်။

27 ပရောဖက် ဧလိရဲ့ လတ်ထတ်ဟု က္လသရေလနိုင်ငံမာ

နေဟူ နူရာဂါသယ်လေ ဘောင်ဂီးရှိဘေမဲ့ သူးနို့လေ
ထဲဟု တယော့-က်လည်း သန်ရှင်းခွမ် ရဂေဟု။ အယ်ဘေ
မဲ့ ရှိရိလူမျိုး နေမန်တယော့-က်ဘွဲ သန်ရှင်းခွမ် ရဟားဟု
ယ်” ဆိုဘီး မိန့်တော်မူလေဟယ်။

28 ဝါလယ်ဇရပ်မာရှိဟူ လူလေဟာ အယ်စကားဟို
ကြားရဟူ ခီမာ သူးနို့ဟာ ဒေါသထွပ်ဟားဂေဟယ်။

29 သူးနို့ဟာ မတ်တတ်ထလိုက်ဘီး ယေရှုဟို မြို့ပုလန်
ထိ ဒရုတ်တိုက်ဆွဲဟားဘီးန သူးနို့ မြို့တည်ဟားဟူ တော
န်ထိဟို ခေါ်ဆောန်ဟားဟယ်။ သူးနို့ဟာ ကိုယ်တော်ဟို ကု
လော့-က်ဆောန်ထတ်ဟုနေ တွန်းခလဟို ခေါ်ဆောန်ဟား
ဘေမဲ့။

30 ကိုယ်တော်ဟာ လူအောင်ဂီးလယ်ဟုနေ ရှော့-က်
ဟားဘီး ကြွဟားလေဟယ်။

ညစ်ညူးဟူနတ် ဝမ်ပူးနေဟူ လူကြောန်း
(မာကု ၁.၂၁-၂၈)

31 အယ်ဘီးန ယေရှုဟာ ဂါလိလဲပြည်ဟု မြို့တမြို့ဖြ
စ်ဟူ ကပေရနောင်မြို့ဟို ဆင်းဟားဘီး ဒန်းနေမာ ကိုယ်
တော်ဟာ လူလေဟို သွန်သန်တော်မူဟယ်။

32 သူးနို့ ဂူလောင်းဟာ ကိုယ်တော်ရဲ့ သွန်သန်ဟူ နည်း
လမ်းဟို အံ့ဩဟားဟယ်။ ဖြားဖြစ်ကြောန်းဆို့ဟာ ကိုယ်
တော်ဟာ ခွမ်အာဏာန ပြောတော်မူကြောန်း ဖြစ်ဟယ်။

33 ဝါလယ်ဇရပ်မာ ညစ်ညူးဟူနတ် ဝမ်ပူးနေဟူလူ တယော့-က်ရှိဘီး သူဟာ သံကုလယ်ဟီးန

34 “မိ-ဝေး! နာဇရက်မြို့သားယေရှု၊ ကိုယ်တော်ဟာ ကျွန်တော့်လေန ဖယ်မျိုးဆိုင်နူး။ ကိုယ်တော်ဟာ ကျွန်တော့်လေဟို့ ဖျစ်ဆီးဟို့တွပ် အယ်နေရာဟို့ ရော့-က်လာဇာလော။ ကိုယ်တော်ဟာ ဖယ်သူဖြစ်ဟယ် ဆိုဇာဟို့ ကျွန်တော်သိဟယ်။ ကိုယ်တော်ဟာ ဘုရားသခင်ရဲ့ သန့်ရှင်းဟူ စေတမန်ဖြစ်ဟယ်!” ဆိုဘီး အော်လေဟယ်။

35 ယေရှုဟာ အယ်နတ်ဟို့ “တိတိနေဘီး အယ်လူထဲဟ ထွပ်!” ဆိုဘီး မိန့်ပေးလေဟယ်။ နတ်ဆိုးဟာ အယ်လူဟို့ သူးနို့ရှေ့မာ ပစ်လဲဒုလဘီးန သူဟို့ ထိခိုက်ရှင်း မွှေဘဲန သူထဲဟ ထွပ်ဟားဟယ်။

36 လူလေ ဂူလောင်းဟ အံ့ဩဟားဂေ့ဘီး ယော့-က်နယော့-က် “အယ်စကားလေဟ ဖြားမျိုးစကားလေနူး။ အယ်လူဟာ ညစ်ညူးဟူ နတ်လေဟို့ ခွမ်အာဏာတဂိုးန မိန့်ပေးလိုက်ဟူန သူးနို့ဟာ ထွပ်ဟားဟယ်!” ဆိုဘီး ပြောနေဂေ့ဟယ်။

37 ယေရှုရဲ့ ဒန်းဟာ အယ်ဒေသ တခုလောင်းဟို့ ပုလန်နို့ဟားလေဟယ်။

လူလေဘောင်ဂီးဟို့ နာပျော့-က်စေဟူကြောင်း
(မသဲ ၆.၁၄-၁၇၊ မာကု ၁.၂၉-၃၄)

38 ယေရှုဟာ ဝါလယ်ဇရပ်ဟနေ ထွပ်ဟားဘီးန ရှိမုန်ရဲ့ အီဟို့ ကြွဟားလိုက်ဟယ်။ ရှိမုန်ရဲ့ ယောကုခမဟာ

ဖျားနာဘီး ရုရာတိုင်း နေကောင်းဘဲ ဖြစ်နေကြောင်း သူးနို့ ဟာ ယေရှုဟို တောင်းလျှော့-က်လေဟယ်။

³⁹ ကိုယ်တော်ဟာ အယ်မီးမရဲ့ ဘေးနားမှာ သွားရပ် ဘီး ဖျားပျော့-က်စေ ဆိုဘီး မိန့်ပေးလိုက်ဟယ်။ အယ် မီးမဟာ ဖျားနာပျော့-က်ဟူးကြောန့် ရှစ်ရှင်းထဘီး ကိုယ်တော်န တမဲ့တော်လေဟို ဧည့်ဝတ်ပြုလေဟယ်။

⁴⁰ နေဝမ်ဟူးဘီးန ရောဂါဘောင်းဇောင်န နေကော န်းဘဲဖြစ်နေဟူ လူလေရဲ့ ငယ်ဂျင်းလေဟာ သူးနို့ဟို ယေရှုနားဟို ခေါ်လာဂေဟယ်။ ကိုယ်တော်ဟာ သူးနို့ ဂူ လောင်းထတ်မာ လတ်ဟို တန်ဘီးန သူးနို့ ဂူလောင်းဟို နာပျော့-က်စေဟယ်။

⁴¹ နတ်ဆိုးလေဟာလည်း လူလေထဲဟုနေ “ကိုယ်တော် ဟာ ဘုရားသခင်ရဲ့ သားတော် ဖြစ်ဟယ်!” ဆိုဘီး အော်ဟစ်ဘီး ထွပ်ဟူးဂေဟယ်။

ယေရှုဟာ မေရှိယဖြစ်ဟယ် ဆိုဇာဟို နတ်ဆိုးလေဟာ သိဟယ်။ အယ်ကြောန့် သူးနို့ဟို စကားခွန်းလည်းပြောန ဆိုဘီး မိန့်ပေးတော်မူဟယ်။

ဝါလယ်ဇရပ်လေမာ ဟောပြောဟူကြောင်း

(မာကု ၁:၃၅-၃၉)

⁴² မိုးလန်းဟူ ခီမာ ယေရှုဟာ မြို့ဟုနေ ထွပ်ဟူးဘီးန တံဆိဟူ နေရာဟို ကြွဟူးလေဟယ်။ လူလေဟာ ကိုယ် တော်ဟို လိုက်ရှာဂေဘီး သူးနို့ဟာ ကိုယ်တော်ဟို တို့ဟူ

ခီမာ ကိုယ်တော်တို့ ထွပ်ဟူးဘဲနေအော် ဆီးတားဂေဟယ်။

⁴³ အယ်ဘေမဲ့ ကိုယ်တော်ဟာ “ငါဟာ ဘုရားသခင်ရဲ့ နိုင်ငံတော်ကြောန်း ဒန်းကောင်းတို့ တခြား မြို့ဝါလေမာလည်း ကြေညာရအူးမယ်။ ဖြားဖြစ်ကြောန်းနဲ့ဆိုဟာ အယ်မျိုးကြေညာတို့ ဘုရားသခင်ဟာ ငါတို့ စေလွှတ်ရှင်းဖြစ်ဟယ်” ဆိုဘီး သူးနို့တို့ မိန့်တော်မူလေဟယ်။

⁴⁴ အယ်ကြောန့် ကိုယ်တော်ဟာ ယုဒပြည် တပြည်လောင်းမာရှိဟူ ဝါလယ်ဇရပ်လေမာ ကြေညာတော်မူလေဟယ်။

5

တမဲ့တော်လေတို့ ခေါ်ဟူကြောန်း

(မသဲ ၄.၁၈-၂၂; မာကု ၁.၁၆-၂၀)

¹ တနေ့မာ ယေရှုဟာ ဂ်နေသရက်အိုင်ရဲ့ ကမ်းနားမာရပ်နေဟူ ခီမာ လူလေဟာ ဘုရားသခင်ရဲ့ စကားတော်တို့ နားထောင့်တို့ ကိုယ်တော်နားတို့ တိုးဝမ်ဂေဟယ်။

² ကိုယ်တော်ဟာ ကမ်းနားမာ ကပ်ဟူးဟူ လှေနှေ့စင်းတို့ ပြင်တော်မူဟယ်။ ငါးဖမ်းမားလေဟာ လှေလေထတ်ဟုနေ ဆင်းဘီးန ငါးဖမ်းပိုက်လေတို့ ဆေးနေဂေဟယ်။

³ ယေရှုဟာ အယ်လှေနှေ့စီးထဲဟာ ရှိမုန်ရဲ့ လှေထတ်တို့ တတ်တော်မူဘီးန လှေတို့ ကမ်းဟုနေ နဲနဲခွာတို့ သူတို့ ခွမ်

တောန်းလေဟယ်။ ယေရှုဟာ လှေထတ်မာ ထိုင်ဘီးန လူ အောက်ဂီးဟို့ သွန်သန်ဟယ်။

⁴ ကိုယ်တော်ဟာ သွန်သန်ရှင်းလေ ပီးဟားဟူ ခီမာ ရှိမုန်ဟို့ “ရေနတ်ထဲဟို့ ထွပ်ဟားဘီး ငါးလေဟို့ ဖမ်းဟို့တွပ် နန်န နန်ပေါန်းဖော်လေရဲ့ ငါးဖမ်းပိုက်လေဟို့ ခုလဂေ” မိန့်တော်မူလေဟယ်။

⁵ ရှိမုန်ဟ “ကျွန်တော့်ဟားလေဟာ တညဉ့်လောင်း ကြိုးစားဘီး ဖမ်းလည်း ဂေါန်လည်းရဂေဟ။ အယ်ဘေမဲ့ ကိုယ်တော်ရဲ့ မိန့်တော်တိုင်း ငါးဖမ်းပိုက်လေဟို့ ခုလလိုက်မယ်” ဆိုဘီး ပုလန်ပြောတော်မူဟယ်။

⁶ သူးနို့ဟာ ငါးဖမ်းပိုက်လေဟို့ ခုလလိုက်ဘီးန ငါးလေဘောင်ဂီး ဖမ်းမိကြောန့် ငါးဖမ်းပိုက်လေ စုပုလဲခါနီး ဖြစ်ဟားဟယ်။

⁷ အယ်ကြောန့် သူးနို့ဟာ လာဘီး ကူညီပေးဟို့ တခြား လှေထဲမာရှိနေဟူ သူးနို့ရဲ့ ပေါန်းဖော်လေဟို့ လတ်ပြဘီး ခေါ်လိုက်ဟယ်။ သူးနို့ဟာ လာဘီးန လှေနှေ့စင်းလောင်းဟို့ ငါးလေပုလဲ ဖုလဲလိုက်ကြောန့် လှေလေဟာ မုလုပ်ခါနီး ဖြစ်ဟားဟယ်။

⁸ အယ်မျိုးဖြစ်ဇာလေဟို့ ရှိမုန်ပေတရု မြင်လိုက်ဟူ ခီမာ ယေရှုရှေ့မာ ဒူးထော့-က်ဘီး “သခင်၊ ကျွန်တော့်နားဟုနေ ကြွဟားတော်မူပါ၊ ကျွန်တော်ဟာ ပြစ်သား ဖြစ်ဟယ်” ဆိုဘီး လျှော့-က်လေဟယ်။

⁹ သူ့နတ်တူးဒူရှိဟူ လူလေ ဂူလောင်းဟာ ဖမ်းမိဟူ ငါးလေ ဟာ ဘောင်ဂီး ဖြစ်နေကြောန့် အံ့ဩဟွားဂေဟယ်။

¹⁰ ရှိမုန်ရဲ့ လောက်ဖော်ဆောန်ဖတ်လေဖြစ်ဘီး ဇေဗေဒဲ ရဲ့ သားလေဖြစ်ဟူ ယာကုပ်န ယောဟန်လေဟာလည်း အယ်မျိုးဘဲ အံ့ဩဟွားဂေဟယ်။ ယေရှုဟာ ရှိမုန်ဟို့ “ကြော့-က်ဂေန။ ခုဟုစဘီး နန်ဟာ လူလေဟို့ ဖမ်းရလေ့ မယ်” ဆိုဘီး မိန့်တော်မူလေဟယ်။

¹¹ သူးနို့ဟာ လေ့လေဟို့ ကမ်းနားမာ ကပ်လိုက်ဘီး ငါး လေ ဂူလောင်း ထားရစ်ဘီးန နော့-က်တော်ဟို့ လိုက်ဂေ ဟယ်။

နူနာရောဂါဟို့ ပျော့-က်စေဟူကြောန်း
(မသံ ၈.၁-၄; မာကု ၁.၄၀-၄၅)

¹² တနေ့မာ ယေရှုဟာ မြို့တမြို့မာ ရှိနေဒူးမာ နူနာ သယ် တယော့-က်ဟာ ယေရှုဟို့ မြင်ဟွားဟူ ခီမာ ပျပ်ဝပ် ဘီး ကိုယ်တော်ဟို့ “သခင်၊ လိုတော်ရှိဟယ် ဆိုဟာ ကျွန် တော်ဟို့ သန်ရှင်းအောန် လောက်နိုင်ဟယ်!” ဆိုဘီး တော န်းဗန်လေဟယ်။ *

¹³ ယေရှုဟာ လတ်တော်ဟို့ ဆန်ဘီးဟာ သူ့ဟို့ တို့ ထိတော်မူဟယ်။ “ငါလိုရှိဟယ်။ သန်ရှင်းစေ!” ဆိုဘီး ကိုယ်တော်ဟို့ မိန့်တော်မူဟယ်။ ရှစ်ရှင်းဘဲ နူနာရောဂါ ဟာ ပျော့-က်ဟွားလေဟယ်

* 5:12 ၅.၁၂ ကျွန်တော်ဟို့ သန်ရှင်းအောန် လောက်နိုင်ဟယ်၊ အယ်ရောဂါဟာ လူတယော့-က်ဟို့ မြဲဒမ်း သန်ရှင်းဘဲအောန် လောက်ဟယ် ဆိုဘီး ယူဆဟယ်။

14 ယေရှုဟာ သူ့တို့ “ဖယ်သူတို့လည်း ပြောနု။ အယ်ဘေမဲ့ ယဇ်ပုရောဟိတ်နားတို့ သွားဘီး ကိုယ်တို့ ပြလိုက်ပါ။ စင်ကြယ်ဟွားဘီး ဆိုဇာတို့ လူလေရှေ့မှာ သတ်သေဖြစ်တို့တွပ် မောရှေပညတ်ဟွားဟူတိုင်း ပူဇော်သကာတို့ ဆစ်သပါ” ဆိုဘီး မိန့်တော်မူလေဟယ်။

15 အယ်ဘေမဲ့ ယေရှုရဲ့ ဒန်းဟာ ရရာတိုင်း ပုလုံနဲ့ ဟွားဘီး လူအောက်ဂီးဟာ ကိုယ်တော်ရဲ့ တရားတော်လေ ကြားရတို့န သူးနို့ရဲ့ ရောဂါလေ ပျော့-က်တို့တွပ် လာဂေဟယ်။

16 အယ်ဘေမဲ့ ကိုယ်တော်ဟာ တိဆိဟူ နေရာမှာ ဆုတောင်းတို့ ထွပ်ကြွဟွားတော်မူဟယ်။

လေဖြတ်နေဟူ လူတို့ နာပျော့-က်စေဟူကြောန်း
(မသံ ၉.၁-၈; မာကု ၂.၁-၁၂)

17 တနေ့မှာ ယေရှုဟာ သွန်သန်တော်မူနေဒူးမှာ ယေရှုရှလင်မြို့၊ ယုဒပြည်န ဂါလိလဲပြည် မြို့ဝါလေဟုနေ လာဟူဇာရီရဲ့ တချို့န ကျမ်းတတ်ဆရာလေဟာ ထိုင်နေဂေဟယ်။ ရောဂါ ပျော့-က်စေတို့ ဘုရားသခင်ရဲ့ တဂိုးတော်ဟာ ယေရှုမှာ ရှိတော်မူဟယ်။

18 လူတချို့ဟာ လေဖြတ်နေဟူ လူတယော့-က်တို့ ထမ်းစင်န သယ်လာဘီး အီထဲတို့ သယ်ဆောင်ဟွားဘီး ယေရှုရဲ့ ရှေ့တော်မှာ ခုလဟွားတို့ ကြိုးစားဂေဟယ်။

19 ကြိုးစားဘေမဲ့လည်း လူလေဘောင်ဂီး ရှိနေကြောန့် သူးနို့ဟာ လူနာတို့ သယ်သွမ်းဟွားတို့ လမ်းရှာတို့ဘဲ

ဖြစ်နေဟယ်။ အယ်ကြောန့် သူးနို့ဟာ အီးခေါန်မိုးထတ်
ဟို့ တတ်ဘီးဟာ အီးခေါန်မိုးဟို့ ဖော့-က်ဘီးမှ လူနာဟို့
ထမ်းစင်န လူအောက်ဂီးရဲ့လယ် ယေရှုရဲ့ ရှေ့တော်ဟို့
လျှော့ခလဂေဟယ်။

²⁰ ယေရှုဟာ သူးနို့မာ ရရာတိုင်း ယောင်ကြည်ရှင်း ရှိဟ
ယ် ဆိုဇာဟို့ မြင်တော်မူဟားဘီး လူနာဟို့ “မိဆော့၊ နန်ဟာ
ပြစ်လေလွတ်ရှင်းခံရဘိ” ဆိုဘီး မိန့်တော်မူလေဟယ်။

²¹ ကျမ်းတတ်ဆရာလေန ဖာရိရှဲလေဟာ “ဘုရားဟို့
စော်ဂါးဘီး ပြောနေဟူ လူဟု ဖယ်သုနူး! ဘုရားသခင် တ
ပါးဒဲဘဲ ပြစ်လေဟို့ ဖြေလွတ်ပေးနိုင်ဟယ်!” ဆိုဘီး သူး
နို့ရှင်းရှင်း ပြောနေဂေဟယ်။

²² ယေရှုဟာ သူးနို့ရဲ့ စိဟို့ သိကြောန့် သူးနို့ဟို့ “နန်းနို့
ဟာ ဖြားဖြစ်ကြောန့် အယ်ဇာလေဟို့ နန်းနို့ရဲ့ နှလောင်းထံ
မာ စဉ်းစားနေဂေနူး။

²³ ‘နန်ဟာ ပြစ်လွတ်ရှင်းခံရဘိ’ ဆိုဘီး ပြောဇာဟု လွယ်
လော။ ‘နန် ထဘီး လမ်းရှော့-က်’ ဆိုဘီး ပြောဇာဟု လွယ်
လော။

²⁴ လူ့ရဲ့ သားဟာ လောကမာ ပြစ်လွတ်ပိုင်ဟူ ခွမ်
အာဏာ ရှိဟယ် ဆိုဇာ နန်းနို့ဟို့ သတ်သေပြမယ်” ဆို
ဘီး မိန့်တော်မူလေဟယ်။ အယ်ကြောန့် ကိုယ်တော်ဟာ
လေဖြတ်နေဟူ လူဟို့ “ထဒန်၊ ထမ်းစင်ဟို့ သီးဘီးဟာ အီ
ပုလန်ဝေါ!” ဆိုဘီး မိန့်တော်မူလေဟယ်။

²⁵ ရှစ်ရှင်းဘဲ အယ်လူဟာ သူးနို့ ဂူလောင်းရှေ့မာ ထ
ရပ်ဘီး။ သူအိဟားဟူ အိယာဟို့ သီးဘီး၊ ဘုရားသခင်ဟို့

ချီးမွမ်းဘီး အိဟို ပုလန်ဟူးဟယ်။

²⁶ သူးနို့ ဂူလောင်းဟာ ရရာတိုင်း အံ့ဩဟူးဂေဟယ်၊ သူးနို့ဟာ ကြော့-က်လန်လာဘီး ဘုရားသခင်ဟို “အယ်နေမာ ရရာတိုင်း အံ့ဩဇာလေဟို နို့လေမြင်ရဂေဘီ” ဆိုဘီး ချီးမွမ်းဂေလေဟယ်။

လေဝိဟို ခေါ်ဟူကြောန်း

(မသဲ ၉.၉-၁၃; မာကု ၂.၁၃-၁၇)

²⁷ အယ်ဇာလေ ပီးဟူးဘီးန ယေရှုဟာ ထွပ်ကြွဟူးတော်မူဘီး လေဝိနာမယ်ရှိဟူ ခွန်ကော့-က်မားဟာ သူခွန်ရောင်းမာ ထိုင်နေဇာဟို မြင်တော်မူလေဟယ်။ ယေရှုဟာ သူဟို “ငါ့နော့-က်ဟို လိုက်ပါ” ဆိုဘီး မိန့်တော်မူလေဟယ်။

²⁸ လေဝိဟာ ဂူလောင်းဟို ထားရစ်ဘီး နော့-က်တော်ဟို လိုက်ဟူးဟယ်။

²⁹ အယ်ဘီးန လေဝိဟာ သူရဲ့ အီမာ ယေရှုတွပ် ဧည့်ခံဗွဲဂီး ကျင်းပလေဟယ်။ အယ်ပွဲဟို လာဟူ ဧည့်သည်လေထဲမာ ခွန်ကော့-က်မားလေန တခြားလူလေ ပါဟယ်။

³⁰ ကျမ်းတတ်ဆရာလေ တချို့န သူးနို့ရဲ့ အောက်စဝမ်ဖြစ်ဟူ ဖာရိရှဲလေ တချို့ဟာ ယေရှုရဲ့ တဗွဲတော်လေဟို ပြစ်တန်ဂေဟယ်။ “ဖြားဖြစ်ကြောန်း နန်းနို့ဟာ ခွန်ကော့-က်မားလေ၊ ပြစ်သားလေနတူးဒူ စားသော့-က်ရဂေနူး” ဆိုဘီး သူးနို့ဟို မေးလိုက်ဟယ်။

31 ယေရှုဟာ သူးနှိဟို့ “နေကောန်းနေဟူ လူလေဟု ဆရာဝန်ဟို့ လိုအပ်ဟူ။ အယ်ဘေမဲ့ နေကောန်းဘဲလူဟု ဆရာဝန်ဟို့ လိုအပ်ဟယ်။

32 ငါဟာ ပြောန့်မတ်ဟူ လူလေ နောန်ဒရဟို့တွပ် ခေါ် ဟို့လာဇာ မူဟူ။ ပြစ်ရိဟူ လူလေဟို့ နောန်ဒရစေဟို့တွပ် ခေါ်ဟို့လာဇာ ဖြစ်ဟယ်” ဆိုဘီး မိန့်တော်မူလေဟယ်။

စာရှောန်ရှင်းန ဆိုင်ဟူမေးခွန်းကြောင်း
(မသဲ ၉.၁၄-၁၇; မာကု ၂.၁၈-၂၂)

33 လူတချို့ဟု ယေရှုဟို့ “ယောဟန်ရဲ့ တမဲ့လေန ဖာရိ ရဲ့လေရဲ့ တမဲ့လေဟာ စာရှောန်ရှင်းန ဆုတောင်းရှင်းလေ ဟို့ ခါဘီးခါ လောက်ဘေမဲ့ ကိုယ်တော်ရဲ့ တမဲ့လေဟာ စားသော-က်ဘီး နေဂေဟယ်” ဆိုဘီး မေးလျှော့-က်ဂေ ဟယ်။

34 ယေရှုဟု “အီတတ်မဲ့မာ ဒွိသားနတူးဒူ ရှိနေဟူ ပေါ န်းသင်းလေဟာ ဒွိသားနတူးဒူ ရှိနေခီမာ စာရှောန်ခိုင်းနိုင် လော။

35 အယ်ဘေမဲ့ ဒွိသားဟို့ သူးနှိနားဟုနေ ဆောန်ယူဟား ဟို့နေ ရှော့-က်လာဟူ ခီမာ သူးနှိဟာ စာရှောန်လေ့မယ်” ဆိုဘီး ပြေတော်မူလေဟယ်။

36 ယေရှုဟာ သူးနှိဟို့ ပေါင်ဥပမာန “ဖယ်သူလည်း အ န်းဂီးစသစ်ဟို့ ဆုဖုလဲဘီး အန်းဂီဟောင်းမာ ဖာလေ့မေ့ ဟူ။ အယ်မျိုးဖာမယ် ဆိုဟာ အန်းဂီသစ်ဟာ ပျစ်စီးဟား ဘီး အန်းဂီဇသစ်န အန်းဂီဟောင်းဟာ လိုက်ဖက် မူဟူ။

37 အယ်မျိုးဘွဲ့ ဝိုင်သစ်ဟို့ သားရေဖူးဟောန်းထဲမာ ထုံ
လေ့ မေ့ဟူ။ ထုံမယ် ဆိုဟာ ဝိုင်သစ်ဟူ သားရေဖူးဟော
န်းဟို့ ပေါ့-က်ပုလဲစေဘီး ဝိုင်န သားရေဖူး နေ့ခုလောင်း
ဟာ ပျစ်စီးဟားလေ့မယ်။

38 ဝိုင်သစ်ဟို့ သားရေဖူးသစ်မာဘွဲ့ ထုံရဟယ်!

39 ဝိုင်ဟောန်းဟို့ သော့-က်ဟားဘီးဟူ လူဟာ ဝိုင်သစ်
ဟို့ သော့-က်ရှင်ဂေဟန်း! ‘ဝိုင်ဟောန်းဟူ ပိုကောန်းဟယ်’
ဆိုဘီး နန်နို့ ပြောလေ့မယ်” ဆိုဘီး မိန့်တော်မူလေဟယ်။

6

ဒန်းနေ့ဆိုင်ဟူ မေးခွန်းလေကြောင်း

(မသံ ၁၂.၁-၈; မာကု ၂.၂၃-၂၈)

1 ဒန်းနေ့မာ ယေရှုဟာ ဂျောင်စဗားလယ်ဂွမ်လေဟို့
ဖြတ်ကြွဟားတော်မူဟယ်။ ကိုယ်တော်ရဲ့ တမဲ့တော်လေ
ဟာ ဂျောင်စဗားနှံလေဟို့ ဆွတ်ဘီး၊ လတ်နပွတ်ဘီး စား
ဂေ့ဟယ်။

2 ဖာရိရှဲတချို့ဟူ “ဒန်းနေ့မာ နန်းနို့ဟို့ လောက်န ဆိုဘီး
နှံလေရဲ့ ပညတ်တရားမာ ပြောဟားဇာဟို့ ဖြားဖြစ်ကြော
န့် နန်းနို့ လောက်ဂေရုန်း” ဆိုဘီး မေးဂေ့ဟယ်။

3 ယေရှုဟာ သူးနို့ဟို့ “ဒါဝိဒ်ဟာ သူရဲ့ ပေါန်းဖော်လေ
မိုက်ဆာလာခီမာ ဖယ်မျိုးလောက်ဟားဟယ် ဆိုဇာဟို့ နန်း
နို့ ဖတ်ဖူးဂေ့ဟလော။

4 သူဟာ ဘုရားသခင်ရဲ့ အိတော်ဟို့ ဝမ်ဘီး ဘုရားသ
ခင်ဟို့ ပူဇော်ဟားဟူ မဟို့ ယူဘီးစားဟယ်။ အယ်ဘီးဟာ

သူ့ရဲ့ ပေါင်းဖော်လေဟို့ ကျွေးဟယ်။ ယဇ်ပုရောဟိတ်လေ မှတပါး ဖယ်သူလည်း စားခွင့်မဲ့ဟူ အယ်မုဟို့ ယူစားဟယ် ဆိုဇာဟာ နို့လေရဲ့ ပညတ်တရားဟို့ ဆန့်ကျင်ဘဲ” ဆိုဘီး မိန့်တော်မူလေဟယ်။

⁵ ယေရှုဟာ “လူ့ရဲ့သားဟာ ဒန်းနေရဲ့ သခင် ဖြစ်ဟယ်” ဆိုဘီး မိန့်တော်မူလေဟယ်။

လတ်တဖတ် လေဖြတ်နေဟူ လူကြောန်း
(မသံ ၁၂.၉-၁၄; မာကု ၃.၁-၆)

⁶ တခြားဒန်းနေမှာ ယေရှုဟာ ဝါလယ်ဇရပ်ဟို့ ဝမ်ဘီး သွန်သန်တော်မူဟယ်။ အယ်နေရာမှာ ညာလတ်တဖတ် သေနေဟူ လူတယော့-က် ရှိဟယ်။

⁷ ကျမ်းတတ်ဆရာ တချို့န ဖာရိရဲ့ တချို့ဟာ ယေရှုဟို့ ပြစ်တန်ရှင်ကြောန့် ဒန်းနေမှာ ကိုယ်တော်ဟာ အယ်လူဟို့ နာပျော့-က်စေဟို့လော၊ ပျော့-က်စေဟို့လော ဆိုဇာဟို့ သူးနို့ဟာ သေးသေချားချာ စောန့်ကေနေဟယ်။

⁸ အယ်ဘေမဲ့ ယေရှုဟာ သူးနို့ရဲ့ ကြံစည်ဟို့ သိကြောန့် အယ်လူဟို့ “ထဒန်ဘီး ရှေ့ဟို့ ထွပ်လာဟား” ဆိုဘီး မိန့်တော်မူလေဟယ်။ အယ်လူဟာ ထဒန်ဘီး မတ်တတ်ရပ်နေဟယ်။

⁹ အယ်ဘီးန ယေရှုဟာ သူးနို့ဟို့ “နန်းနို့ဟို့ ငါမေးမယ်၊ နို့လေရဲ့ ပညတ်တရားဟာ ဒန်းနေမှာ ဖြားဇာလေ လောက်ဟို့ ခွမ်ပြုဟားနူး။ ကောင်းဇာလောက်ရလော။ ဆိုးဇာ

လောက်ရလော။ လူတယော့-က်ရဲ့ သတ်ဟို့ ကယ်အပ်
လော။ သတ်အပ်လော” ဆိုဘီး မေးတော်မူလေဟယ်။

10 ကိုယ်တော်ဟာ သူးနှိလေ ဂူလောင်း ပတ်လည်ဟို့
ကော့ရှဘီးန ကိုယ်တော်ဟာ အယ်လူဟို့ “နန့်ရဲ့ လတ်ဟို့
ဆန့်လိုက်” ဆိုဘီး မိန့်တော်မူ*လေဟယ်။ အယ်လူဟာ
လတ်ဟို့ ဆန့်လိုက်ဟူ ခီမာ သူလတ်ဟာ ကောန်းတိုင်း ပု
လန်ဖြစ်ဟူးဟယ်။

11 ဖာရိရှဲလေဟာ ဒေါသထွပ်ဟူးဘီး ယေရှုဟို့ ဖယ်
မျိုးလောက်ရဟို့ ဆိုဘီးဟာ သူးနှိရှင်းရှင်း တိုင်ဗန်ဂေဟ
ယ်။

တမန်တော် ဆယ့်နှေ့ပါးဟို့ ဝီးကော့-က်ဟူကြောန်း
(မသံ ၁၀.၁-၄; မာကု ၃.၁၃-၁၉)

12 အယ်နေရစ်မာ ယေရှုဟာ ဆုတောင်းဟို့ တောန်ထ
တ်ဟို့ တတ်ကြဟူးဘီး တညဉ်လောင်း ဘုရားသခင်ဟို့
ဆုတောင်းဘီး နေတော်မူဟယ်။

13 မိုးလန်းလာဟူခီမာ တမဲ့တော်လေဟို့ ကိုယ်တော်နား
ဟို့ ခေါ်ဘီး သူးနှိထဲဟု ဆယ့်နှေ့ပါးဟို့ ဝီးကော့-က်ဘီး
တမန်တော် ဆိုဘီး နာမယ် ပေးတော်မူဟယ်။

14 ကိုယ်တော်ဟု ပေတရု ဆိုဘီး နာမယ် ပေးဟူးဟူ ရှိ
မုန်န သူညီအနုဒြေ၊ ယာကုပ်န ယောဟန်၊ ဖိလိပုပုန ဗာ
သောလမာ၊

* 6:10 6.၁၀ မိန့်တော်မူ၊ တချို့ မူရင်းလတ်ရေးမူလေမာ စိဆိုးဘီး
မိန့်တော်မူ၊ ဆိုဘီး ရှိဟယ်။

15 မသန်သောမ၊ အာလဲရဲသား ယာကုပ်န မျိုးရှစ် ပေါက်ကို ရှိမုန်၊

16 ယာကုပ်ရဲသား ယုဒန ကိုယ်တော်ဟူ သစ်စာဖော့-က် ဟူ ယုဒရှုကာရုတ် ဖြစ်ဟယ်။

သွန်သန်ရှင်းန ရောဂါပျော့-က်စေဟူကြောင်း
(မသံ ၄.၂၃-၂၅)

17 ယေရှုဟာ တမန်တော်လေနတူးဒု တောန်ထတ်ဟုနေ ဆင်းလာဘီး တမံတော်လေဘောင်ဂီးန မှလေညီးညီနေရာ မာ ရပ်လိုက်ဟယ်။ အယ်နေရာမာရှိနေဟူ လူအောက်ဂီး ဟာ ယုဒပြည်န ယေရုရှလင်မြို့ဟုနေ လာဟူ လူလေန ပန်လယ်ကမ်းနား တုရမြို့န ဇိဒန်မြို့ဟုနေ လာဟူ လူလေ ဖြစ်ဘီး

18 သူးနို့ဟာ ကိုယ်တော်ရဲ တရားဟို ကြားနာရဟိုန သူး နို့ရဲ နာပျော့-က်ဟို လာဂေဟယ်။ ညစ်ညူးဟူနတ်ဟု ဒေါက်ခပေးရှင်းဟို ခံနေရဟူ လူလေလည်း နာပျော့-က် ဟားဂေဟယ်။

19 ကိုယ်တော်နားဟုနေ တဂိုးတော်ထွပ်ဘီးဟာ သူးနို့ လေ ဂူလောင်းဟို နာပျော့-က်စေကြောန့် လူလေ ဂူလောင်းဟာ ကိုယ်တော်ဟို ထိဟို ကြိုးစားဂေဟယ်။

မင်္ဂလာန အမင်္ဂလာကြောင်း
(မသံ ၅.၁-၁၂)

20 ယေရှုဟာ တမံတော်လေဟို ကေဘီး
“ဆင်းရဲသားလေ၊ နန်းနို့ဟာ မင်္ဂလာရှိဟယ်။

ဘုရားသခင်ရဲ့ နိုင်ငံတော်ဟာ နန်းနို့ရဲ့ နိုင်ငံဖြစ်ဟယ်!”

21 “ခု ငတ်ပြတ်နေဟူ နန်းနို့ဟာ မင်္ဂလာရှိဟယ်။
 ဖြားဖြစ်ကြောန်းနူးဆိုဟာ နန်းနို့ဟာ ဗိုက်ပုလဲရဂေ
 လေ့မယ်!”

“ခု ငိုနေဟူ နန်းနို့ဟာ မင်္ဂလာရှိဘီး၊
 နန်းနို့ဟာ ရယ်ရလေ့မယ်!”

22 “လူ့ရဲ့ သားကြောန့် နန်းနို့ဟို လူလေမူးဟူဇာဘဲ
 ဖြစ်ဖြစ်၊ ငြင်းပယ်ဟူ ဇာဘဲဖြစ်ဖြစ်၊ နန်းနို့နာမယ် ပျစ်
 အောက်လောက်ဟူ ဇာဘဲဖြစ်ဖြစ် နန်းနို့ဟာ မင်္ဂလာရှိဟယ်။

23 အယ်မျိုးဖြစ်ဟူ ခီမာ ဝန်းသာဘီးဟာ ကခုဂေ။ ဖြား
 ဖြစ်ကြောန်းနူးဆိုဟာ ကောန်းဂန်ဘောင်မာ နန်းနို့တွပ် ရရာ
 တိုင်း ကီးဟူ ဆုလာဘ် ရှိဟယ်။ သူးနို့ရဲ့ ဘိုးဘေးလေဟာ
 ပရောဖက်လေဟို အယ်မျိုးဘဲ ညှဉ်းဆဲဟားဂေဟယ်။”

24 “အယ်ဘေမဲ့ ကပ်ရှိဟူ နန်းနို့ဟာ အမင်္ဂလာရှိဘီး၊
 နန်းနို့ဟာ ခုခီမာ သတ်သာဟူ ဘဝဟို ရဂေဟယ်!”

25 “ခု ဗိုက်ပုလဲအောက်စားရဟူ နန်းနို့ဟာ အမင်္ဂလာရှိဘီး၊
 နန်းနို့ဟာ ဗိုက်ဆာရလေ့မယ်!”

“ခု ရယ်နေဟူ နန်းနို့ဟာ အမင်္ဂလာရှိဘီး၊
 နန်းနို့ဟာ ရရာတိုင်း ငြီးတွားဘီး ငိုရလေ့မယ်!”

26 “လူလေ ဂူလောင်းဟာ နန်းနို့ဟို ချီးမွမ်းစကားပြော
 မယ် ဆိုဟာ နန်းနို့ဟာ အမင်္ဂလာရှိဘီး သူးနို့ရဲ့ ဘိုးဘေး

လေဟာလည်း ပရောဖက်တုယောန်လေဟို အယ်မျိုးဘဲ
ချီးမွမ်းဟူးဟယ်။

ရန်သူဟို ရှစ်ဂေဟိုကြောန်း
(မသံ ၅.၃၈-၄၈; ၇.၁၂)

27 “အယ်ဘေမဲ့ ငါစကားဟို ကြားရဟူ နန်းနိုဟို ငါပြော
မယ်။ နန်းနိုရဲ့ ရန်သူလေဟို ရှစ်ဂေ။ နန်းနိုဟို မူးဟူလူလေ
ဟို ကျေးဇူးပြုဂေ။

28 နန်းနိုဟို ကီဆဲဟူ လူလေဟို ကောန်းဂျီးပေးဂေ။ နန်း
နိုဟို နှော့-က်ယှစ်ဟူ လူလေတွပ် ဆုတောင်းဂေ။

29 ယော့-က်ယော့-က်ဟု နန်ပါးတဖတ်ဟို ရိုက်ဟု
ယ် ဆိုဟာ ကျန်ဟူ ပါးတဖတ်ဟိုလည်း ရိုက်ဟို လှည့်
ပေးလိုက်ပါ။ နန်ဝတ်လောင်ဟို လိုရှင်ဟူ သူလေဟို နန်
အန်းဂီဟိုလည်း ပေးလိုက်ပါ။

30 နန်နားမာ တောင်းဟူလူဟို ပေးလိုက်ပါ။ နန်အောက်
စာဟို သီးယူဟူ လူနားမာ ပုလန်ဘီး တောင်းန။

31 နန်းနိုလေဟို သူများလေဟု ပြုမူဆစ်ဆံစေရှင်မျိုး
သူများလေဟိုလည်း ပြုမူဆစ်ဆံဂေပါ။

32 “နန်းနိုဟို ရှစ်ဟူ သူလေဟိုဘဲ ပုလန်ရှစ်မယ် ဆိုဟာ
ဖယ်မျိုးလောက်ဘီး ကောန်းဂျီးမင်္ဂလာဟို နန်းနို ခံစားရ
ဟိုနူး။ ပြစ်သားလေလည်းဘဲ သူးနိုဟို ရှစ်ဟူ သူလေဟို
ဘဲ ပုလန်ရှစ်ဟယ်!

33 နန်းနို့ဟို့ ကောန်းဇာလောက်ဟူ လူလေဟို့ဘဲ ကျေးဇူးပြုမယ် ဆိုဟာ ဖယ်မျိုးလောက်ဘီး ကောန်းဂျီးမ ဝ်ဂလာဟို့ နန်းနို့ ခံစားရဟို့နူး။ ပြစ်သားလေလည်း အယ် မျိုးဘဲ လောက်ဟယ်!

34 နန်းနို့ဟို့ ပုလန်ဘီး ဆပ်ပေးလေ့မယ် ဆိုဘီး မျှော်လင့်နေဟူ လူလေဟို့ဘဲ နန်းနို့ ချေးငါးမယ် ဆိုဟာ ဖယ်မျိုးလောက်ဘီး ကောန်းဂျီးမ ဝ်ဂလာဟို့ နန်းနို့ ခံစားရ ဟို့နူး။ ပြစ်သားလေလည်းဘဲ ပုလန်ဘီး ဆပ်ပေးလေ့မယ် ဆိုဇာဟို့ ယောင်ကြည်ဘီး ရှင်းရှင်း ချေးငှားဂေဟယ်!

35 နန်းနို့ရဲ့ ရန်သူဟို့ ရှစ်ဘီး သူးနို့ဟို့ ကောန်းဇာလောက်ဂေ။ တခုခု ပုလန်ရမယ် ဆိုဘီး မြော်လင့်ဘဲန ချေး ငှားဂေ။ အယ်မျိုးလောက်မှ နန်းနို့ရဲ့ ကျိုးဟာ ကီးမား ဘီး နန်းနို့ဟာ ဗြစ်ဆောင်းဖြစ်ဟူ ဘုရားသခင်ရဲ့ သားမီး လေ ဖြစ်လေ့မယ်။ ဖြားဖြစ်ကြောန့်နူးဆိုဟာ ကိုယ်တော် ဟာ ကျေးဇူးကန်းဟူ သူလေန ဆိုးဟူ သူလေဟို့လည်း ကျေးဇူးပြုကြောန့် ဖြစ်ဟယ်။

36 နန်းနို့ ဖဟာ ကရုဏာရှိမျိုးဘဲ နန်းနို့လည်း ကရုဏာ ရှိဂေပါ။

သူတပါးဟို့ စီရင်ဟူကြောန်း

(မသဲ ၇.၁-၅)

37 “သူတပါးဟို့ စစ်ကြောစီရင်ဂေန။ အယ်မျိုးဆိုဟာ ဘုရားသခင်ဟုလည်း နန်းနို့ဟို့ စစ်ကြောစီရင်လေ့ မှဟူ။ သူတပါးဟို့ ရှုတ်ဒုလဂေန။ အယ်မျိုးဆိုဟာ ဘုရားသခင်

ဟုလည်း နန်းနို့ဟို့ ရှောက်ခလဟို့ မှဟု။ သူတပါးဟို့ ပြစ်လွှတ်ဂေ။ အယ်မျိုးဆိုဟာ ဘုရားသခင်ဟုလည်း နန်းနို့ဟို့ ပြစ်လွှတ်လေ့မယ်။

³⁸ သူတပါးဟို့ ပေးဂေ။ အယ်မျိုးဆိုဟာ ဘုရားသခင်ဟုလည်း နန်းနို့ဟို့ ပေးလေ့မယ်။ နန်းနို့ဟာ ပုလဲလျှံလတ်ခံရလေ့မယ်။ နန်းနို့ဟာ သူတပါးဟို့ ပေးဟူ ပမာဏတိုင်း ဘုရားသခင်ဟု နန်းနို့ဟို့ ပေးလေ့မယ်” ဆိုဘီး မိန့်တော်မူလေဟယ်။

³⁹ အယ်ဘီးန ယေရှုဟာ သူးနို့ဟို့ ပေါင်ဥပမာန “မျစ်ကန်းတယော့-က်ဟု တခြားမျစ်ကန်းတယော့-က်ဟို့ လမ်းပြနိုင်ဟု။ လမ်းပြမယ် ဆိုဟာ နှေ့ယော့-က်လောင်းတွမ်းထဲဟို့ ကုလလေ့မယ်။

⁴⁰ တမဲ့လည်း ဆရာထတ် သာဟု။ အယ်ဘေမဲ့ သူးနို့ရဲ့ ပညာသန်ယူဇာ ပီးဆောင်းဟားဟူ ခီမာ တမဲ့ဂူလောင်းဟာ သူးနို့ရဲ့ ဆရာမျိုးဘဲ ဖြစ်လေ့မယ်။

⁴¹ “နန်ဟာ ကိုယ့်မျစ်စိထဲဟု သစ်တောင်းဟို့ ဗြင်ဘဲန နန်ညီကိုရဲ့ မျစ်စိထဲဟု သစ်မုဟို့ ဖြားဖြစ်ကြောန့် ဗြင်ရနို့။

⁴² နန်မျစ်စိထဲဟု သစ်တောင်းဟို့ ဗြင်ဘဲန နန်ညီကိုဟို့ ‘ညီကို၊ နန်မျစ်စိထဲဟု သစ်မုဟားဟို့ ထုပစ်ပေးပါရစေ’ ဆိုဘီး ဖြားဖြစ်ကြောန့် ပြောရနူး။ သူတော်ကောင်းယောန်ဆောန်ဟူသူ! နန်မျစ်စိထဲဟု သစ်တောင်းဟို့ ရင်

ဦးဆောင်း ထုပစ်လိုက်ပါ။ အယ်ဆိုဟာ ညီကိုမျစ်စိထဲဟု သစ်မုတို့ ထုပစ်ပေးတို့တွင် ရှင်းရှင်းလန်းလန်းဟူး မြင်ရ လေ့မယ်။

သီးန ပန်ကြောင်း

(မသေ ၇.၁၆-၂၀; ၁၂.၃၃-၃၅)

⁴³ “သစ်ပန်ကောင်းဟာ သီးညှို့ဟို့ သီးဂေဟု။ အယ်မျိုး ဘဲ သစ်ပန်ညှို့ဟုလည်း သီးကောင်းဟို့ သီးဂေဟု။

⁴⁴ သစ်ပန်တိုင်းဟာ သီးဟို့ ကေ့လိုက်ဟူန သစ်ပန်ရဲ့ ကြောင်းဟို့ သိရလေဟယ်။ နန်းနို့ဟာ ဆူးဗန်ဟုနေ သန်း ဖောသဖန်းသီးဟို့ ဆွတ်ဟို့ ရဂေဟုမျိုးဘဲ ဆူးချောင်ဟု နေ စမျစ်သီးဟို့ ဆွတ်ဟို့ ရဂေဟု။

⁴⁵ လူကောင်းဟာ သူရဲ့ စိန်လောင်း ဘဏ္ဍာတိုက်ထဲဟု ကောင်းဟူဇာလေဟို့ ထောက်ဖော်တတ်ဘီး လူဆိုးဟာ ဆိုးဟူ ဇာလေဟို့ ထောက်ဖော်တတ်ဟယ်။ ဖြားဖြစ်ကြော န်နူးဆိုဟာ နှောက်ဟာ စိန်လောင်းပုလဲ ရှိဒဲတိုင်း ပြောတ တ်ဟယ်။

အိဆော့-က်မားနေ့မျိုးကြောင်း

(မသေ ၇.၂၄-၂၇)

⁴⁶ “ငါဖြားဘဲပြောပြော လောက်ဂေ့ဘဲန နန်းနို့ဟု ငါ့ဟို့ ‘သခင်၊ သခင်’ ဆိုဘီး ဖြားဖြစ်ကြောန့် ခေါ်နေရနူး။

⁴⁷ ငါ့နားဟို့လာဘီး ငါ့စကားဟို့ ကြားဒဲတိုင်း နားထောန် ဟူ သူဟာ ဖယ်သူန တူဟယ် ဆိုဇာ နန်းနို့ဟို့ ငါပြမယ်။

48 အယ်လူဟာ မုလေဂီးဟို့ နတ်နတ်တူးဘီး ကုလော့-က်ထတ်မာ အုပြစ်ခလဘီးမှ အီဆော့-က်မားန တူဟယ်။ ရေကီးတတ်လာဘီးန အယ်အီဟို့ တိုက်ခတ်ဟူ ခီမာ ကုလော့-က်ထတ်မာ ဆော့-က်ဟားဟူကြောန့် တူခါနိုင်ဟူ။

49 အယ်ဘေမဲ့ ငါ့စကားဟို့ ကြားဘီးဟာ နားထောန်ဘဲဟူသူဟာ အုပြစ်ခလဘဲန မုလေဂီးထတ်မာ အီဆော့-က်မားနတူဘီး ရေကီးတတ်လာန အယ်အီဟို့ တိုက်ခတ်လိုက်ဟူ ခီမာ အီဟာ ရှစ်ရှင်းပြီကုလဟားဘီး ဂူလောင်းဟာ ပျစ်စီးဟားဟယ်။” ဆိုဘီး မိန့်တော်မူလေဟယ်။

7

တပ်မှူးရဲ့ ကျွန်ဟို့ နာပျော့-က်စေဟူကြောန်း (မဿဲ ၈.၅-၁၃)

1 ယေရှုဟာ လူလေဟို့ ဂူလောင်း မိန့်တော်မူဘီးန ကိုယ်တော်ဟာ ကပေရနောင်မြို့ဟို့ ကြွဟားလိုက်ဟယ်။

2 အယ်မြို့မာ တပ်မှူးတယော့-က်ရဲ့ ရရာတိုင်း ရှစ်ဟူ ကျွန်တယော့-က်ဟာ ဖျားဘီး သေခါနီး ဖြစ်နေဟယ်။

3 တပ်မှူးဟာ ယေရှုရဲ့ ဒန်းဟို့ ကြားလိုက်ဟူ ခီမာ သူဟာ ယုဒလူမျိုး ကြီးကဲတချို့ဟို့ ကိုယ်တော်နားဟို့ စေလွှတ်ဘီး သူ့ရဲ့ ကျွန်ဟို့ ကယ်တန်ပေးဟို့ တောန်းလျှော့-က်လေဟယ်။

4 သူးနှိုလေဟာ ယေရှုနားဟို့ ရော့-က်ဟူ ခီမာ မြစ်တာ ရပ်ခံဘီး “အယ်တပ်မူးဟာ ကိုယ်တော်ရဲ့ ကျေးဇူးပြုရှင်း ဟို့ ခံထိုက်ဟယ်။

5 သူဟာ ကျွန်တော့်ဟားလေရဲ့ လူမျိုးလေဟို့ ရှစ်ကြော နဲ့ ကျွန်တော့်ဟားလေတွပ် ဝါလယ်ဇရပ်တဆောက်ဟို့ သူ ကိုယ်တိုင် ဆော့-က်ပေးဟားဟယ်” ဆိုဘီး ကိုယ်တော့်ဟို့ လျှော့-က်လေဟယ်။

6 အယ်ကြောနဲ့ ယေရှုဟာ သူးနှိုလေနတူးဒု လိုက်ဟား ဟယ်။ ကိုယ်တော်ဟာ တပ်မူးရဲ့ အီနားဟို့ ရော့-က်ခါနီး မာ တပ်မူးစေလွတ်လိုက်ဟူ မိဆွေလေဟာ ကိုယ်တော့်ဟို့ “သခင်၊ ကိုယ့်ကိုယ်ကိုယ် ပန်ဗန်းခံတော်မူပါန။ ကျွန်တော် ရဲ့ အီးခေါန်မိုးအော့-က်ဟို့ ကိုယ်တော်ဟာ ဝမ်တော်မူရှင်း ကျေးဇူးဟို့ ကျွန်တော်ခံထိုက်ဟယ်။

7 အယ်မျိုးဘွဲ့ ကျွန်တော် ကိုယ်တိုင်လည်း ကိုယ်တော် နား ဟို့ ရော့-က် ထိုက် ဟူ လူ မှ ဟယ်။ မိန့်ပေးလိုက် န ကျွန်တော်ရဲ့ စေခံဟာ ကျန်းမာရပါလေ့မယ်။

8 ဥပမာ ကျွန်တော် ကိုယ်တိုင်လည်း အာဏာပိုင်လတ် အော့-က်မာ ရာရှိတယော့-က် ဖြစ်ဘီး ကျွန်တော်ရဲ့ လတ် အော့-က်မာရှိဟူ စစ်သားလေဟို့ အောက်ချောက်ရပါဟယ်။ တယော့-က်ဟို့ ‘သွား!’ ဆိုဟာ သွားပါဟယ်။ တယော့-က်ဟို့ ‘လာ!’ ဆိုဟာ လာပါဟယ်။ အယ်ဘီးဟာ ကျွန်တော်ဟာ ကျွန်တော့်ရဲ့ ကျွန်ဟို့ မိန့်ပေးလိုက်ဟယ် ‘အယ်မူဇာဟို့ လောက်လိုက်!’ ဆိုဟာ လောက်လေဟယ်”

ဆိုဘီး လျှော့-က်စေဟယ်။

⁹ အယ်စကားဟို့ ယေရှုကြားဟူ ခီမာ အံ့ဩဟွားဘီး ကိုယ်တော်ဟာ ပတ်လည်ဟို့ ကော့ဘီးန နော့-က်တော် ဟို့ လိုက်နေဟူ လူအောက်ဂီးဟို့ “နန်းနို့ဟို့ ငါပြောမယ်။ အယ်မျှလော့-က်ကီးဟူ ယောင်ကြည်ရှင်းမျိုး ကူသရေလ လူမျိုးထဲမာဟို့ ငါလောင်းဝ တွံဖူးဟ့!” ဆိုဘီး မိန့်တော်မူ လေဟယ်။

¹⁰ တပ်မှူးစေလွတ်လိုက်ဟူ လူလေဟာ အီဟို့ ပုလန် ရော့-က်န တပ်မှူးရဲ့ ကျွန်ဟာ ကျန်းမာဟွားဘီ ဆိုဇာဟို့ တွံလိုက်ရဟယ်။

မောက်ဆိုးမရဲ့ သားဟို့ သတ်ရှင်စေဟူကြောင်း

¹¹ နော့-က်တနေမာ*ယေရှုဟာ နာကုန နာမယ်ရှိဟူမြို့ ဟို့ တမဲ့တော်လေန လူအောက်ဂီးနတူးဒ ကြွဟွားတော်မူ ဟယ်။

¹² ကိုယ်တော်ဟာ မြို့ခွမေး-က်နား ရော့-က်ဟူ ခီမာ မောက်ဆိုးမရဲ့ တယော့-က်ဒဲရှိဟူ သားရဲ့ လောင်းဟို့ သ ှ်ဂြိုဟ်ဟို့ မြို့ပုလန်ဟို့ ထွပ်လာဂေဟယ်။ အယ်မောက် ဆိုးမနတူးဒ မြို့သူမြို့သားလေ ဘောင်ဂီးဟာ မသာပို့ လို က်ဂေဟယ်။

¹³ သခင်ဘုရားဟာ အယ်မောက်ဆိုးမဟို့ မြင်တော်မူဟူ ခီမာ ကိုယ်တော်ရဲ့ စိန်လောင်းမာ အယ်မီးမဟို့ သနားစိ

* 7:11 ၇.၁၁ နော့-က်တနေမာ၊ တချို့ မူရင်းလတ်ရေးမူလေမာ ကြာခန်မာ၊ ဆိုဘီး ရှိဟယ်။

ဖြစ်လာတော်မူဘီးန အယ်မီးမဟို “ငိုန” ဆိုဘီး မိန့်တော်မူလေဟယ်။

14 အယ်ဘီးန ကိုယ်တော်ဟာ တလားဟို လတ်န သွားဘီး ထိလိုက်ဟူကြောန့် တလားထမ်းလာဟူ လူလေဟာ ရပ်ဟားဂေဟယ်။ ယေရှုဟ “ကောန်သားဟား! နန့်ဟို ငါပြောမယ်၊ ထပါ!” ဆိုဘီး မိန့်တော်မူလေဟယ်။

15 သေကောန်ဟာ ထထိုင်ဘီးန စကားပြောနေဟယ်။ ယေရှုဟ ကောန်သားဟားဟို သူ့မိဟို ပုလန်ပေးတော်မူလိုက်ဟယ်။

16 လူလေ ဂူလောင်းဟာ ကြော-က်ရွံ့ရှင်းပုလဲန ဘုရားသခင်ဟို ချီးမွမ်းဂေဟယ်။ “နို့လေထဲမာ ပရောဖက်ဂီးပေါ်လာဘီ! ဘုရားသခင်ဟာ သူ့ရဲ့ လူမျိုးဟို ကယ်တန်ဟို ရော-က်လာဘီ!” ဆိုဘီး သူးနို့ဟ ချီးမွမ်းဂေဟယ်။

17 ယေရှုရဲ့ ဒန်းဟာ ယုဒပြည်ဟ စဘီး ပတ်ဝန်းကျင်တခုလောင်းဟို ပုလံန့်ဟားဟယ်။

ဗတုတိဇယောဟန်နားဟ စေတမန်လေကြာန်း
(မသံ ၁၁.၂-၁၉)

18 ယောဟန်ရဲ့ တမဲ့လေဟာ အယ်ကြာန်းရာ ဂူလောင်းဟို သူးနို့ဆရာဟို ပြောပြဟူ ခီမာ သူဟာ တမဲ့လေထဲဟ နှေ့ယော့-က်ဟို ခေါ်လိုက်ဘီးန

19 သခင်ဘုရားနားဟို စေလွှတ်ဘီး “ကိုယ်တော်ဟာ ကြွလာတော်မူမယ် ဆိုဘီး ပြောနေသူလော။ နှော့-က်ထပ်

တယော့-က်ဟို့ မျှော်နေရအူးလော” ဆိုဘီး မေးလျှော့-က် ခိုင်းလေဟယ်။

20 သူးနို့ဟာ ယေရှုနားဟို့ ရော့-က်လာဟူ ခီမာ “ဗတ တိဇိယောဟန်ဟု ကျွန်တော်ဟူးလေဟို့ မေးလျှော့-က် ခိုင်းလိုက်ဟယ်။ ကိုယ်တော်ဟာ ရော့-က်လာမယ် ဆို ဘီး ပြောနေဟူ သခင်လော။ နော့-က်ထပ် တယော့-က် ဟို့ မျှော်နေရအူးလော” ဆိုဘီး မေးလျှော့-က်လေဟယ်။

21 အယ်ခီမာ ယေရှုဟာ လူလေဘောင်ဂီးဟို့ သူးနို့ရဲ့ ဖျားနာရှင်းလေ၊ ရောဂါလေ၊ နတ်ဆိုးဘေးဟုနေ လွတ် မြော့-က်စေဟယ်။ မျစ်စိကန်းဟူ လူလေဟို့ မျစ်စိပုလ န်မြင်စေဟယ်။

22 ကိုယ်တော်ဟာ ယောဟန် စေလွတ်လိုက်ဟူ လူလေ ဟို့ “နန်းနို့လေကြားရ၊ မြင်ရဇာလေဟို့ ပုလန်ဟူးဘီး ယောဟန်ဟို့ ပြောပြဂေ။ မျစ်စိကန်းနေဟူလူလေ မြ င်ဟူးဘီး။ လမ်းရှော့-က်နိုင်ဘဲဟူ လူလေ လမ်းပုလန် ရှော့-က်ဟူးဘီး။ နူနာသည်လေဟာ သန်ရှင်းဟူးဘီး။† နားပန်းနေဟူ လူလေဟာ နားကြားဟူးဘီး။ သေနေဟူ လူ လေဟာ ပုလန်ရှင်ဟူးဘီး။ ဆင်းရဲသားလေဟာ အယ်ဒန်း ကောန်းဟို့ ကြားရဟူးဘီး။

23 ငါ့ဟို့ ငြင်းပယ်ဘဲဟူ လူလေဟာ မင်္ဂလာရှိဟယ်!” ဆိုဘီး ပုလန်ဖြေတော်မူလေဟယ်။

24 ယောဟန် စေလွတ်လိုက်ဟူ လူလေ ပုလန်ဟူးဘီးန

† 7:22 ၇.၂၂ သန်ရှင်းဟူးဘီး၊ ရှု ၅.၁၂။

ယေရှုဟာ ယောဟန်ကြောင်းကို “ယောဟန်ကို တို့တို့ ဆိုဘီး တောကန္တာရထဲကို သွားဟူ ခီမာ ပြားဇာလေ တို့မယ် ဆိုဘီး မျှော်လင့်နူး။ လေတိုက်ကို လှောက်နေဟူ ကျူဗန်လေကို ကေ့ဟို့ သွားဟူဇာလော။

25 ပြားဇာလေကို တို့ရှင်ကြောန့် သွားနူး။ ဝတ်ကောင်းကောင်းဝတ်ဟူ လူကို ကေ့ဟို့ သွားဟူဇာလော။ အယ်မျိုး အံ့ဩဘွယ်ဝတ်ဟူးဘီး စည်းဇိမ်ခံနေဟူ လူလေဟာ နန်းတော်မာဘဲ ရှိဟယ်!

26 ပြားဇာလေ ကေ့ရှင်ကြောန့် သွားနူး။ ငါ့ကို ပြောကေ့။ ပရောဖက်ကို ကေ့ရှင်ကြောန့် သွားဇာလော။ မှန်ပါဟယ်။ အယ်ဘေမဲ့ နန်းနို့ဟာ ပရောဖက်ထတ် ရရာတိုင်း ကီးဟူလူကို မြင်ဟူးဟယ်။

27 ယောဟန်ကို ကျမ်းစာမာ ‘ဘုရားသခင်ဟု ပြောဟယ်။ ငါဟာ သင်သွားမယ့်လမ်းကို ဆင်သင့်ဖြစ်စေဟို့ ငါ့ရဲ့ တမန်ကို နန်းရှေ့မာ စေလွှတ်မယ်’ ဆိုဘီး ပြောဟူးဟယ်။

28 နန်းနို့ကို ငါပြောမယ်။ လောကမာ သတ်ရှင်ဟူးဟူလူလေထဲမာ ယောဟန်ထတ် ကီးမြတ်ဟူ လူမေ့ဟု။ အယ်ဘေမဲ့ ဘုရားသခင်ရဲ့ နိုင်ငံတော်မာ ငယ်ဆောင်းဟူလူဟာ ယောဟန်ထတ် ပိုဘီး ကီးမြတ်ဟယ်” ဆိုဘီး ယေရှုဟုထပ်ဘီး မိန့်တော်မူလေဟယ်။

29 လူလေ ဂူလောင်းဟာ ကိုယ်တော်ရဲ့စကားကို ကြား

ဟူ ခီမာ သူးနို့န ထူးသဖြင့် ခွန်ကော့-က်မားလေဟာ ဘုရားသခင်ရဲ့ ပြောန့်မတ်ရှင်းဟို့ ဝန်ခံဂေဘီး ယောဟန် ပေးဟူ ဗတုတိဇံခံဂေဟယ်။

30 အယ်ဘေမဲ့ ဖာရီရဲလေန ကျမ်းတတ်ဆရာလေဟာ သူးနို့ကိုယ်တိုင်တွပ် ဘုရားသခင်ရဲ့ ကြံစည်တော်ဟို့ ငြင်း ပယ်ဂေဘီး ယောဟန်ရဲ့ ဗတုတိဇံဟို့ ခံဂေဟယ်။

31 ယေရှုဟု ဆစ်ဘီး “ခုခေတ်မာ ရှိနေဟူ လူလေဟို့ ဖြားဇာန နှိုင်းပြရမယ်နူး။ သူးနို့ဟာ ဖြားဇာလေန တူဟု ယ်နူး။

32 သူးနို့ဟာ ဆေးထဲမာ ထိုင်နေဟူ သားဂန်းလေန တူ ဟယ်။ သားဂန်းတအောက်ဟာ တခြား သားဂန်းတအောက်ဟို့ ‘နို့လေဟာ အီတတ်မွဲတီးလောင်းဟို့ နန်းနို့တွပ် တီး မူပေးဘေမဲ့ နန်းနို့ဟာ ကဂေဟု! နို့လေဟာ မသာအီမာ ဆိုဟူ မသာချင်းဟို့ ဆိုဘေမဲ့ နန်းနို့ဟာ ငိုဂေဟု!’ ဆိုဘီး အော်ပြောဂေဟယ်။

33 ဗတုတိဇံယောဟန်ဟာ စာရှောန်ဘီး ဝိုင်ဟို့ သော့-က် ဘဲန ရော့-က်လာဟူကြောန့် နန်းနို့ဟု ‘သူထဲမာ နတ်ဆိုးပူး နေဟယ်!’ ဆိုဘီး ပြောဂေဟယ်။

34 လူရဲ့သားဟာ စားသော့-က်ဘီး ရော့-က်လာဟူ ခီမာ နန်းနို့ဟု ‘အယ်လူဟို့ ကေ့ပါ! အယ်လူဟာ စားမတ်ဘီး ဝိုင်သော့-က်သူ၊ ခွန်ကော့-က်မားလေန ပြစ်သားလေရဲ့ မိဆွေဖြစ်ဟယ်!’ ဆိုဘီး ပြောဂေဟယ်။

35 အယ်ဘေမဲ့လည်း ဘုရားသခင်ရဲ့ ပညာတရားဟို့

လတ်ခံဟု လူလေဟု အယ်ပညာတရားဟာ မှန်ဟယ် ဆို
ဇာဟို့ သတ်သေပြဂေဟယ်” ဆိုဘီး မိန့်တော်မူလေဟယ်။

ဟရိရဲရဲမုန်ရဲ အီမာ ယေရှုရဲနေဟူကြောန်း

³⁶ ဟရိရဲတယော့-က်ဟာ သူနတူးဒု ညဉ့်ဇာစားဟို့ ယေ
ရှုဟို့ တောန်းလျော့-က်တော်မူကြောန်း ယေရှုဟာ ဟရိရဲ
ရဲ အီဟို့ ဝမ်ဘီးန စားမွဲမာ ထိုင်လိုက်ဟယ်။

³⁷ အယ်မြို့မာ ရရာတိုင်း ပြစ်ကီးဟူ မီးမတယော့-က်
ရှိဟယ်။ ဟရိရဲရဲ အီမာ ယေရှုဟာ ညဉ့်ဇာစားနေဟယ်
ဆိုဇာဟို့ အယ်မီးမဟာ ကြားလိုက်ဟူကြောန်း ဆီမွဲး က
လော့-က်ဖုလုဖူးဟို့ ယူဟားဘီးန

³⁸ ယေရှုရဲ ခေတော်ရင်းမာ ရပ်ဘီး ငိုနေဟူကြောန်း
အယ်မီးမရဲ မျစ်ရယ်ဟာ ကိုယ်တော်ရဲ ခေတော်ထတ်
ဟို့ ကုလနေဟယ်။ အယ်ဘီးန အယ်မီးမဟာ သူရဲဆား
ဗန်န ကိုယ်တော်ရဲ ခေတော်ဟို့ ခြော့-က်အောန်သုဘီး
ကိုယ်တော်ရဲ ခေတော်ဟို့ နမ်းဘီး ဆီမွဲးန လူးလေဟယ်။

³⁹ အယ်မူဇာဟို့ ဗြင်နေဟူ ဟရိရဲဟာ “အယ်လူဟာ ပ
ရောဖက် မှန်ဟယ် ဆိုဟာ သူရဲခေဟို့ ကိုင်နေဟူ အယ်
မီးမဟာ ဖယ်မျိုး မီးမဖြစ်ဟယ် ဆိုဇာဟို့ သိလေ့မယ်။
အယ်မီးမဟာ ဖယ်မျိုး ပြစ်သား ဖြစ်ဟယ် ဆိုဇာဟို့ သိ
လေ့မယ်!” ဆိုဘီး သူ့ကိုယ်သူ ပြောနေလေဟယ်။

⁴⁰ ယေရှုဟာ “ရှိမုန်၊ နန့်ဟို့ ငါပြောဇာရှိဟယ်” ဆိုဘီး သူ
ဟို့ မိန့်တော်မူလေဟယ်။

ရှိမုန်ဟု “ပြောပါ၊ ဆရာ” ဆိုဘီး လျှော့-က်လေဟယ်။

41 ယေရှုဟု “ကပ်ကွီးချေးမား တယော့-က်မာ ကပ်ကွီး တန်နေဟူ လူနွေ့ယော့-က် ရှိဟယ်။ တယော့-က်မာ ငွေဒ န်းဂါးပုလားငါးရာ ကပ်ကွီးတန်နေဘီး တခြားတယော့-က် မာ ငွေဒန်ဂါးပုလားငါးဆယ် ကပ်ကွီးတန်နေဟယ်။

42 သူးနို့ နွေ့ယော့-က်လောင်းဟာ ကပ်ကွီးဟို့ ပုလန် ဆပ်နိုင်ဘဲကြောန့် ကပ်ကွီးချေးမားဟာ သူးနို့ရဲ့ ကပ်ကွီး ဂူလောင်းဟို့ ကင်းလွတ်ခွမ် ပေးလိုက်ဟယ်။ အယ်ဆိုဟာ သူးနို့နွေ့ယော့-က်ထဲဟု ဖယ်သူဟာ ကပ်ကွီးချေးမားဟို့ ပိုဘီး ရှစ်လေ့မယ်နူး။”

43 ရှိမုန်ဟု “ကပ်ကွီးဘောင်ဂီး ကင်းလွတ်ခွမ် ပေးခံရဟူ လူဟာ ပိုဘီး ရှစ်လေ့မယ် ထန်ဟယ်” ဆိုဘီး လျှော့-က် လေဟယ်။

ယေရှုဟု “နန်ထန်ဇာ မှန်ဟယ်” ဆိုဘီး မိန့်တော်မူလေ ဟယ်။

44 အယ်ဘီးန ကိုယ်တော်ဟာ အယ်မီးမဖတ်ဟို့ လှည့် ဘီး ရှိမုန်ဟို့ “အယ်မီးမဟို့ နန်မြင်ဘဲလော။ နန်အီဟို့ ငါ လာဟူ ခီမာ နန်ဟာ ငါ့တွပ် ခေဆေးရေဟို့ ပေးဟု။ အယ် ဘေမဲ့ အယ်မီးမဟာ ငါ့ခေဟို့ သူ့မျှစ်ရယ်န ဆေးပေးဘီး ငါ့ခေဟို့ ခြော့-က်အောန် သူ့ဆားဗန်န သုပေးဟယ်။

45 နန်ဟာ ငါ့ဟို့ နမ်းဟု။ အယ်ဘေမဲ့ အယ်မီးမဟာ ငါ့ ခေဟို့ နားဒမ်း နမ်းနေဟယ်။

46 နန့်ဟာ ငါခေါင်းဟို ဆီန လူးပေးဟှ။ အယ်ဘေမဲ့ အယ်မီးမဟာ ငါခေဟို ဆီမီးန လူးပေးဟှယ်။

47 နန့်ဟို ငါပြောမယ်၊ သူဟာ ပြစ်ဘောင်ဂီး ခွမ့်လွတ် ရှင်းခံရကြောန်းဟို သူရဲ့ ကီးမားဟူ မြစ်တာန သတ်သေ ပြနေဟှယ်။ အယ်ဘေမဲ့ ပြစ်နဲနဲဘဲ လွတ်ရှင်းခံရဟူ လူ ဟာ နဲနဲဘဲ ရှစ်ဟှယ်” ဆိုဘီး မိန့်တော်မူလေဟှယ်။

48 အယ်ဘီးန ယေရှုဟာ အယ်မီးမဟို “နန့်ရဲ့ ပြစ်လေ ခွမ့်လွတ်ရှင်းခံရဘီ” ဆိုဘီး မိန့်တော်မူလေဟှယ်။

49 စားဗွဲမာ ထိုင်နေဟူ တခြားလူလေဟှ “ပြစ်လေဟို ခွ မ့်လွတ်ပေးနေဟူ အယ်လူဟှ ဖယ်သူနူး။” ဆိုဘီး သူးနို့ ရှင်းရှင်းပြောနေဂေဟှယ်။

50 အယ်ဘေမဲ့ ယေရှုဟာ အယ်မီးမဟို “နန့်ရဲ့ ယောင် ကြည်ရှင်းဟာ နန့်ဟို ကယ်တန်လိုက်ဘီ။ ငြိသတ်ရှင်းန သွားပါ” ဆိုဘီး မိန့်တော်မူလေဟှယ်။

8

ယေရှုနော့-က်ဟိုလိုက်ဟူ မီးမလေကြောန်း

1 ခီနဲနဲ ကြာဘီးန ယေရှုဟာ မြို့ဝါလေဟို ဖြတ်ကြံ ဟားဘီး ဘုရားသခင်ရဲ့ နိုင်ငံတော်ကြောန်း ဒန်းကောန်း ဟို ဟောတော်မူဟှယ်။ တမဲ့တော် ဆယ့်နှေးယော့-က်ဟာ ကိုယ်တော်နတူးဒု လိုက်ဟားဘီး၊

² ရောဂါဘေး၊ နတ်ဆိုးဘေးလေဟု လွှတ်ဟူးဟူ မီးမတချို့န နတ်ဆိုးခွန်နစ်ကောန်ရဲ့ နှိစစ်ရှင်းဟုနေ လွှတ်ဟူးဟူ မာရိန (မာဂဒလဝါသူ ဆိုဘီး လည်းခေါ်ဟယ်)၊

³ ဟေရုဒ်မန်းဂီးရဲ့ မျစ်နှာလွဲဖြစ်ဟူ ခုဇရဲ့ မယား ယောဟနန၊ ရှုရှနန၊ ယေရှုန တမဲ့တော်လေဟို့ လောက်ကျွေးနေဟူ မီးမတချို့လည်း လိုက်ဟူးဟယ်။

မျိုးစေ့ကြဲမားရဲ့ ပေါင်ဥပမာ

(မဿဲ ၁၃.၁-၉; မာကု ၄.၁-၉)

⁴ မြို့မြို့နယ်နယ်ဟု လာဂေဟူ လူလေဟာ ယေရှုနားမာစုရောင်းဘီးနေဟူ ခီမာ ကိုယ်တော်ဟာ အယ်ပေါင်ဥပမာအားဖြင့်

⁵ “မျိုးစေ့ ကြဲ ဟို့ ထွပ် ဟူး ဟူ မျိုးစေ့ ကြဲ မား တယော့-က်ရှိဟယ်။ သူဟာ မျိုးစေ့ဟို့ ကြဲလိုက်ဟူ ခီမာ တချို့စေ့လေဟာ လမ်းမာကုလဟူကြောန့် အယ်မျိုးစေ့ဟာ နန်းချေရှင်းခံရဘီးန ကောင်းဂန်ငှတ်လေဟု ကော့-က်စားဟူးဟယ်။

⁶ တချို့စေ့လေဟာ ကုလော့-က်ပေါဟူ မုလေမာကုလဘီးန ပန်ပေါ့-က်လာဟူ ခီမာ စိုဓါတ်မွေဘဲဟူ မုလေဖြစ်ဟူကြောန့် ခြေ့-က်ဟူးလေဟယ်။

⁷ တချို့စေ့လေဟာ ဆူးချောင်ကြားမာ ကုလဟူကြောန့် ဆူးဗန်လေနတူးဒူး ကီးလာဘီးဟာ ပန်လေဟို့ အောက်မိုးလိုက်ဟယ်။

⁸ တချို့စေ့လေဟာ ကောင်းဟူမလေမာ ကုလဟူကြော
န့် ပန်လေဟာ ကီးလာဘီး ဆတရာ သီးသီးဟွားဂေဟယ်”
ဆိုဘီး မိန့်တော်မူလေဟယ်။

အယ်ဘီးန ယေရှုဟာ နိဂေါင်းချောက်ဘီး “နန်းနို့မာ နား
ရှိဟယ် ဆိုဟာ ကြားဂေ!” ဆိုဘီး မိန့်တော်မူလေဟယ်။

ပေါင်ဥပမာလေရဲ့ ရည်ရွယ်ချစ်

(မဿဲ ၁၃.၁၀-၁၇: မာကု ၄.၁၀-၁၂)

⁹ တမဲ့တော်လေဟာ အယ်ပေါင်ဥပမာရဲ့ ဓိပါယ်ဟို့ ယေ
ရှုဟို့ မေးလျှော့-က်ဂေဟူကြောန့်၊

¹⁰ ကိုယ်တော်ဟု ပေါင်ဥပမာန “ဘုရားသခင်နိုင်ငံတော်
ရဲ့ နတ်နဲဟူ ကြောန်းရာလေဟို့ နန်းနို့ဟာ သိရပီးဘီ။
တခြားလူလေဟာ ကေ့နေဘေမဲ့ မြင်ဂေ မူဟု။ ကြားနေ
ဘေမဲ့ နားလည်ဂေ မူဟု။ အယ်ကြောန့် ပြောရရှင်း ဖြစ်
ဟယ်။”

မျိုးစေ့ကြဲမားရဲ့ ပေါင်ဥပမာဟို့ ရှင်းပြဟူကြောန်း

(မဿဲ ၁၃.၁၈-၂၃: မာကု ၄.၁၃-၂၀)

¹¹ “အယ် ပေါင် ဥပမာ ရဲ့ ဓိ ပါ ယ် ဟု မျိုး စေ့ ဟာ
ဘုရားသခင်ရဲ့ တရားစကား ဖြစ်ဟယ်။

¹² လမ်းမာကုလဟူ မျိုးစေ့ဟာ တရားစကားဟို့ ကြားရ
ဟူ လူလေဖြစ်ဟယ်။ အယ်ဘေမဲ့ သူးနို့ဟာ ယောင်ကြည်
ဘီး ကယ်တန်ရှင်းဟို့ ရော့-က်စေဘဲ့ဟို့တွပ် မာရ်နတ်ဟာ
လာဘီး တရားစကားဟို့ သူးနို့ရဲ့ နှလောင်းထဲဟုနေ နှလူ
ဟွားဟယ်။

13 ကုလော့-က်ပေါဟူ မုလေမာ ကုလဟူမျိုးစေဟော တရားစကားဟို့ ကြားရဟူ ခီမာ ဝန်းသာအားရန လတ်ခံ ဂေဟူ လူလေဖြစ်ဟယ်။ အယ်ဘေမဲ့ သူးနို့ထဲမာ တရား စကားဟော ပြစ်စွဲဘဲကြောန့် ရှစ်ဟူးဘဲ ယောင်ကြည်ဘီး စောင်ဇမ်းရှင်းလေန တို့ကြောင်ဟူ ခီမာ ဖော့-က်ပုလန် ဟူးဟယ်။

14 ဆူးချောင်မာကုလဟူ မျိုးစေဟော တရားစကားဟို့ ကြားရဘီးန ဘဝရဲ့ စိုးရိမ်ရှင်းလေ၊ စည်းဇိမ်ကြွယ်ဝရှင်း လေ၊ လောက သာယာမှုလေရဲ့ လွှမ်းမိုးရှင်းဟို့ ခံရဟူ ကြောန့် သီးသီးနိုင်ဂေဘဲဟူ သူလေ ဖြစ်ဟယ်။

15 ကောန်းဟူမုလေမာ ကုလဟူ မျိုးစေဟော တရားစ ကားဟို့ ကြားရဘီးန ပြောန့်မတ်စင်ကြယ်ဟူ စိန်လောင်းန ခံယူကြောန့် ခိုင်မြဲဟူ သီးဟို့ သီးဂေဟူ လူလေဖြစ်ဟယ်။

တောန်းအော့-က်မာထားဟူးဟူ ဆီမီးအီကြောန်း
(မာကူ ၄:၂၁-၂၅)

16 “ဖယ်သူလည်း ဆီမီးအီဟို့ ထွန်းဘီးဟာ တောန်း အော့-က်မာ ထားဂေဟူ။ ကဒန်အော့-က်မာလည်း ထား ဟူးဂေဟူ။ အယ်မျိုးထားမယ့်စား ဆီမီးအီဟို့ ဆီမီးခေါင် ထတ်မာဘဲ တန်ဟူးဟယ်။ အယ်မျိုးထားမှဘဲ လူလေ ဟာ အီထဲဟို့ ဝမ်လာခီမာ လန်းရောန်ဟို့ မြင်ရမယ်။

17 “ဝှပ်ဟူးဇာလေ ဂူလောင်း ပေါ်လာလေ့မယ်။ ဖောင်း ဟူးဇာလေ ဂူလောင်းဟာလည်း ပွမ့်ဟူးလေ့ဘီးန လန်း

ရောန်နားဟို့ ယူလာလေ့မယ်။

¹⁸ “အယ်ကြောန့် နန့်ဟုံ ဖယ်မျိုးနားထောန်ရမယ် ဆိုဇာဟို့ ဒိပြုဂေ။ ဖြးဖြစ်ကြောန့်နားဆိုဟုံ ရှိဟုံထပ် ပေးလေ့မယ်။ အယ်ဘေမဲ့ လောင်းဝမေ့ဘဲဟုံ လူလေနားဟုံ သူးနို့မာ နန့်ရှိဟယ် ဆိုဘီး ထန်နေဇာလေဟို့ သီးယူလေ့မယ်” ဆိုဘီး မိန့်တော်မူလေဟယ်။

ယေရှုရဲ့ မိန့် ညီလေကြောန့်

(မသံ ၁၂.၄၆-၅၀; မာကု ၃.၃၁-၃၅)

¹⁹ ယေရှုရဲ့ မိန့် ညီလေဟုံ ကိုယ်တော်နားဟို့ လာဘေမဲ့ လူအောက်ဂီးကြောန့် ကိုယ်တော်နားဟို့ ရော့-က်နိုင်ဘဲ ဖြစ်နေဟယ်။

²⁰ တယော့-က်ဟုံ ယေရှုဟို့ “ကိုယ်တော်ရဲ့ မိန့် ညီလေဟုံ ကိုယ်တော်ဟို့ တွံရှင်ကြောန့် ပုလန်မာ ရပ်စောန်နေဟယ်” ဆိုဘီး လာလျှော့-က်လေဟယ်။

²¹ ယေရှုဟုံ “ဘုရားသခင်ရဲ့ စကားတော်ဟို့ ကြားဘီးဟုံ နားထောန်ဟုံ လူလေဟုံ ငါ့မိ၊ ငါ့ညီလေဖြစ်ဟယ်” ဆိုဘီး သူးနို့လေ ဂူလောင်းဟို့ မိန့်တော်မူလေဟယ်။

လေမူဒိုင်ဟို့ ငြီးစေဟုံကြောန့်

(မသံ ၈.၂၃-၂၇; မာကု ၄.၃၅-၄၁)

²² တနေ့မာ ယေရှုဟုံ တမဲ့တော်လေနတူးဒု လှေထဲဟို့ ဝမ်ဟားဘီးန သူးနို့ဟို့ “အိုင်တဖတ်ဟို့ ကူးဂေဇို” ဆိုဘီး

မိန့်တော်မူလေဟယ်။ အယ်ကြောန့် သူးနို့ဟာ စဘီးကူးဂေဟယ်။

²³ သူးနို့ဟာ ဝပ်လွှမ့်နေဟူ ခီမာ ယေရှုဟာ အိမ့်နေတော်မူဟယ်။ ရောက်တရစ် အိုင်ထဲမာ လေမူဒိုင်းကုလဘီး လှေဟာ ရေနပုလဲခါနီးနီး ဖြစ်ဟူးဟူကြောန့် သူးနို့လေ ဂူလောင်းဟာ ရရာတိုင်း ကြော့-က်လန့်နေဂေဟယ်။

²⁴ တမဲ့တော်လေဟာ ယေရှုနားဟို့ သွားဘီးန ကိုယ်တော့်ဟို့ နှိုးဘီး “သခင်၊ သခင်၊ ကျွန်တော့်ဟူးလေ သေဟို့ဖြစ်နေဂေဘီ!” ဆိုဘီး လျှော့-က်ဂေလေဟယ်။

ယေရှုဟာ အိယာဟု ထလာဘီးန လေနလှိုင်းဟို့ မိန့်ပေးလိုက်ဟူန လေနလှိုင်းလည်း လောက်ဝ ငြိသတ်ဟူးလေဟယ်။

²⁵ အယ်ဘီးမှ ကိုယ်တော်ဟာ တမဲ့တော်လေဟို့ “နန်းနို့ရဲ့ ယောင်ကြည်ရှင်း ဖယ်မာနူး” ဆိုဘီး မိန့်တော်မူလေဟယ်။

သူးနို့ဟာ ကြော့-က်ရွံ့အံ့ဩဘီး “အယ်လူဟု ဖယ်သုနူး။ သူဟာ လေနလှိုင်းလေဟို့ မိန့်ပေးလိုက်န သူးနို့လေဟာ နားထောန်ဂေဟယ်!” ဆိုဘီး သူးနို့ရှင်းရှင်း ပြောနေဂေဟယ်။

နတ်ဆိုးဟို့ နှန်ထုဟူကြောန့်

(မဿဲ ၈.၂၈-၃၄; မာကု ၅.၁-၂၀)

26 ယေရှုန တဗွဲတော်လေဟာ ဂါရစပြည်*ဟို့ ဝပ်လွှမ်ဟူးဘီး ဂီရသဒေသဟာ ဂါလိလဲပြည် အိုင်တဖတ်မာ ရှိဟယ်။

27 ယေရှုဟာ ကမ်းထတ်ဟို့ ခေခလလိုက်ဟူန နတ်ဆိုးလေပူးနေဟူ ဂါရစမြို့သား တယော့-က်ဟာ ကိုယ်တော်ဟို့ လာတို့လေဟယ်။ အယ်လူဟာ ခီကြာဂီး ဝတ်လည်း ဝတ်ဘဲန၊ အီမာလည်းနေဘဲန သန်းခုလိုင်းထဲမာဘဲ နေလေဟယ်။

28 သူဟာ ယေရှုဟို့ မြင်ခီမာ ကိုယ်တော်ရဲ့ ခေတော်ရင်းမာ ပုလားပုလားဝပ်ဘီး “မြင့်ဆောင်းဟူ ဘုရားသခင်ရဲ့ သားတော် ယေရှု! ကိုယ်တော်ဟာ ကျွန်တော်န ဖြားဆိုင်ဟယ်နူး။ ကျွန်တော် တောန်းဗန်ပါဟယ်။ ကျွန်တော့်ဟို့ နှိစစ်ပါန!” ဆိုဘီး သံကုလယ်ဂီးန လျှော့-က်လေဟယ်။

29 အယ်မျိုး တောန်းဗန်နေဇာဟု ယေရှုဟာ ညစ်ညူးဟူ နတ်လေဟို့ အယ်လူထဲဟု ထွပ်ဟူးဟို့ မိန်ပေးတော်မူလိုက်ကြောန့် ဖြစ်ဟယ်။ အယ်လူဟာ နတ်ဆိုးရဲ့ ခါဘီးခါနှိစစ်ဇာဟို့ ခံရဘီး သူ့ရဲ့ ခေလတ်လေဟို့ သံကြိုးလေန ခယ်ဟူးဘီး လှော်နဟူးဘေမဲ့လည်း သူဟာ သံကြိုးလေဟို့ ဆွဲဖြတ်ဘီးဟာ တောကန္တာရထဲဟို့ ထွပ်ပုလေးဟယ်။

30 ယေရှုဟာ “နန်နာမယ် ဖြားမျိုးခေါ်နူး” ဆိုဘီး သူဟို့ မေးတော်မူဟယ်။

* 8:26 ဂ.၂၆ ဂါရစပြည်၊ တချို့ မူရင်းလတ်ရေးမူလေမာ ဂါဒရပြည်၊ ဆိုဘီး ရှိဟယ် (ရှု မ ၈.၂၈)၊ တခြားကျမ်းလေမာ ဂါရဂီသ၊ ဆိုဘီး ရှိဟယ်။

သူ့ထဲမှာ နတ်ဆိုးလေ ဘောင်ဂီးရှိနေဟူကြောင့် သူဟု
“ကျွန်တော်နာမယ်ဟာ ‘လေဂေါင် ဖြစ်ဟယ်’” ဆိုဘီး ပု
လန်လျှော့-က်လေဟယ်။

³¹ နတ်ဆိုးလေဟာ သူးနှိဟို နတ်ဆောင်းတွမ်း†ထဲဟို နှ
န်ခလဘဲဟိုတွပ် ယေရှုဟို တောင်းဗန်ဂေဟယ်။

³² နီးနားဟု တောန်ဂူးထတ်မာ ဝပ်အောက်ဂီးဟာ စာ
စားနေဂေဟယ်။ နတ်ဆိုးလေဟာ သူးနှိဟို အယ်ဝပ်လေ
ထဲဟို ဝမ်ခွမ်ပေးတော်မူဟို တောင်းဗန်ဂေဟူကြောင့် ယေ
ရှုဟာ ခွမ်ပေးလေဟယ်။

³³ နတ်ဆိုးလေဟာ အယ်လူထဲဟု ထွပ်ဟားဘီးန ဝပ်
လေထဲဟို ဝမ်ဟားဟယ်။ ဝပ်အောက်ဂီးဟာ အိုင်ကမ်း
နားဟို ပုလေးဆင်းဟားဘီး ရေမှလောက်သေဟားလေဟု
ယ်။

³⁴ ဝပ်ထီးမားလေဟာ အယ်မျိုး ဖြစ်ဟားဇာလေဟို မြ
င်ဟားကြောင့် သူးနှိဟာ ထွပ်ပုလေးဂေဘီးန မြို့န တော
ဝါလေမာ အယ်ဒန်းဟို လိုက်ပြောဂေဟယ်။

³⁵ လူလေဟာ အယ်မျိုးဖြစ်ဟားဇာလေဟို ကေ့စား
ဟို ထွပ်လာဂေဟူ ခီမာ နတ်ဆိုးလေ ထွပ်ဟားဘီးဟူ လူ
ဟာ ဝတ်ဟို ဝတ်ဟားဘီး ပေါင်မှန်စိန ယေရှုရဲ့ ခေတော်
ရင်းမာ ထိုင်နေဇာဟို တွံလိုက်ကြောင့် သူးနှိလေ ဂူလော
င်းဟာ ကြော့-က်လန်ဟားဂေဟယ်။

† 8:31 ၈.၃၁ နတ်ဆောင်းတွမ်း၊ နှော့-က်ဆောင်းဟူ တရားစီရင်ဟိုခီထံ
နတ်ဆိုးလေဟို တောက်နှောန်ဟားဟိုတွပ် မွေဂီးရဲ့ အော့-က်မာရှိဟူ
တွမ်းဖြစ်ဟယ်။

36 အယ်လူဟာ ဖယ်မျိုးလောက်ဘီး နတ်ဆိုးလေရဲ့ နှိစစ်ရှင်းဟုနေ လွတ်မြော-က်ဟားဟယ် ဆိုဇာဟို့ ကိုယ်တိုင်မြင်ဘီးဟူ လူလေဟု ခုမှရော-က်လာဟူ လူလေဟို့ ပြောပြလေဟယ်။

37 အယ်ဘီးန ဂါရစဒေသဟု လူလေ ဂူလောင်းဟာ ရရာတိုင်း ကြော-က်လန်နေဟူကြောန့် အယ်ဒေသဟု ထွပ်ဟားတော်မူဟို့ ယေရှုဟို့ တောင်းလျော့-က်ဂေဟယ်။ အယ်ကြောန့် ယေရှုဟာ လေ့ထဲဟို့ ဝမ်ဟားတော်မူဘီး န ပုလန်ဟားလိုက်ဟယ်။

38 နတ်ဆိုးလေ ထွပ်ဟားဟူ လူဟာ ယေရှုဟို့ “ကိုယ်တော်နတူးဒု လိုက်ခွမ်ပေးတော်မူပါ” ဆိုဘီး တောင်းခန်လေဟယ်။

အယ်ဘေမဲ့ ယေရှုဟာ သူဟို့

39 “အီဟို့ ပုလန်ဟားဘီး ဘုရားသခင်ဟာ နန့်ဟို့ ဖယ်မျိုး ကျေးဇူးပြုတော်မူဟယ် ဆိုဇာဟို့ သွားဘီး ကြေညာပါ” ဆိုဘီး မိန့်တော်မူလေဟယ်။

အယ်လူဟာ တမြို့လောင်းဟို့ သွားဘီး ယေရှုဟာ သူဟို့ ဖယ်မျိုး ကျေးဇူးပြုလိုက်ဟယ် ဆိုဇာဟို့ ပြောလေဟယ်။

ယာကုရုရဲ့ သမီးန ယေရှုရဲ့ ဝတ်လောင်ဟို့ တို့ထံဟူမီး

မ

(မသံ ၉.၁၈-၂၆; မာကု ၅.၂၁-၄၃)

40 ယေရှုဟာ အိုင်တဖတ်ဟို့ ပုလန်ဟားဟူ ခီမာ လူလေဟာ ကိုယ်တော်ဟို့ ကြိုဆိုဂေဟယ်။ ဖြားဖြစ်ကြောန့်နဲ့ဆို

ဟာ သူးနို့ဟာ ကိုယ်တော့်ဟို့ စောင့်နေဂေကြောန့် ဖြစ်ဟယ်။

41 အယ်ဒီမာ ယာဏုရု နာမယ်ရှိဟူ လူတယော့-က် ရော့-က်လာဟယ်။ သူဟာ ဝါလယ်ဇရပ်မူး ဖြစ်ဟယ်။ သူဟာ ယေရှုရဲ့ ခေတော်ရင်းမာ ပုလားပုလားဝပ်ဘီး သူး အီဟို့ ကြွပေးတော်မူဟို့တွပ် ကိုယ်တော့်ဟို့ တောန်းဗန်နေဟယ်။

42 ပြားဖြစ်ကြောန့်နူးဆိုဟာ သူးရဲ့ တယော့-က်ဒဲရှိဟူ ဆယ့်နှေ့နှစ်ရှယ် သမီးဟာ သေခါနီးဖြစ်နေကြောန့် ဖြစ်ဟယ်။

ယေရှုဟာ သူနတူးဒု လိုက်ဟားဟူ ဒီမာ လူလေဟာ ကိုယ်တော့်ဟို့ တိုးဂေ့နေဂေဟယ်။

43 သူးနို့လေထဲမာလည်း ဆယ့်နှေ့နှစ် လောင်းလောင်း သွီးသွန်နာဖြစ်နေဟူကြောန့် သူးကပ်လေ ဂူလောင်း ကူဒဲထိ ဆရာဝန်လေန ကုဟယ်။‡ အယ်ဘေမဲ့လည်း သူးရောဂါဟို့ ပျော့-က်အောန် ကုနိုင်ဂေဘဲဟူ မီးမတယော့-က်ရှိလေဟယ်။

44 အယ်မီးမဟာ ယေရှုနော့-က်ဟာ ကပ်လိုက်ဟားဘီးန ကိုယ်တော်ရဲ့ ဝတ်လောင်တော်ဟာ ပန်းဗွားဟို့ တို့ထိလိုက်ဟူန အယ်မီးမရဲ့ သွီးသွန်ဇာဟာ ရှင်းရှင်း တိဟားဟယ်။

45 ယေရှုဟာ “ငါ့ဟို့ ဖယ်သူ တို့ထိလိုက်နူး” ဆိုဘီး မေးလိုက်ဟယ်။

‡ 8:43 ဂ.၄၃ တချို့ မူရင်းလတ်ရေးမူလေမာ သူးကပ်လေ ဂူလောင်း ကူဒဲထိ ဆရာဝန်လေန ကုဟယ်။ ဆိုဘီး မှေ့ဟူ။

လူတိုင်းဟု ငြင်းဂေဘီး ပေတရုဟု “သခင်၊ လူလေဟာ ကျွန်တော့်ဟူးလေရဲ့ ပတ်လည်မာရှိနေဘီး ကိုယ်တော့် ဟို့ တိုးဝှေ့နေဂေဟယ်” ဆိုဘီး ပုလန်ဖြေလေဟယ်။

⁴⁶ အယ်ဘေမဲ့ ယေရှုဟု “ငါ့ဟို့ ယော့-က်ယော့-က်ဟု တို့ထိလိုက်ဟယ်။ ငါ့ထဲဟု တဂိုးထွပ်ဟူးဇာဟို့ ငါသိဟယ်” ဆိုဘီး ပုလန်မိန့်တော်မူလေဟယ်။

⁴⁷ အယ်မီးမဟာ သူတို့ထိလိုက်ဇာဟို့ သိဟူးဘီ ဆိုဘီး ကြော့-က်ရွံ့တောင်လောက်နေကြော့န့် ရှေ့ဟို့ ထွပ်လာဘီး ယေရှုရဲ့ ခေတော်ရင်းမာ ပျပ်ဝပ်လိုက်ဟယ်။ လူလေ ဂူလောင်းရဲ့ရှေ့မာ ကိုယ်တော့်ဟို့ ဖြားကြော့န့် တို့ထိရကြော့နီးန ဖယ်မျိုး ရှင်းရှင်း နာပျော့-က်ဟူးကြော့နီးဟို့ ပြောပြလိုက်ဟယ်။

⁴⁸ ယေရှုဟာ အယ်မီးမဟို့ “ငါ့သမီး၊ နန့်ရဲ့ ယောင်ကြည်ရှင်းဟာ နန့်ဟို့ ကျန်းမာစေဘီ။ ငြိသတ်ရှင်းန သွားပါ” ဆိုဘီး မိန့်တော်မူလေဟယ်။

⁴⁹ ယေရှုဟာ အယ်မျိုး ပြောနေဟူ ခီမာဘဲ့ ဝါလယ်ဇရပ်မူးရဲ့ အီဟုနေ လူတယော့-က် ရော့-က်လာဟယ်။ ယာဏုရဟို့ “ကိုယ်တော်ရဲ့ သမီးဟာ သေဟူးဘီ။ ဆရာဟို့ နှောက်ယှစ်ပေးန” ဆိုဘီး သူဟု ပြောလေဟယ်။

⁵⁰ အယ်ဘေမဲ့ ယေရှုဟာ အယ်မျိုးပြောနေဇာဟို့ ကြားဘီးန ယာဏုရဟို့ “စိုးရိမ်န။ ယောင်ကြည်ရှင်းဘဲ့ရှိပါ။ ဝယ်ဟူးဂန်းဟာ ကျန်းမာဟူးလေမယ်” ဆိုဘီး မိန့်တော်မူလေဟယ်။

51 ယာကူရုရဲ့ အီဟို ရော့-က်ဟားဟူ ခီမာ ကိုယ်တော်ဟာ ပေတရု၊ ယောဟန်၊ ယာကုပ်န ဝယ်ဟားဂန်းရဲ့ မိဖလေဟုလွဲဘီး တခြားဖယ်သူဟိုမှ ကိုယ်တော်နတူးဒု အီထဲဟို ဝမ်ခွမ်ပေးဟူ။

52 လူတိုင်းဟာ ဝယ်ဟားဂန်းတွပ် ငိုကြွေးဘီးဝန်းနဲ နေဂေဟယ်။ ယေရှုဟု “ငိုန၊ ဝယ်ဟားဂန်းဟာ သေနေဇာ မှဟူ။ အိမ့်နေဟယ်!” ဆိုဘီး မိန့်တော်မူလေဟယ်။

53 သူးနို့ ဂူလောင်းဟာ ကိုယ်တော်ဟို ရယ်ဇာဂေဟယ်။ ဖြားဖြစ်ကြောန့်နို့ဆိုဟာ ဝယ်ဟားဂန်းဟာ သေနေဘိ ဆိုဇာဟို သူးနို့ သိနေကြောန့် ဖြစ်ဟယ်။

54 အယ်ဘေမဲ့ ယေရှုဟာ ဝယ်ဟားဂန်းရဲ့ လတ်ဟို ကိုင်လိုက်ဘီး “ဝယ်ဟားဂန်း၊ ထဝေါ!” ဆိုဘီး မိန့်တော်မူလေဟယ်။

55 ဝယ်ဟားဂန်းဟာ သတ်ဝိညာဉ် ပုလန်ဝမ်လာဘီး ရှစ်ရှင်းထလေဟယ်။ ယေရှုဟာ ဝယ်ဟားဂန်းဟို စားဇာကျေးဟို သူးနို့ဟို မိန့်တော်မူလိုက်ဟယ်။

56 ဝယ်ဟားဂန်းရဲ့ မိဖလေဟာ ရုရာတိုင်း အံ့ဩဟားဟယ်။ အယ်ဘေမဲ့ ယေရှုဟု အယ်မျိုးဖြစ်ဇာလေဟို ဖယ်သူဟိုလည်း ပြောဘဲဟိုတွပ် သူးနို့ဟို ပညတ်တော်မူလေဟယ်။

တမဲ့တော် ဆယ့်နှစ်ပါးတို့ စေလွှတ်ဟူကြောင်း
(မဿဲ ၁၀.၅-၁၅; မာကု ၆.၇-၁၃)

¹ ယေရှုဟာ တမဲ့တော် ဆယ့်နှစ်ပါးတို့ ခေါ်ဘီး နတ်ဆိုး
လေတို့ နှိပ်စက်တို့ ရောဂါလေ ပျော့-က်စေတို့ သူနီတို့ တ
ဂိုးန ခွမ်အာဏာတို့ ပေးတော်မူဟုယ်။

² အယ်ဘီးန ကိုယ်တော်ဟာ ဘုရားသခင်ရဲ့ နိုင်ငံတော်
ကြောင်း ဟောပြောတို့န လူနာလေ ကျန်းမာစေတို့ သူနီ
တို့ စေလွှတ်တော်မူဘီးန၊

³ သူနီတို့ “ခရီးသွားတို့တွပ် နန်းနီနတူးဒူ ပြားဇာလည်း
ယူဟူးဂေ့န။ တောန်အူး၊ လွယ်အံ၊ စားဇာ၊ ကပ်လေန
အန်းဂီပိုလည်း ယူဂေ့န။

⁴ ဖယ်အီဘဲဖြစ်ဖြစ် နန်းနီတို့ ဝမ်ခွမ်ပြုဟုယ် ဆိုဟာ
အယ်မြို့ဟု ထွပ်ခန်ထိ အယ်အီမာနေဘီး

⁵ လူလေဟု နန်းနီတို့ လတ်ခံဟု ဆိုဟာ အယ်မြို့ဟု
ထွပ်ဟူးဘီး သူနီဟာ လတ်ခံဂေ့ဟု ဆိုဇာတို့ သတ်သေ
ဖြစ်န နန်းနီခေဖွားဟု မုလေမုတို့ ခါခလလိုက်ဂေ့” ဆိုဘီး
မိန့်တော်မူလေဟုယ်။

⁶ တမဲ့တော်လေဟာ ထွပ်ဟူးဘီး ဝါလေဂူလောင်းတို့
သွားဘီးန ရော့-က်ဟူ နေရာတိုင်းမာ ဒန်းကောန်းဟော
ပြောဂေ့ဘီး ရောဂါလေတို့ ပျော့-က်စေဂေ့ဟုယ်။

ဟေရုဒ်စီရှောက်နေဟူကြောင်း

(မဿဲ ၁၄.၁-၁၂; မာကု ၆.၁၄-၂၉)

7 ဂါလိလဲပြည်ဟို့ အောက်ချောက်ဟူ ဟေရုဒ်ဟာ ကိုယ်တော် ပြုတော်မူဟူ ဇာလေ ဂူလောင်းဟို့ ကြားဟူ ခီမာ ရရာတိုင်း စိရောက်ဟူးဟယ်။ ဖြားဖြစ်ကြောန်းနူးဆို ဟာ လူတချို့ဟု ဗတုတိဇိ ယောဟန်ဟာ သေဘီးမှ ပုလန် ရှင်လာဟယ် ဆိုဘီး ပြောနေကြောန်း ဖြစ်ဟယ်။

8 တခြားလူလေဟု ဇေလိယ ပုလန်ပေါ်လာဟယ် ဆိုဇာ ဟို့ ပြောဂေဘီး တခြားလူလေဟုလည်း ရှေးပရောဖက် လေထဲဟု တယော့-က် သေဘီးမှ ပုလန်ရှင်လာဟယ် ဆို ဘီး ပြောနေဂေဟယ်။

9 ဟေရုဒ်ဟု “ငါဟာ ယောဟန်ရဲ့ ခေါင်းဟို့ ဖြတ်လိုက် ပီးဘီ။ အယ်ဆိုဟာ ငါဒန်းကြားနေရဟူ အယ်လူဟာ ဖယ် သူနူး” ဆိုဘီး ပြောလေဟယ်။ အယ်ဘီးန သူဟာ ယေရှု ဟို့ တွံရဟို့ ရှာကြံလေဟယ်။

လူငါးထောန်ဟို့ ကျွေးမွေးဟူကြောန်း

(မသံ ၁၄.၁၃-၂၁; မာကု ၆.၃၀-၄၄; ယောဟန် ၆.၁-၁၄)

10 တမန်တော်လေဟာ ပုလန်ရော့-က်လာဘီးန ယေ ရှုဟို့ သူးနို့ရဲ့ လောက်ဆောန်ချစ်လေ ဂူလောင်းဟို့ လျှော့-က်ဂေဟယ်။ ကိုယ်တော်ဟာ သူးနို့နတူးဒု ဗက်ဇိဒ ဆိုဘီး နာမယ်ရှိဟူ မြို့ဟို့ ကြွဟူးလေဟယ်။

11 လူအောက်ဂီးဟာ အယ်မျိုးကြွဟူးဟယ် ဆိုဇာ ဟို့ ကြားရဟူ ခီမာ ကိုယ်တော်နော့-က်ဟို့ လိုက်ဂေဟု

ယ်။ ကိုယ်တော်ဟု သူးနို့ဟို့ ကြိုဆိုဘီး ဘုရားသခင်ရဲ့ နိုင်ငံတော်ကြောန်းဟို့ ဟောပြောဘီးဟု ရောဂါရှိဟူ သူ လေဟို့ နာပျော့-က်စေဟယ်။

12 ညဉ့်မိုက်ခါနီးခီမာ တဗွဲတော် ဆယ့်နှေ့ပါးဟု ကိုယ် တော်နားဟို့ လာဘီးန “လူလေဟို့ နီးနားမာရှိနေဟူ ဝါလေ ဟို့ သွားစေဘီး အိဟို့နေရာလေန စားဇာလေရှာဟို့ ရှာ စေတော်မူပါ။ ဖြားဖြစ်ကြောန်းနူးဆိုဟု အယ်နေရာဟု လူသူမဲ့ဘဲဟူ နေရာဖြစ်ဟူကြောန်း ဖြစ်ဟယ်” ဆိုဘီး လျော့-က်ဂေဟယ်။

13 အယ်ဘေမဲ့ ကိုယ်တော်ဟု သူးနို့ဟို့ “နန်းနို့ကိုယ်တိုင် သူးနို့စားဟို့ စားဇာတခုပေးဂေ” ဆိုဘီး မိန့်တော်မူလေ ဟယ်။

သူးနို့ဟ “ကျွန်တော့် ဟားလေ ဂူလောင်းမာ မု ငါး လောင်းန ငါးနှေ့ကောန်ဘဲ ရှိဟယ်။ ကိုယ်တော်ဟု အယ် လူအောက်ဂီးတွပ် စားဇာဝယ်ဟို့ ကျွန်တော့်ဟားလေဟို့ သွားစေရှင်လော” ဆိုဘီး ပုလန်လျှောက်ဂေဟယ်။

14 (အယ်လူအောက်ဂီးထဲမာ ယော့-က်ကျား ၅,၀၀၀ လော့-က် ရှိဟယ်။)

ယေရှုဟု တဗွဲတော်လေဟို့ “လူလေဟို့ ငါးဆယ်စီစု ဘီး ထိုင်ခိုင်းလိုက်” ဆိုဘီး မိန့်တော်မူလေဟယ်။

15 တဗွဲတော်လေဟု မိန့်တော်မူလိုက်ဟူတိုင်း လောက် ဘီးန၊

16 ယေရှုဟာ မုငါးလောင်းနဲ့ ငါးနှေ့ကောက်ဟို့ ယူလေဟယ်။ အယ်ဘီးနဲ့ ကောက်နဲ့ဟို့ မော့ကော့ဘီး၊ မုနဲ့ ငါးတွပ်ဘုရားသခင်ဟို့ ချီးမွမ်းဘီး၊ မုဟို့ ဖွဲဘီးနဲ့ လူလေဟို့ ဝီပေးဟို့ တမဲ့တော်လေဟို့ ပေးလေဟယ်။

17 သူးနို့ ဂူလောင်းဟာ ဗိုက်ပုလဲအောက် စားကော့ဘီးနဲ့ တမဲ့တော်လေဟာ ကြွင်းကျန်လေဟို့ လိုက်ကော့-က်ကော့ခြင်းဒေါင်းနဲ့ ဆယ်နှေ့တောက်ပုလဲ ရကော့ဟယ်။

ပေတရုရဲ့ ဝန်ခံချစ်ကြွန်း

(မဿဲ ၁၆:၁၃-၁၉; မာကု ၈:၂၇-၂၉)

18 တနေ့မာ ယေရှုတပါးဒဲ ဆုတောင်းနေဟူ ခီမာ တမဲ့တော်လေဟာ ကိုယ်တော်နားဟို့ လာကော့ဟယ်။ ကိုယ်တော်ဟာ “လူအောက်ဂီးဟာ ငါဟို့ ဖယ်သူ ဆိုဘီး ပြောနေဂေနှူး” ဆိုဘီး သူးနို့ဟို့ မေးတော်မူဟယ်။

19 သူးနို့ဟာ “တချို့ဟာ ကိုယ်တော်ဟာ ဗတုတိဇယောဟန် ဖြစ်ဟယ်။ တခြားလူလေဟာ ကိုယ်တော်ဟာ ဇေလိယ ဖြစ်ဟယ်။ တခြားလူလေဟာ သေဘီးမှ ပုလန်ရှင်လာဟူ ရှေးပရောဖက် တပါးပါး ဖြစ်ဟယ် ဆိုဘီး ပြောကော့ဟယ်” ဆိုဘီး လျှော့-က်လေဟယ်။

20 ကိုယ်တော်ဟာ “နန်းနို့လေဟာမား ငါဟို့ ဖယ်သူဖြစ်ဟယ် ဆိုဘီး ပြောဂေနှူး” ဆိုဘီး သူးနို့ဟို့ မေးတော်မူလေဟယ်။

ပေတရုဟု “ကိုယ်တော်ဟော ဘုရားသခင်ရဲ့ မေရှိယ ဖြစ်ဟယ်” ဆိုဘီး လျှော့-က်လေဟယ်။

သေခံရတို့တွင် ပြောဟူကြောင်း

(မဿဲ ၁၆.၂၀-၂၈; မာကု ၈.၃၀-၉.၁)

²¹ အယ်ဘီးန ယေရှုဟော အယ်ကြောင်းဟို့ ဖယ်သူဟို့ လည်း ပြောဘဲတို့တွင် သူးနို့ဟို့ မိန့်ပေးလေဟယ်။

²² ကိုယ်တော်ဟုလည်း “လူ့ရဲ့သားဟော ရရာတိုင်း နာကျင်ရှင်း ဝေဒနာဟို့ ခံရဘီး ကြီးကဲလေ၊ ယဇ်ပုရောဟိတ်ဂီးလေန ကျမ်းတတ်ဆရာလေရဲ့ ငြင်းပယ်ရှင်းဟို့ ခံရလေ့မယ်။ လူ့ရဲ့သားဟော သေသတ်ရှင်းဟို့ ခံရမယ်။ အယ်ဘေမဲ့ သောင်းရစ် ပုလဲဟူ နေ့မာ လူ့ရဲ့သားဟော ပုလန်ရှင်လေ့မယ်” ဆိုဘီး သူးနို့ဟို့ မိန့်တော်မူလေဟယ်။

²³ အယ်ဘီဟော ကိုယ်တော်ဟော သူးနို့ ဂူလောင်းဟို့ “နန်းနို့ဟု ငါ့တမဲ့ ဖြစ်ရှင်ဟယ် ဆိုဟော ကိုယ့်ကိုယ်ကိုယ် ငြင်းပယ်ဘီး နေ့တိုင်း နန်းနို့ရဲ့ လတ်ဝါးကပ်တိုင်ဟို့ ထမ်းဘီးဟော ငါ့နော့-က်ဟို့ လိုက်ရမယ်။

²⁴ ပြားဖြစ်ကြောန့်ဆိုဟော နန်းနို့ရဲ့ သတ်ဟို့ ကယ်တန်ရှင်ဟယ် ဆိုဟော နန်းနို့ဟော သတ်ရှောင်းလေ့မယ်။ အယ်ဘေမဲ့ ငါ့ကြောန့် နန်းနို့ရဲ့ သတ်ရှောင်းမယ် ဆိုဟော နန်းနို့ဟော နန်းနို့သတ်ဟို့ ကယ်တန်လေ့မယ်။

25 နန်းနို့ဟာ လောက တခုလောင်းဟို့ ပိုင်ဆိုင်ခွဲမ့် ရဘေ
မဲ့လည်း နန်းနို့ရဲ့ သတ်ရှောင်းမယ် ဆိုဟာ ဖြားကျိုးရှိမယ်
နူး။ ဖြားကျိုးလည်းမေ့ဟု!

26 နန်းနို့ဟာ ငါန ငါရဲ့ စကားလေတွပ် ယှစ်နေမယ် ဆို
ဟာ လူရဲ့သားဟာ သူရဲ့ ဖောင်းသရေတော်၊ ဖရဲ့ ဖောင်း
သရေတော်၊ သန့်ရှင်းဟူ ကောင်းဂန်တမန်လေရဲ့ ဖောင်း
သရေတော်န ကြွလာဟူ ခီမာ အယ်လူတွပ် ယှစ်လေ့မယ်။

27 နန်းနို့ဟို့ ငါ မှန်တိုင်းပြောမယ်၊ အယ်နေရာမာ ရှိနေ
ဟူ လူတချို့ဟာ ဘုရားသခင်ရဲ့ နိုင်ငံတော်ဟို့ မြင်ရဘဲန
သေရလေ့ဟို့ မှုဟု” ဆိုဘီး မိန့်တော်မူလေဟယ်။

ဆင်းသဏ္ဌာန် ပုလောန်းလဲဟူကြောင်း

(မသဲ ၁၇.၁-၈; မာကု ၉.၂-၈)

28 ယေရှုဟာ အယ်မျိုးမိန့်တော်မူဘီး တဘတ်လော့-က်
ကြာဟူ ခီမာ ပေတရု၊ ယာကုပ်န ယောဟန်လေဟို့ ခေါ်ဘီး
န ဆုတောင်းဟို့ တောန်ထတ်ဟို့ တတ်ဟူးဂေ့ဟယ်။

29 ကိုယ်တော်ဟာ ဆုတောင်းနေဟူ ခီမာ ကိုယ်တော်ရဲ့
မျှစ်နှာဟာ ဆင်းသဏ္ဌာန် ပုလောန်းလဲဟူးဘီး ဝတ်တော်
ဟာလည်း ဖုလူဆွတ်ဆွတ် ဖြစ်လာဟယ်။

30 လူနွဲ့ယော့-က်ဟာ ရောက်တရစ် ပေါ်လာဘီး
ကိုယ်တော်န စကားပြောနေဂေ့ဟယ်။ သူးနို့ဟာ မောရှေ
န လေိယဖြစ်ဘီး

31 သူးနို့ဟာ ကောန်းဂန်ဖောင်းသရေတော်န ပေါ်လာဘီး ဘုရားသခင်ရဲ့ ရည်ရွယ်ချစ် ပုလဲဇောင်ဟို့တွပ် ကြာခန် မာ ယေရုရှလင်မြို့မာ ကိုယ်တော် သေခံရဟို့ကြောင်းဟို့ ယေရုရှန ပြောနေဂေဟယ်။

32 ပေတရုန သူးရဲ့ လောက်ဖော်ဆောန်ဖတ်လေဟာ အိမ့် နေဂေဟယ်။ အယ်ဘေမဲ့ သူးနို့ဟာ နိုးလာဘီးဟာ ယေရု ရဲ့ ဖောင်းသရေတော်န ကိုယ်တော်နတူးဒု ရပ်နေဟူ လူ နှေ့ယော့-က်ဟို့ မြင်ရဟယ်။

33 အယ်လူနှေ့ယော့-က်ဟာ ယေရုနားဟာ ထွပ်ဟားဟူ ခီမာ ပေတရုဟာ ကိုယ်တော်ဟို့ “သခင်၊ အယ်နေရာ ဟာ နေရှင်ဘွယ်ကောန်းဟယ်၊ ကျွန်တော်ဟားလေဟာ ကိုယ်တော်တွပ် တဲတဆောန်၊ မောရှေတွပ် တဲတဆောန် န ဇလိယတွပ် တဲတဆောန်၊ တဲသောင်းဆောန်ဟို့ ကျွန် တော်ဟားလေ ဆော့-က်ပေးမယ်” ဆိုဘီး လျှော့-က်လေ ဟယ်။ (သူပြောနေဇာဟို့ သူတကယ် သိဂေဟယ်။)

34 သူဟာ အယ်မျိုး လျှော့-က်နေဟူ ခီမာဘဲ့ မိုးတီတ ခု ပေါ်လာဘီးဟာ သူးနို့ဟို့ ဖောင်းဟားလိုက်ဟူကြောန် ကြော့-က်လန်ဟားဂေဟယ်။

35 မိုးတီထဟနေ “အယ်သူဟာ ငါဝီးကော့-က်ဟားဟူ ငါ့ရဲ့ ရှစ်ဟူသား ဖြစ်ဟယ်။ သူစကားဟို့ နားထောန်ဂေ!” ဆိုဘီး သံတော် ထွပ်ပေါ်လာဟယ်။

36 သံတော် ထွပ်ပေါ်လာဘီးန ယေရုတပါးဒဲဟို့ဘဲ့ မြင်ရ

လေဟယ်။ အယ်ဒီမာ တမဲ့တော်လေဟာ မြင်ရဟူဇာလေ
ဂူလောင်းဟို့ ဖယ်သူဟို့လည်း ပြောဘဲန တိတိဟူးနေဂေ
ဟယ်။

ညစ်ညူးဟူနတ်ဟို့ နှန်ထုကြာန်း

(မသ် ၁၇.၁၄-၁၈; မာကု ၉.၁၄-၂၇)

³⁷ နတ်ကီးဖတ်မာ ယေရှုန တမဲ့တော် သောင်းပါးဟာ
တောန်ထတ်ဟုနေ ဆင်းလာဂေဟူ ဒီမာ လူအောက်ဂီးဟာ
ယေရှုဟို့ ကြိုဆိုဂေဟယ်။

³⁸ လူအောက်ဂီးထဲဟုနေ လူတယော့-က်ဟု “ဆရာ!
ကျွန်တော့်ရဲ့ သားဟို့ ကေ့ရှုပေးဟို့ ကျွန်တော်တောင်းဗန်
ပါဟယ်။ သူဟာ ကျွန်တော့်ရဲ့ တယော့-က်ဒဲဟူ သားဖြစ်
ဟယ်!

³⁹ နတ်ဖမ်စားဟူးဟူကြောန့် သူဟာ ရောက်တရစ်
ထအော်ဘီးဟာ ဇတ်ပေါ့-က်ဟု ဖြုတ်လေထွပ်ဘီး
တော့-က်မာလာလေဟယ်။ နတ်ဟာ သူဟို့ နာကျင်အော
န်လောက်ဘီးမှ ခတ်ခတ်ခဲခဲ ထွပ်ဟူးဟယ်!

⁴⁰ ကျွန်တော်ဟာ ဆရာရဲ့ တမဲ့လေဟို့ အယ်နတ်ဟို့ နှန်
ထုခိုင်းဘေမဲ့ သူးနို့ဟာ တတ်နိုင်ဂေဟု” ဆိုဘီး အော်ဟစ်
ဘီး လျော့-က်လေဟယ်။

⁴¹ ယေရှုဟု “ယောင်ကြည်ရှင်းလည်းမေ့။ ဖော့-က်ပုလ
န်ဟူ လူလေ! ငါဟာ နန်းနို့တူးဒူ ဖယ်လော့-က်ကြာအော
န် နေနေရနူး။ ငါဟာ နန်းနို့ဟို့ ဖယ်လော့-က်ကြာကြာ သီး
ခံရဟို့နူး။” ဆိုဘီး မိန့်တော်မူလေဟယ်။ အယ်ဘီးန ကိုယ်

တော်ဟု အယ်လူဟို “နန့်ရဲ့ သားဟို ခေါ်လာပါ” ဆိုဘီး မိန့်တော်မူလေဟယ်။

42 ကောန်သားဟူးဟာ လာနေဒူးမာဘွဲ နတ်ဆိုးဟာ သူ့ဟို မှလေထတ်မာလွဲခဲလဘီး တော့-က်မာအောန် လောကဟယ်။ ယေရှုဟာ ညစ်ညူးဟူနတ်ဟို မိန့်ပေးလိုက်ဘီး ကောန်းသားဟူးဟို ကျန်းမာစေဘီးန သူ့ရဲ့ဖဟို ပုလန်ပေးလေဟယ်။

43 လူလေ ဂူလောင်းဟာ ဘုရားသခင်ရဲ့ မဟာတဂိုးတော်ဟို အံ့ဩဟူးဂေဟယ်။

သေခံရဟိုတွပ် ထပ်ဘီး မိန့်တော်မူဟူကြောင်း
(မသံ ၁၇.၂၂,၂၃; မာကု ၉.၃၀-၃၂)

လူလေဟာ ယေရှု ပြုလောက်ဇလေ ဂူလောင်းဟို အံ့ဩနေခီမာဘွဲ ကိုယ်တော်ဟာ တမဲ့တော်လေဟို

44 “နန့်နို့ဟို ငါမိန့်မာဟူးဇလေဟို မေ့ဂေ့န! လူ့ရဲ့သားဟာ လူလေရဲ့ လတ်ထဲဟို အပ်ရှင်းဟို ခံရလေ့မယ်” ဆိုဘီး မိန့်တော်မူလေဟယ်။

45 အယ်ဘေမဲ့ အယ်စကားဟို တမဲ့တော်လေ နားလည်နိုင်ဘဲအောန် ဓိပါယ်ဟို ဖောင်းဟူးကြောန့် သူးနို့ဟာ နားလည်ဂေဟယ်။ အယ်ဓိပါယ်န ပတ်သတ်ဘီး ကိုယ်တော်ဟို တောန်းလျှော့-က်ဟိုလည်း သူးနို့ ကြော့-က်ဂေဟယ်။

ကီးဆောင်းဟု ဖယ်သူနူး။

(မသံ ၁၈.၁-၅; မာကု ၉.၃၃-၃၇)

46 တဗွဲတော်လေ ကြားထဲမာ ဖယ်သူဟာ ကီးမြတ်ဆောင်း ဖြစ်ဟယ် ဆိုဘီး ဂြင်းခူရှင်းလေ ဖြစ်လာဟယ်။

47 ယေရှုဟာ သူးနို့ ပြားဇာလေ ဂြင်းခူနေဟယ် ဆိုဇာဟို့ စိထဲမာ သိဟူကြောန့် သားဂန်းဟား တယော့-က်ဟို့ ခေါ်ဘီးဟာ ကိုယ်တော်ရဲ့ ဘေးနားမာ ရပ်စေဘီးန၊

48 သူးနို့လေဟို့ “အယ်မူသားဂန်းဟားဟို့ ငါ့နာမနှိုက် လတ်ခံဟူသူဟာ ငါ့ဟို့ လတ်ခံဟယ်။ ငါ့ဟို့ လတ်ခံဟူသူဟာ ငါ့ဟို့ စေလွတ်လိုက်ဟူ သူဟို့လည်း လတ်ခံရှင်းဖြစ်ဟယ်။ အယ်ကြောန့် နန်းနို့ထဲမာ ငယ်ဆောင်းဟူလူဟာ ကီးမြတ်ဆောင်း ဖြစ်ဟယ်” ဆိုဘီး မိန့်တော်မူလေဟယ်။

နန်းနို့ဟို့ ဆန့်ကျင်ဘဲဟူလူဟာ နန်းနို့ဖတ်မာရှိဟူကြောန့်

(မာကု ၉:၃၈-၄၀)

49 ယောဟန်ဟု “သခင်၊ ကိုယ်တော်ရဲ့ နာမန နတ်ဆိုးလေဟို့ နှန်ထုနေဟူ လူတယော့-က်ဟို့ ကျွန်တော့်ဟားလေ တို့ဟားဟယ်။ အယ်လူဟာ ကျွန်တော့်ဟားလေ အောက်စုထဲဟူမှဘဲကြောန့် ကိုယ်တော်ရဲ့ နာမဟို့ သောင်းန ဆိုဘီး တားမြစ်ဟားဟယ်” ဆိုဘီး လျှော့-က်လေဟယ်။

50 ယေရှုဟာ “အယ်လူဟို့ တားမြစ်ဂေ့န။ ပြားဖြစ်ကြောန့်ဆိုဟာ နန်းနို့ဟို့ ဆန့်ကျင်ဘဲဟူ လူဟာ နန်းနို့ဖတ်မာရှိဟူ

ယ်” ဆိုဘီး ယောဟန်န တခြားတမဲ့တော်လေဟို့ မိန့်တော်
မူလေဟယ်။

ယေရှုဟို့ ငြင်းပယ်ဟူ ရှမာရိဝါကြောန်း

51 ယေရှုဟာ ကောန်းဂန်ဘောင်ဟို့ တတ်ကြွဟို့ နီးလာ
ဟူ ခီမာ ယေရုရှလင်မြို့ဟို့ ကြွဟားတော်မူဟို့ စံဆောင်း
ဖြတ်လေဟယ်။

52 ကိုယ်တော်ဟာ စေတမန်လေဟို့ ရှေ့ဟုနေ စေလွှတ်
ဘီး သူးနို့ဟာ ကိုယ်တော်တွပ် ပြင်ဆင်ဟို့ ရှမာရိဝါထဲဟို့
ဝမ်ဂေဟယ်။

53 အယ်ဘေမဲ့ ကိုယ်တော်ဟာ ယေရုရှလင်မြို့ဟို့ ခရီး
ပြုနေဟယ် ဖြစ်ဟူကြောန့် အယ်နေရာမာရှိနေဟူ လူလေ
ဟာ ကိုယ်တော်ဟို့ လတ်ခံဂေဟယ်။

54 အယ်မူဇာဟို့ တမဲ့တော်လေဖြစ်ဟူ ယာကုပ်န ယော
ဟန်လေ ဗြင်ဟားဟူ ခီမာ သူးနို့ဟ “သခင်ဘုရား၊ ကျွန်
တော့်ဟားလေဟာ ဧလိယလောက်ဟူမျိုး ကောန်းဂန်
ဟုနေ မီးကုလစေလိုက်ဘီး သူးနို့ဟို့ လောန်ဟားဟို့
ကိုယ်တော် လိုရှင်လော။”* ဆိုဘီး မေးလျှော့-က်လေဟ
ယ်။

55 အယ်ဘေမဲ့ ယေရှုဟာ လှည့်ကေ့ဘီးန သူးနို့ဟို့
ဆောင်းမလေဟယ်။†

* 9:54 ၉:၅၄ တချို့ မူရင်းလတ်ရေးမူလေမာ ဧလိယလောက်ဟူမျိုး၊
ဆိုဘီး ထပ်ပေါင်းထဲဟားဟယ်။ † 9:55 ၉:၅၅ တချို့
မူရင်းလတ်ရေးမူလေမာ “နန်းနို့ရဟားဟူ ဝိညာဉ်တော်ဟို့ နန်းနို့ သိဂေဟ၊
လူရဲ့သားဟာ လူလေရဲ့ သတ်ဟို့ ဖျစ်ဆီးဟို့တွပ် လာဇာ မူဟ၊ သူးနို့ဟို့
ကယ်တန်ဟို့တွပ် လာဟယ်။” ဆိုဇာဟို့ ထပ်ပေါင်းထဲဟားဟယ်။

56 အယ်ဘီးန ယေရှုဟာ တမဲ့တော်လေန တခြားဝါဟို ဆစ်ဘီး ကြွဟူးတော်မူဟယ်။

ယေရှုရဲ့ နှော့-က်လိုက်ဖြစ်ရှင်ဟူ သူလေကြောန်း
(မသံ ၈.၁၉-၂၂)

57 သူးနို့ဟာ ခရီးဆစ်သွားနေကြောန့် လူတယော့-က် ဟာ ယေရှုဟို “ကိုယ်တော် ဖယ်နေရာသွားသွား ကျွန်တော် လိုက်ပါမယ်” ဆိုဘီး လျှော့-က်လေဟယ်။

58 ယေရှုဟုလည်း “မုလေခွီးမာ တွမ်းရှိဟယ်။ ကောန်း ဂန်ဟု ငှတ်မာလည်း သိုက်ရှိဟယ်။ အယ်ဘေမဲ့ လူရဲ့သား မာဟု ခေါင်းခလဟို့တွပ် နေရာမေ့ဟု” ဆိုဘီး မိန့်တော်မူ လေဟယ်။

59 ကိုယ်တော်ဟာ “ငါ့နှော့-က်ဟို လိုက်ပါ” ဆိုဘီး တခြား တယော့-က်ဟို မိန့်တော်မူလေဟယ်။

အယ်ဘေမဲ့ အယ်လူဟု “သခင်၊ ကျွန်တော့်ဖဟို ရင် ဦးဆောင်း သွားဘီး သင်္ဂြိုဟ်ဟို့တွပ် ခွမ်းပေးပါ” ဆိုဘီး လျှော့-က်လေဟယ်။

60 ယေရှုဟု “လူသေလေဟို လူသေလေဘဲ သင်္ဂြိုဟ် ပါစေ။ နန်ဟာ သွားဘီး ဘုရားသခင်ရဲ့ နိုင်ငံတော်ဟို ဟောပြောပါ” ဆိုဘီး မိန့်တော်မူလေဟယ်။

61 နှော့-က်တယော့-က်ဟုလည်း “သခင်၊ ကျွန်တော် ဟာ ကိုယ်တော့် နှော့-က်တော်ဟို လိုက်ရှင်ဟယ်။ အယ် ဘေမဲ့ ကျွန်တော့်မိသားစုဟို ရင်ဦးဆောင်း နှောက်ဆစ်ခွ မ်ပြုပါ” ဆိုဘီး လျှော့-က်လေဟယ်။

⁶² ယေရှုဟာ သူ့တို့ “ထွန်ဂိုင်းတို့ ကိုင်ဘီး နှော-က်တို့ ပုလန်လှည့်ကေ့ဟူ လူဟာ ဘုရားသခင်ရဲ့ နိုင်ငံတော်တွင် ပေးသော အခွင့်အလမ်းဟု” ဆိုဘီး မိန့်တော်မူလေဟူယ်။

10

တမဲ့တော် ခွန်နစ်ဆယ်နှော့ယော့-က်တို့ စေလွှတ်ကြော
နိုး

¹ အယ်မျိုးမိန့်တော်မူဘီးန သခင်ဘုရားဟာ နှော-က် ထပ် လူ ၇၂ ပါး*တို့ ဝီးကော့-က်တော်မူဘီး၊ နှော့ယော့-က်စီတွဲဘီး ကိုယ်တော်ကိုယ်တိုင် သွားတို့ မြို့ဝါလေတို့ ရင်ဦးဆောင်း စေလွှတ်လေဟူယ်။

² ကိုယ်တော်ဟာ သူးနို့တို့ “ရိုသီးဇာလေ ဘောင်ဂီး ရှိဘေမဲ့ ရိုသီးမားလေဟာ နဲနဲဘဲရှိဟူယ်။ ရိုသီးမားလေ စေလွှတ်ပေးတို့တွင် ဗားဇရှင်တို့ ဆုတောင်းဂေ။

³ သွားဂေ! ဝံပုလွေအောက်ထဲတို့ သိုးသားဂန်းလေတို့ စေလွှတ်ဟူမျိုး နန်းနို့တို့ ငါစေလွှတ်ဟူယ်။

⁴ ကပ်အံ၊ လွယ်အံ၊ ခေနပ်လေတို့ ယူဂေန။ လမ်းမာရပ်ဘီး ဖယ်သူတို့လည်း နှောက်ဆစ်ဂေန။

⁵ နန်းနို့ဟာ အိတအိတတို့ ဝမ်ဟားဟူခီတိုင်း ရင်ဦးဆောင်း ‘အယ်အိမာ ငြိသတ်ရှင်းရှိပါစေ’ ဆိုဘီး နှောက်ဆစ်ဂေ။

* 10:1 ၁၀.၁ ၇၂ ပါး၊ တချို့ မူရင်းလတ်ရေးမူလေမာ ခွန်နစ်ဆယ်၊ ဆိုဘီး ဖော်ပြဟားဟူယ်။ 10:2 ၁၀.၂ မ ၉.၃၇.၃၈ 10:3 ၁၀.၃ မ ၁၀.၁၆ 10:4 ၁၀.၄-၁၁ မ ၁၀.၇-၁၄ မာ ၆.၈-၁၁ လု ၉.၃-၅

6 အယ်အီမာ ငြိသတ်ရှင်းဟို့ ရှစ်မြတ်နိုးသူရှိမယ် ဆိုဟာ နန်းနို့ နှောက်ဆစ်ဟူ ငြိသတ်ရှင်းဟာ အယ်လူထတ်မာ ကျန်ရစ်လေ့မယ်။ ငြိသတ်ရှင်းဟို့ ရှစ်မြတ်နိုးသူ မေ့ဟု ဆိုဟာ နန်းနို့ နှောက်ဆစ်ဟူ ငြိသတ်ရှင်းဟာ နန်းနို့နားဟို့ ပုလန်လာလေ့မယ်။

7 နန်းနို့ဟာ အယ်အီမာနေဘီး သူးနို့ ကျွေးဇာလေဟို့ စားသောက်ဂေ။ ဖြားဖြစ်ကြောန့်နူးဆိုဟာ လောက်လောက်ဟူ သူဟာ လောက်ခဟို့ ရထိုက်ဟယ်။ တအီဟုနေ တအီဟို့ ပုလောန်းဂေန။

8 နန်းနို့ဟို့ လတ်ခံဟူ မြို့ဟို့ဝမ်ဘီး ကျွေးဇာလေဟို့ စားဂေ။

9 အယ်မြို့မာရှိဟူ လူနာလေဟို့ နာပျော့-က်စေဘီး ‘ဘုရားသခင်ရဲ့ နိုင်ငံတော်ဟာ တည်ခါနီးနေဘီ’ ဆိုဘီး အယ်လူလေဟို့ ပြောဂေ။

10 အယ်ဘေမဲ့ နန်းနို့ဟို့ လတ်ခံဘဲဟူ မြို့ဖြစ်မယ် ဆိုဟာ လမ်းထတ်ဟုနေ

11 ‘နန်းနို့ဟို့ ဒိပေးဟူနေန နို့လေရဲ့ ခေဖွားမာ ကပ်နေဟူ နန်းနို့မြို့ဟု မုလေမုလေဟို့ နို့လေ ခါခလလိုက်ဟယ်။ အယ်ဘေမဲ့ ဘုရားသခင်ရဲ့ နိုင်ငံတော်ဟာ တည်ခါနီးနေဘီ ဆိုဇာဟို့ အော့-က်မေ့ဂေ!’ ဆိုဘီး ပြောဂေ။

12 တရားစီရင်ဟူနေမာ ဘုရားသခင်ဟာ အယ်မြို့ထတ်သောဒိုမြို့ဟို့ဘဲ ပိုဘီး ကရုဏာတော် ပြလေ့မယ် ဆိုဇာ

10:7 ၁၀.၇ ၁ ကော ၉.၁၄: ၁ တိ ၅.၁၈ 10:10 ၁၀.၁၀,၁၁ တ ၁၃.၅၁

10:12 ၁၀.၁၂ က မ ၁၁.၂၄: ၁ မ ၁၀.၁၅

ဟို့ ငါ ပြောဟယ်!

ယောင်ကြည်ဘဲဟူ မြို့လေကြောန်း
(မသဲ ၁၁.၂၀-၂၄)

¹³ “ခေါရဇိန်မြို့၊ နန်ဟာ အမင်္ဂလာရှိဟယ်! ဗက်ဇဲဒမြို့၊ နန်ဟာ အမင်္ဂလာရှိဟယ်! နန်းနို့ဟို့ ပြဟားဟူ နိမိတ်လတ်ခဏာလေဟို့ တုရုမြို့န ဇိဒန်မြို့မာ ပြဟားမယ် ဆိုဟာ အယ်မြို့လေဟု လူလေဟာ လျှော်တေဟို့ ဝတ်ဘီးပုလာထဲမာ ထိုင်ဘီး နောက်ဒရဂေလေ့မယ်!

¹⁴ တရားစီရင်ဟူနေမာ ဘုရားသခင်ဟာ နန်းနို့ထတ် တုရုမြို့န ဇိဒန်မြို့လေဟို့ဘဲ ပိုဘီး ကရုဏာပြလေ့မယ်။

¹⁵ ကပေရနောင်မြို့၊ နန်ဟာ အမင်္ဂလာရှိဟယ်! နန်ဟာ ကောင်းဂန်ထိ ချီးမြှော-က်ရှင်းဟို့ ခံရဘောမဲ့လည်း မရဏာနိုင်ငံဟို့ဘဲ ခုလရှင်းဟို့ ခံရလေ့မယ်!” ဆိုဘီး မိန့်တော်မူလေဟယ်။

¹⁶ ယေရှုဟာ တမဲ့တော်လေဟို့ “ဖယ်သူဘဲဖြစ်ဖြစ် နန်းနို့စကားဟို့ နားထောန်ဟူသူဟာ ငါ့စကားဟို့ နားထောန်ဟူသူ ဖြစ်ဟယ်။ ဖယ်သူဘဲဖြစ်ဖြစ် နန်းနို့ဟို့ ငြင်းပယ်ဟူသူဟာ ငါ့ဟို့ ငြင်းပယ်ဟူသူ ဖြစ်ဟယ်။ ဖယ်သူဘဲဖြစ်ဖြစ် ငါ့ဟို့ ငြင်းပယ်ဟူ လူဟာ ငါ့ဟို့ စေလွှတ်လိုက်ဟူ လူဟိုလည်း ငြင်းပယ်ဟူလူ ဖြစ်ဟယ်” ဆိုဘီး မိန့်တော်မူလေဟယ်။

တမဲ့တော် ခွန်နစ်ဆယ်နေ့ပါး ပုလန်ရော့-က်လာဟူ
ကြောန်း

17 တမဲ့တော် ၇၂ ပါး†ဟာ ရရာတိုင်း ဝန်းသာဘီး ပု
လန်ရော့-က်လာဂေဘီး “သခင်၊ ကျွန်တော့်ဟားလေဟာ
ကိုယ်တော်ရဲ့ နာမန နတ်ဆိုးလေဟို နှန်ထုလိုက်ဟူ ခီမာ
သူးနို့လေဟာ နားထောန်ဘီးဟာ ထွပ်ဟားဂေဟယ်!” ဆို
ဘီး လျှော့-က်ဂေဟယ်။

18 ယေရှုဟာ “စာတန်ဟာ ကောန်းဂန်ဟုနေ လျှပ်စစ်
ဖြန့်မျိုး ကုလလာဇာဟို ငါမြင်ရဟယ်။

19 နားထောန်ဂေ! နန်းနို့ဟာ ဗွီလေန ကန်းမီးဂေါ့-က်
လေ ထတ်မာ လမ်းရှော့-က်နိုင်ဘီး ရန်သူရဲ့တဂိုး အာဏာ
လေ ဂူလောင်းဟို နိုင်ရဟူ ခွမ့်အာဏာလေဟို ငါပေးဟား
ပီးဘီ ဖြစ်ဟူကြောန် ဖယ်ဘေးလည်း နန်းနို့ဟို ညဉ်းဆဲ
လေ့ မူဟူ။

20 အယ်ဘေမဲ့ နန်းနို့ဟာ နတ်ဆိုးလေဟို နှန်ထုနိုင်ဟူ
ကြောန် ဝန်းသာဂေန။ နန်းနို့ရဲ့ နာမယ်ဟာ ကောန်းဂန်
စာရင်းမာ ရေးဟားပီးဘီ ဖြစ်ဟူကြောန် ဝန်းသာဂေ” ဆို
ဘီး သူးနို့ဟို မိန်တော်မူလေဟယ်။

ယေရှု ဝန်းသာတော်မူဟူကြောန်း
(မာကု ၁၁.၂၅-၂၇; ၁၃.၁၆-၁၇)

† 10:17 ၁၀.၁၇ ၇၂ ပါး၊ တချို့ မူရင်းလတ်ရေးမူလေမာ ခွန်နစ်ဆယ်၊
ဆိုဘီး ဖော်ပြဟားဟယ် (ရှု ခန်းငယ် ၁)။

21 အယ်ဒီမာ ယေရှုဟာ သန့်ရှင်းဟူ ဝိညာဉ်တော်အားဖြင့် ရရာတိုင်း ဝန်းသာနေဘီး “ကောင်းဂန်ဘောင်န မုလေဂီးရဲ့သခင် ဖြစ်တော်မူဟူဖ! ကိုယ်တော်ဟာ ပညာရှိလေန ဉာဏ်ကောင်းဟူ သူလေတွပ် ဝှပ်ဟားဟူ ဇာလေဟို ပညာတတ်ဘဲဟူ သူလေဟိုဘဲ ဖွမ်ပြပေးဟူ ကြောန့် ကိုယ်တော့်ဟို ကျေးဇူးတန်ဟယ်။ မှန်ပါဟယ် ဖ၊ အယ်မူဇာဟာ ရှေ့တော်မာ နှစ်သက်ဖွယ် ဖြစ်ပါဟယ်။

22 “နို့ဖဟာ ရှိမျှဂူလောင်း ငါ့ဟို ပေးဟားပီးဘီ။ အယ်သားဟာ ဖယ်သူဖြစ်ဟယ် ဆိုဇာဟို ဖဟလွဲဘီး ဖယ်သူလည်း သိဂေဟ။ ဖဟာ ဖယ်သူ ဖြစ်ဟယ် ဆိုဇာဟိုလည်း အယ်သားန အယ်သားတော်ဟ ဖွမ်ပြဟိုတွပ် ဝီးကော့-က်ဟားဟူ သူလေမှတပါး ဖယ်သူလည်း သိဂေဟ” ဆိုဘီး မိန့်တော်မူလေဟယ်။

23 အယ်ဘီးန ယေရှုဟာ တမဲ့တော်လေဖတ်ဟို လှည့်ဘီးန သူးနို့ဟို “နန်းနို့ ခုမြင်နေရဟူ ဇာလေဟို မြင်ရဟူ ကြောန့် နန်းနို့မျှစိဟာ မင်္ဂလာရှိဂေဟယ်!

24 နန်းနို့ဟို ငါပြောမယ်။ နန်းနို့ မြင်ရဟူ ဇာလေဟို ပရောဖက်လေန မန်းဂီးလေဟာ မြင်ရှင်ဘေမဲ့လည်း သူးနို့ဟာ မြင်ရဂေဟ။ နန်းနို့ ကြားရဟူ ဇာလေဟိုလည်း သူးနို့ ကြားရဂေဟ” ဆိုဘီး မိန့်တော်မူလေဟယ်။

‡ 10:21 ၁၀.၂၁ သန့်ရှင်းဟူဝိညာဉ်တော်အားဖြင့်၊ တချို့မူရင်းလတ်ရေးမူလေမာ ဝိညာဉ်တော်အားဖြင့် ဆိုဘီး ဖော်ပြဟားဟယ်။ တချို့ မူရင်းလတ်ရေးမူလေမာ ကိုယ်တော်ရဲ့ ဝိညာဉ်ထဲမာ၊ ဆိုဘီး ဖော်ပြဟားဟယ်။ 10:22 ၁၀.၂၂ က ယော ၃.၃၅; ခ ယော ၁၀.၁၅

ကောင်းဟူ ရှုမာရိရဲ့ ပေါင်ဥပမာ

25 ကျမ်းတတ်ဆရာ တယော့-က်ဟာ ထလာဘီးဟာ ယေရှုဟို “ဆရာ၊ ထာဝရသတ် ရရှိဟို့တွပ် ပြားလောက် ရမယ်နူး။” ဆိုဘီး ပညာစမ်းရှင်ဟူကြောန့် မေးလျှော့-က် လေဟယ်။

26 ယေရှုဟာ “ပညတ်တော်မာ ပြားဇာလေ ပြောဟား နူး။ နန်းနို့ ဖယ်မျိုးဖတ်ဟားနူး။” ဆိုဘီး သူဟို မေးတော် မူလေဟယ်။

27 အယ်လူဟ “နန်းရဲ့သခင်၊ ဘုရားသခင်ဟို စိန် လောင်းကြွင်းမဲ့၊ ဉာဏ်စွမ်းကြွင်းမဲ့၊ ကိုယ်စွမ်းရှိမျှန ရှစ် ပါ။ အယ်ဘီးဟာ နန်းရဲ့ အီဇနီးရှင်းဟို နန်းကိုယ်နန် ရှစ်မျိုး ဘဲရှစ်ပါ” ဆိုဘီး ပုလန်လျှော့-က်လေဟယ်။

28 ယေရှုဟာ “နန်ဖြေဇာဟာ မှန်ဟယ်။ အယ်မျိုးလောက် မယ် ဆိုဟာ နန်ဟာ သတ်ရှင်ရလေ့မယ်” ဆိုဘီး မိန့်တော် မူလေဟယ်။

29 အယ်ဘေမဲ့ အယ်ကျမ်းတတ်ဆရာဟာ ပြောန့်မတ် ကြောန်းပြရှင်ဟူကြောန့် ယေရှုဟို “ကျွန်တော့်ရဲ့ အီဇနီးရှင်းဟာ ဖယ်သူနူး။” ဆိုဘီး သူဟာ မေးတော်မူလေဟယ်။

30 ယေရှုဟာ “လူတယော့-က်ဟာ ယေရှုရှလင်မြို့ဟာ နေ ယေရိခေါမြို့ဟို ဆင်းလာဟူ ခီမာ မှလတိုက်ခံရလေ ဟယ်။ မှလလေဟာ သူရဲ့ အန်းဂီးလေဟို ခလွတ်ဘီး၊

ရိုက်သတ်ဘီးဟာ သေခါနီးနီး ဖြစ်နေဟူ ခီမာ ပစ်ဟွားဘီး ထွပ်ဟွားဟယ်။

31 အယ်မျိုးဖြစ်ဘီးန ယဇ်ပုရောဟိတ် တပါးဟာ အယ်လမ်းတိုင်း ရှော့-က်လာဟူ ခီမာ အယ်လူဟို ဗြင်ဘေမဲ့လည်း ရှော့နဘီးဟာ သွားလေဟယ်။

32 အယ်မျိုးဘဲ့ လေဝိတယော့-က်လည်း ရှော့-က်လာဘီး အယ်လူဟို ကော့ဘီးန ရှော့နဘီးဟာ သွားလေဟယ်။

33 အယ်ဘေမဲ့ ရှမာရိလူမျိုး တယော့-က်ဟာ ခရီးသွားရင်းန အယ်လူရိုဟူ နေရာဟို ရှော့-က်လာဟယ်။ သူဟာ အယ်လူဟို ဗြင်လိုက်ဟူ ခီမာ သနားစိလေ ဖြစ်လာဟယ်။

34 သူဟာ အယ်လူနားဟို သွားဘီး အယ်လူရဲ့ ဒန်ရာလေထတ်ဟို ဆီနဝိုင်ဟို လောန်းထဲဘီးဟာ ဝတ်န စဲပေးလေဟယ်။ အယ်ဘီးန သူရဲ့ မြည်းထတ်ဟို တန်ဘီးန လူနာဟို ပြုစုပေးဟို့တွပ် တည်းခိုခန်းဟို ခေါ်ဟွားဟယ်။

35 နတ်ကီးတိုင်မာ သူဟာ ဇရှင်ဟို ငွေဒန်းဂါးနွေ့ပုလားပေးဘီး ‘အယ်လူဟို ကော့ရှုပြုစုပေးပါ။ နော့-က်ထပ် ကူကုလဇာလေဟို ငါပုလန်လာဟူ ခီမာ ပေးမယ်’” ဆိုဘီး ပြောလေဟယ်။

36 ယေရှုဟာ “အယ်လူလေ သောင်းယော့-က်ထဲမာ ဖယ်သူဟာ မှလတိုက်ခံရသူန အီဇနီးရှင်းဖြစ်ဟယ် ဆိုဘီး နန်ထန်နူး။” ဆိုဘီး မေးတော်မူလေဟယ်။

37 ကျမ်းတတ်ဆရာဟ “လူနာဟို သနားဟူလူ ဖြစ်ဟယ်” ဆိုဘီး လျော့-က်လေဟယ်။

ယေရှုဟု “အယ်ဆိုဟာ နန်သွားဘီး အယ်မျိုးလောက် ပါ” ဆိုဘီး မိန့်တော်မူလေဟယ်။

မာသန မာရိအီဟို အီးခလယ်သွားဟူကြောင်း

³⁸ ယေရှုန တဗဲတော်လေဟာ ခရီးသွားနေဒူးမာ ဝါတ ဝါဟို ဝမ်ဂေလေဟယ်။ အယ်ဝါမာ မာသနာမယ်ရှိဟူ မီး မဟာ သူအီမာ ကိုယ်တော့်ဟို ဧည့်ခံလေဟယ်။

³⁹ မာသမာလည်း မာရိနာမယ်ရှိဟူ ညီမတယော့-က် ရှိဟယ်။ အယ်ညီမဟာ သခင်ဘုရားရဲ့ ခေတော်ရင်းမာ ထိုင်ဘီးန ကိုယ်တော်ရဲ့ စကားတော်ဟို နားထောန်နေလေ ဟယ်။

⁴⁰ မာသဟာ ဧည့်ဝတ်ပြုရှင်းမှုလေကြောန့် စိပူပန်ဘီး ကိုယ်တော့်ဟို “သခင်၊ ကျွန်မဟာ ဧည့်ဝတ်ပြုရှင်းလော က်ဟို လောက်နေရဟူ ဒီမာ ကျွန်မညီမဟု ကိုယ်တော် ရဲ့ ခေတော်ရင်းမာ လာထိုင်နေဇာဟာ မျှတမှုရှိဘဲလော။ ကျွန်မဟို ကူညီပေးဟို သူဟို ပြောပေးအူး!” ဆိုဘီး လျှော့-က်လေဟယ်။

⁴¹ သခင်ဘုရားဟု “မာသ၊ မာသ! နန်ဟာ အယ်မူကိစ လေတွပ်ဘဲ စိုးရိမ်ပူပန်နေဟယ်။

⁴² အယ်ဘေမဲ့ နန်မာ လိုအပ်နေဟူဇာ တခုဘဲရှိဟယ်။ မာရိဟာ ပိုကောင်းဟူဇာဟို ဝီးကော့-က်ဟားပီးဘီ။ အယ် မူဇာဟို သူနားဟုနေ ဖယ်သူလည်း ယူရဟို မူဟု” ဆိုဘီး သူဟို မိန့်တော်မူလေဟယ်။

11

ဆုတောင်းနည်း သန်ပေးဟူကြောင်း
(မသံ ၆.၉-၁၃; ၇.၇-၁၁)

¹ တနေ့ ယေရှုဟာ တနေရာမှာ ဆုတောင်းနေဟယ်။
ကိုယ်တော်ဟာ ဆုတောင်းပီးဟူးဟူ ခီမာ တမဲ့တော်လေ
ထဲဟု တယော့-က်ဟု “သခင်၊ ယောဟန်ဟာ သူတမဲ့လေ
ဟို့ ဆုတောင်းနည်းသန်ပေးမျိုး ကျွန်တော့်ဟူးလေဟို့
လည်း သန်ပေးတော်မူပါ” ဆိုဘီး လျှော့-က်လေဟယ်။

² ယေရှုဟု “နန်းနီလေ ဆုတောင်းဟူ ခီမာ
“ကောင်းဂန်ဘောင်မာ ရှိတော်မူဟူ။
ကိုယ်တော် ရဲ့ နာမ တော် ဟို့ ရှိသေလေးမြတ် ရှင်း
ရှိပါစေ။
နိုင်ငံတော် တည်ထောင်ပါစေ။

³ ကျွန်တော့်ဟူးလေတွပ် လိုအပ်ဟူ စားဇာဟို့* နေ့စဉ်နေ့
တိုင်း ပေးသနားတော်မူပါ။

⁴ ကျွန်တော့်ဟူးလေဟို့ ပြစ်မှားဟူ သူလေရဲ့ ပြစ်လေဟို့
ကျွန်တော်ဟူးလေ ခွင့်လွှတ်ပေးဟူမျိုးဘဲ
ကျွန် တော့် ဟူး လေ ရဲ့ ပြစ် လေ ဟို့ လည်း ခွ မ့်
လွှတ်ပေးပါ။

ပြစ်သွီးဆောက်ဟူ နှော့-က်ဟို့ လိုက်ပါသွားစေဘဲနာ၊

* 11:3 ၁၁.၃ ကျွန်တော့်ဟူးလေတွပ် လိုအပ်ဟူ စားဇာဟို့၊
အယ်မျိုးမှုဘဲနေဟာ နတ်ကီးတိုင်တွပ်စာ။

ကောင်းဘဲဟူ လေဟုလည်း ကယ်နှုပေးပါ” ဆို
ဘီး သူးနို့ဟို မိန့်တော်မူလေဟယ်။

⁵ အယ်ဘီးန ယေရှုဟာ “နန်းနို့ထဲဟု ယော့-က်ယော့-က်
ဟာ ညဉ့်နတ်ဟူ ခီမာ အယ်မိဆွေရဲ့ အီဟိုသွားဘီး ‘မိဆွေ၊
ကျွန်တော့်ဟို မုသောင်းလောင်းချေးပါ။

⁶ ကျွန်တော့်မိဆွေ တယော့-က်ဟာ ခရီးဟုနေပုလန်လာ
ဘီး ကျွန်တော့်အီဟို ရော့-က်လာဟယ်။ သူ့ဟို ကျွေးဟို
ဖြားလည်းမေ့ဘဲဖြစ်နေဟယ်!’ ဆိုဘီး ပြောလေဟယ်။

⁷ နန်းမိဆွေဟာ အီထဲဟုနေ ‘ငါ့ဟို နှော့-က်ယုန်န! ခွ
ဗော့-က်လည်းပိဟားပီးဘီ။ ငါ့သားမီးလေန ငါလည်း အံ
ယာဝမ်နေဘီ။ ငါထဘီး နန်းဟို ဖြားဇာလည်း ပေးနိုင်ဟု’
ဆိုဘီး ပုလန်ပြောလေမယ်။

⁸ နန်းနို့ဟို ငါပြောမယ်၊ အယ်လူဟာ သူ့မိဆွေ ဖြစ်ဟု
ယ် ဆိုဇာဟို ထော့-က်ဘီး ဖြားဇာဟိုမျှ ထဘီး ပေးဘဲနေ
ဘေမဲ့လည်း အားလျော့ဘဲန တောင်းနေဟူကြောန့် ထဘီး
လိုရှင်ဇာလေ ဂူလောင်းဟို ပေးလေမယ်။

⁹ အယ်ကြောန့် နန်းနို့ဟို ငါပြောမယ်။ တောင်းဂေ့။ တော
န်းမယ် ဆိုဟာ ရဂေ့လေမယ်။ ရှာဂေ့။ ရှာမယ် ဆိုဟာ တို့
ဂေ့လေမယ်။ ခွဗော့-က်ဟို ခေါ့-က်ဂေ့။ ခေါ့-က်မယ် ဆို
ဟာ ဖွမ်ပေးလေမယ်။

¹⁰ တောင်းဟူသူဟာ ရလေဟယ်။ ရှာဟူသူဟာ တို့လေ
ဟယ်။ ခွဗော့-က်ဟို ခေါ့-က်ဟူသူဟာ ခွဗော့-က်ဟို ဖွမ်
ပေးလေမယ်။

11 နန်းနို့မာ ဖယ်မျိုးဖဟာ သားမီးလေဟု ငါးဟို့ တော
န်းဟူ ခီမာ ငါးဟို့ ပေးဘဲန ဗွီဟို့ ပေးဟို့လော။

12 ကြစ်ဥဟို့ တောန်းဟူ ခီမာ ကန်းမီးဂေါ-က်ဟို့ ပေး
ဟို့လော။

13 နန်းနို့ဟာ ကောန်းဘဲဟူသူလေ ဖြစ်ဘေမဲ့လည်း နန်း
နို့ရဲ့ သားမီးလေဟို့ ကောန်းဟူဇာလေဟို့ဘဲ ပေးဟယ် ဆို
ဟာ ကောန်းဂန်ဘောင်မာ ရှိတော်မူဟူ နန်းနို့ဖဟာ တောင်း
ဟူလူလေဟို့ သန်ရှင်းဟူဝိညာဉ်တော်ဟို့ ပိုဘီး ပေးတော်
မူလေ့မယ်!” ဆိုဘီး တမဲ့တော်လေဟို့ မိန့်တော်မူလေဟ
ယ်။

ယေရှုန ဗေလဇေဗုလကြောင်း

(မသဲ ၁၂.၂၂-၃၀; မာကု ၃.၂၀-၂၇)

14 ယေရှုဟာ အ,နေဟူ နတ်ဆိုးဟို့ နှန်ထုလေဟယ်။
နတ်ဆိုးထွပ်ဟားဘီးန အ,နေဟူသူဟာ စကားပြောလာဟူ
ကြောန့် လူအောက်ဂီးဟာ ရရာတိုင်း အံ့ဩဟားဟယ်။

15 အယ်ဘေမဲ့ လူတချို့ဟ “ကိုယ်တော်ဟာ နတ်ဆိုး
မန်း ဗေလဇေဗုလဟု ပေးဟားဟူတဂိုးန နတ်ဆိုးလေဟို့
နှန်ထုဂေဟယ်” ဆိုဘီး ပြောဂေဟယ်။

16 တချို့ဟ ယေရှုဟို့ စမ်းသပ်ရှင်ဂေဟူကြောန့် ကော
န်းဂန်ဘောင်ဟု နိမိတ်လတ်ခဏာတခုဟို့ ပြကေ့ ဆိုဘီး
တောန်းဆိုဂေဟယ်။

17 အယ်ဘေမဲ့ ယေရှုဟာ သူးနို့လေရဲ့ ကြံစည်ဟို့ သိနေဟူကြောန့် “နိုင်ငံတနိုင်ငံမာ လူလေကွဲပြားဘီး ရှင်းရှင်းတိုက်ခိုက်နေမယ် ဆိုဟာ အယ်နိုင်ငံဟာ ကြာခန်မာ ပျစ်စီးဟွားလေ့မယ်။ အီထောန်တခုမာ အီသူအီသားလေ ကွဲပြားဘီး ရှင်းရှင်းတိုက်ခိုက်နေမယ် ဆိုဟာ အယ်အီထောန်ဟာ ပျစ်စီးဟွားလေ့မယ်။

18 အယ်ကြောန့် စာတန်ရဲ့ နိုင်ငံဟာ ကွဲပြားမယ် ဆိုဟာ ဖယ်မျိုး ရပ်တည်နိုင်မယ်နူး။ ငါဟာ ဗေလဇေဗုလ ပေးဟွားဟူတဂိုးန နတ်ဆိုးလေဟို့ နှန်ထုဟယ် ဆိုဘီး နန်းနို့ ပြောဂေဟယ်။

19 ငါဟာ ဗေလဇေဗုလ ပေးဟွားဟူတဂိုးန နတ်ဆိုးလေဟို့ နှန်ထုဟယ် ဆိုဟာ နန်းနို့ရဲ့ တမဲ့လေဟာ ဖယ်သူပေးဟွားဟူ တဂိုးန နှန်ထုဂေနူး။ နန်းနို့ရဲ့ တမဲ့လေဟာ နန်းနို့ရဲ့ တရားသူဂီးလေ ဖြစ်ဟယ်!

20 ငါဟာ ဘုရားသခင်ရဲ့ တဂိုးတော်အားဖြင့် နတ်ဆိုးလေဟို့ နှန်ထုဟယ်။ အယ်ကြောန့် ဘုရားသခင်ရဲ့ နိုင်ငံတော်ဟာ နန်းနို့ထဲမာ တည်ထောန်နေဘီ။

21 “ခွန်အားကီးဟူလူဟု လတ်နတ်စောင်န သူ့အိဝမ်းဟို့ စောန်နေဟူ ခီမာ သူ့အောက်စာလေဟာ လောင်ခြောင်နေဟယ်။

22 အယ်ဘေမဲ့ အယ်သူထတ် ခွန်အားကီးဟူလူဟု ရော-က်လာဘီး သူ့ဟို့ တိုက်ခိုက်အောန်မြင်ဟွားဟူ ခီမာ သူ့အားကိုးဟူ လတ်နတ်စောင်လေဟို့ သီးယူဘီး ရရှိဟွား

ဟူ ပစ်စီးလေဟို ခွဲတမ်းခလလေ့မယ်။”

23 “ငါ့ဖတ်မာ နေဘဲဟူသူဟာ ငါ့ရန်ဖတ်ဖြစ်ဟယ်။ ငါ့
နတူးဒု စုသီးဘဲဟူသူဟာ ကြဲဖြန့်နေဟူသူ ဖြစ်လေဟယ်။

ညစ်ညူးဟူနတ် ပုလန်ဝမ်ပူးကြောင်း
(မဿဲ ၁၂.၄၃-၄၅)

24 “ညစ်ညူးဟူ နတ်ဟာ လူထဲဟု ထွပ်ဟူးဘီး
ခြွေ-က်ကပ်ဟူ နေရာမာ ခိုနားရာဟို ရှာလေဟယ်။ တို့
ဟု ဆိုဟာ ‘ငါဟာ နေရာဟောင်းဟိုဘဲ ပုလန်မယ်’ ဆိုဘီး
ပြောလေဟယ်။

25 နေရာဟောင်းဟို ပုလန်ရော့-က်ဟူ ခီမာ သန်ရှင်း
အောန် ခါဟူးဇာဟို တို့လေဟယ်။

26 သူထတ်ပိုဆိုးဟူ ညစ်ညူးဟူနတ် ခွန်နစ်ကောန်ဟို
ခေါ်လာဘီးဟာ အယ်နေရာဟောင်းမာဘဲ နေလေဟယ်။
အယ်ကြောန့် အယ်လူရဲ့ နော့-က်ဖြစ်ဟူ ဇာဟာ ရှေ့ဖြစ်
ဟူ ဇာထတ် ပိုဘီး ဆိုးဝါးလေဟယ်” ဆိုဘီး မိန့်တော်မူ
လေဟယ်။

စစ်မှန်ဟူ မင်္ဂလာကြောင်း

27 ယေရှုဟာ အယ်မျိုးပြောလိုက်ဟူ ခီမာ လူအောက်
ဂီးထဲဟု မီးမတယော့-က်ဟာ ကိုယ်တော့ဟို “ကိုယ်တော့
ဟို မိုးဘီး နို့တိုက်ဟူ မီးမဟာ မင်္ဂလာရှိဟယ်!” ဆိုဘီး
လျှော့-က်လေဟယ်။

28 အယ်ဘေမဲ့ ယေရှုဟု “ဘုရားသခင်ရဲ့ စကားတော်
ဟို့ ကြားဘီး နားထောန်ဟူလူဟာ မင်္ဂလာရှိဟယ်!” ဆိုဘီး
ပုလန်မိန်တော်မူလိုက်ဇာဟု၊

နိမိတ်လတ်ခဏာတောန်းဟူကြန်း
(မသံ ၁၂.၃၈-၄၂)

29 လူအောက်ဂီးဟာ ယေရှုနားမာ ဝိုင်းအောင်နေဟူ
ကြောန့် ကိုယ်တော် မိန်တော်မူလိုက်ဇာဟု “ခုခေတ် လူ
လေဟာ ရရာတိုင်း ဆိုးညစ်ဂေဟယ်! သူးနို့ဟာ နိမိတ်
လတ်ခဏာဟို့ တောန်းဘေမဲ့ ယောနရဲ့ နိမိတ်လတ်ခဏာ
မှတပါး ဖယ်နိမိတ်လတ်ခဏာလည်း သူးနို့ဟို့ ပြလေ့မယ်
မူဟု။

30 နိနဝေမြို့သားလေတွပ် ယောနဟာ နိမိတ်လတ်ခဏာ
ဖြစ်ဟူ မျိုးဘွဲ့ အယ်ခေတ် လူလေတွပ် လူရဲ့သားဟာ
လည်း နိမိတ်လတ်ခဏာ ဖြစ်လေ့မယ်။

31 ရှေ့ဘပြည်ဟု မိဖုရားဟာ ရှောလမုန် မန်းဂီးရဲ့ စကား
ဟို့ နားထောန်ဟို့ ဆိုဘီး ဟိုးဝီးဂီးမာရှိနေဟူ တိုင်းပြည်ဟု
နေ လာဟယ်။ အယ်နေရာမာ ရှောလမုန်ထတ် ကီးမြတ်
ဟူလူ ရှေ့-က်ရှိနေဘီ။ တရားစီရင်တော်မူဟူ နေ့မာ ရှေ့
ဘပြည်ဟု မိဖုရားဟာ ထရပ်ဘီး အယ်မူလူလေဟို့ ပြစ်
တန်စွပ်စွဲလေ့မယ်။

32 တရားစီရင်ဟူ နေ့မာ နိနဝေမြို့သားလေဟာ ထရပ်
ဘီး နန်းနို့ဟို့ စွပ်စွဲလေ့မယ်။ ဖြားဖြစ်ကြောန့်နူးဆိုဟာ

ယောနဟောပြောဟူ တရားကို ကြားရဟူ ခီမာ သူးနို့ဟာ နောက်ဒရဟူးကြောန့် ဖြစ်ဟယ်။ အယ်နေရာမာ ယောန ထတ် ရရာတိုင်း ကီးမြတ်ဟူသူ ရှိဟယ် ဆိုဇာ နန်းနို့ဟို ငါ ပြောဟယ်။”

ကိုယ်ခန္ဓာရဲ့ ဆီမီးအီ

(မသဲ ၅.၁၅; ၆.၂၂,၂၃)

³³ “ဖယ်လူလည်း ဆီမီးအီဟို ဖောင်းကွယ်ဘီး ထွန်းဂေဟု။ ဆီမီးအီဟို တောင်းအော့-က်မာ ထားဘီး †လည်း ထွန်းဂေဟု။ အီထဲဟို ဝမ်လာဟူ လူလေဟာ လန်းရောန်ရ ဟို့တွပ် ဆီမီးခေါင်ထတ်မာ တန်ဘီး ထွန်းဂေဟယ်။

³⁴ မျစ်စိဟာ ကိုယ်ခန္ဓာတွပ် ဆီမီးအီန တူဟယ်။ မျစ်စိ ကောင်းဟယ် ဆိုဟာ နန်းနို့ရဲ့ ကိုယ်ခန္ဓာ တခုလောင်း လန်းဟူးဘီး မျစ်စိကောင်းဂေဟု ဆိုဟာ နန်းနို့ရဲ့ ကိုယ်ခန္ဓာ တခုလောင်း မိုက်လေ့မယ်။

³⁵ အယ်ကြောန့် နန်းနို့ရဲ့ လန်းရောန်ဟို မိုက်ဖြစ်ဘဲအော န် ဒိပြုဂေ။

³⁶ နန်ရဲ့ ကိုယ်ခန္ဓာ တခုလောင်းဟာ လောင်းဝ မှောက်ဘဲ န လန်းနေမယ် ဆိုဟာ ဆီမီးအီရဲ့ တော့-က်ပဟူ လန်းဟာ နန်ထတ်မာ ထွန်းလန်းမျိုး နန်ရဲ့ ကိုယ်ခန္ဓာ တခုလောင်း လည်း လန်းရောန်န တော့-က်ပနေလေ့မယ်” ဆိုဘီး မိန့်တော်မူလေဟယ်။

11:33 ၁၁.၃၃ မ ၅.၁၅; မာ ၄.၂၁; လု ၈.၁၆ † **11:33 ၁၁.၃၃** တချို့ မူရင်းလတ်ရေးမူလေမာ ဆီမီးအီဟို တောင်းအော့-က်မာ ထားဘီး၊ ဆိုဇာဟာ မေ့ဟု။

ဖာရိရှဲန ကျမ်းတတ်ဆရာလေဟံ ပြစ်တန်ဟူကြောင်း
(မဿဲ ၂၃.၁-၃၆; မာကု ၁၂.၃၈-၄၀)

37 ယေရှုဟာ အယ်မျိုးမိန့်တော်မူဘီးန ဖာရိရှဲတ
ယော့-က်ဟာ ကိုယ်တော့်ဟံ သူနတူးဒု စားသော့-က်ဟံ
တောန်းလျှော့-က်ဟူကြောန် သူရဲ့ အိထံဟံ ဝမ်ဘီးန ဗွဲမာ
ထိုင်တော်မူလေဟယ်။

38 ယေရှုဟာ လတ်ဆေးဘဲန စာစားနေဇာဟံ ဖာရိရှဲ ဗြ
င်ဟားဟူ ခီမာ အံ့ဩဟားလေဟယ်။

39 သခင်ဘုရားဟု သူဟံ “နန်းနို့ ဖာရိရှဲလေဟာ စံဟန်း
ဇားလေရဲ့ ပုလန်ဖတ်ဟံ စင်ကြယ်အောန် ဆေးဂေဟယ်။
အယ်ဘောမဲ့ နန်းနို့ရဲ့ စိထံမာ ကြမ်းဖတ်ရှင်း၊ ဆိုးညစ်ရှင်း
လေန ပုလဲနေဟယ်။

40 လူမိုက်လေ! ပုလန်ဖတ်ဟံ ဖန်ဆင်းဟူ ဘုရားဟာ တွ
မ်းဖတ်ဟံလည်း ဖန်ဆင်းဟယ် ဆိုဇာဟံ သိဂေဟလော။

41 အယ်ဘောမဲ့ နန်းနို့ရဲ့ ခွပ်လေ၊ စံလေထံမာ ရှိဟူဇာ
လေဟံ ဆင်းရဲသားလေဟံ ပေးကမ်းဂေပါ။ အယ်မျိုး
လောက်မယ် ဆိုဟာ ဂူလောင်းဟာ နန်းနို့တွပ် စင်ကြယ်
ဟားလေမယ်။”

42 “ဖာရိရှဲလေ၊ နန်းနို့ဟာ အမင်္ဂလာရှိဟယ်၊ နန်းနို့ဟာ
ပန်ဇီး၊ စမူစဗားန တခြားဆေးဖပ်ဝမ်ဟူ ဝပ်ဘောန်းဇောင်
ဟံ ဆယ်ဖို့တဖို့ ပေးလူဂေဟယ်။ အယ်ဘောမဲ့ တရားမျှတ
မှုန ဘုရားသခင်ရဲ့ ရှစ်မြစ်တာလေဟံ လျစ်လူရှဟားဂေ
ဟယ်။ နန်းနို့ဟာ ဆယ်ဖို့တဖို့ဟံ ပေးလူဟူ ခီမာ တရား

မျှတမှုနဲ့ ဘုရားသခင်ရဲ့ ရှစ်မြစ်တာဟို့ ချန်ဟားဂေဟယ်။”

43 “ဟရိရှဲလေ၊ နန်းနို့ဟာ အမင်္ဂလာ ရှိဂေဟယ်! နန်းနို့ဟာ ဝါလယ်ဇရပ်မာ ဆိုလည်း မြင့်မြတ်ဟူ နေရာလေဟို့ရော၊ ဆေးမာ ဆိုလည်း လူလေရဲ့ ရိုးရိုသေးသေ နှော့-က် ဆစ်ရှင်းလေဟို့ရော နှစ်သက်ဂေဟယ်။

44 နန်းနို့လေဟာ အမင်္ဂလာရှိဂေဟယ်! နန်းနို့ဟာ မှတ်သားမှုဘဲဟူ သန်းခလိုင်ဒွမ်းန တူဂေဟယ်။ အယ်တွမ်းလေထတ်မာ သွားနေဟူ လူလေဟု သန်းခလိုင်ဒွမ်းဖြစ်မှန်း သိဂေဟယ်” ဆိုဘီး မိန့်တော်မူလေဟယ်။

45 ကျမ်းတတ်ဆရာ တယော့-က်ဟာ ကိုယ်တော့်ဟို့ “ဆရာ၊ အယ်မျိုးပြောဇာဟာ ကျွန်တော့်ဟားလေဟို့လည်း စော်ဂါးရာရော့-က်ပါဟယ်!” ဆိုဘီး လျှော့-က်လေဟယ်။

46 ယေရှုဟု “ကျမ်းတတ်ဆရာလေ၊ နန်းနို့ လည်းဘဲ အမင်္ဂလာ ရှိဂေဟယ်! နန်းနို့ဟာ ထမ်းဟို့ခတ်ဟူ ဝန်ထောက်လေဟို့ လူလေဟို့ ထမ်းခိုင်းဂေဟယ်။ နန်းနို့ ကိုယ်တိုင်ဟု အယ်မူဝန်ထောက်လေဟို့ လတ်ဖျားန ထိဂေဟယ်။

47 နန်းနို့ဟာ အမင်္ဂလာ ရှိဟယ်! နန်းနို့ရဲ့ ဘိုးဘေးလေ သတ်ဟားဟူ ပရောဖက်လေတွပ် နန်းနို့ဟု သန်းခလိုင်လေဟို့ ဆော့-က်ပေးဂေဟယ်။

48 အယ်ကြောန့် နန်းနို့ရဲ့ ဘိုးဘေးလေ ကျူးလွန်ဟားဟူ မူလေတွပ် နန်းနို့ဟာ သတ်သေလေ ဖြစ်ဂေဟယ်။ သူးနို့

လေဟာ ပရောဖက်လေဟို သတ်ဘီး နန်းနို့ဟု သန်းခလိုင်လေဟို ဆော့-က်ပေးဂေဟယ်။

49 အယ်ကြောန့် ဘုရားသခင်ရဲ့ ရွှေဉာဏ်တော်နဲ့ ‘အယ်လူလေထဲဟို ပရောဖက်လေ၊ စေတမန်လေဟို ငါစေလွှတ်မယ်။ သူးနို့လေဟာ အယ်ပရောဖက်လေ၊ စေတမန်လေထဲဟု တချို့ဟို ညှဉ်းဆဲဘီး တချို့ဟို သတ်ဂေလေ့မယ်’ ဆိုဘီး မိန့်တော်မူဟူးဟယ်။

50 အယ်ကြောန့် ကမ္ဘာတည်ခီဟုနေစဘီး သတ်ခံရဟူ ပရောဖက်လေရဲ့ သွီးကြောန့် အယ်ခေတ်လူလေဟာ ပြစ်ဒန်စီရင်ရှင်းဟို ခံရဂေလေ့မယ်။

51 အာဗေလရဲ့ သွီးဟုနေ ယဇ်ပလ္လင်နဲ့ ဗိမာန်တော်ကြားမာ သတ်ခံရဂေဟူ ဇာခရီရဲ့ သွီးထိ ဖြစ်ဟယ်။ အယ်မူဇာလေ ဂူလောင်းတွပ် အယ်ခေတ်လူလေဟာ ပြစ်ဒန်စီရင်ရှင်းဟို ခံရလေ့မယ် ဆိုဇာဟို ငါမှန်တိုင်း ပြောဟယ်!

52 “ကျမ်းတတ်ဆရာလေ၊ နန်းနို့ဟာ အမင်္ဂလာရှိဂေဟယ်! နန်းနို့ဟာ သိပညာဗိမာန် ခွဲဗေါ့-က်သော့ဟို သီးဟူးဘီး နန်းနို့ကိုယ်တိုင်လည်း ဝမ်ဂေဟု။ ဝမ်ဟိုသူလေဟိုလည်း တားဆီးဂေဟယ်!” ဆိုဘီး မိန့်တော်မူလေဟယ်။

53 အယ် နေ ရာ ဟု နေ ယေရှု ထွပ် ဟူး ဟူ ခီ မာ ကျမ်းတတ်ဆရာနဲ့ ဖာရိရှဲလေဟာ ကိုယ်တော့ဟို စဘီးဟာ ပြင်းပြင်းထန်ထန် ဝေဖန်ဂေဘီး၊

54 စကားတော်ထဲမာ မှားရှာဟိုတွပ် မေးခွန်းလေ ဘောငင်ဂီးမေးဂေလေဟယ်။

12

သူတော်ကောင်း ယောန်ဆောန်ရှင်းနု ပတ်သတ်ဘီး ဒိ ပေးဟူကြောင်း

(မသံ ၁၀.၂၆,၂၇)

¹ ထောန်ဗောင်းဘောင်ဂီးရှိဟူ လူလေဟာ စုဝီးလာဟူ ခီမာ သူးနို့ရှင်းရှင်း နန်းမိဂေဟူကြောန် ယေရှဟာ တမဲ့ တော်လေဟို “ဖာရိရှဲလေရဲ့ ဟန်ဆောန်မုနတူဟူ တဆေး ဟို ဒိပြုဂေ။

² ဖောင်းဟူးဟူ အလေ ဂူလောင်းဟာ ပွမ်လာရလေ့ မယ်။ ဝှပ်ဟူးဟူ အလေ ဂူလောင်းဟာလည်း ပေါ်လာရ လေ့မယ်။

³ အယ်ကြောန် မှောန်ထဲမာ နန်းနို့ပြောဟူ စကားလေ ဟို လန်းရောန်ထဲမာ ကြားသိလေ့မယ်။ အီခန်းထဲမာ နန်း နို့ တိုးတိုးပြောနေဟူ စကားလေဟို အီးခေါန်မိုးထတ်ဟု နေဘီး ကြေညာဂေလေ့မယ်။”

ကြော-က်ရဟိုလူကြောင်း

(မသံ ၁၀.၂၈-၃၁)

⁴ “ငါ့မိဆွေလေ၊ နန်းနို့ဟို ငါပြောမယ်။ ကိုယ်ခနုဓာဟို ဘဲ သတ်နိုင်ဘီးဟာ နော-က်ထပ် ဖြားလည်းလောက်နိုင် ဘဲဟူ သူလေဟို ကြော-က်ဂေန။

⁵ နန်းနို့ကြော-က်ရဟို သူဟို ငါပြောမယ်။ ကိုယ်ခနုဓာဟို သတ်ဘီးန နန်းနို့ဟို ငရဲထဲခလနိုင်ဟူ ခွမ်အာဏာရှိဟူ

ဘုရားသခင်ဟို့ ကြော့-က်ဂေ။ နန်းနို့ဟို့ ငါထပ်ပြောမယ်။
ဘုရားသခင်ဟို့ ကြော့-က်ဂေ!

6 “အီးဇာဟား ငါးကောန်ဟို့ ကပ်နေ့ပုလားန ရောန်းဂေ
ဟွယ် မူဟုလော။ အယ်ဘေမဲ့ ဘုရားသခင်ဟာ အယ်မူ
အီးဇာဟားလေ တကောန်ဟို့မျှ မေ့တော်မူဟု။

7 နန်းနို့ ခေါန်းဟု ဆားဗန်လေ ဂူလောင်းဟို့ ရေတွပ်
ဟားဟွယ်။ အယ်ကြောန့် ကြော့-က်ဂေန။ နန်းနို့ဟာ အီး
ဇာဟားလေထတ် ရရာတိုင်း ဖိုးကီးဟွယ်!

ခရစ်တော်ဟို့ ဝန်ခံရှင်းန ငြင်းပယ်ရှင်းကြောန်း
(မသံ ၁၀.၃၂,၃၃; ၁၂.၃၂; ၁၀.၁၉,၂၀)

8 “နန်းနို့ဟို့ ငါပြောမယ်။ ဖယ်သူဘဲဖြစ်ဖြစ် လူလေ
ရှေ့မာ ငါ့ဟို့ ဝန်ခံမယ် ဆိုဟာ လူ့ရဲ့သားဟုလည်း
ဘုရားသခင်ရဲ့ ကောင်းဂန်တမန်လေရှေ့မာ အယ်သူဟို့
ဝန်ခံလေ့မယ်။

9 အယ်ဘေမဲ့ လူလေရှေ့မာ ငါ့ဟို့ ငြင်းပယ်မယ် ဆိုဟာ
လူ့ရဲ့သားဟုလည်း ဘုရားသခင်ရဲ့ ကောင်းဂန်တမန်လေ
ရှေ့မာ ငြင်းပယ်လေ့မယ်။

10 “လူ့ရဲ့သားဟို့ နှောက်န စော်ဂါးဟူ သူဟာ ပြစ်လွတ်
ရှင်းခွမ်း ရနိုင်ဘေမဲ့လည်း သန်ရှင်းဟူဝိညာဉ်တော်ဟို့
ပြစ်မှားဘီး ပြောဆိုဟူ သူဟာ ပြစ်လွတ်ရှင်းခွမ်း ရလေ့
မယ် မူဟု။

11 “လူလေဟု နန်းနို့ဟို့ ဝါလယ်ဇရပ်လေ၊ လူဂီးမန်းလေ၊ အာဏာပိုင်လေရဲ့ ရှေ့ဟို့ ခေါ်ဆောန်လာဟူ ခီမာ ဖယ်မျိုး ပုလန်ပြောရမယ် ဆိုဇာဟို့ စိုးရိမ်ဂေ့န။

12 ဖြားဖြစ်ကြောန်နူးဆိုဟာ နန်းနို့ ဖယ်မျိုး ပြောရမယ် ဆိုဇာဟို့ သန်ရှင်းဟူဝိညာဉ်တော်ဟု အယ်ခီမာ သန်ပေးလေ့မယ်” ဆိုဘီး ရင်ဦးဆောင်း မိန့်တော်မူလေဟယ်။

ဌေးမိုက် ပေါင်ဥပမာကြောန်း

13 လူအောက်ဂီးထဲဟု လူတယော-က်ဟာ ယေရှုဟို့ “ဆရာ၊ ကျွန်တော့်ဟို့ မွီခွဲပေးဟို့ ကျွန်တော့်နောက်ဟို့ ပြောပေးပါ” ဆိုဘီး လျှော့-က်လေဟယ်။

14 ယေရှုဟု “မိဆွေ၊ ဖယ်သူဟု ငါ့ဟို့ နန်းနို့ရဲ့ တရားသူဂီးဖြစ်နရော၊ မွီခွဲဝိသူဖြစ်နရော ခန်ဟားဂေ့ဟယ်နူး။” ဆိုဘီး သူ့ဟို့ မိန့်တော်မူလေဟယ်။

15 အယ်ဘီးန ကိုယ်တော်ဟာ သူးနို့လေ ဂူလောင်းဟို့ “လောဘလွန်ကျူးရှင်း ဘောန်းဇောင်ဟို့ ဒိထားဂေ့။ ဖြားဖြစ်ကြောန်နူးဆိုဟာ လူ့ရဲ့ သတ်ဟာ အောက်စာပစ်စီး ပေါရှင်းနှိုက် တည်ဂေ့ဟု” ဆိုဘီး မိန့်တော်မူလေဟယ်။

16 အယ်ဘီးန ယေရှုဟာ ပေါင်ဥပမာန “တခါဒူးဟု ဌေးတယော-က်ဟာ သူလယ်ယာဟုနေ သီးနှံလေ ဘောင်ဂီးထွပ်ဟယ်။

17 ‘ငါ့ရဲ့ သီးနှံလေ ဂူလောင်းဟို့ သိုလှောင်ဟူးဟို့တွပ်
နေရာ မွေဟူ။ ငါဖယ်မျိုးလောက်ရမယ်နူး။’ ဆိုဘီး တ
ယော့-က်ဒဲ စဉ်းစားနေလေဟယ်။

18 အယ်ဘီးန သူဟူ ‘ငါ အယ်မျိုးလောက်မယ်။ အယ်
ဂိုဒေါန်ဟောန်းဟို့ ဖျစ်ဘီး အယ်ထတ် ပိုကီးဟူ ဂိုဒေါန်ဟို့
ဆော့-က်ဘီးဟူ ရျောင်ဆန်လေန တခြားအောက်စာပစ်
စီး ဂူလောင်းဟို့ သိုလှောင်ဟူးမယ်။

19 အယ်ဘီးဟူ ငါ့ဝိညာဉ်ဟို့လည်း ဝေ့ဝိညာဉ်၊ နှစ်လေ
ဘောင်ဂီးတွပ် လိုအပ်ဟူ အောက်စာလေ ဂူလောင်းဟို့ သို
လှောင်ဟူးပီးဘိ။ စားလိုက်၊ သော့-က်လိုက်န ပျော်ပါး
ဘီးနေပါ! ဆိုဘီး ငါ့ကိုယ့်ငါ ပြောမယ်။’

20 အယ်ဘေမဲ့ ဘုရားသခင်ဟူ ‘လူမိုက်! အယ်ညဉ့်
မာ နန့်ဝိညာဉ် ချောက်ငြီးရလေမယ်။ အယ်ဆိုဟူ နန့်သို
လှောင်ဟူးဇာလေဟို့ ဖယ်သူလေ ရလေမယ်နူး။’ ဆိုဘီး
မိန့်တော်မူလေဟယ်။

21 အယ်ဘီးန ယေရှုဟူ “ကိုယ့်တွပ်အောက်စာလေ
ဘောင်ဂီးဟို့ စုဆောင်းဟူးဘေမဲ့လည်း အယ်ဌေးဟူ
ဘုရားသခင်ရဲ့ ရှေ့မာ ဆင်းရဲနေဟူသူ ဖြစ်ဟယ်” ဆိုဘီး
နိဂေါန်းချောက် မိန့်တော်မူလေဟယ်။

ဘုရားသခင်ဟို့ ယောင်ကြည်ဟူကြောန်း
(မသဲ ၆.၂၅-၃၄)

22 အယ်ဘီးန ယေရှုဟူ တမဲ့တော်လေဟို့ “အယ်
ကြောန်း နန့်နို့ဟို့ ငါပြောမယ်၊ ဖယ်မျိုးစားရဟို့၊ ဖယ်မျိုး

သော-က်ရဟ္မိ ဆိုဘီး သတ်တွပ် စိုးရိမ်ဂေ့န။ ဖယ်မျိုးဝတ်
ရဟ္မိ ဆိုဘီးလည်း ကိုယ်ခန္ဓာတွပ် စိုးရိမ်ဂေ့န။

²³ စာထတ် သတ်ဟု ပိုဘီး ရေးကီးဟယ်။ ဝတ်ထတ်
လည်း ကိုယ်ခန္ဓာဟု ပိုဘီး ရေးကီးဟယ်။

²⁴ ကုလီးကန်းလေဟ္မိ ကေ့ကေ့။ သူးနို့လေဟု မျိုးစေ့
လည်းကြဲဟု။ သီးနှံလည်းရိဟု။ သူးနို့မာ ကူလောန်ခန်း
လေ၊ ဗားဂတ်လေလည်း မေ့ဟု။ အယ်ဘေမဲ့ ဘုရားသခ
င်ဟု သူးနို့ဟ္မိ ကျွေးမွေးတော်မူဟယ်၊ နန်းနို့ဟု အယ်ငှ
တ်လေထတ် ရရာတိုင်း ဖိုးကီးဟယ်၊

²⁵ နန်းနို့လေထဲမာ ဖယ်သူဟု စိုးရိမ်ရှင်းအားဖြင့် သတ်
ပိုဘီး ရှယ်လာ* နိုင်ဘွဲ့လော။

²⁶ အယ်မျှလော-က် သေးငယ်ဟု မူဟ္မိ လောက်နိုင်ဟု
ဆိုဟု ဖြားဖြစ်ကြောန် တခြားမူလေတွပ် စိုးရိမ်ဂေ့နေ့နူး။

²⁷ တောပန်းလေဟ္မိ ကေ့ကေ့။ အယ်ပန်းလေဟု ဗိုင်းင
င်ဟု။ ယက်ကန်းလည်းရစ်ဟု။ အယ်ဘေမဲ့ ရှောလမုန်မ
န်းဂီးရဲ့ ဖောင်းစည်းဇိမ်လေ ဂူလောင်းဟ္မိ ဆင်ဟယ်ဟ္မိမူ
အယ်တောပန်းလေထဲဟု တဗန်မျိုး လှပတင့်တယ်ဟု ဆို
ဘီး နန်းနို့လေဟ္မိ ငါပြောဟယ်။

²⁸ ယောင်ကြည်ရှင်း အားနဲဟူလူလေ၊ အယ်နေ့ ကွမ်းပု
လန်ထဲမာရှိဘီး နတ်ကီးတိုင်ဟု မီးဖိုထဲဟ္မိ ရော-က်ရဟူ
တောမြစ်ပန်ဟ္မိ ဘုရားသခင်ဟု အယ်မျိုး ဝတ်ဆင်ပေး
ဟယ် ဆိုဟု နန်းနို့ဟ္မိ အယ်ထတ်မက ဝတ်ဆင်ပေးမယ်

* 12:25 ၁၂၂၅ သတ် ပိုဘီး ရှယ်လာ၊ အယ်မျိုးမှုဘွဲ့နေဟု သတ် ပိုဘီး
ကီးလာဟယ်။

မူဟုလော။”

29 “အယ်ကြောန့် ဖယ်မျိုး စားရဟ့်နဲ့။ ဖယ်မျိုး သော့-က်ရဟ့်နဲ့ ဆိုဘီး စိုးရိမ်ရှင်းရှိဂေ့န။

30 (အယ်လောကရှိ ဘုရားသိဘဲဟူ လူလေဟဘဲ အယ် မူဇာလေဟို ရှာဖွေဂေ့ဟယ်။) အယ်မူဇာလေဟို နန်းနို့လေ လိုအပ်ဟယ် ဆိုဇာဟို နန်းနို့ဖ သိတော်မူဟယ်။

31 နန်းနို့ဟာ ဘုရားသခင်ရဲ့ နိုင်ငံတော်ဟို ရှာဂေ့။ အယ် ဆိုဟာ ကိုယ်တော်ဟာ အယ်မူဇာလေဟို ပေးတော်မူလေ့ မယ်။”

ကောန်းဂန်ဘဏ္ဍာကြောန်း

(မသဲ ၆.၁၉-၂၁)

32 “သိုးစုငယ်၊ ကြော့-က်ဂေ့န။ နန်းနို့ရဲ့ ဖဟာ နန်းနို့ တွပ် နိုင်ငံတော်ဟို ပေးဟို လိုရှိတော်မူဟယ်။

33 နန်းနို့ရဲ့ အောက်စာလေဟို ရောင်းဘီး ဆင်းရဲသား လေဟို ပေးကမ်းစွန့်ကြဲဂေ့။ ဆိုးဟောင်းနိုင်ဘဲဟူ ကပ်အိ လေဟို လောက်ဂေ့ဘီး သူခိုးဖော့-က်နိုင်ဘဲဟူ၊ ပိုးလေ ကိုက်စားနိုင်ဘဲဟူ၊ ကောန်းဂန်ဘောင်မာ ကူခန်းနိုင်ဘဲဟူ ဘဏ္ဍာဟို စုဂေ့ပါ။

34 ပြားဖြစ်ကြောန်းနဲ့ဆိုဟာ နန်းနို့လေဟာ ဘဏ္ဍာရှိဟူ နေရာဟိုဘဲ နန်းနို့စိန်လောင်းလေ ရော့-က်တတ်ဟယ်။”

ဒိန် စောန်နေဟူ စေခံလေကြောန်း

35 “နန်းနို့ဟာ ဆင်သင့်ဖြစ်နေရဲဟို့တွပ် ခါးဟို့ စဲဘီး မီးအီလေဟို့ ထွန်းညှိဂေ။

36 အီတတ်ဗွဲဟု ပုလန်လာဟူ သူးနို့ရဲ့ သခင်ဟို့ စောန်နေ ဟူ စေခံလေမျိုး ဖြစ်ဂေ။ သူဟာ ခွဗော့-က်ဟို့ ခေါ်-က် ဟူ ခီမာ သူးနို့ဟာ ရှစ်ရှင်း ဖွမ်ပေးလေ့မယ်။

37 သခင်ပုလန်ရော့-က်လာဟူ ခီမာ ဆင်သင့်စောန်နေ ဟယ် ဆိုဇာဟို့ သခင်တို့ရဟူ စေခံလေဟာ မင်္ဂလာရှိဟယ်! နန်းနို့ဟို့ ငါမှန်တိုင်း ပြောမယ်။ သခင်ဟာ စေခံလေ ဟို့ ညှိသည်လေမျိုး ဗွဲမာ ထိုင်ခိုင်းဘီး သူကိုယ်တိုင် ခါး ဟို့ စဲဘီးဟာ လောက်ကျေးလေ့မယ်။

38 သခင်ဟု ညဉ့်နတ်ခီမာဘဲဖြစ်ဖြစ်၊ မိုးလန်းခီမာဘဲ ဖြစ်ဖြစ် လာမယ် ဆိုဘီး စောန်နေဟူ စေခံလေဟာ မင်္ဂလာ ရှိဂေဟယ်!

39 အီဇရှင်ဟာ သူခိုးလာနိုင်ဟူခီဟို့ သိနေမယ် ဆိုဟာ သူ့အီဟို့ သူခိုးဗော့-က်ခံရလေ့မယ် မူဟု ဆိုဇာဟို့ နားလည်ဟားဂေ။

40 လူရဲ့သားဟာ နန်းနို့ မျှော်လင့်ဘဲဟူ ခီမာ ရော့-က် လာမယ် ဖြစ်ဘီး နန်းနို့လည်း ဆင်သင့် ရှိနေဂေ” ဆိုဘီး မိန့်တော်မူလေဟယ်။

သစ်စာရှိဟူ စေခံန သစ်စာမေ့ဘဲဟူ စေခံကြောင်း
(မသဲ ၂၄.၄၅-၅၁)

41 ပေတရုဟု “သခင်၊ အယ်ပေါင်ဥပမာဟာ ကျွန်တော့် ဟူးလေတွပ် ပြောနေဇာလော။ လူလေ ဂူလောင်းတွပ် ပြောနေဇာလော။” ဆိုဘီး မေးလျှော့-က်လေဟယ်။

42 သခင်ဘုရားဟု “သစ်စာရှိဘီး ပညာရှိဟူ စေခံဟု ဖယ်သူနူး။ အီဇရှင်ဟာ စေခံလေဟို့ အောက်ချောက်ဟို့ န သတ်မှတ်ဟူးဟူ ခီမာ စားဇာလေဟို့ ထုပေးဟို့ စေခံ အောက် တယော့-က်ဟို့ ခန့်ဟူးဟယ်။

43 အီဇရှင် ပုလန်လာဟူ ခီမာ သစ်စာရှိရှိ လောက်ဆော န်နေဇာဟို့ တွံရမယ် ဆိုဟာ အယ်စေခံဟာ မင်္ဂလာရှိဟု ယ်!

44 နန်းနို့ဟို့ ငါ မှန်တိုင်းပြောမယ်၊ အီဇရှင်ဟာ သူ့ အောက်စာပစ်စီး ဂူလောင်းဟို့ စီမံအောက်ချောက်ဟို့ အယ်စေခံဟို့ အပ်လေ့မယ်။

45 အယ်ဘေမဲ့ အယ်စေခံဟာ ငါ့သခင် ပုလန်လာ ဟို့ ကြာအူးမယ် ဆိုဘီး စိထဲမာ အော့-က်မေ့ဘီး စေခံ ယော့-က်ကျားလေ၊ စေခံမီးမလေဟို့ ရိုက်ဘီး သော့-က် စား ယစ်မောနေလေဟယ်။

46 အယ်စေခံရဲ့ သခင်ဟာ သူ့မျှော်လင့်ဘဲဟူနဲ့ သိနိုင် ဘဲဟူ ခီမာ ပုလန်ရော့-က်လာမယ် ဆိုဟာ အယ်စေခံဟို့ ပြင်းပြင်းထန်ထန် ပြစ်ဒန်ပေးဘီး† ယောင်ကြည်ဘဲဟူ သူ လေနတူးဒူ နေရာခလဟူးရှင်းဟို့ ခံရလေ့မယ်။

47 “သခင်ရဲ့ လိုဆနဒဟို့ သိသိဂီးန ပြင်ဆင်ဟူးရှင်း

† 12:46 ၁၂.၄၆ ပြင်းပြင်းထန်ထန် ပြစ်ဒန်ပေးဘီး၊ အယ်မျိုးမူဘွဲနေဟာ ပွန်ဟို့ ပစ်လိုက်ဟယ်။

လည်း မှော့ဘဲဟူ၊ သခင်ရဲ့ လိုဆနဒ်ဟို့ လိုက်လျောရှင်း
လည်း မှော့ဘဲဟူ စေခံဟာ ကီဒန်ဘောင်ဂီး ရိုက်ခံရလေ့
မယ်။

⁴⁸ အယ်ဘေမဲ့ သခင်ရဲ့ လိုဆနဒ်ဟို့ သိဘဲန ကီဒန်နဘဲ
ထိုက်တန်ဟူ မှဟို့ လောက်မိဟူ သူဟာ ကီဒန်နဲနဘဲ ရိုက်
ခံရမယ်။ ဘောင်ဂီးရဟားဟူ သူလေနားဟုနေ ဘောင်ဂီး
တောင်းလေ့မယ်။ ဘောင်ဂီးအပ်ဟားဟူ သူလေနားဟုနေ
ဘောင်းဂီး တောင်းဂေ့လေ့မယ်။

ယေရှုဟာ စိဝန်းကွဲရှင်းဟို့ ဖြစ်စေဟူကြောင်း
(မသံ ၁၀.၃၄-၃၆)

⁴⁹ “ငါဟု အယ်လောကဟို့ မီးလောန်စေဟို့တွပ် လာဟု
ယ်။ ခုဘဲ မီးလောန်စေရှင်ဘိ!

⁵⁰ ငါခံယူရဟို့ ဗတုတိဇိတခု ရှိသေးဟယ်။ အယ်မူဇာ
ဟို့ လောက်ဆောန်ဟို့ ပီးခန်ထိ ငါဟာ စီဒေါက်ခရော့-က်
နေဟယ်!

⁵¹ အယ်လောကဟို့ ငြိသတ်ရှင်းပေးဟို့ ငါလာဟယ် ဆို
ဘီး ထန်ဂေ့ဟယ်လော။ ငြိသတ်ရှင်းပေးဟို့ လာဟူဇာ မှ
ဟူ။ ရှင်းရှင်း စိဝန်းကွဲစေဟို့ဘဲ ငါလာဟယ်။

⁵² ခုဟုနေဘီးဟာ လူငါးယော့-က်ရှိဟူ အီထောန်မာ
နွေ့ယော့-က်ဟု တဖတ်၊ သောင်းယော့-က်ဟု တဖတ်
ဆန်ကျင်ဘီး ကွဲပြားဂေ့လေ့မယ်။

53 ဖနသား၊ မိနမီး၊ ယောက္ခမန ချေးမလေ ရှင်းရှင်း စိဝန်းကွဲလေ့မယ်” ဆိုဘီး မိန့်တော်မူလေဟယ်။

ခေတ်ကာလဟို့ သိရှိဟူကြောန်း
(မသေ ၁၆.၂၃)

54 ယေရှုဟာ လူလေဟို့ “နော့-က်ဖတ်မာ မိုးတီလေ တတ်လာဇာဟို့ မြင်ဟူ ခီမာ မိုးဝါလေ့မယ် ဆိုဘီး နန်းနို့ ရှစ်ရှင်း ပြောဂေဟယ်။ နန်းနို့ပြောမျိုးဘဲ ဖြစ်တတ်ဟယ်။

55 အယ်ဘီးန တောင်လေတိုက်လာနေဇာဟို့ မြင်ဟူ ခီမာ နေပူလေ့မယ် ဆိုဘီး ပြောဂေဟယ်။ နန်းနို့ပြောမျိုးဘဲ ဖြစ်တတ်ဟယ်။

56 သူတော်ကောန်း ယောန်ဆောန်ဟူသူလေ! နန်းနို့ဟာ မှလေဂီးန ကောန်းဂန်ရဲ့ ခြေနေဟို့ ကော့ဘီးဟာ ရာသီဥတုရဲ့ ခြေနေဟို့ ပိုင်းခြားဘီး သိနိုင်ဂေဟယ်။ ခုကာလ ခြေနေဟို့ ဖြားဖြစ်ကြောန် ခန်မှန်းဘီး သိနိုင်ဂေဟူနူး။

ကြေအေးရှင်းကြောန်း
(မသေ ၅.၂၅,၂၆)

57 “မှန်ကန်ဟူလောက်ဟို့ လောက်ဟို့တွပ် ဖြားဖြစ်ကြောန် နန်းနို့ကိုယ်တိုင် ဆောင်းဖြတ်ဂေဟူနူး။

58 နန်ဟို့ တရားစွဲဟူ လူနတူးဒု တရားသူဂီးနားဟို့ သွားရမယ် ဆိုဟာ လမ်းမာ ကြေအေးအောန်လောက်ဂေ။ အယ်မျိုးလောက်ဘဲဟု ဆိုဟာ သူဟာ နန်ဟို့ တရားသူဂီးရှေ့ဟို့ ဆွဲခေါ်ဟားလေ့မယ်။ တရားသူဂီးဟု နန်ဟို့ ရဲ

လတ်ထဲမှာ အပ်လိုက်လေ့မယ်။ ရဲလေဟုလည်း နန်ဟို
ထောန်ထဲမှာ ထဲဟူးလေ့မယ်။

⁵⁹ နန်းနို့ဟို ငါ မှန်တိုင်းပြောမယ်၊ ကပ်ကွီးလေ ဂူလော
င်းဟို ကျေအောန် ဆပ်ခန်ထိ နန်ဟာ ထောန်ထဲမှာ နေရ
လေ့မယ်” ဆိုဘီး မိန့်တော်မူလေဟယ်။

13

နောန်ဒရရှင်းလော၊ ပျစ်စီးရှင်းလော

¹ အယ်ခီမာ လူတချို့ဟာ ယေရုရှားဟို လာဘီး ပိ
လတ်ဟု သတ်ဖြတ်လိုက်ဟူ ဂါလိလဲလူလေကြောင်းဟို
လျှော့-က်ဂေဟယ်။ အယ်လူလေဟာ ယဇ်ပူဇော်နေဒူးမာ
သတ်ခံရဟူ သူလေ ဖြစ်ဂေဟယ်။

² ယေရုဟာ သူးနို့ဟို “အယ်ဂါလိလဲ လူလေဟာ အယ်
မျိုးသတ်ခံရဟူကြောန့် တခြားဂါလိလဲ လူလေထတ် ပို
ဆိုးဟူ ပြစ်သားလေ ဖြစ်ဟယ် ဆိုဘီး နန်းနို့ ထန်နေဂေဟ
ယ် မူဟုလော။

³ နန်းနို့ဟို ငါပြောမယ်၊ သူးနို့လေဟာ ပိုဆိုးဟူ ပြစ်သား
လေ မူဟု! အယ်ဘေမဲ့ နန်းနို့ဟာ နောန်ဒရဂေဟု ဆိုဟာ
အယ်လူလေမျိုးဘွဲ သေကျေပျစ်စီးဂေ လေ့မယ်။

⁴ ရှိလောင်မျှော်စင် ပြိုကုလဟူ ခီမာ ပိဘီးသေဟူးဟူ
လူဆယ်ရှစ်ယော့-က်ဟို ဖြားမျိုးပြောမယ်နူး။ သူးနို့ဟာ
ယေရုရှလင်မြို့မာ နေထိုင်ဟူ တခြားသူလေ ဂူလောင်း
ထတ် ပိုဆိုးဟူ ပြစ်သားလေ ဖြစ်ဟယ် ဆိုဘီး နန်းနို့ ထန်
နေဂေလော။

⁵ နန်းနို့ဟို ငါပြောမယ်။ သူးနို့လေဟာ ပိုဆိုးဟူ ပြစ်သားလေ မူဟူ။ အယ်ဘေမဲ့ နန်းနို့ဟာ နောက်ဒရဂေဟာ ဆိုဟာ အယ်လူလေမျိုးဘဲ သေကျေပျစ်စီးဂေ လေ့မယ်” ဆိုဘီး မိန့်တော်မူလေဟယ်။

သီးသီးဘဲဟူ သဖန်းဗန်ရဲ့ ပေါင်ဥပမာကြောန်း

⁶ အယ်ဘီးန ယေရှုဟာ အယ်ပေါင်ဥပမာန “လူတယော့-က်ရဲ့ စပျစ်ခြံထဲမှာ စိုက်ပျိုးဟွားဟူ သဖန်းဗန်တဗန် ရှိဟယ်။ ဇရှင်ဟာ အယ်ပန်မာ သီးဟို လာရှာဟူ ခီမာ တွံရဟူ။

⁷ အယ်ကြောန့် သူဟာ ခြံစောန့်မားဟို ‘ငါဟာ အယ်သဖန်းဗန်မာ သဖန်းသီးလာရှာနေဇာ သောင်းနှစ်ရှိဟွားဘီ။ အယ်ဘေမဲ့ လောင်းလည်း တွံရဟူ။ အယ်မူပန်ဟို ခွတ်ပစ်လိုက်! ဖြားဖြစ်ကြောန့် မုလေဂီးဟို ကျိုးမွေဘဲ အောန် လောက်နေဂေဟိုနူး။’ ဆိုဘီး ပြောလေဟယ်။

⁸ အယ်ဘေမဲ့ ခြံစောန့်မားဟု ‘ဆရာ၊ အယ်ပန်ဟို တနှစ်လော့-က် ထားပေးပါအူး။ ပန်ရင်းပတ်ပတ်လည်ဟို တူးဆွဘီးဟာ မုလေဩဇာ ထဲကေ့ကေ့မယ်။

⁹ အယ်ဆိုဟာ နော့-က်နှစ်မာ ပိုကောန်းဟူ သီးဟို သီးရှင်သီးလေ့မယ်၊ အယ်ဘေမဲ့ သီးသီးဟု ဆိုဟာ ခွတ်ပစ်ပါ ဆိုဘီး ပြောလေဟယ်” ဆိုဘီး မိန့်တော်မူလေဟယ်။

ဒန်းနေမာ သန်စွမ်းဘဲဟူ မီးမဟို ရောဂါပျော့-က်စေဟူကြောန်း

10 ဒန်းနေ့ တနေ့မှာ ယေရှုဟာ ဝါလယ်ဇရပ်တခုမှာ သွန်သန်နေတော်မူဟယ်။

11 အယ်နေရာမှာ ဆယ့်ရှစ်နှစ်လောင်းလောင်း နတ်ဆိုးဝမ်းပူးရှင်းဟို့ ခံနေရဟူကြောင့် ခါးကူးဟားဘီး လောင်းဝါးဆန်နိုင်ဘဲဟူ မီးမတယော့-က်ရှိနေဟယ်။

12 ယေရှုဟာ သူ့ဟို့ မြင်ဟူ ခီမာ ရှေ့တော်ဟို့ ခေါ်ဘီး “ဝှေ့ မီးမ၊ နန်ရောဂါ ပျော့-က်ဟားဘီး!” ဆိုဘီး မိန့်တော်မူလေဟယ်။

13 အယ်ဘီးန ကိုယ်တော်ဟာ သူ့ထတ်မာ လတ်ဟို့ တန်လိုက်ဟူ ခီမာ ရှစ်ရှင်းဘဲ သူ့ရဲ့ခါးဟာ ဆန်ဟားဘီး ဘုရားသခင်ဟို့ ချီးမွမ်းလေဟယ်။

14 ဒန်းနေ့မှာ ယေရှုဟာ ရောဂါပျော့-က် စေတော်မူဟူကြောင့် ဝါလယ်ဇရပ်မှူးဟာ စီဆိုးဘီး လူလေဟို့ “လောက်လောက်နိုင်ဟူရစ် ခြော့-က်ရစ်ရှိဟယ်။ အယ်ရစ်လေမာ ရောဂါလာကုဂေ။ ဒန်းနေ့မှာ ရောဂါလာကုဂေန!” ဆိုဘီး ပြောလေဟယ်။

15 သခင်ဘုရားဟာ သူ့ဟို့ “သူတော်ကောန်း ယောန်ဆောန်ဟူသူလေ! နန်းနို့ ဂူလောင်းဟာ ဒန်းနေ့မှာ နန်းနို့ရဲ့ မြည်းလေ၊ နွားလေဟို့ တင်းကုပ်ဟုနေ ကြိုးဖြေပေးဘီး ရေတိုက်ဟို့ ခေါ်ဆောန်ဂေဟယ် မူဟုလော။

16 အယ် မျိုး ဆိုဟာ ဆယ့်ရှစ် နှစ် လောင်း လောင်း စာတန်ရဲ့ တောက်နှောန်ရှင်းဟို့ ခံနေရဟူ အာဗြဟံရဲ့ သမီးဟို့ ဒန်းနေ့မှာ ဖြေလွတ်သင့်ဟယ် မူဟုလော။” ဆိုဘီး

မိန့်တော်မူလေဟယ်။

17 အယ်မျိုး မိန့်တော်မူလိုက်ဟူ ခီမာ ကိုယ်တော့်ဟို ဆန့်ကျင်ဖတ်လောက်နေဟူ သူလေဟာ ယှစ်ရဟူးဂေ ဘီး လူလေ ဂူလောင်းဟာ ကိုယ်တော် လောက်ဟူ အံ့သြ ဘွယ်လေကြောန့် ဝန်းသာဂေဟယ်။

မုညင်းစေ ပေါင်ဥပမာကြောန်း

(မသံ ၁၃.၃၁,၃၂; မာကု ၄.၃၀-၃၂)

18 ယေရှုဟာ “ဘုရားသခင်ရဲ့ နိုင်ငံတော်ဟာ ဖြားဇာန တူဟယ်နူး။ ဖြားဇာန နှိုင်းယှဉ်ရနူး။

19 နိုင်ငံတော်ဟာ အယ်ပေါင်ဥပမာန တူဟယ်။ လူတ ယော့-က်ဟာ မုညင်းတစေဟို သူခြံထဲမာ စိုက်လိုက်ဟ ယ်။ အယ်စေဟု ကီးလာဘီး သစ်ပန်ကီးဖြစ်လာဟူ ခီမာ အယ်ပန်ရဲ့ ကိုင်းခတ်လေမာ ကောန်းဂန်ငှတ်လေဟာ သူး နို့ရဲ့ သိုက်ဟို ဆော့-က်လောက်ဘီး နေဂေဟယ်” ဆိုဘီး မိန့်တော်မူလေဟယ်။

တဆေး ပေါင်ဥပမာကြောန်း

(မသံ ၁၃.၃၃)

20 ယေရှုဟာ “ဘုရားသခင်ရဲ့ နိုင်ငံတော်ဟို ဖြားဇာန နှိုင်းယှဉ်ရဟိုနူး။

21 နိုင်ငံတော်ဟာ အယ်ပေါင်ဥပမာန တူဟယ်။ မီးမတ ယော့-က်ဟာ တဆေးဟို ယူဘီး မုညစ်သောင်းတောန်းန ရောနှောလိုက်ဟူ ခီမာ မုညစ် အားလောင်းဂူဟို ဖောန်းကြွ

စေနိုင်ဟူ တဆေးန တူဟယ်” ဆိုဘီး ထပ်ဘီး မိန့်တော်မူ
လေဟယ်။

ခွဗော့-က်ကျဉ်းကြောန်း
(မဿဲ ၇.၁၃,၁၄,၂၁-၂၃)

²² အယ်ဘီးန ယေရှုဟာ မြို့လေ၊ ဝါလေမာ သွန်သန်
ဘီး ယေရုရှလင်မြို့ဟို သွားလေဟယ်။

²³ လူတယော့-က်ဟာ ကိုယ်တော့ဟို “သခင်၊ ကယ်
တန်ရှင်းခံရဟူ သူလေ နဲနဲဘဲ ရှိဟယ်လော။” ဆိုဘီး မေး
လျှော့-က်လေဟယ်။

²⁴ ယေရှုဟ “ခွဗော့-က်ကျဉ်းထဲဟို ဝမ်ဟို့ ကြိုးစား
အားထုဂေ။ ဖြားဖြစ်ကြောန်းနဲ့ဆိုဟာ လူလေဘောင်ဂီး
ဟာ အယ်ခွဗော့-က်ထဲဟို ဝမ်ဟို့ ကြိုးစားဘေမဲ့ ဝမ်နိုင်
ဂေဟ။

²⁵ အီဇရှင်ဟာ ထဘီး ခွဗော့-က်ဟို ပိလိုက်ဟူကြောန်း
နန်းနို့လေဟာ ပုလန်မာရပ်ဘီး ခွဗော့-က်ဟို ခေါ့-က်ဘီး
‘ဆရာ၊ ကျွန်တော့ဟားလေဟို ခွဗော့-က်ဖွမ်ပေးပါ!’ ဆို
ဘီး တောန်းဗန်ဂေလေမယ်။ ဇရှင်ဟ ‘နန်းနို့လေ ဖယ်ဟ
လာဟယ် ဆိုဇဟို ငါသိဟ!’ ဆိုဘီး ပုလန်ပြောလေဟ
ယ်။

²⁶ အယ်ဆိုဟာ နန်းနို့လေဟ ‘ကျွန်တော့ဟားလေဟာ
ကိုယ်တော်နတူးဒု စားဂေဟယ်။ သော့-က်ဂေဟယ်။ ကျွန်
တော့ဟားလေရဲ့ မြို့ဝါမာလည်း ကိုယ်တော်ဟာ သွန်သန်
ပေးဟယ်!’ ဆိုဘီး ဖြေလေမယ်။

၂၇ အယ်ဘေမဲ့ ကိုယ်တော်ဟု ‘နန်းနို့ ဖယ်ဟုလာဟယ် ဆိုဇာဟို့ ငါသိဟု။ တရားဘဲဟူ မူဟို့ လောက်ဟူ သူလေ၊ ငါနားဟု ဖယ်ဂေ!’ ဆိုဘီး ပြောလေ့မယ်။

၂၈ နန်းနို့ဟု ဘုရားသခင် နိုင်ငံတော်ထဲမာ အာမြဟံ၊ ဣဇာက်၊ ယာကုပ်န ပရောဖက်လေ ဂူလောင်းဟို့ မြင်ရဘေမဲ့ နန်းနို့လေဟု နိုင်ငံတော်ပုလန်ဟို့ နှန်ထုခံရဟူ ခီမာ ရရာတိုင်း ငိုကြွေးဘီး အံသွားခဲကုလိရဂေ လေ့မယ်။

၂၉ ရှေ့ဖတ်၊ နှော့-က်ဖတ်၊ တောန်ဖတ်၊ မြော့-က်ဖတ်ဟု လာဂေဟူ လူလေဟု ဘုရားသခင် နိုင်ငံတော်ရဲ့ စားသော့-က်မဲ့မာ လာဘီး ထိုင်ဂေလေ့မယ်။

၃၀ ခု နှော့-က်ဆောင်းဟို့ ရော့-က်နေဟူ သူလေဟု ရှေ့ဆောင်းဟို့ ရော့-က်ဂေလေ့မယ်။ ခု ရှေ့ဆောင်းဟို့ ရော့-က်နေဟူ သူလေဟု နှော့-က်ဆောင်းဟို့ ရော့-က်ဂေလေ့မယ်” ဆိုဘီး သူးနို့ဟို့ မိန့်တော်မူလေဟယ်။

ယေရှုရှလင်မြို့တွပ် ယေရှုရဲ့ မြစ်တာတော်ကြောင်း
(မသဲ ၂၃.၃၇-၃၉)

၃၁ အယ်ခီမာ ဖာရိရှဲတချို့ဟု ယေရှုနားဟို့ လာဘီး “ဟေရုဒ်ဟု ကိုယ်တော့်ဟို့ သတ်ရှင်နေဟူကြောန့် အယ်နေရာဟု ထွပ်ဟားဘီး တခြားနေရာဟို့ သွားပါ” ဆိုဘီး လျှော့-က်လေဟယ်။

³² ယေရှုဟာ “အယ်မုလေခွီးဟို့ သွားပြောဂေပါ။ ‘ငါဟာ အယ်နေန နတ်ကီးတိုင်မာလည်း နတ်ဆိုးလေဟို့ နှန်ထုဘီးဟာ ရောဂါလေဟို့လည်း ပျော့-က်စေအူးမယ်။ သောင်းရစ်မြေ-က်ဟူနေမာ ငါ့ရဲ့ လောက်ဟို့ ပီးဆောင်းစေမယ်။’

³³ အယ်ဘေမဲ့ ငါဟာ အယ်နေ၊ နတ်ကီးတိုင်၊ နတ်ကီးဖတ်လည်း ခရီးသွားရအူးမယ်။ ပရောဖက်ဟာ ယေရှုရှလင်မြို့ဟုလဲ့ဘီး တခြားနေရာမာ သတ်ခံရဟို့ မှေ့ဟူ။”

³⁴ “ယေရှုရှလင်မြို့၊ ယေရှုရှလင်မြို့၊ ပရောဖက်လေဟို့ သတ်ဟူမြို့၊ ဘုရားသခင် စေလွှတ်လိုက်ဟူ တမန်လေဟို့ ကုလော့-က်ခဲန ပစ်ဟူမြို့၊ ကြစ်မဟာ ကြစ်သားဟားလေဟို့ သူရဲ့ တောန်အော့-က်မာ စုသီးဟားမျိုး ငါဟာ နန်ရဲ့ လူမျိုး ဂူလောင်းဟို့လည်း စုသီးဟို့ ခါဘီးခါ လိုရှင်လေဟယ်။ အယ်ဘေမဲ့လည်း နန်ဟာ ငါ့ဟို့ ခွမ်ပြဟု!

³⁵ အယ်ကြောန့် နန်ရဲ့ အီဟို့ ဘုရားသခင် စွန့်ပစ်လေမယ်။ ငါပြောမယ်။ ‘ဘုရားသခင် နာမန ကြွလာဟူ သခင်ဟာ မင်္ဂလာရှိဟယ်’ ဆိုဘီး နန်ပြောဟူခီ ရော့-က်ခန်မာ ငါ့ဟို့ နန်မြင်ရလေမယ် မူဟု” ဆိုဘီး သူးနို့ဟို့ မိန့်တော်မူဟယ်။

14

လူနာတယော့-က်ဟို့ ရောဂါပျော့-က်စေဟူကြောန်း

¹ ဒန်းနေမာ ယေရှုဟာ စားဇာစားဟို့ ဖာရိရှဲခေါင်းဆောင်တယော့-က်ရဲ အီထဲဟို့ ဝမ်ဟူးဟူ ခီမာ သူးနို့လေဟာ ကိုယ်တော်ဟို့ စောန်ကေနေဂေဟယ်။

² ရေယျဉ်းစွဲမား တယော့-က်ဟာ ယေရှုနားဟို့ ရော့-က်လာဟယ်။

³ ယေရှုဟု “ဒန်းနေမာ ရောဂါ ပျော့-က်စေဟို့တွပ် ပညတ်တော်ဟု ခွမ်ပြုဟူးဘဲလော။” ဆိုဘီး ဖာရိရှဲလေန ကျမ်းတတ်ဆရာလေဟို့ မေးတော်မူလိုက်ဟယ်။

⁴ အယ်ဘေမဲ သူးနို့လေဟာ တိဆိနေဂေဟယ်။ ယေရှုဟာ အယ်လူနာဟို့ ခေါ်ဘီး၊ ရောဂါပျော့-က်စေဘီး သူဟို့ လွတ်လိုက်ဟယ်။

⁵ ကိုယ်တော်ဟု “နန်းနို့ရဲ သားဂန်းဟူးဘဲဖြစ်ဖြစ်၊ နွားတကောန်ဘဲဖြစ်ဖြစ် ဒန်းနေမာ ရေဒွမ်းထဲဟို့ ကုလဟူးမယ် ဆိုဟာ နန်းနို့ဟာ ရှစ်ရှင်း ဆွဲဒန်လေ့မယ် မူဟုလော။” ဆိုဘီး သူးနို့ဟို့ မေးတော်မူလေဟယ်။

⁶ အယ်ဘေမဲ သူးနို့လေဟာ ဖြားလည်း ဖြေနိုင်ဂေဟယ်။

ညွှတ်ဝတ်ပြုရှင်းန နှိခလရှင်းကြောန်း

⁷ ညွှတ်သည် လေဟာ ကောန်းဆောင်းနေရာဟို့ ဝီးကော့-က်နေဇာဟို့ ယေရှုမြင်ဟူ ခီမာ သူးနို့လေဟို့ အယ်ပေါင်ဥပမာန

⁸ “နန်းနို့ဟို့ ယော့-က်ယော့-က်ဟု အီတတ်မွဲဟို့ ဖိဟူးဟူ ခီမာ ကောန်းဆောင်းနေရာမာ ထိုင်ဂေန။ နန်းနို့ထတ်

ရေးကီးဟူ ယော့-က်ယော့-က်ဟိုလည်း ဖိခေါ်ဟားမယ် ဆိုဟာ၊

⁹ ခေါ်ဖိသူဟာ နန့်ဟို ‘အယ်လူတွပ် နေရာဖယ်ပေးဂေ’ ဆိုဘီး ပြောလေ့မယ်။ အယ်ဆိုဟာ နန့်ဟာ ယုစရဘီး နိ ဆောင်းနေရာမာ ထိုင်ရလေ့မယ်။

¹⁰ အယ်ကြောန့် နန့်ဟို ဖိခေါ်ဟူ ခီမာ နိဆောင်းနေရာမာ သွားဘီးထိုင်ဂေ။ အယ်မျိုးဆိုဟာ ဖိခေါ်သူဟ နန့်နားဟို လာဘီးဟာ ‘မိဆွေ ပိုကောန်းဟူ နေရာမာ ထိုင်ပါ’ ဆိုဘီး နန့်ဟို ပြောလေ့မယ်။ အယ်ဆိုဟာ နန့်ဟာ ဧည့်သည်လေ ရဲ့ ရှေ့မာ ဂေါင်သရေ ရှိလေ့မယ်။”

¹¹ “အယ်ကြောန့် ကိုယ့်ကိုယ်ကိုယ် ချီးမြှော့-က်ဟူသူ ဟာ နိဒုလခံရဘီး ကိုယ့်ကိုယ်ကိုယ် နိဒုလဟူသူဟာ ချီးမြှော့-က်ခံရလေ့မယ်” ဆိုဘီး မိန့်တော်မူဟယ်။

¹² အယ်ဘီးန ယေရှုဟာ ဖိခေါ်သူဟို “နန့်ဟာ မွန်းဒဲဇာ၊ ညဉ့်ဇာဟို ကျွေးမွေးဟူ ခီမာ မိဆွေလေ၊ ညီကိုလေ၊ ဆွေမျိုးလေ၊ အီဇနီးရှင်း ငွေးလေဟို ဖိခေါ်န။ ဖြားဖြစ် ကြောန့်နူးဆိုဟာ သူးနိလေဟာ နန့်ဟို ပုလန်ဖိဘီးဟာ ကျေးဇူးဆပ်လေ့မယ်။

¹³ အယ်ကြောန့် စားသော့-က်ဗွဲ ကျင်းပဟူ ခီမာ ဆင်းရဲသား၊ အင်္ဂါချို့တဲ့သူ၊ ခေသန်ဘဲဟူသူ၊ မျစ်စိကန်း သူလေဟိုဘဲ ဖိခေါ်ပါ။

¹⁴ အယ်မျိုးဆိုဟာ နန့်ဟာ မင်္ဂလာရှိလေ့မယ်။ ဖြား

ဖြစ်ကြောင့်နူးဆိုဟာ သူးနှိလေဟု နန့်ဟို ပုလန်ဘီး ကျေးဇူးဆပ်နိုင်ဂေဟို မူဟု။ အယ်ဘေမဲ့လည်း ပြောန့် မတ်သူလေ ရှင်ပုလန်ထမြော့-က်ဟူ ခီမာ ဘုရားသခင်ဟု နန့်ဟို ပုလန်ဆပ်ပေးလေ့မယ်” ဆိုဘီး မိန့်တော်မူလေဟု ယ်။

စားသော့-က်မွဲဂီး ပေါင်ဥပမာ

(မသံ ၂၂.၁-၁၀)

15 စားမွဲမာ ထိုင်နေဟူ ဧည့်သည့်လေထဲဟု တယော့-က် ဟာ အယ်စကားဟို ကြားဟူ ခီမာ ယေရှုဟို “ဘုရားသခင် နိုင်ငံတော်ရဲ့ စားသော့-က်မွဲမာ ထိုင်ရဟူ သူလေဟာ ရရာ တိုင်း ပျော်လေ့မယ်!” ဆိုဘီး လျော့-က်လေဟယ်။

16 ယေရှုဟာ “လူတယော့-က်ဟာ စားသော့-က်မွဲဂီးဟို ပြင်ဆင်ဟွားဘီး လူဘောင်ဂီးဟို ဖိဟွားဂေဟယ်။

17 စားသော့-က်မွဲခီ ရော့-က်ဟူ ခီမာ ဖိဟွားဟူ လူလေ နားဟို သူရဲကျန်ဟို စေလွှတ်ဘီးဟာ ‘ဂူလောင်း ဆင်သင့် ဖြစ်နေဘီ။ ကြွေဂေပါ!’ ဆိုဘီး ပြောစေဟယ်။

18 အယ်ဘေမဲ့ သူးနှိလေ ဂူလောင်းဟာ ယော့-က်ဘီး ယော့-က် ဆင်ခေလတ်ခေလေ ပေးဂေဟယ်။ ပထမ တယော့-က်ဟု ‘ငါ့ဟာ လဲဗုလန်တဂွပ် ဝယ်ဟွားဇာဟို သွားဘီး ကေ့ကေ့ရအူးမယ်။ ငါ့ဟို ခွမ်လွတ်ဟို တောန်း လျော့-က်ပါဟယ်’ ဆိုဘီး ပြောလေဟယ်။

19 နော့-က်ထပ် တယော့-က်ဟု ‘ငါဝယ်ဟွားဟူ နွားငါး ရှဉ်းဟို မောန်းစမ်းဟို သွားရအူးမယ်။ ငါ့ဟို ခွမ်လွတ်ဟို

တောန်းလျှော့-က်ပါဟယ်’ ဆိုဘီး ပြောလေဟယ်။

²⁰ နှော့-က်ထပ် တယော့-က်ဟု ‘ငါလည်း ခုဘဲသေး အီထောန်ကုလကြောန့် လာနိုင်ဟို့ မူဟု’ ဆိုဘီး ပြောလေဟယ်။

²¹ စေခံဟာ သူ့သခင်နားဟို့ ပုလန်ဟားဘီးဟာ အယ်ကြောန်းရာ ဂူလောင်းဟို့ ပုလန်ပြောပြဟယ်။ သခင်ဟာ ရရာတိုင်း ဒေါသထွပ်ဟားဘီး ‘မြို့ထဲမာရှိဟူလမ်းမလမ်းကြားလေဟို့ မြန်းမြန်သွား။ အယ်ဘီးဟာ ဆင်းရဲသား၊ အင်္ဂါချို့တဲ့သူ၊ ခေသန်ဘဲဟူသူ၊ မျစ်စိကန်းသူလေဟို့ ခေါ်ပါ’ ဆိုဘီး သူ့ရဲ့စေခံဟို့ ပြောလေဟယ်။

²² စေခံဟာ ပုလန်ရော့-က်လာဘီး ‘သခင်၊ သခင်ခိုင်းဒဲ့တိုင်း လောက်ပီးဘီ။ အယ်ဘေမဲ့ နေရာလပ်လေ ရှိနေသေးဟယ်’ ဆိုဘီး ပြောလေဟယ်။

²³ အယ်ကြောန့် သခင်ဟု ‘မြို့ပုလန်၊ လမ်းမ၊ ခြံစည်းရိုးနားဟို့ သွားပါ။ အယ်ဘီးဟာ ငါ့အီဟို့ ပုလဲအောန် လူလေဟို့ ခေါ်လာပါ’ ဆိုဘီး စေခံဟို့ ပြောလေဟယ်။

²⁴ နန်းနို့ဟို့ ငါပြောမယ်။ ရင်းရင်ဒူးဟု ဖိခေါ်ဟားဟူ လူလေ တယော့-က်လည်း ငါ့ရဲ့ စားသော့-က်မွဲဟို့ မြည်းစမ်းရလေဟို့ မူဟု!” ဆိုဘီး ပြောလေဟယ်။

တမဲ့တော်ဖြစ်ဟို့တွပ် ပေးရဟူ ဖိုးခ
(မသံ ၁၀.၃၇,၃၈)

²⁵ လူအောက်ဂီးဟာ ယေရှုနတူးဒု သွားနေဟူ ခီမာကိုယ်တော်ဟာ လှည့်ကော့ဘီး

26 “ယော့-က်ယော့-က်ဟာ ငါ့နားဟို့ လာဘေမဲ့လည်း ငါ့ဟို့ ရှစ်ဇာထတ် မိဖ၊ သားမယား၊ နောက်၊ ညီမန သူးနို့ရဲ့ သတ်ဟို့ ပိုဘီး ရှစ်မယ် ဆိုဟာ ငါ့တမဲ့ ဖြစ်နိုင်ဟို့ မဟု။

27 သူးနို့ရဲ့ လတ်ဝါးကပ်တိုင်ဟို့ ထမ်းဘီး ငါ့နော့-က်ဟို့ လိုက်ဂေဟု ဆိုဟာ ငါ့တမဲ့လေ ဖြစ်နိုင်ဟို့ မဟု။

28 နန်းနို့ ထဲ ဟု တယော့-က်ဟာ မျှော်စင် တခုဟို့ ဆော့-က်မယ် ဆိုဘီး ကြံရိုဟူသူဟု ကပ်လော့-က်ငှအော န် ရှိလော၊ မေ့ဟုလော ဆိုဘီး ရင်ဦးဆောင်း ထိုင်ဘီး ကူ ကုလဇာလေဟို့ တွပ်ကေလေ့မယ်။

29 အယ်မျိုးတွပ်ဘဲန ဆိုဟာ မျှော်စင်ဟို့ အပြစ်ဒုလဘီး ပီးအောန် ဆော့-က်နိုင်ဘဲကြောန် မြင်ဟူသူလေ ဂူလော င်းဟာ ရယ်ဇာလေ့မယ်။

30 ‘အယ်လူဟာ တည်ဆော့-က်ဟို့ စပြုနိုင်ဘေမဲ့ ဆောင်းသတ်နိုင်ဘဲဟူသူ!’ ဆိုဘီး သူးနို့ဟာ ပြောဂေလေ့ မယ်။

31 စစ်သား ၁၀,၀၀၀ ရှိဟူ မန်းဂီးတပါးဟာ စစ်သား ၂၀,၀၀၀ န ချီတတ်လာဟူ တခြားမန်းဂီးဟို့ ထွပ်ဘီး ရင်ဆိုင်မယ် ဆိုဟာ အယ်စစ်သားအင်အားန ခုခံနိုင်မယ် ခုခံနိုင်ဟု ဆိုဘီး ရင်ဦးဆောင်း ထိုင်ဘီးဟာ တွပ်ကေဘီး ဆောင်းဖြတ်လေ့မယ်။

32 ခုခံဟို့ အင်အား မေ့ဟု ဆိုဟာ တခြားမန်းဂီးဟာ ဝီး ဂီးမာ ရှိနေဂဒဲဟု တမန်လေဟို့ လွတ်ဘီးဟာ စစ်ပြေငြိမ်း

ရေး စကားကို တောင်းလျှော့-က်ရလေ့မယ်။

³³ အယ်မျိုးဘဲ နန်းနီမာ ရှိမျှတို့ စွန့်ဘဲဟု ဆိုဟော ငါ့တ
ဖွဲ့ ဖြစ်နိုင်တို့ မူဟု။”

ငန်ဓါတ်မေ့ဘဲဟူ ဆားကြောန်း

(မသဲ ၅.၁၃; မာကု ၉.၅၀)

³⁴ “ဆားဟော ကောင်းဟယ်။ အယ်ဘေမဲ့ ငန်ဓါတ်မေ့ဟု
ဆိုဟော ငန်ဟူ ရသာတို့ ပုလန်ရတို့ နည်းလမ်းမေ့ဘီ။

³⁵ မုလေဆီလွှာတွပ်လည်း ကောင်းဟု။ မုလေဩဇာ
တွပ်လည်း ကောင်းဘဲဟူကြောန့် ဝီးဝီးတို့ ပစ်လွှပ်လိုက်
ဂေ့ဟယ်။

“အယ်ကြောန့် နန်ဟော နားရှိဟယ် ဆိုဟော ကြားဂေ့!” ဆို
ဘီး မိန့်တော်မူလေဟယ်။

15

ပျော့-က်နေဟူ သိုးကြောန်း

(မသဲ ၁၈.၁၂-၁၄)

¹ တနေ့မာ ခွန်ကော့-က်မားလေန ပြစ်သားလေဟော
တရားစကားကို နားထောန်တို့တွပ် ယေရှုနားတို့ ရော့-က်
လာဟူ ခီမာ

² ဖာရိရှဲလေန ကျမ်းတတ်ဆရာလေဟု “အယ်လူဟော
ပြစ်သားလေတို့ လတ်ခံဘီးဟော သူးနီနတူးဒုလည်း စား
သော့-က်ဂေ့ဟယ်!” ဆိုဘီး ပြစ်တန်ဂေ့ဟယ်။

³ အယ်ကြောန့် ယေရှုဟု အယ်ပေါင်ဥပမာန

၄ “နန်းနို့ထဲဟု တယော့-က်မာ သိုးကောန်တရာရှိဘီး တကောန်ပျော့-က်ဟွားမယ် ဆိုဟာ ဖယ်မျိုးလောက်ဂေ့ မယ်နူး။ သိုးကိုးဆယ်ကိုးကောန်ဟို့ စားကျစ်မာ ထားရစ် ဘီးဟာ ပျော့-က်နေဟူ သိုးတကောန်ဟို့ တွံအောက်လိုက် ရှာဂေ့လေ့မယ်။

၅ အယ်သိုးဟို့ ပုလန်တွံဟူ ခီမာ ရရာတိုင်း ဝန်းသာဘီး ဟာ ခေါင်းထတ်မာ

၆ ထမ်းဘီး အီဟို့ ပုလန်ဟွားဟယ်။ အယ်ဘီးန အီဇနီး ရှင်းလေန မိဆွေလေဟို့ ခေါ်ဘီးဟာ ‘ပျော့-က်နေဟူ သိုး ဟို့ ငါပုလန်တွံဟွားဘီ။ နို့လေ ပွဲလောက်ဂေ့ဇို!’ ဆိုဘီး ပြောလေ့မယ်။

၇ အယ်မျိုးဘွဲ နောက်ဒရဘဲဟူ ပြောန့်မတ်သူ ကိုးဆယ် ကိုးယော့-က်ထတ် နောက်ဒရဟူ ပြစ်သားတယော့-က်တွပ် ကောင်းဂန်ဘောင်မာ ပိုဘီး ဝန်းသာလေ့မယ် ဆိုဘီး နန်းနို့ ဟို့ ငါပြောဟယ်။”

ပျော့-က်နေဟူ ဒန်းဂါးကြောန်း

၈ “အယ်မျိုးဘွဲ မီးမတယော့-က်မာ ငွေဒန်းဂါး ဆယ် ပုလားရှိဘီး ငွေဒန်းဂါး တပုလားပျော့-က်ဟွားမယ် ဆို ဟာ အယ်မီးမ ဖြားဇာလောက်မယ်နူး။ သူဟာ မီးအီထွန်း ဘီး၊ ရှင်းလန်းဘီးဟာ တွံအောက် သေးသေချားချာ ရှာလေ့ မယ်။

၉ အယ်ငွေဒန်းဂါးဟို့ တွံဟူ ခီမာ သူဟာ အီဇနီးရှင်းလေန မိဆွေလေဟို့ ခေါ်ဘီး ‘ပျော့-က်ဟွားဟူ ဒန်းဂါးဟို့ ငါပု

လန်တို့ဘီ။ နို့လေ ပွဲလောက်ဂေဇို!’ ဆိုဘီး ပြောလေ့မယ်။

¹⁰ အယ်မျိုးဘဲ ဘုရားသခင်ရဲ့ ကောန်းဂန်တမန်လေ ဟာလည်း နောက်ဒရဟူ ပြစ်သားတယော့-က်တွပ် ရရာ တိုင်း ဝန်းသာလေ့မယ် ဆိုဇာဟို နန်းနို့ဟို ငါပြောဟယ်” ဆိုဘီး မိန့်တော်မူလေဟယ်။

ပျော့-က်နေဟူ သားကြောင်း

¹¹ ယေရှုဟာ ဆစ်ဘီး “လူတယော့-က်မာ သားနေ့ ယော့-က် ရှိဟယ်။

¹² သားငယ်ဟု ဖဟို ‘ဖ၊ နို့ရဲ့ မွီလေဟို ပေးပါ’ ဆိုဘီး တောင်းလေဟယ်။ အယ်ကြောန့် ဖဟု သူ့ရဲ့ မွီအောက်စာ လေဟို သားနေ့ယော့-က်ဟို ခွဲဝီပေးလိုက်ဟယ်။

¹³ ရစ်နဲနဲကြာဘီးနု သားငယ်ဟာ သူ့ရဲ့ မွီအောက်စာ လေဟို ရောင်းခလဘီး ကပ်ထုနု အီထတ်ဟုနေ ဆင်းဟူး ဟယ်။ သူဟာ ဟိုးဝီးဂီးမာရှိနေဟူ တိုင်းပြည်ဟို သွားဘီး အယ်နေရာမာ ဗရမ်းဗဒါသတ်ရှင်ဘီးဟာ သူ့ကပ်လေဟို ဖြုန်းစားပစ်လေဟယ်။

¹⁴ သူ့ရဲ့ ကပ်လေ ဂူလောင်းဟို သောင်းဖြုန်းပစ်ဘီးဟူ ခီမာ အယ်တိုင်းပြည် နှံ့ပုလားမာ ဆိုးဝါးဟူ ငတ်မွတ်ရှင်း ဘေး ကုလရော့-က်လာဟူကြောန့် သူဟာ ငတ်ပြတ်လေ ဟယ်။

¹⁵ အယ်ကြောန့် အယ်တိုင်းပြည်ရဲ့ ပြည်သားလေထဲဟု တယော့-က်နားဟို လောက်လောက်ဟို သွားလေဟယ်။

အယ်ပြည်သားဟု သူ့ရဲ့လဲဗုလန်ထဲဟို့ စေလွှတ်လိုက်ဘီး
ဝပ်လေဟို့ ထီးခိုင်းလေဟယ်။

16 သူဟာ ဝပ်လေစားနေဟူ ပဲတောန့်လေဟို့ စားရှင်ဟူ
စိ ဖြစ်လာလေဟယ်။ အယ်ဘေမဲ့ ဖယ်သူလည်း သူဟို့
စားဇာကျေးဟို့သူ မေ့ဟူ။

17 နှော-က်ဆောင်းမာ သူဟာ သိတရား ဝမ်လာဘီး ‘ငါ့
ဖရဲ့ လောက်သမားလေ ဂူလောင်းဟာ မိုက်ဝအောန် စား
နေရဂေဟယ်။ ငါဟု အယ်မာ ငတ်ပြတ်နေဟယ်!

18 ငါ့ဖနားဟို့ သွားဘီး “ဖ၊ နို့ဟာ ကောန်းဂန်ဟို့ရော၊ နို့
ဖဟို့ရော ပြစ်မှားမိဘီ။

19 နို့ဟို့ သား ဆိုဘီး ခေါ်ဟို့ထိုက်ဟု။ နို့ဖရဲ့ လောက်
သမား တယော-က်မျိုးဘဲ့ ပြုမူပါ” ဆိုဘီး ပြောမယ်’ ဆို
ဘီး ကြံစည်ရှိလေဟယ်။

20 အယ်ကြောန့် သူဟာ ထဘီး ဖနားဟို့ ပုလန်ဟားဟု
ယ်။

“သူဟာ ဟိုးဝီးမာရှိနေဒူးမာ သူ့ရဲ့ဖဟု သားဟို့ မြင်လို
က်ဟူ ခီမာ သနားစိ ဖြစ်လာဟူကြောန့် ပုလေးလာဘီး၊ သူ
ဟို့ ပိုက်ဘီး နမ်းလေဟယ်။

21 သားဟာ ‘ဖ၊ နို့ဟာ ကောန်းဂန်ဟို့ရော၊ နို့ဖဟို့ရော
ပြစ်မှားမိဘီ။ နို့ဟို့ သား ဆိုဘီး ခေါ်ဟို့ထိုက်ဟု’ ဆိုဘီး
ပြောလေဟယ်။

22 အယ်ဘေမဲ့ ဖဟု စေခံလေဟို့ ခေါ်လိုက်ဘီး ‘မြန်းမြ
န်လောက်! ကောန်းဆောင်း ဝတ်လောင်ရှယ်ဟို့ ယူလာဘီး

ဟာ သူ့တို့ ဝတ်ပေးရဲ့။ သူ့လတ်မာ လတ်စွပ်တို့ စွပ်ပေး
ဘီး သူ့ရဲ့ခေမာ ခေနပ်တို့ စီးပေးရဲ့။

23 အယ်ဘီးဟာ ကောန်းဆောင်း နွားသားဂန်းတို့ သွား
ဘီးဟာ သတ်ရဲ့။ နို့လေ စားသော-က်မွဲဂီးတို့ လောက်
ရဲ့ဇို!

24 ဖြားဖြစ်ကြောနဲ့နဲ့ဆိုဟာ ငါ့သားဟာ ရင်းရင်ဒူး
ဟု သေဟွားဘေမဲ့ ခုပုလန်ရှင်ဟွားဘီ။ ရင်းရင်ဒူးဟု
ပျော့-က်ဟွားဘေမဲ့ ခုပုလန်တို့ဟွားဘီ ဆိုဘီး ပြောလေ
ဟယ်။ အယ်ဘီးန စားသော-က်မွဲဂီးတို့ စပြုရေလေဟု
ယ်။”

25 “အယ်ခီမာဘဲ့ သားဂီးဟာ လဲဗုလန်ဟုနေ အီတို့ ပု
လန်လာလေဟယ်။ အီနားတို့ ရှေ့-က်လာဟူ ခီမာ တီးမှု
သံလေ၊ ကခုသံလေတို့ ကြားရဟယ်။

26 အယ်ကြောနဲ့ စေခံတယော့-က်တို့ ခေါ်ဘီး ‘ဖြားဇာ
လေ ဖြစ်နေရဲ့နဲ့။’ ဆိုဘီး မေးလေဟယ်။

27 စေခံဟု ‘သင့်ရဲ့ညီဟာ ဘေးတို့ဘဲ့န ပုလန်ရှေ့-က်
လာဟူကြောနဲ့ သင့်ရဲ့ဖဟု ကောန်းဆောင်း နွားသားဂန်း
တို့ သတ်ဘီးဟာ စားသော-က်မွဲဂီး လောက်ပေးနေဟယ်’
ဆိုဘီး ပုလန်ပြောလေဟယ်။

28 သားဂီးဟာ ရရာတိုင်း မျစ်ဘီးဟာ အီထဲတို့ ဝမ်ဘဲန
နေလေဟယ်။ အယ်ကြောနဲ့ သူ့ဖဟာ ပုလန်တို့ ထွပ်လာ
ဘီးဟာ သူ့တို့ ဖျောင်းဖျလေဟယ်။

29 အယ်ဘေမဲ့ သူဟာ ဖဟု ‘နို့ဟာ နှစ်လေဘောင်ဂီး

ကျွန်တယော့-က်မျိုး နို့ဖတွပ် လောက်လောက်ပေးဟယ်။ နို့ဖရဲ့ မိန့်ဟိုလည်း မြဲဒမ်း နားထောန်ဟယ်။ အယ်ဘေမဲ့ နို့ဖဟာ နို့ဟို ဖြားဇာပေးဖူးနူး။ နို့ငယ်ဂျင်းလေနတူးဒု စားသော့-က်မဲ့လောက်ဟိုတွပ် ဘဲတကောန်ဟိုမျှ ပေးဖူးဟု!

30 အယ်ဘေမဲ့ နို့ဖရဲ့ အောက်စာ ပစ်စီးလေဟို မီးမပျစ်လေန ပျော်ပါးဖုလူးစားပစ်ဘီး ပုလန်လာဟူ အယ်သားတွပ် ဆိုဘီး ကောန်းဆောင်း နွားသားဂန်းဟို သတ်ဘီး ကျွေးဟယ်!’ ဆိုဘီး ပုလန်ပြောလေဟယ်။

31 ဖဟု ‘ငါ့သား၊ သားဟု ဖနတူးဒု မြဲဒမ်းနေဟယ်။ ဖရဲ့ အောက်စာပစ်စီး ဂူလောင်းဟာလည်း သားရဲ့ အောက်စာပစ်စီးလေ ဖြစ်ဟယ်။

32 အယ်ဘေမဲ့ သားရဲ့ ညီဟာ ရင်းရင်ဒူးဟု သေဟားဘေမဲ့ ခုပုလန်သတ်ရှင်ဟားဘီ။ ရင်းရင်ဒူးဟု ပျော့-က်ဟားဘေမဲ့ ခုပုလန်တို့ဟားဘီ။ အယ်ကြောန့် နို့လေဟာ ဝန်းသာဘီး ပွဲလောက်နေဟယ်’ ဆိုဘီး ပုလန်ပြောလေဟယ်” ဆိုဘီး မိန့်တော်မူလေဟယ်။

16

ပါးနပ်ဟူ ဘဏ္ဍာစိုးကြောန်း

1 ယေရှုဟာ တမဲ့တော်လေဟို “ဌေးတယော့-က်မာ ဘဏ္ဍာစိုး တယော့-က် ရှိဟယ်။ အယ်ဘဏ္ဍာစိုးဟာ ဌေးရဲ့ အောက်စာ ပစ်စီးလေဟို ဖုလူးစားပစ်နေဟယ် ဆိုဘီး ဌေးဟို လာပြောဂေဟယ်။

၂ အယ်ကြောန့် ဌေးဟု ဘဏ္ဍာစိုးဟို့ ခေါ်ဘီး ‘နန့်ကြောန့်လေ ငါကြားရဇလေဟု ဖြားလေနှူး။ နန့်ဟို့ ငါ့ရဲ့ ဘဏ္ဍာစိုးဖြစ်န ဆစ်ဘီး ထားနိုင်ဟို့မူဘီ။ အယ်ကြောန့် နန့်ရဲ့ လောက်ငန်းနဆိုင်ဟူ စာရင်းလေဟို့ တန်ပြပါ’ ဆိုဘီး ပြောလေဟယ်။

၃ ဘဏ္ဍာစိုးဟု ‘ငါ့သခင်ဟု ငါ့ဟို့ လောက်ဖုလုလိုက်ဘီ။ ငါ ဖယ်မျိုးလောက်ရမယ်နှူး။ ငါ့မာ မုလေတူးဟို့ ခွန်အားလည်း မေ့ဟု။ တောန်းစားဟို့လည်း ငါယှစ်ဟယ်။

၄ ဘဏ္ဍာစိုး ရာထူးဟုနေ ငါပုလဟူးဟူ ခီမာ လူလေဟာ သူးနို့ရဲ့ အီလေမာ ငါ့ဟို့ လတ်ခံအောက် ဖြားမျိုးလောက်ရမယ် ဆိုဇာဟို့ ငါသိဘီ!’ ဆိုဘီး ကိုယ့်ကိုယ်ကိုယ် ပြောလေဟယ်။

၅ အယ်ကြောန့် သူ့သခင်ဟို့ ကပ်ကွီးပေးဇရိဟူ လူလေဂူလောင်းဟို့ ခေါ်လိုက်ဟယ်။ ပထမလူဟို့ ‘ငါ့သခင်ဟို့ ဆပ်ရဟို့ ကပ်ကွီး ဖယ်မျှရှိနှူး’ ဆိုဘီး မေးလေဟယ်။

၆ အယ်လူဟု ‘ဆီဂါလံ ၈၀၀ ပေးဇရိပါဟယ်’ ဆိုဘီး ပုလန်ဖြေဟယ်။ ဘဏ္ဍာစိုးဟု သူ့ဟို့ ‘နန့်ရဲ့ ကပ်ကွီးစာရင်းဟို့ ယူဘီး ဂါလံ ၄၀၀ ဆိုဘီး ဗြန်းဗြန်ဟူးရေးပါ’ ဆိုဘီး ပြောလေဟယ်။

၇ အယ်ဘီးနု နှော့-က်ထပ် တယော့-က်ဟို့ ‘နန့်မာလည်း ကပ်ကွီး ဖယ်မျှရှိဟယ်နှူး’ ဆိုဘီး မေးလေဟယ်။ သူဟု ‘ဂျောင်အိ ၁,၀၀၀ ပေးဇရိပါဟယ်’ ဆိုဘီး ပုလန်ဖြေဟယ်။ ဘဏ္ဍာစိုးဟု ‘နန့်ရဲ့ ကပ်ကွီး စားရင်းဟို့ ယူဘီး အိ

၈၀၀ ဆိုဘီး ရေးပါ' ဆိုဘီး သူ့ဟို ပြောလေဟယ်။

⁸ သခင်ဟု အယ်မျိုးရိုးသားဘဲဟူ ဘဏ္ဍာစိုးရဲ့ ပါးနပ်ဟူ လောက်ဆောန့်မှုတွပ် သူ့ဟို ချီးကျူးလေဟယ်။ ဖြားဖြစ် ကြောန့်နူးဆိုဟာ လောကသားလေဟာ သူးနို့ရဲ့ လောကီ ကံစလေ လောက်ဟူ ခီမာ လန်းသားလေထတ် ပိုဘီး ပါး နပ်ဂေဟယ်” ဆိုဘီး မိန့်တော်မူလေဟယ်။

⁹ ယေရှုဟု “နန်းနို့ဟို ငါပြောမယ်။ လောက စည်းဇိမ် အားဖြင့် မိဆွေလေ ရအောန်လောက်ဂေ။ အယ်မျိုးဆို ဟာ အယ်စည်းဇိမ်လေ ကူဟားဟူ ခီမာ သူးနို့ဟာ နန်းနို့ ဟို ထာဝရအိတော်မာ ကြိုဆိုလတ်ခံလေ့မယ်။

¹⁰ သေးငယ်ဟူ မူမာ သစ်စာရှိဟူသူဟာ ကီးမားဟူ မူ မာလည်း သစ်စာရှိလေ့မယ်။ သေးငယ်ဟူ မူမာ သစ်စာ မှော့ဘဲဟူ သူဟာ ကီးမားဟူ မူမာလည်း သစ်စာရှိလေ့မယ် မူဟူ။

¹¹ အယ်ကြောန့် နန်းနို့ဟာ လောကစည်းဇိမ်ဟို သောင်း ပြုဟူ ခီမာ သစ်စာမှော့ဘဲဟူသူ ဖြစ်မယ် ဆိုဟာ စစ်မှန်ဟူ စည်းဇိမ်ဟို ဖယ်သူဟု နန်းနို့ဟို အပ်မယ်နူး။

¹² အယ်ဘီးဟာ တခြားလူရဲ့ အောက်စာပစ်စီးဟို သောင်းပြုဟူ ခီမာ သစ်စာမှော့ဟု ဆိုဟာ နန်းနို့ပိုင်ဆိုင် ဟို အောက်စာပစ်စီးဟို ဖယ်သူဟာ ပေးဂေ့မယ်နူး။

¹³ “ဖယ်ကျွန်ဘဲဖြစ်ဖြစ် သခင်နွေယော့-က်ရဲ့ စေဟို ခံနိုင်ဟူ။ သခင်တယော့-က်ဟို မူးဘီး သခင်တယော့-က် ဟို ရှစ်လေ့မယ်။ တယော့-က်ဟို သစ်စာစောန့်ဘီး တ

ယော့-က်ဟို ထီလေးဇးလောက်လေ့မယ်။ နန်းနို့လေဟာ ဘုရားသခင်န လောကစည်းဇိမ်လေဟို တပြိုင်ဒဲ စေခံနိုင် ဂေဟ့” ဆိုဘီး မိန့်တော်မူလေဟယ်။

ယေရှုရဲ့ စကားတော်တချို့

(မဿဲ ၁၁.၁၂,၁၃; ၅.၃၁,၃၂; မာကု ၁၀.၁၁,၁၂)

¹⁴ အယ်စကားလေဟို ဖာရိရဲလေ ကြားရဟူ ခီမာ ယေရှု ဟို လှော်နပြောန်ဂေဟယ်။ ဖြားဖြစ်ကြောန်နူးဆိုဟာ သူး နို့လေဟာ ကပ်မတ်မားလေ ဖြစ်ဟယ်။

¹⁵ ယေရှုဟာ သူးနို့ဟို “နန်းနို့ဟာ လူလေရဲ့ ရှေ့မာ ဖြော န်မတ်ဟန်ဆောန်ဟယ်။ အယ်ဘေမဲ့ ဘုရားသခင်ဟာ နန်း နို့ရဲ့ စိန့်လောင်းဟို သိနေဟယ်။ လူလေ ရရာတိုင်း တန်ဖိုး ထားဟူဇာဟာ ဘုရားသခင်ရဲ့ ရှေ့မာ ရှုံဇာကောန်းဟယ်” ဆိုဘီး မိန့်တော်မူလေဟယ်။

¹⁶ “မောရှေရဲ့ ပညတ်ကျမ်းန ပရောဖက်ကျမ်းလေဟာ ဗတုတိဇယောဟန် လတ်ထတ်ထိ သတ်ရော့-က်မူ ရှိဟယ်။ အယ်ခီဂဒဲဟုနေ ဘုရားသခင်ရဲ့ နိုင်ငံတော်ကြောန်း ဒန်းကောန်းဟို ဟောပြောဂေဟယ်။ လူတိုင်းဟာ အယ် နိုင်ငံတော်ထဲဟို လုယက် တိုးဝမ်ဂေဟယ်။

¹⁷ အယ်ဘေမဲ့ ပညတ်တရားထဲမာ ငယ်ဆောင်းဖြစ်ဟူ စာလောင်း တလောင်းပျစ်စီးဟိုထတ် ကောန်းဂန်ဘောင်န မုလေဂီး ပျစ်စီးဟို လွယ်ဟယ်။”

18 “ကိုယ့်မယားဟို့ ကွာရှင်းဘီးဟာ တခြားမီးမန အီထောန်ပြုဟူသူဟာ အီထောန်ရေးဖော့-က်ပုလန်ရှင်းဟို့ ကျူးလွန်သူ ဖြစ်ဟယ်။ ကွာရှင်းဟားဟူ မီးမတယော့-က်န အီထောန်ပြုဟူ ယော့-က်ကျားဟာလည်း အီထောန်ရေးဖော့-က်ပုလန်ရှင်းဟို့ ကျူးလွန်ဟယ်။”

ဌေးန လာဇရု

19 “တခါဒူးဟု ဌေးတယော့-က်ဟာ ရရာတိုင်း ဖိုးကီးဟူ ခရမ်းရောန်ဝတ်ရောင်န ပိချောဟို့ ဝတ်ဆင်ဘီး နေ့တိုင်း စည်းငိမ်ခံစားဘီး နေလေဟယ်။

20 ဌေးရဲ့ အီခွဗော့-က်နားမာ လာဇရု နာမယ်ရှိဟူ ဆင်းရဲသား တယော့-က်ရှိဘီး သူ့တကောန်လောင်းမာ အိုင်းနာလေ ပေါ့-က်နော့ဘီး။”

21 “သူဟာ ဌေးရဲ့ စားမွဲဟု ကုလဟူ စားကြွင်းစားကျန်လေဟို့ စားရဟို့တွပ် မျှော်နေဟယ်။ ခွီးလေဟုလည်း သူ့ရဲ့ အိုင်းနာလေဟို့ လာဘီး ယစ်နေလေဟယ်။

22 ဆင်းရဲသားဟာ သေဟားဟူ ခီမာ ကောန်းဂန်တမန်လေဟု သူ့ဟို့ အာဗြဟံရဲ့ ဘေးမာ ထိုင်စေဟို့ သယ်ဆောင်ဟားလေဟယ်။ ဌေးလည်း သေဟားဘီးဟာ သဂြိုဟ်ရှင်းဟို့ ခံရလေဟယ်။

23 သူဟာ မရဏာနိုင်ငံ*မာ ဝေဒနာဟို့ ဆိုးဆိုးဝါးဝါး ခံနေရဘီး မော့ကေလိုက်ဇာ အာဗြဟံန အာဗြဟံရဲ့ ဘေးမာ လာဇရုဟို့လည်း မြင်လိုက်ရဟယ်။

16:18 ၁၆.၁၈ မ ၅.၃၂: ၁ ကော ၇.၁၀,၁၁

* 16:23 ၁၆.၂၃

မရဏာနိုင်ငံ၊ လူသေလေရဲ့ လောက။

24 အယ်ကြောန့် သူဟု ‘ဖအာမြဟံ! ကျွန်တော့်ဟို့ သနားပါ။ ကျွန်တော်ဟာ အယ်မီးဘောင်ထဲမှာ ဝေဒနာဟို့ ဆိုးဆိုးဝါးဝါး ခံနေရကြောန့် လာဇရုရဲ့ လတ်ဖျားဟို့ ရေဆွတ်ဘီး ကျွန်တော့်လျှာဟို့ အေးစေဟို့ သူ့ဟို့ စေလွှတ်ပေးပါ!’ ဆိုဘီး အော်ပြောလေဟယ်။

25 အယ်ဘေမဲ့ အာမြဟံဟု ‘ငါ့သား၊ နန်ဟာ သတ်ရှင်ခီဒူးဟု ကောန်းဟူဇာလေဟို့ လတ်ခံရရှိဘီး လာဇရုဟာ ကောန်းဘဲဟူဇာလေဟို့ လတ်ခံရရှိဟွားဟယ် ဆိုဇာဟို့ အော့-က်မေ့ပါ။ အယ်ဘေမဲ့ ခု သူဟာ အယ်နေရာမှာ သတ်သာရှင်းရှိဘီး နန်ဟု ဝေဒနာဟို့ ဆိုးဆိုးဝါးဝါး ခံစားနေရဟယ်။

26 အယ်ဘီးဟာ နန်းနို့န နို့လေကြားမှာ ရရာတိုင်း နတ်ဟူချော-က်ဂီး တခုရှိဟယ်။ အယ်ကြောန့် နန်းနို့ဟုလည်း နို့လေနားဟို့ ကူးနိုင်ဂေ့ဟု။ နို့လေဟုလည်း နန်းနို့နားဟို့ ကူးနိုင်ဂေ့ဟု’ ဆိုဘီး ပုလန်ပြောလေဟယ်။

27 ဌေးဟု ‘ဖ၊ အယ်ဆိုဟာ လာဇရုဟို့ ကျွန်တော့်ဖရဲ့ အီဟို့ စေလွှတ်ပေးဟို့တွပ် ကျွန်တော် တောန်းလျှော့-က်ပါဟယ်။

28 ကျွန်တော့်မှာ ညီငါးယော့-က်ရှိပါဟယ်။ သူးနို့လေဟို့ ဝေဒနာခံစားရဟူ အယ်နေရာဟို့ ရော့-က်ဘဲအောန် သူးနို့ဟို့ ဒိပေးဟို့ လာဇရုဟို့ သွားစေပါ’ ဆိုဘီး ပြောလေဟယ်။

29 အာမြဟံဟု ‘နန်ရဲ့ ညီလေဟို့ ဒိပေးဟို့ မောရှေန ပ

ရောဖက်လေ ရှိဟုယ်။ သူးနို့စကားလေဟို့ နားထောန်ရမယ်’ ဆိုဘီး ပြောလေဟုယ်။

³⁰ ငွေးဟု ‘ဖအာမြဟံ၊ အယ်မျိုး မူဟု! သေရာဟု ပုလန်ရှင်လာဟူ ယော့-က်ယော့-က်ဟို့ သူးနို့နားဟို့ သွားစေမယ် ဆိုဟာ သူးနို့ဟာ နောန်ဒရလေမယ်’ ဆိုဘီး ပုလန်ပြောလေဟုယ်။

³¹ အယ်ဘေမဲ့ အာမြဟံဟု ‘သူးနို့လေဟာ မောရှေန ပရောဖက်လေရဲ့ စကားဟို့ နားထောန်ဂေဟု ဆိုဟာ သေရာဟုန ပုလန်ရှင်လာဟူ ယော့-က်ယော့-က်ဟို့လည်း လတ်ခံယောင်ကြည်ဂေဟို့ မူဟု’ ဆိုဘီး ပြောလေဟုယ်” ဆိုဘီး မိန့်တော်မူလေဟုယ်။

17

ပြစ်ကြောန်း

(မသဲ ၁၈.၆, ၇, ၂၁, ၂၂; မာကု ၉.၄၂)

¹ ယေရှုဟာ တမဲ့တော်လေဟို့ “လူလေဟို့ ပြစ်ထဲကုလအောန် လောက်ဟို့ မှားယွင်းဇာလေ ရှိရမယ်။ အယ်ဘေမဲ့ ပြစ်ထဲကုလအောန် မှားယွင်းဇာလေ လောက်ဟူ သူဟာ အမင်္ဂလာရှိဟုယ်။

² အယ်လူဟာ အယ်မျိုး သားဂန်းတ ယော့-က်ဟို့ မှားယွင်းစေရှင်းထတ် ကိုယ့်လည်ဗန်းမာ ကီးမားဟူ ကုလိဆောင်ဟို့ ဆွဲဘီးဟာ ပန်လယ်ထဲမာ ပစ်ဒုလခံရရှင်းဟာ ပိုဘီး ကောန်းအူးမယ်။

³ အယ်ကြောန့် ဖြားဘဲလောက်လောက် ဒီထားဂေ့!

“နန့်ရဲ့ ညီကိုဟု နန့်ဟို့ ပြစ်မှားမယ် ဆိုဟာ သူ့ဟို့ ဆောင်းမပါ။ သူဟာ နောက်ဒရမယ် ဆိုဟာ ခွမ့်လွှတ်လိုက် ပါ။

⁴ သူဟု နန့်ဟို့ တရစ်မာ ခွန်နစ်ခါ ပြစ်မှားဘီးဟာ ခွန် နစ်ခါလောင်းလောင်း နန့်နားဟို့ လာဘီးဟာ ‘ငါနောက်ဒရ ဘီ’ ဆိုဘီး လာပြောမယ် ဆိုဟာ သူ့ဟို့ ခွမ့်လွှတ်ရမယ်” ဆိုဘီး မိန့်တော်မူလေဟယ်။

ယောင်ကြည်ရှင်းကြောန်း

⁵ တမန်တော်လေဟု သခင်ဘုရားဟို့ “ကျွန်တော့်ဟား လေရဲ့ ယောင်ကြည်ရှင်းဟို့ တိုးလာအေန့် လောက်ပေး တော်မူပါ!” ဆိုဘီး လျှော့-က်ဂေ့ဟယ်။

⁶ သခင်ဘုရားဟု “နန့်နို့မာ မညှင်းစေလော့-က် ယောင် ကြည်ရှင်း ရှိမယ် ဆိုဟာ အယ်ပိုးစားဗန်ဟို့ ‘ပြစ်ဟုနေ ကု လော့ဘီးဟာ ပန်လယ်ထဲမာ စိုက်နေစေ!’ ဆိုဘီး နန့်နို့ဟု ပြောမယ် ဆိုဟာ နန့်နို့ပြောဟူတိုင်း အယ်ပန်ဟု နားထော န်လေ့မယ်။

စေခံတယော့-က်ရဲ့ တာဝန်

⁷ “နန့်နို့ထဲဟု တယော့-က်မာ လယ်ထွန်ဟို့၊ သိုးထီးဟို့ ခိုင်းဟားဟူ စေခံတယော့-က် ရှိဟယ်။ သူဟာ လဲဗုလန် ဟု ပုလန်လာဟူ ခီမာ ဗြန်းဗြန်လာဘီး စားသော့-က်ဂေ့ ဆိုဘီးဟာ နန့်နို့ထဲမာ ဖယ်သူပြောမယ်နူး။

⁸ လောင်းဝပြောဟို့ မူဟု! အယ်မျိုးပြောဟို့စား ‘ငါ့တွပ် စားဇာပြင်ပါ။ ငါစားသော့-က်နေဒူးမာ ခါးစဲဘီး ငါ့ဟို့ စေ ခံပါ။ ငါစားဘီးမှ နန်စားရမယ်’ ဆိုဘီး ပြောလေ့မယ် မူ ဟုလော။

⁹ စေခံဟာ ခိုင်းဟားဟူတိုင်း လောက်ပေးဟူကြောန် သူ့ ဟို့ ကျေးဇူးတန်ရဟို့လော။

¹⁰ အယ်မျိုးဘဲ နန်းနို့ဟို့ ခိုင်းဟားဟူ လောက်လေ ဂူ လောင်း လောက်ဘီးဟားဟူ ခီမာ ‘နို့လေဟာ သာမန်စေ ခံလေ ဖြစ်ဘီး နို့လေရဲ့ တာဝန်ဟို့ လောက်ဆောန်ဇာဘဲ ဖြစ်ဟယ်’ ဆိုဘီး ပြောဂေ့ပါ” ဆိုဘီး မိန့်တော်မူလေဟယ်။

ယေရှုဟာ လူဆယ်ယော့-က်ဟို့ နာပျော့-က်စေဟူ ကြောန်း

¹¹ ယေရှုဟာ ယေရှုရှလင်မြို့ဟို့ ကြွဟားဟူ ခီမာ ရှမာ ရံပြည်န ဂါလိလဲပြည် နယ်စပ်ဟုနေဘီး ကြွတော်မူလေ ဟယ်။

¹² ကိုယ်တော်ဟာ ဝါတဝါထဲဟို့ ဝမ်တော်မူဟူ ခီမာ နူနာ ဆယ်ယော့-က်ဟာ ကိုယ်တော့်ဟို့ လာတို့ဂေ့ဟယ်။ သူးနို့ လေဟာ ဝီးဝီးမာ ရပ်နေဘီး

¹³ “သခင်ယေရှု! ကျွန်တော့်ဟားလေဟို့ သနားတော်မူ ပါ!” ဆိုဘီး အော်ပြောလေဟယ်။

¹⁴ ယေရှုဟာ သူးနို့ဟို့ မြင်တော်မူဟူ ခီမာ “နန်းနို့ဟာ ယဇ်ပုရောဟိတ်လေနားဟို့ သွားဘီး မိမိကိုယ်ဟို့ ပြဂေ့”

ဆိုဘီး မိန့်တော်မူလေဟယ်။

သူးနှိဟာ သွားနေဒူးမာဘဲ သန်ရှင်းဟားလေဟယ်။*

15 သူးနှိထဲဟာ တယော့-က်ဟာ ရောဂါပျော့-က်ဟားဘီ ဆိုဇာဟို မြင်ဟူ ခီမာ ဘုရားသခင်ဟို သံကုလယ်ဂီးန ချီးမွမ်းဘီး ပုလန်လာလေဟယ်။

16 ယေရှုရဲ့ ခေတော်ရင်းမာ ပျပ်ဝပ်ဘီးဟာ ကိုယ်တော့် ဟို ကျေးဇူးတန်လေဟယ်။ အယ်လူဟာ ရှုမာရီလူ တယော့-က်ဖြစ်ဟယ်။

17 ယေရှုဟာ “လူဆယ်ယော့-က်လောင်း သန်ရှင်းဟားဟယ် မူဟုလော။ ကျန်ဟူ ကိုးယော့-က်ဟာ ဖယ်မာနူး။

18 ဖြားဖြစ်ကြောန့် အယ်လူမျိုးခြား တယော့-က်ဘဲ ပုလန်လာဘီး ဘုရားသခင်ဟို ချီးမွမ်းရနူး။” ဆိုဘီး မေးတော်မူလေဟယ်။

19 အယ်ဘီးန ယေရှုဟာ သူ့ဟို “ထဘီးသွားဝေါ၊ နန်ရဲ့ ယောင်ကြည်ရှင်းဟာ နန်ဟို ကျန်းမာစေဘီ” ဆိုဘီး မိန့်တော်မူလေဟယ်။

နိုင်ငံတော် တည်ထောက်ဟူကြောန်း

(မသံ ၂၄.၂၃-၂၈, ၃၇-၄၁)

20 ဖာရိရှဲတချို့ဟာ ယေရှုဟို ဘုရားသခင်ရဲ့ နိုင်ငံတော်ဟာ ဖယ်ခီမာ တည်ထောက်မယ်နူး။ ဆိုဘီး မေးဂေဟယ်။ ကိုယ်တော်ဟာ “ဘုရားသခင်ရဲ့ နိုင်ငံတော်ဟာ မြင်ရဟူ နိုင်ငံမျိုး တည်ထောက်ဟို မူဟု။

* 17:14 ၁၇.၁၄သန်ရှင်းဟားလေဟယ်၊ ရှု ၅.၁၂။

21 ‘ကေ့ကေ့။ နိုင်ငံတော်ဟု အယ်မာရှိဟယ်! ဟောက်မာရှိဟယ်!’ ဆိုဘီး ဖယ်သူလည်း ပြောနိုင်လေ့မယ် မူဟု။
 ဖြားဖြစ်ကြောန့်နူးဆိုဟာ နိုင်ငံတော်ဟု နန်းနို့ထဲမာ[†] ရှိနေကြောန့် ဖြစ်ဟယ်” ဆိုဘီး မိန့်တော်မူလေဟယ်။

22 အယ်ဘီးန ကိုယ်တော်ဟု တမဲ့တော်လေဟို့ “နန်းနို့ မြင်ရှင်နေဟူ လူ့သားရဲ့ နေ့ရစ်တရစ် ရော-က်လာလေ့မယ်။ အယ်ဘေမဲ့ နန်းနို့ မြင်ရလေ့မယ် မူဟု။

23 လူလေဟု ‘ကေ့ကေ့၊ လူ့ရဲ့သားဟု ဟောက်မာရှိဟယ်! အယ်မာရှိဟယ်!’ ဆိုဘီး နန်းနို့ဟို့ ပြောလေ့မယ်။
 အယ်ဘေမဲ့ လိုက်ရှာဂေ့န။

24 ဖြားဖြစ်ကြောန့်နူးဆိုဟာ လျှပ်စစ်ဟု ဖျတ်ဟူ ခီမာကောန်းဂန်တဖတ်ဟုနေ တခြားတဖတ်ထိ လန်းဟူးမျိုးဘဲ လူ့ရဲ့သားဟု ပုလန်လာဟူ နေ့ရစ်မာလည်း အယ်မျိုးဘဲ ဖြစ်လေ့မယ်။

25 အယ်ဘေမဲ့ သူဟု ရင်ဦးဆောင်း နာကျင်ရှင်းလေဘောင်ဂီး ခံရဘီး ခုခေတ် လူလေရဲ့ ငြင်းပယ်ရှင်းလေဟို့ ခံရလေ့မယ်။

26 နောဧရဲ့ နေ့ရစ်လေမာ ဖြစ်ဟူးမျိုးဘဲ လူ့ရဲ့သား ပုလန်လာဟူ နေ့ရစ်လေမာလည်း ဖြစ်လေ့မယ်။

27 နောဧဟု သန်းဖောထဲဟို့ ဝမ်ဟူ နေ့ရစ်တိုင်အောန် လူလေဟု စားလိုက်၊ သော့-က်လိုက်၊ လတ်ထပ်လိုက်

[†] 17:21 **၁၇.၂၁** နန်းနို့ထဲမာ၊ အယ်မျိုးမူဘဲဟု နန်းနို့ကြားထဲမာ အယ်မျိုးမူဘဲဟု နန်းနို့ကြားထဲမာ ရောက်တရစ် ပေါ်လာလေ့မယ်။

လောက်နေဂေဟယ်။ အယ်ဘီးန ရေကီးလာဘီး သူးနို့လေ
ဂူလောင်းဟို့ ဖျစ်ဆီးလေဟယ်။

²⁸ အယ်မျိုးဘဲ လောတရဲ နေရစ်လေမာလည်း လူတိုင်း
ဟာ စားလိုက်၊ သော့-က်လိုက်၊ ရောန်းလိုက်၊ ဝယ်လိုက်၊
စိုက်ပျိုးလိုက်၊ တည်ဆော့-က်လိုက်န လောက်နေဂေဟ
ယ်။

²⁹ သောဒုံမြို့ဟုနေ လောတ ထွပ်ဟူနေမာ ကောန်းဂန်
ဟုနေ ကန်န မီးဝါဒလလိုက်ဘီး သူးနို့လေ ဂူလောင်းဟို့
ဖျစ်စီးလေဟယ်။

³⁰ လူရဲသား ပေါ်ထွပ်ဟူ နေရစ်မာလည်း အယ်မျိုးဘဲ
ဖြစ်လေ့မယ်။”

³¹ “အယ်မျိုးနေမာ အီးခေါန်မိုးထတ်မာရှိဟူ လူဟို့ အီ
ထဲမာရှိဟူ ပစ်စီးလေဟို့ ယူဟို့တွပ် အော့-က်ဟို့ ဆင်းစေ
န။ အယ်မျိုးဘဲ လဲဗုလန်ထဲမာရှိနေဟူ လူလည်း အီဟို့ ပ
လန်စေန။

³² လောတရဲ မယားဟို့ အော့-က်မေ့ဂေ။

³³ ကိုယ့်သတ်ဟို့ ကယ်ရှင်ဟူ လူဟာ သတ်ရှောင်းလေ
မယ်။ ကိုယ့်သတ်ဟို့ ရှောင်းစေဟူ သူဟာ သတ်ဟို့ ကယ်
တန်လေ့မယ်။

³⁴ နန်းနို့ဟို့ ငါပြောမယ်၊ အယ်ညဉ့်မာဘဲ အိယာတခုဒဲ
မာ တူးဒုအိနေဟူ လူနေ့ယော့-က်ထဲဟု တယော့-က်ဟို့
သီးယူဟားဘီးဟာ တယော့-က်ဟု ကျန်ရစ်လေ့မယ်။

35 တူးဒူကုလိဆောင်ကုလိနေဟူ မီးမနွေယော့-က်ထံ
ဟု တယော့-က်ဟို သီးယူဟူးဘီးဟု တယော့-က်ဟု
ကျန်ရစ်လေ့မယ်” ဆိုဘီး မိန့်တော်မူလေဟယ်။

36 †

37 တမဲ့တော်လေဟု ကိုယ်တော့်ဟို “သခင်၊ အယ်မူဇာ
လေဟု ဖယ်နားမာ ဖြစ်ဟို့နူး” ဆိုဘီး မေးဂေဟယ်။

ယေရှုဟု “သေကောန်ရှိဟူ နေရာမာ လင်းတငှတ်လေ
စုနေဂေလေ့မယ်” ဆိုဘီး မိန့်တော်မူလေဟယ်။

18

မောက်ဆိုးမန တရားသူဂီးရဲ့ ပေါင်ဥပမာ

1 အယ်ဘီးန ယေရှုဟု တမဲ့တော်လေဟို လောင်းဝ
လတ်လျော့ဘဲန မြဲဒမ်း ဆုတောင်းရမယ် ဆိုဘီး သူးနို့ဟို
သွန်သန်ဟိုတွပ် ပေါင်ဥပမာန မိန့်တော်မူလေဟယ်။

2 “မြို့တမြို့မာ ဘုရားသခင်ဟိုလည်း ကြော့-က်ဘဲဟူ၊
လူလေဟိုလည်း ရိုသေဘဲဟူ တရားသူဂီး တယော့-က်ရှိ
ဟယ်။

3 အယ်မြို့မာရှိဟူ မောက်ဆိုးမ တယော့-က်ဟု သူနား
ဟို တခီလောင်းလာဘီး ‘ကျွန်မဟို တရားစွဲဟူသူဟို မျ
မျှတတ စီရင်ပေးပါ’ ဆိုဘီး တောင်းဗန်ဟယ်။

† 17:36 **၁၇:၃၆** တချို့ မူရင်းလတ်ရေးမူလေမာ လဲဗွန်မာ
လောက်လောက်နေဟူ ယော့-က်ကျားနွေယော့-က်ထံဟု တယော့-က်ဟို
သီးဟူးဘီးဟု တယော့-က်ဟု ကျန်ရစ်လေ့မယ်၊ ဆိုဘီး ခန်းငယ် ၃၆ ဟို
ထပ်ပေါင်းထဲဟူးဟယ် (ရှု မ ၂၄:၄၀)။

4 ခီ ကြာဂီး တရားသူဂီးဟာ အယ်မောက်ဆိုးမရဲ့ လျှော့-က်ဟွားချစ်ဟို့ ငြင်းဆန်လေဟယ်။ အယ်ဘေမဲ့ နှော့-က်ဆောင်းမာ သူဟာ ‘ငါဟာ ဘုရားသခင်ဟို့လည်း ကြော့-က်ဟဲ့။ လူလေဟို့လည်း ရှိသေဟဲ့။

5 အယ်ဘေမဲ့လည်း အယ်မောက်ဆိုးမဟာ ငါဟို့ နှော့-က်ယှစ်ပေးနေဟူကြောန့် သူမဟို့ တရားနည်းလမ်း တိုင်း စီရင်မယ်။ အယ်မျိုးလောက်ဟဲ့ ဆိုဟာ သူဟာ တ ခီလောင်းလာဘီး နှော့က်ဆောင်းမာ ငါဟို့ ပန်ဗန်းစေလေ့ မယ်!’ ဆိုဘီး ကိုယ့်ကိုယ်ကိုယ် ပြောလေဟယ်” ဆိုဘီး မိန့်တော်မူလေဟယ်။

6 သခင်ဘုရားဟာ ဆစ်ဘီး “တရားဘဲဟူ တရားသူဂီး ပြောလိုက်ဇာဟို့ နားထောန်ကေ။

7 ဘုရားသခင်လည်း သူနားဟို့ နေ့ရောညဉ့်ပါ ကူညီဟို့ တွပ် အော်ဟစ်နေဟူ၊ သူဝီးကော့-က်ဟွားဟူ လူလေတွပ် စီရင်ဘဲန နေဟို့လော။ ကိုယ်တော်ဟာ အယ်လူလေဟို့ ကူ ညီဟို့တွပ် ခီဆွဲနေဟို့လော။

8 နန်းနို့ဟို့ ငါပြောမယ်။ ကိုယ်တော်ဟာ သူးနို့လေတွပ် ဖြန်းဖြန်ဟွား တရားစီရင်လေ့မယ်။ အယ်ဘေမဲ့ လူရဲ့သား ရော့-က်လာဟူ ခီမာ ယောင်ကြည်ရှင်းဟို့ မှလေဂီးထတ် မာ တွံရအူးမယ် ဘဲ့လော။” ဆိုဘီး မိန့်တော်မူလေဟယ်။

ဃာရိရဲန ခွန်ကော့-က်မား ပေါင်ဥပမာ

9 ကိုယ့်ဖြောန်မတ်ရှင်းဟို့ အားကိုးဘီး တပါးသူဟို့ ထန် သေးတတ်ဟူ သူလေတွပ် ယေရှုဟာ အယ်ပေါင်ဥပမာန

မိန့်တော်မူလေဟယ်။

10 “တခါဒူးဟု လူနွေယော့-က်ဟာ ဆုတောင်းဟို့ ဆိုဘီး ဗိမာန်တော်ဟို့ သွားဂေ့ဟယ်။ တယော့-က်ဟု ဖာရိရဲ ဖြစ်ဘီး နော့-က်တယော့-က်ဟု ခွန်ကော့-က်မား ဖြစ်ဟယ်။

11 ဖာရိရဲဟာ မတ်တတ်ရပ်ဘီး ‘ဘုရားသခင်၊ ကျွန်တော်ဟာ တခြားသူလေမျိုး လောဘကီးဟူသူ၊ ဖြောင့်မတ်ဘဲဟူသူ၊ အီထောန်ရေးဖော့-က်ပုလန်ဟူသူ မုဘဲဟူကြောန် ကျေးဇူးတန်ဟယ်။ ကျွန်တော်ဟာ အယ်ခွန်ကော့-က်မားမျိုးလည်း မုဘဲဟူကြောန် ကိုယ်တော့ဟို့ ကျေးဇူးတန်ဟယ်’ ဆိုဘီး ဆုတောင်းလေဟယ်။

12 ‘ကျွန်တော်ဟာ တဘတ်မာ နွေရစ်စာရှောင်ဘီး ကျွန်တော့်ဝမ်ငွေ ဂူလောင်းရဲ ဆယ်ဖို့တဖို့ဟို့လည်း ပေးဟယ်’ ဆိုဘီး ဆုတောင်းလေဟယ်။

13 အယ်ဘေမဲ့ ခွန်ကော့-က်မားဟာ ဝီးမာဘဲရပ်နေဘီး ကောင်းဂန်ဟို့လည်း မော်ကေ့ရဲဘဲန ‘ဘုရားသခင်၊ ပြစ်သား ကျွန်တော့်ဟို့ သနားတော်မူပါ!’ ဆိုဘီး ရင်ဖတ်ဟို့ ထုဘီးဟာ ဆုတောင်းလေဟယ်။

14 နန်းနို့ဟို့ ငါပြောမယ်၊ အယ်ခွန်ကော့-က်မားဟာ ဘုရားသခင်ရှေ့မာ သူတော်ကောင်းဖြစ်န အီဟို့ ပုလန်ဟားရဟယ်။ ဖာရိရဲဟု အယ်မျိုးမူဟု။ ဖြားဖြစ်ကြောန် နူးဆိုဟာ သူ့ကိုယ်သူ ချီးမြှော့-က်ဟူသူဟာ နှိခိုလခံရဘီး

သူ့ကိုယ်သူ နို့ခလဟူသူဟာ ချီးမြှောက်ရှင်းခံရလေ့မယ်”
ဆိုဘီး မိန့်တော်မူလေဟယ်။

ယေရှုဟု သားဂန်းလေဟို့ ကောင်းဂျီးပေးဟူကြောင်း
(မဿဲ ၁၉.၁၃-၁၅; မာကု ၁၀.၁၃-၁၆)

¹⁵ လူတချို့ဟာ သူးနို့သားဂန်းလေထတ်မာ လတ်တန်
ပေးဟို့တွပ် ယေရှုနားဟို့ ခေါ်ဆောင်လာဟယ်။ တမဲ့တော်
လေဟု အယ်မူဇာဟို့ မြင်ဟူ ခီမာ သူးနို့ဟို့ ပြစ်တန်လေ
ဟယ်။

¹⁶ အယ်ဘေမဲ့ ယေရှုဟာ သားဂန်းလေဟို့ သူးနားဟို့ ခေါ်
လိုက်ဘီး “သားဂန်းလေဟာ ငါနားဟို့ လာပါလေစေ။ သူး
နို့ဟို့ တားဂေန။ ဖြားဖြစ်ကြောန်နူးဆိုဟာ ဘုရားသခင်ရဲ့
နိုင်ငံတော်ဟာ အယ်သူလေရဲ့ နိုင်ငံဖြစ်ဟူကြောန် ဖြစ်ဟ
ယ်။

¹⁷ နန်းနို့ဟို့ ငါ မှန်တိုင်းပြောမယ်၊ ဘုရားသခင်ရဲ့ နိုင်ငံ
တော်ဟို့ သားဂန်းတယော့-က်မျိုး လတ်ခံဘဲဟူ သူဟာ
နိုင်ငံတော်ဟို့ ဝမ်ရလေ့ဟို့ မဟု” ဆိုဘီး မိန့်တော်မူလေဟ
ယ်။

ဌေးသားကြောန်း

(မဿဲ ၁၉.၁၆-၃၀; မာကု ၁၀.၁၇-၃၁)

¹⁸ ယုဒခေါင်းဆောင်တယော့-က်ဟု ယေရှုဟို့ “ကောင်း
မြတ်ဟူဆရာ၊ ထာဝရသတ်ဟို့ လတ်ခံရရှိဟို့တွပ် ဖြားမျိုး
လောက်ရဟို့နူး။” ဆိုဘီး မေးလျှော့-က်လေဟယ်။

19 ယေရှုဟု “ငါ့ကို ကောင်းမြတ်ဟူသူ ဆိုဘီး ဖြားဖြစ်ကြောင့် ခေါ်ရဦး။ ဘုရားသခင်မှတစ်ပါး ကောင်းမြတ်ဟူသူ ဖယ်သူလည်း မေ့ဟု။

20 ‘အီထောန်ရေးဖော့-က်ပုလန်န၊ လူသတ်န၊ ခိုးန၊ လီညာဘီး သတ်သေခံန၊ မိဖဟို ရိုသေရမယ်’ ဆိုဘီး ပညတ်တော်လေဟို နန်သိဟယ် မှဟုလော။” ဆိုဘီး သူ့ဟို မိန်တော်မူလေဟယ်။

21 အယ်သူဟု “ကျွန်တော်ဟာ ငယ်ငယ်ဟု အယ် ပညတ်လေ ဂူလောင်းဟို လိုက်ရှော့-က်ပီးဘီ” ဆိုဘီး လျော့-က်လေဟယ်။

22 အယ်စကားဟို ကြားရခီမာ ယေရှုဟု “နန်လောက်ရဟို တခုကျန်သေးဟယ်။ နန်မာရှိဇာလေ ဂူလောင်းဟို ရောန်းဘီး ရလာဟူ ကပ်ဟို ဆင်းရဲသားလေဟို ပေးပါ။ အယ်ဆိုဟာ နန်ဟာ ကောင်းဂန်ဘောင်မာ ဘဏ္ဍာဟို ရလေမယ်။ အယ်ဘီးမှ ပုလန်လာဘီးဟာ ငါ့နော့-က်ဟို လိုက်ရမယ်” ဆိုဘီး သူ့ဟို မိန်တော်မူလေဟယ်။

23 အယ်သူဟာ ကိုယ်တော်ရဲ့ စကားတော်ဟို ကြားရဟူ ခီမာ ရရာတိုင်း ဝန်းနဲဟွားဟယ်။ ဖြားဖြစ်ကြောင့်နဲ့ဆိုဟာ သူမာအောက်စာလေ ဘောင်ဂီးရှိဟူကြောင့် ဖြစ်လေဟယ်။

24 ယေရှုဟာ အယ်သူ ရရာတိုင်း ဝန်းနဲဟွားဟူဇာဟို ပြင်တော်မူဟူ ခီမာ “ဌေးသားလေဟာ ဘုရားသခင်ရဲ့ နိုင်ငံတော်ဟို ဝမ်ဟို ရရာတိုင်း ခတ်ဟယ်။

25 ငွေသားဟာ ဘုရားသခင်ရဲ့ နိုင်ငံတော်ထဲဟို ဝမ်ဟို ထတ် ကုလားအုတ်ဟာ အပ်ပေါ့-က်ထဲဟို ဝမ်ဟို ပိုဘီး လွယ်ဟယ်” ဆိုဘီး မိန့်တော်မူလေဟယ်။

26 အယ်စကားဟို ကြားရဟူ သူလေဟာ ကိုယ်တော့်ဟို “အယ်မျိုးဆိုဟာ ဖယ်သူလေ ကယ်တန်ရှင်း ခံရနိုင်ဟို နူး။” ဆိုဘီး မေးလျှော့-က်ဂေဟယ်။

27 ယေရှုဟ “လူလေတွပ် ဖြစ်နိုင်ဘဲဟူ အလေဟာ ဘုရားသခင်တွပ် ဖြစ်နိုင်ဟယ်” ဆိုဘီး မိန့်တော်မူလေ ဟယ်။

28 အယ်ဘီးန ပေတရုဟ “ကျွန်တော့်ဟားလေဟာ ရှိမျှ ဂူလောင်းဟို ထားဟားရစ်ဘီး ကိုယ်တော် နော့-က်ဟို လို က်ဂေဟယ်” ဆိုဘီး လျှော့-က်လေဟယ်။

29 ယေရှုဟ သူးနို့ဟို “နန်းနို့ဟို ငါ မှန်တိုင်းပြောမယ်၊ ဘုရားသခင်ရဲ့ နိုင်ငံတော်တွပ် အါ၊ မယား၊ ညီကိုလေ၊ မိ ဖလေ၊ သားမီးလေဟို စွန့်ဟူ သူဟာ

30 ခုဘဝမာ ကျိုးဘောင်ဂီး ရရှိဘီးဟာ နောန်ဘဝမာ လည်း ထာဝရသတ်ဟို ရလေ့မယ်” ဆိုဘီး မိန့်တော်မူလေ ဟယ်။

သေခံရဟိုကြောန်းဟို သောင်းခါမြော့-က်ပြောဟူ ကြောန်း

(မသဲ ၂၀.၁၇-၁၉၊ မာကု ၁၀.၃၂-၃၄)

31 ယေရှုဟ တဗဲ့တော် ဆယ်နှေ့ပါးဟို နီးနားဟို ခေါ်ဘီး ဟာ “နားထောန်ဂေ့! နို့လေဟာ ယေရှုရှလင်မြို့ဟို သွား

နေဂေဟယ်။ အယ်နေရာမှာ လူ့ရဲ့သားနဲ့ သက်ဆိုင်ဟူ ပ
ရောဖက်လေ ရေးဟူးဇာလေ ဂူလောင်းဟာ ပုလဲဇောင်ရ
လေ့မယ်။

³² လူ့ရဲ့သားဟို့ လှော်နံပြောနံ၊ သရော်ဘီး ထိုးရယ်န
ထိုးမယ် လူမျိုးခြားလေ လတ်ထဲဟို့ အပ်ဂေလေ့မယ်။

³³ သူးနို့လေဟာ ကီဒန်ပေးဘီး သတ်ဂေလေ့မယ်။
အယ်ဘေမဲ့လည်း လူ့ရဲ့သားဟာ သောင်းရစ်မြှော-က်ဟူ
နေမာ ထမြော-က်လေ့မယ်” ဆိုဘီး မိန့်တော်မူလေဟယ်။

³⁴ အယ်ဘေမဲ့လည်း တမဲ့တော်လေဟာ အယ်မူဇာလေ
ဟို့ တခုလည်း ဘောပေါ-က်ဂေဟယ်။ အယ်မူဇာရဲ့ ဓိပါယ်
ဟို့ ဖောင်းကွယ်ဟူးဟူကြောန့် ယေရှု မိန့်တော်မူနေဟူ ဇာ
လေဟို့ နားလည်ဂေဟယ်။

မျစ်ကန်းဒေါန်းစားဟို့ မြင်စေဟူကြောန့်

(မသံ ၂၀.၂၉-၃၄; မာကု ၁၀.၄၆-၅၂)

³⁵ ယေရှုဟာ ယေရိခေါမြို့နားဟို့ ရော့-က်လာတော်မူ
ဟူ ခီမာ မျစ်ကန်းတယော့-က်ဟာ လမ်းဘေးမာ ထိုင်ဘီး
တောန်းစားနေဟယ်။

³⁶ သူဟာ လူအောက်ဂီး ဖြတ်ဟူးဇာဟို့ ကြားလိုက်ဟူ
ခီမာ “ဖြားဇာလေဖြစ်နေနူး” ဆိုဘီး မေးလိုက်ဟယ်။

³⁷ သူးနို့ဟ “နာဇရက်မြို့သားယေရှု ဖြတ်ဟူးတော်မူ
ဟယ်” ဆိုဘီး သူဟို့ ပြောဂေဟယ်။

³⁸ အယ်သူဟ “ဒါဝိဒ်ရဲ့သားတော်! ယေရှု! ကျွန်တော့်
ဟို့ သနားတော်မူပါ!” ဆိုဘီး အော်ဟစ်လေဟယ်။

³⁹ ရှေ့မာရှိနေဟူ လူလေဟု သူ့ဟို ပြစ်တန်ဂေဘီး တံတံဟားနေဟို့ ပြောဂေဟယ်။ အယ်ဘောမဲလည်း သူဟု “ဒါဝိဒ်ရဲ့သား! ကျွန်တော့်ဟို့ သနားတော်မူပါ!” ဆိုဘီး ပိုဘီး အော်ဟစ်လေဟယ်။

⁴⁰ အယ်ကြောန့် ယေရှုဟာ ရပ်နားဘီး မျစ်ကန်းဟို့ သူနားဟို့ ခေါ်လာဟို့ မိန့်ပေးတော်မူလေဟယ်။ အယ်သူဟာ နီးနားဟို့ ရော့-က်လာဟူ ခီမာ ယေရှုဟု၊

⁴¹ “နန့်တွပ် ငါ့ဟို့ ဖြားဇာလောက်စေရှင်ဟယ်နူး။” ဆိုဘီး သူ့ဟို့ မေးတော်မူလေဟယ်။

သူဟု “သခင်၊ ကျွန်တော်ဟို့ မျစ်စီမြင်စေတော်မူပါ” ဆိုဘီး လျှော့-က်လေဟယ်။

⁴² ယေရှုဟု “မျစ်စီမြင်စေ! နန့်ရဲ့ ယောင်ကြည်ရှင်းဟု နန့်ဟို့ ကယ်တန်ဘီ” ဆိုဘီး သူ့ဟို့ မိန့်တော်မူလေဟယ်။

⁴³ ရှစ်ရှင်းဘဲ သူဟာ မြင်ဟားလေဟယ်။ အယ်ဘီးနဘုရားသခင်ရဲ့ ကျေးဇူးတော်ဟို့ ချီးမွမ်းဘီးဟာ ယေရှုနော့-က်ဟို့ လိုက်လေဟယ်။ အယ်မူဇာဟို့ မြင်လိုက်ဟူ လူအောက်ဂီးဟာ ဘုရားသခင်ဟို့ ချီးမွမ်းဂေဟယ်။

19

ယေရှုန ဇော့ခဲကြောန်း

¹ ယေရှုဟာ ယေရိခေါမြို့ထဲဟို့ ဝမ်ဟားဘီးဟာ အယ်မြို့ဟို့ ဖြတ်ဟားတော်မူဟယ်။

၂ အယ်နေရာမှာ ဇကုခဲနာမယ်ရှိဟူ လူတယော့-က်ရှိဟယ်။ သူဟာ ခွန်ခေါင်းဖြစ်ဘီး ဌေးသားလည်း ဖြစ်ဟယ်။

၃ သူဟာ ယေရှုဟို့ ဖယ်သူဖြစ်ဟယ် ဆိုဇာဟို့ မြင်ရှင်ဘေမဲ့လည်း ရပ်ပုဟူသူ တယော့-က်ဖြစ်ဟူကြောန့် လူအောက်ဂီးဟို့ ကျော်ဘီး ယေရှုဟို့ မြင်နိုင်ဘဲဖြစ်နေဟယ်။

၄ အယ်ကြောန့် သူဟာ လူအောက်ဂီးရှေ့ဟုနေ ပုလေးဟားဘီး ယေရှုဟို့ မြင်ဟို့တွပ် သဖန်းဗန်ထတ်ဟို့ တတ်လေဟယ်။ ဖြားဖြစ်ကြောန့်နဲ့ဆိုဟာ ကိုယ်တော်ဟု အယ်လမ်းတိုင်း လာနေဟူကြောန့် ဖြစ်လေဟယ်။

၅ ယေရှုဟာ အယ်နေရာဟို့ ရော့-က်လာဟူ ခီမာ မော်ကေလိုက်ဘီးန “ဇကုခဲ၊ ပြန်းမြန်ဆင်းလာ။ အယ်နေ့ နန့်အီမာ ငါတည်းမယ်” ဆိုဘီး မိန့်တော်မူလေဟယ်။

၆ ဇကုခဲဟာ ပြန်းမြန်ဆင်းလာဘီး ကိုယ်တော်ဟို့ ရရာတိုင်း ဝန်းသာဟူစိန် ကြိုဆိုလေဟယ်။

၇ အယ်မူဇာဟို့ မြင်လိုက်ဟူ လူလေ ဂူလောင်းဟု “အယ်လူဟာ ပြစ်သားတယော့-က်ရဲ့ အီမာတည်းဟို့ လိုက်ဟားဘိ!” ဆိုဘီး ကဲ့ရဲ့ပြစ်တန်ဂေ့ဟယ်။

၈ ဇကုခဲဟာ ထရပ်ဘီးဟာ “သခင်! ကျွန်တော်ရဲ့ အောက်စာပစ်စီး တဝပ်ဟို့ ဆင်းရဲသားလေဟို့ ပေးပါမယ်။ အယ်ဘီးဟာ ကျွန်တော်ဟာ တယော့-က်ယော့-က်နားဟု တရားဘဲန ယူဟားဇာလေ ရှိမယ် ဆိုဟာ ကျွန်တော်ဟာ လေးဆ ပုလန်ပေးပါမယ်” ဆိုဘီး သခင်ဘုရား

ဟို့ လျှော့-က်လေဟယ်။

⁹ ယေရှုဟု “အယ်နေဘဲ ကယ်တန်ရှင်းဟာ အယ်အီထတ်ဟို့ ရော့-က်လေဘီ။ ဖြားဖြစ်ကြောန်းနူးဆိုဟာ အယ်သူဟာလည်း အာဗြဟံရဲ့ မုလေးမုလစ် တယော့-က် ဖြစ်ဟူကြောန်း ဖြစ်လေဟယ်။

¹⁰ လူသားဟာ ပျော့-က်နေဟူ သူလေဟို့ ရှာဟို့န ကယ်တန်ဟို့တွပ် ကြွလာဟယ်” ဆိုဘီး သူဟို့ မိန့်တော်မူလေဟယ်။

ရွှေဒန်းဂါး ပေါင်ဥပမာကြောန်း
(မသဲ ၂၅.၁၄-၃၀)

¹¹ ယေရှုဟု အယ်ကြောန်းရာလေဟို့ နားထောန်နေဟူ သူလေဟို့ ပေါင်ဥပမာ တခုန ထပ်ဘီး မိန့်တော်မူလေဟယ်။ ကိုယ်တော်ဟာ ယေရုရှလင်မြို့နားမာ ရှိနေဟူကြောန်း ဘုရားသခင်ရဲ့ နိုင်ငံတော်ဟာ ရှစ်ရှင်းပေါ်လာမယ် ဆိုဘီး သူးနို့လေဟု ထန်နေဂေဟူကြောန်း ဖြစ်ဟယ်။

¹² အယ်ကြောန်း ကိုယ်တော်ဟု “မြင့်မြတ်ဟူသူ တယော့က်ဟာ မန်းဂီးဖြစ် ခံယူဘီးမှ ပုလန်လာမယ် ဆိုဘီး ဝီးဂီးမာရှိဟူ နိုင်ငံဟို့ သွားလေဟယ်။

¹³ ခရီးသွားခန်မာ သူဟာ စေခံဆယ်ယော့-က်ဟို့ ခေါ်ဘီးန ရွှေဒန်းဂါး တပုလားစီ ပေးဘီးဟာ ‘ငါခရီးထွပ်နေဒူးမာ အယ်ဒန်းဂါးလေန စီးပွားရှာဂေ’ ဆိုဘီး သူးနို့ဟို့ မှာဟွားရစ်လေဟယ်။

14 အယ်ဘေမဲ့ သူ့ရဲ့ တိုင်းသူပြည်သားလေဟာ သူ့ဟို မှူးဂေဟယ်။ အယ်ကြောန့် သူ့နော့-က်ဟုနေ တမန်လေဟို စေလွှတ်ဘီး ‘နို့လေဟာ အယ်သူဟို နို့လေရဲ့ မန်းဂီးဖြစ် လိုရှင်ဂေဟု’” ဆိုဘီး လျှော့-က်ခိုင်းလေဟယ်။

15 “အယ်လူဟာ နိုင်ငံအောက်ချောက်ခွမ့်ဟို ခံယူဘီး ပု လန်လာဟယ်။ ရှစ်ရှင်းဘဲ သူဟာ ရွှေဒန်းဂါးလေပေးဟား ဟူ စေခံလေဟို ဖယ်မျှလော့-က် မှလတ်ရဟားဟယ် ဆို အဟို သိရှင်ဟူကြောန့် သူးနို့ဟို ခေါ်ခိုင်းလိုက်ဟယ်။

16 ပထမ စေခံဟာ ရော့-က်လာဘီး ‘သခင်၊ သခင်ပေး ဟားဟူ ရွှေဒန်းဂါးတပုလားအားဖြင့် မှလတ်ဆယ်ပုလား ရဟယ်’ ဆိုဘီး လျှော့က်လေဟယ်။

17 သခင်ဟု ‘ကောန်းလေဟယ်။ နန်ဟာ စေခံကောန်း တယော့-က် ဖြစ်လေဟယ်! နန်ဟာ ငယ်ဟူမုမာ သစ်စာ ရှိဟူကြောန့် မြို့ဂီးဆယ်မြို့ဟို အောက်စိုးပါ’ ဆိုဘီး မိန့် တော်မူလေဟယ်။

18 ဒုတိယ စေခံဟာ ရော့-က်လာဘီး ‘သခင်၊ သခင်ပေး ဟားဟူ ရွှေဒန်းဂါးတပုလားအားဖြင့် မှလတ်ငါးပုလားရ ဟယ်’ ဆိုဘီး လျှော့-က်လေဟယ်။

19 အယ်လူဟို ‘နန်ဟာ မြို့ဂီးငါးမြို့ဟို အောက်ချောက် ပါ’ ဆိုဘီး မိန့်တော်မူလေဟယ်။

20 နော့-က်ထပ်စေခံ ရော့-က်လာဘီး ‘သခင်၊ အယ် မာ သခင်ရဲ့ ရွှေဒန်းဂါးတပုလား ရှိဟယ်။ ကျွန်တော်ဟာ အယ်ဒန်းဂါးဟို လတ်ကိုင်ပဝါန ထောက်ဘီးဟာ သီးဟား

ဟုယ်။

21 သခင်ဟာ စီဆတ်ဟူသူ ဖြစ်ဟူကြောင့် သခင်ဟို ကျွန်တော်ကြော့-က်ဟယ်။ သခင်ဟာ ဖြားလည်းသွမ်း ဟားဘဲဇာဟို ထောက်ယူဘီး ဖြားလည်းစိုက်ဘဲဇာဟို ရံ သီးဟယ်’ ဆိုဘီး လျှော့-က်လေဟယ်။

22 သခင်ဟ ‘ဆိုးညစ်ဟူစေခံ! နန့်စကားတိုင်း နန့်ဟို ငါ စီရင်မယ်! ငါဟာ စီဆတ်ဟူသူ၊ ငါဟာ ဖြားလည်းသွမ်း ဘဲဇာဟို ထောက်ယူဘီးဟာ ဖြားလည်းစိုက်ဘဲဇာဟို ရံ သီးဟယ် ဆိုဇာဟိုလည်း နန့်သိဟယ်။

23 အယ်မျိုးဆိုဟာ ဖြားဖြစ်ကြောင့် ငါ့ကပ်လေဟို ဘဏ်မာအပ်ဘဲနနေနူး။ အပ်ဟားမယ် ဆိုဟာ ငါ့ပုလန် ရော့-က်ဟူ ခီမာ တိုးလေနတူးဒု ငါ့ကပ်လေဟို ပုလန်ရ မယ်’ ဆိုဘီး သူဟို ပြောလေဟယ်။

24 အယ်ဘီးန နီးနားမာ ရပ်နေဟူ သူလေဟို ‘သူရဲ ရွှေ ဒန်းဂါး တပုလားယူဘီး ရွှေဒန်းဂါး ဆယ်ပုလားရှိဟူ စေခံ ဟို ပေးလိုက်’ ဆိုဘီး ပြောလေဟယ်။

25 အယ်ဘေမဲ့ သူးနို့လေဟ ‘သခင်၊ အယ်သူမာ ရွှေ ဒန်းဂါး ဆယ်ပုလား ရှိနေဘီးသား ဖြစ်ဟယ်!’ ဆိုဘီး လျှော့-က်ဂေဟယ်။

26 ‘နန်းနို့ဟို ငါပြောမယ်။ ရှိဟူလူဟို ထပ်ပေးဘီး သူ ဟို ကြွယ်ဝစေလေ့မယ်။ မှော့ဘဲဟူ လူလေနားဟ ရှိဟူမျှ ဟို နှုလေ့မယ်။

၂၇ ငါ့ဟို့ သူးနို့လေရဲ့ မန်းဂီးဖြစ်န လိုရှင်ဘဲဟူ ငါ့ရဲ့ ရန်သူလေဟို့ အယ်နေရာဟို့ ခေါ်လာဂေ။ ငါ့ရှေ့တော်မာ သတ်ဂေ! ဆိုဘီး စီရင်တော်မူလေဟယ်” ဆိုဘီး မိန့်တော် မူလေဟယ်။

အောက်ဖွဲ့ခံဘီး ယေရုရှလင်မြို့ထဲ ဝမ်တော်မူဟူကြာ န်း

(မဿဲ ၂၁.၁-၁၁; မာကု ၁၁.၁-၁၁; ယောဟန် ၁၂.၁၂-၁၉)

၂၈ ယေရုဟာ အယ်မျိုးမိန့်တော်မူဘီးန သူးနို့လေရဲ့ ရှေ့ ဟုနေဘီး ယေရုရှလင်မြို့ဟို့ ကြွဟားတော်မူဟယ်။

၂၉ သံလွင်တောန်နားမာရှိဟူ ဗက်ဖာဂေဝါန ဗေသနိဝါ နားဟို့ ရော့-က်လာဟူ ခီမာ တမဲ့တော် နှေ့ပါးဟို့ ရှေ့ဟု နေစေလွှတ်ဘီး

၃၀ “နန်းနို့ရှေ့မာရှိဟူ ဝါဟို့ သွားဂေ။ ဝါထဲဟို့ ရော့-က် ဟူ ခီမာ ဖယ်သူလည်း စီးဖူးသေးဘဲဟူ မြည်းသားဂန်း ဟားဟို့ ခယ်ဟားဇာဟို့ နန်းနို့ဟာ တို့လေမယ်။ အယ် မြည်းသားဂန်းဟားဟို့ ကြိုးဖြေဘီး ငါ့နားဟို့ ခေါ်လာဂေ။

၃၁ ယော့-က်ယော့-က်ဟု ဖြားဖြစ်ကြောန် မြည်းကြိုး ဟို့ ဖြေဂေနေနူး။ ဆိုဘီး နန်းနို့ဟို့ မေးမယ် ဆိုဟာ အယ် မြည်းဟို့ သခင်* လိုရှိဟယ် ဆိုဘီး သူးနို့ဟို့ ပြောဂေ” ဆို ဘီး မိန့်တော်မူလေဟယ်။

* 19:31 ၁၉.၃၁ သခင်၊ အယ်မျိုးမူဘဲနေဟာ မြည်းဇှောင်။

32 စေလွှတ်လိုက်ဟူ သူလေဟာ ထွပ်ဟူးဘီးန ယေရှု မိန့်တော်မူမျိုးဘဲ ဂူလောင်းဟို့ တွံရဟယ်။

33 သူးနို့လေဟာ မြည်းဟို့ ကြိုးဖြေပေးနေဟူ ခီမာ မြည်းဇရှင်ဟု “ဖြားဖြစ်ကြောန့် မြည်းဟို့ ကြိုးဖြေပေး နေရနူး။” ဆိုဘီး သူးနို့ဟို့ မေးလေဟယ်။

34 သူးနို့ဟု “အယ်မြည်းဟို့ သခင် လိုရှိဟယ်” ဆိုဘီး ဖြေဂေဟယ်။

35 အယ်ဘီးန သူးနို့ဟု မြည်းသားဂန်းဟူးဟို့ ယေရှုနား ဟို့ ယူဆောန်ဟူးလေဟယ်။ အယ်မြည်းထတ်မာ သူးနို့ရဲ့ ဝတ်ရောင်လေဟို့ ခန်းဘီးန ယေရှုဟို့ စီးစေဂေဟယ်။

36 ကိုယ်တော်ဟု စီးဘီးလာဟူ ခီမာ လူလေဟု သူးနို့ ရဲ့ ဝတ်ရောင်လေဟို့ လမ်းထတ်မာ ခန်းပေးဂေဟယ်။

37 ကိုယ်တော်ဟု ယေရှုရှလင် ဗြို့နီး သံလွင်တောန် ဆင်းလမ်းဟို့ ရော့-က်လာဟူ ခီမာ တဗဲ့တော် အောက်ဂီး ဟု သူးနို့မြင်ရဟူ နိမိတ်လတ်ခဏာ ဂူလောင်းတွပ် ဝန်း သာဟူစိန ဘုရားသခင်ရဲ့ ဂေါင်တော်ဟို့။

38 “ဘုရားသခင်ရဲ့ နာမန ကြွလာဟူ မန်းဂီးဟု မင်္ဂလာ ရှိပါစေ! ကောန်းဂန်ဘောင်မာ ငြိသတ်ရှင်းရှိပါစေ။ မြင့် ဆောင်းဟူ နေရာမာ ဖောင်းကီးတော်မူပါစေ!” ဆိုဘီး သံ ကုလယ်ဂီးန ချီးမွမ်းဂေဟယ်။

39 အယ်ခီမာ လူအောက်ဂီးထဲဟု ဖာရီရဲ့တချို့ဟု “ဆရာ၊ ကိုယ်တော်ရဲ့ တဗဲ့တော်လေဟို့ တိတိဟူးနေဟို့ ဆောင်းမပေးတော်မူပါ!” ဆိုဘီး ယေရှုဟို့ လျှော့-က်လေ

ဟုယ်။

⁴⁰ ယေရှုဟု “နန်းနို့ဟို ငါပြောမယ်၊ သူးနို့ဟို တိတိဟူး
နေစေမယ် ဆိုဟာ ကုလော့ခဲလေဟု အော်ဟစ်ဂေ့လေ့
မယ်” ဆိုဘီး မိန့်တော်မူလေဟယ်။

ယေရှုလင်မြို့တွပ် ငိုတော်မူဟူကြောင်း

⁴¹ ကိုယ်တော်ဟာ ယေရှုလင်မြို့နားဟို ရော့-က်လာ
ဘီး အယ်မြို့ဟို ဗြင်တော်မူဟူ ခီမာ ငိုတော်မူဘီး၊

⁴² “နန်ဟာ ငြိသတ်ရှင်းတွပ် လိုအပ်ဟူဇာလေဟို အယ်
နေမာဘဲ သိရမယ် ဆိုဟာ မင်္ဂလာရှိဟယ်! အယ်ဘေမဲ့
အယ်မူဇာလေဟာ ခုနန်ရဲ့ မျစ်စိရှေ့မာ ဖောင်းကွယ်ဟူး
ရှင်းခံရဟယ်!

⁴³ နန်ရဲ့ ရန်သူလေဟာ ဖတ်ဖတ်ဟုနေဘီး တားဆီးလေ
န ဝန်းရံဘီး ပိဟူးမယ့်နေ ရော့-က်လာလေ့မယ်။

⁴⁴ သူးနို့လေဟု နန်ဟိုရော၊ နန်ရဲ့ မြို့ရိုးထဲဟု သူလေဟို
ရော တယော့-က်လည်း ကျန်ဘဲအောက် ဖျစ်ဆီးဂေ့လေ့
မယ်။ အယ်နေရာမာ ကုလော့တောင်း တလောင်းလည်း
ကျန်ရစ်ဟိုမဟု။ ဖြားဖြစ်ကြောန်နူးဆိုဟာ နန်ဟို ကယ်တ
န်ဟို ဘုရားသခင် ရော့-က်လာမယ့် ခီဟို သိဘဲကြောန် ဖြ
စ်ဟယ်!” ဆိုဘီး မိန့်တော်မူလေဟယ်။

မိမာန်တော်ဟို ကြွဟူးဟူကြောင်း

(မသံ ၂၁.၁၂-၁၇; မာကု ၁၁.၁၅-၁၉; ယောဟန်
၂.၁၃-၂၂)

45 ယေရှုဟာ မိမိတော်ထဲဟို့ ဝမ်တော်မူဘီးန ရှောန်း ဝယ်နေဟူ လူလေဟို့ နှိပ်ထုတော်မူဘီး

46 သူးနို့လေဟို့ “ကျမ်းစာထဲမာ ဘုရားသခင်ဟု ‘ငါ့ မိမိတော်ဟာ ဆုတောင်းဟူ အီတော် ဖြစ်ရလေ့မယ်’ ဆို ဘီး မိမိတော်မူဟူးဟယ်။ အယ်ဘေမဲ့ နန်းနို့ဟု အယ်အီ တော်ဟို့ သူခိုးလေတွပ် ပူးအောင်းဟူနေရာ ဖြစ်စေဂေဘီ!” ဆိုဘီး မိမိတော်မူလေဟယ်။

47 ယေရှုဟာ နေ့တိုင်း မိမိတော်မာ သွန်သန်ပေးတော် မူဟယ်။ ယဇ်ပုရောဟိတ်ဂီးလေ၊ ကျမ်းတတ်ဆရာလေ န လူထုခေါင်းဆောင်လေဟာ ကိုယ်တော်ဟို့ သတ်ဟို့တွပ် ရှာကြံဂေဟယ်။

48 အယ်ဘေမဲ့ လူလေ ဂူလောင်းဟာ ကိုယ်တော်ရဲ့ စကားတော်ဟို့ အာရုံစိုက်ဘီး နားထောန်နေဂေဟူကြော နို့ ကိုယ်တော်ဟို့ သတ်ဟို့တွပ် နည်းလမ်းရှာဟို့ တွံဘဲဖြစ် နေဟယ်။

20

ယေရှုရဲ့ ခွမ်အာဏာနဆိုင်ဟူ မေးခွန်းကြောင်း
(မဿဲ ၂၁:၂၃-၂၇; မာကု ၁၁:၂၇-၃၃)

1 တနေ့မာ ယေရှုဟာ မိမိတော်ထဲမာ လူလေဟို့ သွန် သန်တော်မူဘီးဟာ ဒန်းကောင်းဟို့ ဟောတော်မူနေဟူ ခိ မာ ယဇ်ပုရောဟိတ်ဂီးလေ န ကျမ်းတတ်ဆရာလေဟာ သ တ်ဂီးဝါဂီးလေနတူးဒူ ရှော-က်လာဘီး

2 ကိုယ်တော်တို့ “အယ်မူဇာလေဟို ဖြားခွမ့်အာဏာန လောက်နေနူး။ အယ်ခွမ့်အာဏာဟို ဖယ်သူဟု ပေးဟူး နူး။” ဆိုဘီး မေးလျှော့-က်လေဟယ်။

3 ယေရှုဟာ “အယ်ဆိုဟာ ငါလည်း နန်းနို့ဟို မေးခွန်း တခု မေးအူးမယ်။ ငါ့ဟို ဖြေပေးဂေ။

4 ယောဟန်ရဲ့ ဗတုတိဇ်ဟာ ကောင်းဂန်ဟုနေ လာဇာ လော။ လူလေဟုနေ လာဇာလော။” ဆိုဘီး သူးနို့ဟို မေး တော်မူလေဟယ်။

5 သူးနို့ဟာ “နို့လေဖြားမျိုး ဖြေရမယ်နူး။ ‘ကောင်းဂန် ဟုနေ လာဟယ် ဆိုဘီး ဖြေလိုက်မယ် ဆိုဟာ ယောဟန် ဟို နန်းနို့လေ ဖြားဖြစ်ကြောန့် ယောင်ကြည်ဂေဟူး။ ဆို ဘီး ပုလန်မေးလေ့အူးမယ်။

6 လူလေဟုနေ လာဟယ် ဆိုဘီး နို့လေဟု ဖြေလိုက် မယ် ဆိုဟာလည်း ယောဟန်ဟို ပရောဖက်တပါး ဖြစ်ဟု ယ် ဆိုဇာဟို လူလေဟု ယောင်ကြည်ဂေဟူးကြောန့် နို့လေ ဟို ကုလော့ခဲန ပစ်လေ့မယ်” ဆိုဘီး ရှင်းရှင်းဆွေးဆွေး ဂေဟယ်။

7 အယ်ကြောန့် သူးနို့လေဟာ “အယ်ခွမ့်အာဏာဟာ ဖ ယ်ဟုနေလာဟယ် ဆိုဇာဟို ကျွန်တော့်ဟူးလေ သိဂေဟု” ဆိုဘီး ပုလန်ဖြေလေဟယ်။

8 ယေရှုဟာ “အယ်မူဇာလေဟို ဖြားခွမ့်အာဏာန ငါ လောက်ဟယ် ဆိုဇာဟိုလည်း နန်းနို့ဟို ငါပြောဟု” ဆိုဘီး သူးနို့ဟို မိန့်တော်မူလေဟယ်။

စပျစ်ခြံလောက်မားလေရဲ့ ပေါင်ဥပမာကြောန်း
(မသံ ၂၁.၃၃-၄၆; မာကု ၁၂.၁-၁၂)

⁹ အယ်ဘီးန ယေရှုဟာ အယ်ပေါင်ဥပမာန လူလေဟို့
“လူတယော့-က်ဟာ စပျစ်ခြံဟို့ စိုက်ဘီး ခြံစောန့်မားလေ
ဟို့ ငှားရစ်ဘီးန ခိကြာဂီး ခရီးထွပ်ဟားလေဟယ်။

¹⁰ စပျစ်သီး ဆွတ်ခီရော့-က်ဟူ ခီမာ စပျစ်ခြံထွပ်
သီးတချို့ဟို့ ယူဟို့ထွပ် ခြံစောန့်မားလေနားဟို့ ကျွန်တ
ယော့-က်ဟို့ စေလွှတ်လေဟယ်။ အယ်ဘောမဲ့ ခြံစောန့်မား
လေဟာ အယ်ကျွန်ဟို့ ရိုက်နှက်ဘီး လတ်ခဲခဲန ပုလန်လွတ်
လေဟယ်။

¹¹ အယ်ကြောန့် ဇရှင်ဟာ ကျွန်တယော့-က်ဟို့ ထပ်လွတ်
လေဟယ်။ အယ်ဘောမဲ့ ခြံစောန့်မားလေဟာ အယ်ကျွန်ဟို့
လည်း ရိုက်နှက်ဘီး၊ ရှက်ခွဲဘီး လတ်ခဲခဲန ပုလန်လွတ်
လေဟယ်။

¹² အယ်ဘီးန ဇရှင်ဟာ တတိယ ကျွန်ဟို့ ထပ်ဘီး
စေလွှတ်လေဟယ်။ ခြံစောန့်မားလေဟာ အယ်ကျွန်ဟို့
လည်း ဒန်ရာရစောဘီးဟာ ပုလန်ဟို့ နှန်ထုဂေဟယ်။

¹³ စပျစ်ခြံ ဇရှင်ဟာ ‘ငါဖယ်မျိုးလောက်ရမယ်နူး။ ငါ့ရဲ့
ရှစ်ဟူသားဟို့ စေလွှတ်မယ် ဆိုဟာ ခြံစောန့်မားလေဟာ
သူဟို့ ရိုသေကောန်း ရိုသေဂေလေ့မယ်!’ ဆိုဘီး ပြောလေ
ဟယ်။

¹⁴ အယ်ဘောမဲ့ ခြံစောန့်မားလေဟာ သူ့ရဲ့သားဟို့ မြင်ဟူ
ခီမာ ‘အယ်သူဟာ ဇရှင်ရဲ့ သားဖြစ်ဟယ်။ သူဟို့ သတ်ဂေ

ဇိ။ အယ်ဆိုဟာ သူ့ဖရဲ့ အောက်စဟာ နို့လေရဲ့အောက်
စာ ဖြစ်ဟူးလေ့မယ်၊’ ဆိုဘီး သူးနို့လေ ယော့-က်န
ယော့-က် ပြောဂေဟယ်။

15 အယ်ကြောန့် သူးနို့လေဟာ ဇရှင်ရဲ့ သားဟို့ စပျစ်ခြံ
ပုလန်ဟို့ ထုဘီးဟာ သတ်ဂေလေဟယ်။”

“အယ်မျိုးဆိုဟာ စပျစ်ခြံဇရှင်ဟု ခြံစောန့်မားလေဟို့
ဖြားဇာလောက်မယ်နူး။” ဆိုဘီး ယေရှုဟု မေးတော်မူလေ
ဟယ်။

16 “ဇရှင်ဟာ လာဘီး အယ်လူလေဟို့ သတ်ဘီးဟာ စ
ပျစ်ခြံဟို့ တခြားခြံစောန့်မားလေဟို့ အပ်ပေးလေ့မယ်”
ဆိုဘီး မိန့်တော်မူလေဟယ်။

လူလေဟု အယ်မျိုး ကြားရဟူ ခီမာ “အယ်မျိုး ဖြစ်ပါ
စေန၊” ဆိုဘီး ပြောဂေဟယ်။

17 ယေရှုဟာ သူးနို့ဟို့ ကေ့ဘီး
“အီဆော့-က်မားလေဟု သောင်းဇာရဘဲဟူကြောန့် ဖယ်
ဟူးဟူ ကုလော့-က်ဟာ
ဂူလောင်းထဲမာ ရေးကီးဆောန့် ဖြစ်လာရဂေဟယ်’
ဆိုဘီး ရေးဟူးဇာဟာ ဖြားမိပါယ်နူး။”

18 “အယ်ကုလော့-က်ထတ်ဟို့ ကုလဟူလူတိုင်းဟာ ပိုင်း
ပိုင်းကုလိုးလေ့မယ်။ အယ်ဘီးဟာ အယ်ကုလော့-က်ဟာ
ယော့-က်ယော့-က်ထတ်ဟို့ ကုလမယ် ဆိုဟာ အယ်သူ
ဟာ ညစ်ညစ်ကြေဟူးလေ့မယ်” ဆိုဘီး မိန့်တော်မူလေ
ဟယ်။

ခွန်ဆောက်ရှင်းနု ဆိုင်ဟူမေးခွန်းကြောင်း
(မသေ ၂၂.၁၅-၂၂; မာကု ၁၂.၁၃-၁၇)

¹⁹ ကျမ်းတတ်ဆရာလေနု ယဇ်ပုရောဟိတ်ဂီးလေဟာ အယ်ပေါင်ဥပမာဟု သူးနှိုဟို့ စောန်းခိဘီး ပြောနေဟယ် ဆိုဇာဟို့ သိဂေဟူကြောန့် ရှစ်ရှင်းဘဲ ယေရှုဟို့ ဖမ်းဟို့ တွပ် ရှာကြံဂေဟယ်။ အယ်ဘေမဲ့ လူလေဟို့ ကြော့-က် ဂေဟယ်။

²⁰ အယ်ကြောန့် သူးနှိုလေဟု ခွမ်ကောန်းဟို့ ရှာနေဂေဟယ်။ သူးနှိုလေဟု လူတချို့ဟို့ ရိုးသားဟန်ဆောန်ဟို့ တွပ် လာဘ်ထိုးဟွားဟယ်။ အယ်ဘီးဟု သူးနှိုလေဟု ကိုယ်တော်ရဲ့ စကားထဲမာ မှားရှာဟို့တွပ် အယ်လူလေဟို့ စေလွှတ်လေဟယ်။ အယ်ဆိုဟု သူးနှိုလေဟု ကိုယ်တော်ဟို့ ခွမ်အာဏာနု တဂိုးရှိဟူ ရောမ မြို့ဝန်းမန်းနားဟို့ အပ်ဂေလေမယ်။

²¹ အယ်သူလျှိုလေဟု “ဆရာ၊ ဆရာဟောနေဇာလေရော၊ သန်ကြားနေဇာလေရော မှန်ဟယ် ဆိုဇာဟို့ ကျွန်တော့်ဟွားလေ သိဟယ်။ ဆရာဟု မျှစ်နှာလိုက်ဘဲနု လူလေတွပ် ဘုရားသခင်ရဲ့ လိုတော်နု ဆိုင်ဟူ သမ္မာတရားဟို့ သန်ကြားပေးဟယ်။

²² ကဲသာ မန်းဂီးဟို့ ခွန်ဆောက်ရှင်းဟု ပညတ်တော်နု ညီဟယ်လော။ ညီဟုလော။” ဆိုဘီး ယေရှုဟို့ မေးလျှော့-က်လေဟယ်။

²³ အယ်ဘေမဲ့ ယေရှုဟု သူးနှိုရဲ့ ပရိယာယ်ဟို့ သိတော်

မူဟူကြောင့်

²⁴ “ငါ့ဟူ ငွေဒန်းဂါးတပုလား ပြဂေ။ အယ်ဒန်းဂါးမာ ဖယ်သူရောက်ပေါင်န နာမယ်ရှိဟယ်နူး။” ဆိုဘီး မေး တော်မူလေဟယ်။

သူးနို့လေဟ “ကဲသာမန်းဂီး ပေါင်န ကဲသာမန်းဂီး နာ မယ်ရှိဟယ်” ဆိုဘီး ဖြေဂေဟယ်။

²⁵ အယ်ကြောန် ယေရှုဟ “အယ်မျိုးဆိုဟာ ကဲသာမန်း ဂီး ပိုင်ဟူဇာဟို ကဲသာမန်းဂီးဟို ပေးဂေ။ ဘုရားသခင် ပို င်ဟူဇာဟို ဘုရားသခင်ဟို ပေးဂေ” ဆိုဘီး မိန့်တော်မူလေ ဟယ်။

²⁶ သူးနို့လေဟာ လူလေရှေ့မာ ကိုယ်တော်ရဲ့ စကား လေထဲမာ မှားရှာတို့နိုင်ဘဲ ဖြစ်နေဂေဟယ်။ အယ်ဘီးဟာ ကိုယ်တော်ရဲ့ ပုလန်မိန့်တော်မူဟူ စကားဟို အံ့ဩဟားဂေ ဘီး တိဆိဟားဂေလေဟယ်။

ရှင်ပုလန်ထမြော့-က်ရှင်းန ဆိုင်ဟူမေးခွန်းကြောန်း

(မသဲ ၂၂.၂၃-၃၃; မာကု ၁၂.၁၈-၂၇)

²⁷ အယ်ဘီးန ရှင်ပုလန်ထမြော့-က်ရှင်းမေ့ဟ ဆိုဘီး ပြောဂေဟူ ဇဒွါကဲတချို့ဟာ ယေရှုနားဟို လာဘီးဟာ၊

²⁸ “ဆရာ၊ မောရှေဟ ‘လူတယော့-က်ဟာ သားမီးလေ မှော့နဲ သေဟားမယ် ဆိုဟာ ကျန်ရစ်ဟူ မယားဟို သူရဲ့ ညီဟ ပုလန်ဘီး လတ်ထပ်ရဟယ်။ အယ်ဘီးဟာ သူးနို့မာ ရလာဟူ သားမီးလေဟို သေဟားဟူသူရဲ့ သားမီးလေဖြစ်

သတ်မှတ်ရမယ်’ ဆိုဘီး ကျွန်တော့်ဟူးလေတွပ် အယ် ပညတ်တရားဟို့ ရေးဟူးဟယ်။

²⁹ တခါဒူးဟု ညီကို ခွန်နစ်ယော့-က် ရှိဟယ်။ နောက်ဂီး ဆောင်းဟု အီထောန်ပြုဘီး သားမီးလေ မှော့ဘဲန သေ ဟူးဟယ်။

³⁰ အယ်ဘီးန အယ်မီးမဟို့ ဒုတိယညီဟု ယူလေဟယ်။

³¹ အယ်ဘီးန တတိယညီဟု ယူလေဟယ်။ အယ်မျိုးန ဘဲ ညီကို ခွန်နစ်ယော့-က်လောင်းဟု သားမီးလေ မှော့ဘဲ န သေဟူးဂေဟယ်။

³² နော့-က်ဆောင်းမာ အယ်မီးမလည်း သေဟူးဟယ်။

³³ အယ်မျိုးဆိုဟု ရှင်ပုလန်ထမြော့-က်ဟူ နေ့မာ အယ်မီးမဟု ဖယ်သူရဲ မယား ဖြစ်လေမယ်နူး။ ညီကို ခွန်နစ်ယော့-က်လောင်းဟု အယ်မီးမဟို့ ယူဟူးပီးဘီ ဆို ဘီး သူးနို့ဟု လျှော့-က်လေဟယ်။”

³⁴ ယေရှုဟု “အယ်ဘဝမာ ယော့-က်ကျားလေန မီးမ လေဟု အီထောန်ပြုဂေဟယ်။

³⁵ အယ်ဘေမဲ့ သေရာဟုနေ ပုလန်ရှင်ဟို့ ထိုက်တန်ဟူ ယော့-က်ကျားလေန မီးမလေဟု နောက်ဘဝမာ အီထော န်ပြုရှင်းလေ မှော့ဟု။

³⁶ သူးနို့လေဟု ကောင်းဂန်တမန်လေမျိုး ဖြစ်ဟူးဘီး သေဂေဟ်မီး။ သူးနို့လေဟု သေရာဟုနေ ပုလန်ရှင်လာ ဟူကြောန့် ဘုရားသခင်ရဲ့ သားမီးလေ ဖြစ်ဂေဟယ်။

³⁷ အယ်ဘီးဟု သေရာဟုနေ ပုလန်ရှင်ဟယ် ဆိုဇာ

ဟို့ မောရှေဟု ရှင်းရှင်းလင်းလင်း သတ်သေပြဟူးဟယ်။
မောရှေဟာ မီးလောင်နေဟူချောင်ကြောင်းနု ပတ်သတ်
ဘီး ဘုရားသခင်ဟို့ ‘အာဗြဟံရဲ့ ဘုရားသခင်၊ ဣဇာက်
ရဲ့ ဘုရားသခင်၊ ယာကုပ်ရဲ့ ဘုရားသခင်’ ဆိုဘီး ဖော်ပြ
ဟူးလေဟယ်။

³⁸ ဘုရားသခင်ဟာ သေဟူးဟူ သူလေရဲ့ ဘုရား မှဟု။
သတ်ရှင်ဟူ သူလေရဲ့ ဘုရား ဖြစ်ဟယ်။ ဖြားဖြစ်ကြောန့်
နှုဆိုဟာ လူလေ ဂူလောင်းဟာ ကိုယ်တော့်အားဖြင့် သတ်
ရှင်ဂေဟယ်” ဆိုဘီး သူးနှိလေဟို့ မိန့်တော်မူလေဟယ်။

³⁹ ကျမ်းတတ်ဆရာ တချို့ဟု “ဆရာ၊ ကောင်းဟူဖြေ
ဖြစ်ဟယ်!” ဆိုဘီး လျှော့-က်ဂေလေဟယ်။

⁴⁰ အယ်ကြောန့် သူးနှိလေဟာ ကိုယ်တော့်ဟို့ နှော့-က်
ထပ် မေးခွန်းလေ မေးရဲဂေဟမ်း။

မေရှိယနု ဆိုင်ဟူမေးခွန်းကြောန့်

(မသဲ ၂၂.၄၁-၄၆; မာကု ၁၂.၃၅-၃၇)

⁴¹ ယေရှုဟာ “မေရှိယဟာ ဒါဝိဒ်ရဲ့ မှလေးမှလစ်ဖြစ်ဟ
ယ် ဆိုဇာဟို့ ဖယ်မျိုးပြောနိုင်ဂေနှု။ ဆိုဘီး သူးနှိလေဟို့
မေးတော်မူလေဟယ်။

⁴² ဒါဝိဒ်ကိုယ်တိုင်ဟု ဆာလံကျမ်းမာ”
“သခင်ဘုရားဟု ငါ့သခင်ဟို့၊

⁴³ နန့်ရဲ့ ရန်သူလေဟို့ နန့်ရဲ့ ခေတန်ခေါင်ဖြစ် ငါ့လ
ဟူးခီထံ ငါ့ရဲ့ ညာဖတ်မာ ထိုင်နေပါ ဆိုဘီး ပြော
ဟယ်” ဆိုဘီး ရေးဟူးဟယ်။”

44 “ဒါဝိဒ်ဟု ကိုယ်တော်တို့ ‘သခင်’ ဆိုဘီး ခေါ်လေဟယ်။ အယ်ဆိုဟာ ဖယ်မျိုးဖြစ်ဘီးဟာ မေရှိယဟာ ဒါဝိဒ်ရဲ့ မှလေးမှလစ် ဖြစ်ဟားရနူး။” ဆိုဘီး မေးတော်မူလေဟယ်။

ကျမ်းတတ်ဆရာလေဟို ရှောန်ဟို ဒီပေးဟူကြောင်း
(မသံ ၂၃.၁-၃၆; မာကု ၁၂.၃၈-၄၀)

45 လူလေ ဂူလောင်းဟာ နားထောန်နေဟူ ခီမာ ယေရှုဟု တမံတော်လေဟို

46 “ကျမ်းတတ်ဆရာလေဟို ဒီထားဂေ။ သူးနို့လေဟာ ဝတ်လောင်ရှယ်လေန ရှော့-က်သွားဘီး ဆေးလေထဲမာ နှောက်ဆစ်ခံရဇာဟို နှစ်သက်ဂေဟယ်။ သူးနို့လေဟာ ဝါလယ်ဇရပ်လေမာ သီးသန့်ခေါင်လေန စားသော့-က်ပွဲလေမာ ကောန်းဆောင်းနေရာဟို ဝီးကော့-က်ဂေလေဟယ်။

47 သူးနို့လေဟာ မောက်ဆိုးမရဲ့ အီလေဟို အဓမ္မသီးယူဟယ်။ အယ်ဘီးဟာ လူလေထန်ကီးအောန် ခီကြာဂီး ဆုတောင်းဂေဟယ်! သူးနို့လေဟာ ရရာတိုင်း ဆိုးဟူ ပြစ်ဒန်ဟို ခံရလေ့မယ်!” ဆိုဘီး မိန့်တော်မူလေဟယ်။

21

မောက်ဆိုးမရဲ့ လူငွေကြောင်း
(မာကု ၁၂.၄၁-၄၄)

1 ယေရှုဟာ ပတ်ပတ်လည်ဟို ကေ့လိုက်ဟူ ခီမာ ဌေးသားလေဟာ ဗိမာန်တော်ထဲဟု လူခံမောင်းထဲဟို သူးနို့ရဲ့ လူငွေလေ ထဲနေဂေဇာဟို မြင်တော်မူဟယ်။

² အယ်ဘီးဟာ ကိုယ်တော်ဟာ ရရာတိုင်း ဆင်းရဲဟူ မောက်ဆိုးမဟု ကြေးဒန်းဂါး နှေးပုလား ထုံနေဟူလည်း မြင်တော်မူလေဟယ်။

³ ကိုယ်တော်ဟု “အယ်ဆင်းရဲဟူ မောက်ဆိုးမဟာ တခြားလူလေ ဂူလောင်းထတ် ဘောင်ဂီးလူဟယ် ဆိုဇာ ဟို နန်းနို့ဟို ငါမှန်တိုင်း ပြောဟယ်။

⁴ ဖြားဖြစ်ကြောန့်နူးဆိုဟာ တခြားလူလေ ဂူလောင်း ဟာ သူးနို့အောက်စာရဲ့ ပုံနေဟူဇာလေဟို လူဂေလေဟယ်။ အယ်ဘေမဲ့ အယ်မောက်ဆိုးမဟာ သူမာရှိမျှ ဂူလောင်းဟို ပေးလေဟယ်” ဆိုဘီး မိန့်တော်မူလေဟယ်။

ဗိမာန်တော်ဖျစ်ဆီးခံရဟို့ကြောန့်
(မဿဲ ၂၄.၁,၂; မာကု ၁၃.၁,၂)

⁵ ဗိမာန်တော်ဟို လှပဟူ ကုလော့-က်တောင်းလေနရော၊ ဘုရားသခင်ဟို ဆစ်ကပ်ဟူးဟူ လှပစီးလေနရော လှ ဆင်ဟူးဟယ် ဆိုဘီး တမဲ့တော်တချို့ဟာ ပြောနေဂေဟယ်။

⁶ ယေရှုဟု “နန်းနို့ မြင်ဟူးဇာလေ ဂူလောင်းဟာ ကုလော့-က်တောင်းလည်း ကျန်ရစ်ဘဲအောန် ဖျစ်ဆီးရှင်း ခံရဟို့ ခီရော့-က်လာလေမယ်” ဆိုဘီး မိန့်တော်မူလေဟယ်။

ဆင်းရဲဒေါက်ခန ညှဉ်းဆဲရှင်းကြောန့်
(မဿဲ ၂၄.၃-၁၄; မာကု ၁၃.၃-၁၃)

7 သူနိုးနို့လေဟု “ဆရာ၊ အယ်မူဇာလေဟု ဖယ်ခီမာ ဖြစ်လာမယ်နူး။ အယ်မူဇာလေ ဖြစ်ခါနီးဟူ ခီမာ ဖယ် မျိုးနိမိတ်လေ ပေါ်လာဟုံနူး။” ဆိုဘီး မေးလျှော့-က်ဂေ ဟယ်။

8 ယေရှုဟု “နန်းနို့လေ လှည့်ဇားခံရဘဲအောက် ဒိထား ဂေ။ လူလေဘောင်ဂီးဟာ ငါနာမန ရော့-က်လာဘီးဟာ ‘ငါဟာ အယ်လူဘဲ ဖြစ်ဟယ်! ခီရော့-က်လာဘီး!’ ဆိုဘီး ပြောလေ့မယ်။ အယ်ဘေမဲ့ သူနိုးနို့ နှော့-က်ဟုံ လိုက်ဂေန။

9 နန်းနို့လေဟာ စစ်ပွဲလေန ပူကန်ရှင်းကြောင်းလေဟုံ ကြားရဟူ ခီမာ ကြော့-က်ဂေန။ အယ်မူဇာလေဟု ရင် ဦးဆောင်း ဖြစ်ရမယ်။ အယ်ဘေမဲ့လည်း ဆောင်းသတ်ခီ ဟာ ရော့-က်လာသေးဟု” ဆိုဘီး မိန့်တော်မူလေဟယ်။

10 ကိုယ်တော်ဟု “လူမျိုးလေဟာ တမျိုးန တမျိုး၊ နိုင်ငံ လေဟာ တနိုင်ငံန တနိုင်ငံ တိုက်ဂေလေ့မယ်။

11 နေရာတိုင်းမာ ကြော့-က်ဘွယ်လန့်ဘွယ် မုလေဂီး လှောက်ရှင်းလေ၊ စာရေဇာ ရှားပါးရှင်းလေ၊ ကပ်ရောဂါ လေ ဖြစ်ဂေလေ့မယ်။ ကောင်းဂန်ထတ်ဟုနေ ထူးဆန်း ဘီး ကြော့-က်ဇာကောင်းဟူ နိမိတ်လေ ပေါ်လာဂေလေ့ မယ်။

12 အယ်ဘေမဲ့လည်း အယ်မူဇာလေ ဖြစ်လာခန်မာ နန်း နို့လေဟုံ ဖမ်းဆီးဘီး ညည်းဆဲဂေလေ့မယ်။ နန်းနို့လေဟုံ ဝါလယ်ဇရပ်လေမာရော၊ ထောန်ထဲမာရော လှော်ဟား ဂေလေ့မယ်။ ငါနာမကြော့န့် နန်းနို့လေဟုံ ပြို့ဝန်မန်းလေ

န မန်းဂီးလေ ရှေ့မှော-က်ဟို ခေါ်ဆောန်ဟူးဂေလေမယ်။

¹³ အယ်နည်းလမ်းအားဖြင့် နန်းနို့ဟာ ဒန်းကောန်းဟို သတ်သေခံဟိုတွပ် ခွမ်းရေး ဖြစ်လာဂေလေမယ်။

¹⁴ အယ်ကြောန့် ဖယ်မျိုးချေပရမယ် ဆိုဇာဟို ကြိုတန် ဘီး စိုးရိမ်ဘဲဟိုတွပ် နန်းနို့ရဲ့ စိန်လောင်းဟို ဆောင်းဖြတ် ဟူးဂေ။

¹⁵ ဖြားဖြစ်ကြောန့်နူးဆိုဟာ နန်းနို့ရန်သူလေဟာ ပုလန် ဘီး ခုခံဟန်တားနိုင်ဘဲနေအောန် နန်းနို့ဟို နှောက်စွမ်းန ဉာဏ်ပညာဟို ငါပေးမယ်။

¹⁶ နန်းနို့ရဲ့ မိဖလေရော၊ ညီကိုလေရော၊ ဆွေမျိုးလေ ရော၊ ငယ်ဂျင်းလေဟာ နန်းနို့ဟို အပ်ဂေလေမယ်။ နန်းနို့ ထဲဟု တချို့ဟာ သေသတ်ရှင်းဟို ခံရဂေလေမယ်။

¹⁷ လူတိုင်းဟာ ငါနာမကြောန့် နန်းနို့ဟို မူးတီးဂေလေ မယ်။

¹⁸ အယ်ဘေမဲ့ နန်းနို့ခေါင်းဟု ဆားဗန်တဗန်မျှ ဆောင်း ရှောင်းစေဟု။

¹⁹ နန်းနို့ဟာ တည်ကြည်ရှင်းအားဖြင့် ကယ်တန်ရှင်းဟို ခံရဂေလေမယ်။”

ယေရှုရှလင်မြို့ ဖျစ်ဆီးခံရဟိုကြောန်း

(မသံ ၂၄.၁၅-၂၁; မာကု ၁၃.၁၄-၁၉)

²⁰ “ယေရှုရှလင်မြို့ဟို စစ်တပ်လေ ဝိုင်းဟူးဇာဟို နန်း နို့ ပြင်ရဟူ ခီမာ အယ်မြို့ဟာ ကြာခန်မာ ဖျစ်ဆီးရှင်းခံရ မယ် ဆိုဇာဟို နန်းနို့လေ သိဂေလေမယ်။

21 အယ်ဆိုဟာ ယုဒနယ်မာရှိဟူ သူလေဟာ တောန်ထတ်ဟို့ တတ်ပုလေးဂေစေ။ မြို့ထဲမာရှိဟူ လူလေဟာ မြို့ပုလန်ဟို့ ထွပ်ဂေစေ။ အယ်ဘီးဟာ ကျေးဝါမာရှိဟူ သူလေဟို့လည်း မြို့ထဲဟို့ ဝမ်ဂေစေန။

22 ဖြားဖြစ်ကြောန့်နွဲ့ဆိုဟာ အယ်နေရစ်လေဟာ ကျမ်းစာဟု ပြောဟူးတိုင်း ပုလဲဇောင်ဟို့တွပ် ‘ပြစ်ဒန်ပေးဟို့ နေရစ်လေ’ ဖြစ်ဟယ်။

23 အယ်နေရစ်လေမာ ဝန်းရှင်မလေန သားရှင်မိလေတွပ် ရရာတိုင်း ဆိုးဝါးဂေလေ့မယ်၊ ဒေါက်ခဆင်းရဲဟာ အယ်ပြည်ထတ်ဟို့ ရှေ့-က်လာလေ့မယ်။ အယ်ဘီးဟာ ဘုရားသခင်ရဲ့ မျစ်တော်ဟာ အယ်သူလေ ထတ်မာလည်း ကုလရှေ့-က်လေ့မယ်။

24 တချို့လေဟာ ထားန သတ်ခံရဂေလေမယ်။ ကျန်ဟူ သူလေဟာ ထောန်သားလေဖြစ်န နိုင်ငံသီးသီးဟို့ ဖမ်းဆီးဟူးရှင်း ခံရဂေလေ့မယ်။ လူမျိုးခြားလေဟာ သူးနှိရဲ့ ခီကူခန်ထိ ယေရုရှလင်မြို့ဟို့ နန်းချေဂေလေ့မယ်။”

လူရဲ့သား ကြွလာတော်မူဟူကြောန့်

(မသံ ၂၄.၂၉-၃၁; မာကု ၁၃.၂၄-၂၇)

25 “နေ၊ လ၊ ကြယ်လေမာ ထူးဆန်းဟူ နိမိတ်လေ ဖြစ်လေ့မယ်။ မုလေဂီးထတ်ဟု လူမျိုးလေ ဂူလောင်းဟာ ပန်လယ်လှိုင်းတံပိုးသံကြောန့် စိပျစ်ဟူးဘီး ကြော့-က်လန်ဂေလေ့မယ်။

26 ကောင်းဂန်ဟု တဂိုးလေဟာ လှောက်ခါဂေဘီး လူလေဟာ ကမ္ဘာထတ်ဟို့ သတ်ရော-က်လာဟို့ ဇာလေတွပ် ကြိုတိုးဘီး ကြော-က်လန်လာဟူကြောန့် မူးလဲဂေလေ့မယ်။

27 အယ်ခီမာ လူရဲသားဟာ ကီးမားဟူ ဖောင်းတဂိုးန မိုးတီဟို့ စီးဘီး ကြွလာနေဇာဟို့ သူးနို့လေ ပြင်ရဂေလေ့မယ်။

28 အယ်မူဇာလေ စဘီး ဖြစ်လာဟူ ခီမာ နန်းနို့ဟို့ ဝီးကော-က်ဟို့ ခီဟာ နီးလာဘိဖြစ်ဟူကြောန့် မတ်တပ်ထဘီး နန်းနို့ရဲ ခေါင်းလေဟို့ မော့ဟူးဂေ” ဆိုဘီး မိန့်တော်မူလေဟယ်။

သဖန်းဗန် ပေါင်ဥပမာကြောန်း

(မသဲ ၂၄.၃၂-၃၅; မာကု ၁၃.၂၈-၃၁)

29 အယ်ဘီးန ယေရှုဟာ သူးနို့ဟို့ အယ်ပေါင်ဥပမာန “သဖန်းဗန်န တခြားသစ်ပန်လေဟို့ ကေ့ကေ့။

30 နန်းနို့လေဟာ အယ်ပန်လေမာ ဝပ်နုလေ ထွပ်လာဇာဟို့ ပြင်ဟူ ခီမာ နွေရာသီ ရော-က်ခါနီးဘိ ဆိုဇာဟို့ နန်းနို့လေ သိဂေဟယ်။

31 အယ်မျိုးဘဲ အယ်မူဇာလေ ဖြစ်လာဇာဟို့ နန်းနို့လေ ပြင်ဟူ ခီမာ ဘုရားသခင်ရဲ နိုင်ငံတော် တည်ခါနီးဘိ ဆိုဇာဟို့ နန်းနို့လေ သိဂေပါ။

32 “ငါ မှန်တိုင်းပြောမယ်၊ အယ်မူဇာလေ ဂူလောင်း ဖြစ်လာခန်မာ အယ်မျိုးဆစ်ဟာ လောင်းဝ ပျော-က်ကွ

ယ်ဟုားဟို့ မူဟု။

³³ ကောန်းဂန်န မုလေဂီးဟု ပျေ့-က်ကွယ်ဟုားလေ့မယ်။ အယ်ဘေမဲ့ ငါ့စကားလေဟု လောင်းဝ ပျေ့-က်ကွယ်လေ့မယ် မူဟု။

ဒိရှိဟို့ လိုအပ်ဟူကြောင်း

³⁴ “ဒိနနေဂေ။ ပျော်လွန်ကြူးရှင်းလေ၊ သော့-က်စားယစ်မေရှင်းလေ၊ လောကီမှုရေး စိုးရိမ်ရှင်းလေကြောန့်နန်းနို့ရဲ့ စိန်လောင်းလေဟု လေးလံထိုင်းမှိုင်းနေဒူးမာ အယ်နေရစ်ဟု ထောန်ချေ့-က်မျိုးဘဲ နန်းနို့ထတ်ဟို့ ရောက်တရစ် ရှေ့-က်လာလေ့မယ်။

³⁵ ဖြားဖြစ်ကြောန့်နူးဆိုဟု အယ်နေရစ်ဟု မုလေဂီးတဗုလန်လောင်းမာရှိဟူ လူလေ ဂူလောင်းထတ်ဟို့ ကုလရှေ့-က်လာလေ့မယ်။

³⁶ အယ်ကြောန့် နန်းနို့ဟု ဖြစ်လာဟို့ဇာလေ ဂူလောင်းဟု နေ လွတ်မြေ့-က်ဘီး လူသားရဲ့ ရှေ့တော်မာ မတ်တတ်ရပ်နိုင်ဟို့တွပ် ဒီတိုင်း ဒိနနေဘီး ဆုတောင်းဂေ” ဆိုဘီး မိန်တော်မူလေဟယ်။

³⁷ ယေရှုဟု နေ့ခီလေမာ ဗိမာန်တော်မာ သွန်သန်တော်မူဘီး ညဉ့်ခီလေမာ ပုလန်ဟို့ ထွပ်ဟုားဘီး သံလွင်တောန်ထတ်မာ ညဉ့်ဟို့ ကူစေတော်မူဟယ်။

³⁸ လူလေ ဂူလောင်းဟု ဗိမာန်တော်မာ တရားနားထောန်ဟို့ မိုးလန်းစောစောဂီး ကိုယ်တော်နားဟို့ လာဂေဟယ်။

22

ယေရှုဟို သတ်ဟို့ ကြံစည်ဟူကြောန်း

(မသဲ ၂၆.၁-၅; မာကု ၁၄.၁,၂; ယောဟန် ၁၁.၄၅-၅၃)

¹ ပသခါပွဲ ဆိုဘီး ခေါ်ဟူ တဆေးမွေဘဲဟူ မုပွဲတော် ခီ နီးလာလေဟယ်။

² ယဇ်ပုရောဟိတ်ဂီးလေန ကျမ်းတတ်ဆရာလေဟာ လူ လေဟို့ ကြော-က်လန်ဂေဟူကြောန်း ယေရှုဟို့ တိတိဟား သတ်ဟို့တွပ် နည်းလမ်းရှာကြံဂေလေဟယ်။

ယေရှုဟို့ အပ်ဟို့ ယုဒဘောတူဟူကြောန်း

(မသဲ ၂၆.၁၄-၁၆; မာကု ၁၄.၁၀,၁၁)

³ အယ်ဘီးန စာတန်ဟာ တမဲ့တော် ဆယ့်နှေ့ပါးထဲဟု တပါးဖြစ်ဟူ ဣရုကာရုတ် ဆိုဘီး ခေါ်ဟူ ယုဒထဲဟို့ ဝမ် လေဟယ်။

⁴ အယ်ကြောန်း ယုဒဟာ ယဇ်ပုရောဟိတ်ဂီးလေန ဗိမာန် တော်စောန့် ကြီးကဲလေနားဟို့ သွားဘီး ယေရှုဟို့ သူးနို့ လတ်ထဲဟို့ ဖယ်မျိုး အပ်ရမယ် ဆိုဇာဟို့ သူးနို့လေန တိုင် ဗန်ဂေလေဟယ်။

⁵ သူးနို့လေဟာ ဝန်းသာဘီးဟာ သူဟို့ ကပ်ပေးဟို့ ဘော တူဂေဟယ်။

⁶ ယုဒဟာလည်း ဘောတူဘီး လူလေဟို့ သိစောဘဲန ယေ ရှုဟို့ သူးနို့လတ်ဟို့ အပ်ဟို့တွပ် ခွမ်ကောန်းဟို့ ရှာကြံလေ ဟယ်။

ပသခါပွဲ ပြင်ဆင်ဟူကြောန်း
(မသံ ၂၆.၁၇-၂၅; မာကု ၁၄.၁၂-၂၁; ယောဟန်
၁၃.၂၁-၃၀)

⁷ တဆေးမှုဘဲဟူ မုပွဲတော် ခီမာ ပသခါသိုးသားဂန်း
လေဟို့ သတ်ရဟူနေ့ ရော့-က်လာဟယ်။

⁸ ယေရှုဟာ ပေတရုန ယောဟန်ဟို့ “ပသခါပွဲတော်ဟို့
နို့လေစားဟို့ သွားဘီး ပြင်ဆင်ဂေပါ” ဆိုဘီး မိန့်တော်မူ
ဘီး သူးနို့ဟို့ စေလွှတ်လေဟယ်။

⁹ သူးနို့ဟုလည်း “ကိုယ်တော်ဟု ကျွန်တော့်ဟားလေ
ဟို့ ဖယ်နေရာမာ ပြင်ဆင်စေရှင်ဟယ်နူး။” ဆိုဘီး မေး
လျှော့-က်ဂေဟယ်။

¹⁰ ကိုယ်တော်ဟု “နန်းနို့ဟာ မြို့ထဲဟို့ ဝမ်ဟားဟူ ခီမာ
ရေအိုးထမ်းလာဟူ လူတယော့-က်ဟာ နန်းနို့ဟို့ လာတို့
လေ့မယ်။ အယ်လူ ဝမ်ဟားဟူ အီထဲဟို့ ဝမ်လိုက်ဟားဘီး
ဟာ၊

¹¹ အီဇရှင်ဟို့ ‘ဆရာဟု ငါ့တမဲ့လေနတူးဒု ပသခါညဉ့်
ဇာစားဟို့ ခန်းဟု ဖယ်မာနူး။ ဆိုဘီး မေးခိုင်းလိုက်ဟယ်’
ဆိုဘီး ပြောဂေပါ။

¹² အယ်လူဟု ပြင်ဆင်ဟားဟူ ထတ်ခန်းမဟို့ နန်းနို့ဟို့
ပြလေ့မယ်။ အယ်ခန်းမာ နန်းနို့ ပြင်ဆင်ဂေပါ” ဆိုဘီး မိန့်
တော်မူလေဟယ်။

¹³ သူးနို့ဟာ ထွပ်ဟားဘီးန ယေရှုဟု သူးနို့ဟို့ မိန့်တော်
မူဟားတိုင်းဘဲ ဂူလောင်းဟို့ တွံရဟူကြောန် ပသခါညဉ့်

ဇာတို့ ပြင်ဆင်ဂေဟယ်။

သခင်ဘုရားရဲ့ ညဉ့်ဇာကြားနား

(မဿဲ ၂၆.၂၆-၃၀; မာကု ၁၄.၂၂-၂၆; ၁ ကောရိနုသု ၁၁.၂၃-၂၅)

¹⁴ ခီရော့-က်လာဟူ ခီမာ ယေရှုဟာ တမန်တော်လေန တူးဒူ စားမွဲမာ ထိုင်တော်မူဟယ်။

¹⁵ ကိုယ်တော်ဟာ “ငါဟာ ဒေါက်ခဝေဒနာခံရခန်မာ အယ်ပသခါ ညဉ့်ဇာတို့ နန်းနီနတူးဒူ ရရာတိုင်း စားရှင် ဟယ်။

¹⁶ နန်းနီတို့ ငါပြောမယ်၊ ပသခါပွဲတော်ဟာ ဘုရားသခင် ရဲ့ နိုင်ငံတော်မာ ပုလဲဇောင်သေးခန်ထိ အယ်ပွဲတော်တို့ နှော့-က်ထပ်ခါ ငါစားတို့မဟု” ဆိုဘီး သူးနီတို့ မိန့်တော်မူ လေဟယ်။

¹⁷ အယ်ဘီးန ယေရှုဟာ ခွပ်တို့ ယူဘီး ဘုရားသခင် ရဲ့ ကျေးဇူးတော်တို့ ချီးမွမ်းဘီးန “အယ်ခွပ်တို့ ယူဘီး၊ ရှင်းရှင်းဝီမျှဘီး သော့-က်ဂေပါ။

¹⁸ နန်းနီတို့ ငါပြောမယ်။ ခုဟုစဘီး ဘုရားသခင်ရဲ့ နိုင်ငံတော် တည်ထောင်ခန်ထိ အယ်စပျစ်ပိုင်တို့ ငါလောင်း ဝ သော့-က်လေ့မယ် မဟု” ဆိုဘီး မိန့်တော်မူလေဟယ်။

¹⁹ အယ်ဘီးန ကိုယ်တော်ဟာ မဟုယူဘီး ဘုရားသခင် ရဲ့ ကျေးဇူးတော်တို့ ချီးမွမ်းဘီးန မဟု ဖဲဘီးဟာ သူးနီလေ တို့ ပေးဘီး “အယ်မဟာ နန်းနီတွပ် စွန်ဟူ ငါ့ရဲ့ ကိုယ်ခန္ဓာ

ဖြစ်ဟုယ်။ ငါ့ဟို့ အော့-က်မေ့ဟို့ အယ်မျိုးလောက်ဂေ”
ဆိုဘီး မိန့်တော်မူလေဟုယ်။

²⁰ အယ်မျိုးဘဲ ညဉ့်ဇာစားဘီးန ကိုယ်တော်ဟာ ခွပ်ဟို့
လည်း ယူဘီးဟာ “အယ်ခွပ်ဟာ နန်းနို့တွပ် သွန်းလောန်း
ဟူ ငါ့ရဲ့ သွီးန ဇီခတ်ဟားဟူ ဘုရားသခင်ရဲ့ ပဋိညာဉ်
တရားသစ် ဖြစ်ဟုယ်”*

²¹ “အယ်ဘေမဲ့ ငါ့ဟို့ အပ်မယ့်လူရဲ့ လတ်ဟာ ငါ့နတူး
ဒူ စားမွဲထတ်မာ ရှိနေဟုယ်!

²² လူရဲ့သားဟာ ဘုရားသခင် ခုလမှတ်ဟားတိုင်းဘဲ
သေခံဟို့ မှန်ဘဲသွားရမယ်။ အယ်ဘေမဲ့ လူရဲ့သားဟို့ အ
ပ်ဟူလူဟာ အမင်္ဂလာရှိဟုယ်!” ဆိုဘီး မိန့်တော်မူလေဟု
ယ်။

²³ အယ်ဘီးန တမွဲတော်လေဟာ နို့လေထဲဟု ဖယ်သူ
ဟာ အယ်မျိုးလောက်ဟို့နူး။ ဆိုဘီး သူးနို့ရှင်းရှင်း မေး
ဂေလေဟုယ်။

ကီးမြတ်ရှင်းန ပတ်သတ်ဘီး ဂြင်းခူဟူကြောန်း

²⁴ သူးနို့လေထဲဟု ဖယ်သူဟို့ ကီးမြတ်ဆောင်း ဖြစ်ဟု
ယ် ဆိုဘီး မှတ်ယူရမယ် ဆိုဇာဟို့ သူးနို့ရှင်းရှင်း ဂြင်းခူ
ဂေလေဟုယ်။

* **22:20** **၂၂.၂၀** တချို့ မူရင်းကျမ်းစာလေမာ ယေရှုရဲ့
စကားနော့-က်မာပါဟူ အယ်မဟာ ငါ့ရဲ့ ကိုယ်ခန္ဓာ ဖြစ်ဟုယ်၊ ဆိုဇာဟာ
ခန်းငယ် ၁၉ န ခန်းငယ် ၂၀ မာ မေ့ဟူ။ **22:24** **၂၂.၂၄** မ ၁၈.၁: မာ
၉.၃၄: လု ၉.၄၆

25 ယေရှုဟု သုံးနှိုင်းလေဟို “လူမျိုးခြားလေရဲ့ မန်းဂီးလေဟာ ပြည်သူလေထဲတံမာ စိုးတရ လောက်တတ်ဂေဟယ်။ လူလေထဲတံမာ အာဏာရှိဟူ သူလေဟိုလည်း သူများကျိုးဆောန်ဂုပ်သူ ဆိုဘီး ခေါ်ခဲရဂေဟယ်။

26 အယ်ဘေမဲ့ နန်းနှိုင်းလေဟု အယ်မျိုးလောက်ဂေန်။ နန်းနှိုင်းမာ ကီးမြတ်ဆောင်းဖြစ်ဟူ သူဟာ ငယ်ဆောင်းဟူ သူမျိုး ဖြစ်ရမယ်။ ဦးဆောန်ဟူ သူဟာ စေခံမျိုး ဖြစ်ရမယ်။

27 စားမွဲမာ ထိုင်နေဟူသူန စေခံဟူ သူလေထဲမာ ဖယ်သူဟု ပိုဘီး ကီးမြတ်နူး။ စားမွဲမာ ထိုင်နေဟူသူ မဟုလော။ အယ်ဘေမဲ့ ငါဟာ နန်းနှိုင်းမာ စေခံဟူသူမျိုး ဖြစ်ဟယ်။”

28 “စောင်ဇမ်း နှောန်ယှစ်ရှင်းလေဟို ငါခဲနေရဒူးမာ နန်းနှိုဟာ ငါနတူးဒူ ရပ်တည်ပေးဟူ လူလေ ဖြစ်ဂေဟယ်။

29 အယ်ဘီးဟာ ငါဖဟု ငါ့ဟို နိုင်ငံတော်ဟို ပေးအပ်ဟူမျိုးဘဲ ငါဟုလည်း နိုင်ငံတော်ဟို နန်းနှိုဟို ပေးအပ်မယ်။

30 နန်းနှိုဟာ ငါရဲ့ နိုင်ငံတော်မာ ငါရဲ့ စားမွဲမာ ထိုင်ဘီး စားသော-က် ရဂေလေ့မယ်။ အယ်ဘီးဟာ ပလ္လင်ထတ်မာ ထိုင်ဘီး ကူသရေလမျိုးနွယ် ဆယ့်နှေ့နွယ်ဟို တရားစီရင်ရဂေလေ့မယ်။

ပေတရုဟာ ငြင်းဆိုလေ့မယ် ဆိုဇာဟို ဖော်ပြဟူကြောန်း

(မဿဲ ၂၆.၃၁-၃၅; မာကု ၁၄.၂၇-၃၁; ယောဟန်

၁၃.၃၆-၃၈)

³¹ “ရှိမုန်၊ ရှိမုန်၊ နားထောန်ပါ၊ ဂျောင်ဆန်ဟို့ ဇဂါဒလ ဟူမျိုးဘဲ စာတန်ဟု နန်းနို့လောင်းဟို့ ဇဂါဒလဟို့တွပ် ခွ မှ်တောန်းလေဘီ။

³² အယ်ဘေမဲ့ နန်းရဲ့ ယောင်ကြည်ရှင်း ဆောင်းရှောင်း ဘဲဟို့တွပ် ငါဆုတောန်းနေဟယ်။ နန်ဟာ ငါဖတ်ဟို့ ပုလန် လှည့်လာဟူ ခီမာ နန်းရဲ့ ညီကိုလေဟို့ ခိုင်ခံစေပါ” ဆိုဘီး မိန့်တော်မူလေဟယ်။

³³ ပေတရုဟု “သခင်၊ ကျွန်တော်ဟာ ကိုယ်တော်နတူးဒု ထောန်ဘဲကုလကုလ၊ သေဘဲသေသေ ဆင်သင့်ရှိဟယ်!” ဆိုဘီး လျှော့-က်လေဟယ်။

³⁴ ယေရှုဟု “ပေတရု၊ နန်းဟို့ ငါပြောမယ်။ အယ်ညဉ့် ကြစ်တွန်ခန်မာ နန်ဟာ ငါဟို့ သိဟု ဆိုဘီး သောင်းခါ ငြင်း လေ့မယ်” ဆိုဘီး မိန့်တော်မူလေဟယ်။

ကပ်အိ၊ ထားန လွယ်အိကြောင်း

³⁵ အယ်ဘီးန ယေရှုဟာ “နန်းနို့ဟို့ ကပ်အိ၊ လွယ်အိန ခေန်ပမ္မောဘဲ စေလွတ်ဟူ ခီမာ နန်းနို့လေမာ လိုအပ်ဇာလေ ရှိသေးလော။” ဆိုဘီး တမဲ့တော်လေဟို့ မေးလေဟယ်။

သူးနို့ဟာ “မ္မောဟု” ဆိုဘီး လျှော့-က်လေဟယ်။

³⁶ ယေရှုဟု “အယ်ဘေမဲ့ ခု ကပ်အိရှိဟူ သူဟာ ယူဟား စေ။ လွယ်အိရှိဟူ သူဟာလည်း ယူဟားစေ။ ထားမ္မောဘဲ

ဟူ သူဟာ မိမိဝတ်လောင်ဟို ရောင်းဘီးဟာ ထားဟို ဝယ်
စေ။

³⁷ နန်းနို့ဟို ငါပြောမယ်၊ ‘သူဟာ တရားမဲ့ဘဲဟူ သူလေ
ရဲ့ စာရင်းထဲမှာ ထဲသွင်းရှင်းခံရမယ်’ ဆိုဘီး ကျမ်းစာမှာ
ရေးဟွားဟူဇာဟာ ငါမှာ ပုလဲဇောင်ရမယ်။ ဖြားဖြစ်ကြော
နန်းဆိုဟာ ငါ့ကြောန်းဟို ရေးဟွားဇာဟာ ပုလဲဇောင်ရှင်း
ဟို ရော့-က်နေဘီ” ဆိုဘီး မိန့်တော်မူလေဟယ်။

³⁸ တမဲ့တော်လေဟ “သခင်! ကေ့တော်မူပါ! အယ်မာ
ထားနေ့ရှောင်း ရှိဟယ်” ဆိုဘီး လျှော့-က်လေဟယ်။

ကိုယ်တော်ဟ “အယ်ဆိုဟာ ရလော့-က်ဘီ!”[†] ဆိုဘီး
မိန့်တော်မူလေဟယ်။

သံလွင်တောန်ထတ်မာ ဆုတောင်းဟူကြောင်း

(မသေ ၂၆.၃၆-၄၆; မာကု ၁၄.၃၂-၄၂)

³⁹ ယေရှုဟာ မြို့ထဲဟုနေ ထွပ်ဟွားဘီး ခါတိုင်းမျိုးဘဲ
သံလွင်တောန်ထတ်ဟို ကြွတော်မူဟယ်။ တမဲ့တော်လေ
လည်း ကိုယ်တော်နတူးဒု လိုက်ဟွားဂေဟယ်။

⁴⁰ အယ်နေရာဟို ရော့-က်ဟူ ခီမာ ကိုယ်တော်ဟ “နန်း
နို့လေဟာ သွီးဆောန်ရှင်းထဲဟို ကုလဘဲဟိုတွပ် ဆုတော
န်းဂေ” ဆိုဘီး သူးနို့ဟို မိန့်တော်မူလေဟယ်။

⁴¹ အယ်ဘီးန ကိုယ်တော်ဟာ သူးနို့လေန ကုလော့-က်
ခဲတပစ်ဇာလောက် ဝီးဟို သွားဘီးဟာ ဒူးထော့-က်ဘီးန
ဆုတောင်းဟူဇာဟ

[†] 22:38 ၂၂.၃၈ အယ်ဆိုဟာ ရလော့-က်ဘီ၊ အယ်မျိုးမူဘဲဟာ
အယ်ထားနေ့ရှောင်းနဆို တော်ဘီ။

42 ကိုယ်တော်ဟု “ဖ၊ ဖြစ်နိုင်မယ် ဆိုဟာ အယ်မူဝေဒနာ ခွပ်ဟို့ ကျွန်တော့်ဟုနေဘီး ယူဟားပေးပါ။ အယ်ဘေမဲ့ ကျွန်တော့် လိုရှင်တိုင်းဖြစ်စေဘဲန ဖလိုရှင်းတိုင်းဘဲ ဖြစ်စေပါ” ဆိုဘီး ဆုတောင်းလေဟယ်။

43 အယ်ခီမာ ကောင်းဂန်ဘောင်ဟု ကောင်းဂန်တမန် တပါးဟု ကိုယ်တော်နားမာ ပေါ်လာဘီး ကိုယ်တော့်ဟို့ အားပေးတော်မူဟယ်။

44 ကိုယ်တော်ဟု ပြင်းထန်ဟူ ဝေဒနာဟို့ ခံစားဘီး ပိုဘီး ပြင်းပြင်းထန်ထန် ဆုတောင်းဟူကြောန့် ကိုယ်တော်ရဲ့ ချွေးဟု သွီးစစ်လေမျိုး မှလေဂီးထတ်ဟို့ ကုလလေဟယ်။[‡]

45 ကိုယ်တော်ဟု ဆုတောင်းရာဟုနေ ထတော်မူဘီး တဗဲ့တော်လေနားဟို့ ပုလန်လာဟူ ခီမာ သူးနို့လေဟု ဝန်းနဲဘီး အိမ့်နေဇာဟို့ တွဲဟားလေဟယ်။

46 ကိုယ်တော်ဟု “နန်းနို့လေ ဖြားဖြစ်ကြောန့် အိမ့်နေဂေနှူး။ သွီးဆောန်ရှင်းထဲဟို့ ကုလဘဲဟို့တွပ် ထဒန်ဘီး ဆုတောင်းဂေ” ဆိုဘီး သူးနို့ဟို့ မိန့်တော်မူလေဟယ်။

ယေရှုဟို့ ဖမ်းဆီးဟူကြောန်း

(မသဲ ၂၆.၄၇-၅၆; မာကု ၁၄.၄၃-၅၀; ယောဟန် ၁၈.၃-၁၁)

47 အယ်မျိုးမိန့်တော်မူနေဒူးမာဘဲ တဗဲ့တော် ဆယ့်နေ့ ပါးထဲဟု တပါးဖြစ်ဟူ ယုဒဟု လူအောက်ဂီးဟို့ ဦးဆော

‡ 22:44 **၂၂.၄၄** တချို့ မူရင်းလတ်ရေးမူလေမာ ခန်းငယ် ၄၃-၄၄ ဟာ မှေ့ဟယ်။

န်ဘီး ရော့-က်လာဟယ်။ သူဟာ ယေရှုဟို နမ်းဟို့တွပ်
တိုးဝမ်လာလေဟယ်။

48 အယ်ဘေမဲ့ ယေရှုဟာ “ယုဒ၊ လူရဲ့သားဟို့ နမ်းရှင်း
အားဖြင့် အပ်ဟို့လော။” ဆိုဘီး မေးတော်မူလေဟယ်။

49 ယေရှုနတူးဒူ ရှိနေဂေဟူ တမဲ့တော်လေဟာ ဖြစ်လာ
မယ့်ဇာဟို့ သိလိုက်ဟူ ခီမာ သူးနို့ဟာ “သခင်၊ ကျွန်တော့်
ဟားလေ ထားန ခွတ်ရဟို့လော။” ဆိုဘီး မေးလျှော့-က်
လေဟယ်။

50 သူးနို့ထဲဟာ တယော့-က်ဟာ ယဇ်ပုရောဟိတ်မန်းရဲ့
ကျွန်တယော့-က်ဟို့ ခွတ်လိုက်ဇာ အယ်လူရဲ့ ညာဖတ်နား
ဝှပ်ဟာ ပြတ်ဟားလေဟယ်။

51 အယ်ဘေမဲ့ ယေရှုဟာ “တော်ဘီ!” ဆိုဘီး မိန့်တော်
မူလေဟယ်။ ကိုယ်တော်ဟာ အယ်လူရဲ့ နားဝှပ်ဟို့ လတ်
တော်န ထိလိုက်ဘီး ပုလန်ကောန်းစေလေဟယ်။

52 အယ်ဘီးန ယေရှုဟာ မိမိဟို့ ဖမ်းဟို့ရော့-က်လာဟူ
ယဇ်ပုရောဟိတ်ဂီးလေ၊ ဗိမာန်တော်စောန့် တပ်မှူးလေန
သတ်ကီးဝါဂီးလေဟို့ “နန်းနို့ဟာ မှုလဟို့ ဖမ်းဟူမျိုး ထား
လေ၊ ဒေါက်လေဟို့ ကိုင်ဆောန်ဘီး လာဂေရလော။

53 ငါဟာ နေ့တိုင်း နန်းနို့နတူးဒူ ဗိမာန်တော်မာ ရှိနေ
ဒူးမာ နန်းနို့ဟာ ငါဟို့ ဖမ်းဂေဟာ။ အယ်ဘေမဲ့ အယ်မျိုး
လောက်ဆောန်ဟို့တွပ် နန်းနို့ရဲ့ခီ ဖြစ်ဟယ်။ မှောန်မိုက်တ
ဂိုးလည်း ဖြစ်ဟယ်” ဆိုဘီး မိန့်တော်မူလေဟယ်။

ယေရှုဟို ပေတရု ဂြင်းဟူကြောင်း

(မသံ ၂၆.၅၇,၅၈,၆၉-၇၅; မာကု ၁၄.၅၃,၅၄,၆၆-၇၂;
ယောဟန် ၁၈.၁၂-၁၈,၂၅-၂၇)

54 သူးနှီးလေဟု ယေရှုဟို ဖမ်းဘီးဟာ ယဇ်ပုရောဟိတ်
မန်းရဲ့ အီဟို ခေါ်ဟောင်းဂေဟယ်။ ပေတရုဟာလည်း ခပ်ဝီး
ဝီးဟုနေ လိုက်ဟောင်းလေဟယ်။

55 အီဝမ်းရဲ့ လယ်မာ မီးဗောင်ဟို ဝိုင်းဘီးထိုင်နေဟူ လူ
လေကြားထဲမှာ ပေတရုဟာ ဝမ်ထိုင်လေဟယ်။

56 အယ်မျိုး ပေတရုဟာ မီးဗောင်းနားမှာ ထိုင်နေဇာဟို
စေခံမီးမ တယော့-က်ဟု မြင်ဟောင်းဟူကြောင့် သူ့ဟို စေ
စေကော့ဘီး “အယ်လူဟာလည်း ယေရှုရဲ့ ပေါန်းဖော် ဖြစ်
ဟယ်!” ဆိုဘီး ပြောလေဟယ်။

57 အယ်ဘေမဲ့ ပေတရုဟု “ငွေမီးမ၊ အယ်သူဟို ငါ သိ
ဟု!” ဆိုဘီး ဂြင်းလေဟယ်။

58 ရှစ်ဟောင်းကြာဘီးန လူတယော့-က်ဟာ ပေတရုဟို မြ
င်ဟောင်းဟူ ခီမာ “နန်လည်း သူးနှီးလေထဲဟု တယော့-က်ဘဲ
ဖြစ်ဟယ်!” ဆိုဘီး ပြောလေဟယ်။

အယ်ဘေမဲ့ ပေတရုဟာ “ငွေလူ၊ ငါဟာ သူးနှီးထဲဟု မူ
ဟု!” ဆိုဘီး ပြောလေဟယ်။

59 တနာရီလော့-က် ကြာဘီးန တခြားတယော့-က်ဟု
“မှန်တိုင်း ပြောရမယ် ဆိုဟာ အယ်သူဟာ ဂါလိလဲလူ ဖြစ်
ဟူကြောင့် ယေရှုန ပေါန်းဖော်ဟူသူ ဖြစ်ဟယ်!” ဆိုဘီး
ခိုင်ခိုင်မာမာ ပြောလေဟယ်။

60 အယ်ဘေမဲ့ ပေတရုဟု “ဝေ့လူ၊ နန်ပြောနေဇာလေဟို
ငါ သိဟု!” ဆိုဘီး ပုလန်ပြောလေဟယ်။

သူအယ်မျိုး ပြောနေဒူးမာဘဲ ကြစ်တွန်လေဟယ်။

61 အယ်ခီမာ သခင်ဘုရားဟာ လှည့်ဘီး ပေတရုဟို စူး
စိုက်ဘီး ကေ့တော်မူဟယ်။ ပေတရုဟုလည်း “အယ်ညဉ့်
ကြစ်တွန်ခန်မာ နန်ဟာ သောင်းခါတိတိ ငြင်းပယ်လေ
မယ်” ဆိုဘီး မိန့်တော်မူဟူးဟူ သခင်ဘုရားရဲ့ စကား
တော်ဟို ပုလန်အေ့-က်မေ့လာဟယ်။

62 အယ်ကြောန့် ပေတရုဟာ ပုလန်ဟို ထွပ်ဟူးဘီး ရ
ရာတိုင်း ငိုလေဟယ်။

ယေရှုဟို လှောင်ပြန်ဘီး ရိုက်နှက်ဟူကြောင်း
(မသံ ၂၆.၆၇-၆၈; မာကု ၁၄.၆၅)

63 ယေရှုဟို စောန့်ကြပ်နေဟူ လူလေဟု ကိုယ်တော့်ဟို
လှောင်ပြန်ဘီး ရိုက်နှက်ဂေ့ဟယ်။

64 သူးနို့လေဟု ကိုယ်တော်ရဲ့ မျစ်နှာဟို ဖောင်းဘီးဟာ
“ကိုယ်တော့်ဟို ဖယ်သူလေ ရိုက်ဂေ့နူး။ ပရောဖက်ပြုဂေ့!”
ဆိုဘီး ကိုယ်တော်ဟို မေးဂေ့ဟယ်။

65 အယ်ဘီးဟာ သူးနို့လေဟု တခြားကဲ့ရဲ့ဇာလေ ဘော
င်ဂီးန ကိုယ်တော့်ဟို ပြောဂေ့ဟယ်။

ယေရှုဟို တရားလွတ်တော်ရှေ့မာ စစ်ဆေးဟူကြောင်း
(မသံ ၂၆.၅၉-၆၆; မာကု ၁၄.၅၅-၆၄; ယောဟန်
၁၈.၁၉-၂၄)

66 မိုးလန်းဟွားဟူ ခီမာ သတ်ကီးဝါဂီးလေ၊ ယဇ်ပုရော
ဟိတ်ဂီးလေန ကျမ်းတတ်ဆရာလေဟာ စုဝီးဂေဘီး ယေ
ရှုဟို တရားလွတ်တော်ရှေ့ဟို ခေါ်ဆောန်ဟွားဂေဟယ်။

67 သူးနို့လေဟ “နန်ဟာ မေရီယဘဲလော။ နို့လေဟို
ပြောပါ” ဆိုဘီး မေးဂေဟယ်။

ကိုယ်တော်ဟ “နန်းနို့ဟို ငါပြောမယ် ဆိုဟာလည်း နန်း
နို့ ယောင်ကြည်ဂေဟို မှဟု။

68 နန်းနို့ဟို ငါ မေးမေးမယ် ဆိုဟာလည်း နန်းနို့ ဖြေဂေ
ဟို မှဟု။

69 အယ်ဘေမဲ့ ခုဟုနေဘီး လူရဲ့သားဟာ အနန္တတဂိုးရှင်
ဘုရားသခင်ရဲ့ ညာဖတ်မာ ထိုင်တော်မူလေ့မယ်” ဆိုဘီး
မိန့်တော်မူလေဟယ်။

70 သူးနို့လေ ဂူလောင်းဟာ “အယ်မျိုးဆိုဟာ နန်
ဟ ဘုရားသခင်ရဲ့သား ဖြစ်ဟယ်လော။” ဆိုဘီး မေး
လျှော့-က်လေဟယ်။

ကိုယ်တော်ဟာ “နန်းနို့ မေးဟူတိုင်းဘဲ ငါဖြစ်ဟယ်” ဆို
ဘီး သူးနို့ဟို မိန့်တော်မူလေဟယ်။

71 အယ်ဘီးန သူးနို့လေဟာ “နို့လေကိုယ်တိုင် သူရဲ့
နွေ-က်ဟုနေ အယ်စကားလေဟို ကြားရဘိ ဖြစ်ဟူကြော
န့် နွေ-က်ထပ် ပြားသတ်သေလေ လိုသေးဟယ်နူး!” ဆို
ဘီး ပြောဂေဟယ်။

ပိလတ်ရှေ့တို့ ခေါ်ဆောင်တော်မူကြောင်း
(မဿဲ ၂၇.၁,၂,၁၁-၁၄; မာကု ၁၅.၁-၅; ယောဟန်
၁၈.၂၈-၃၈)

¹ တရားလွှတ်တော် တဖွဲ့လောင်းဟာ ထဘီးန ယေရှုတို့
ပိလတ်မန်းရှေ့တို့ ခေါ်ဆောင်ဟောင်းဘီး၊

² အယ်နေရာမာ သူးနို့လေဟာ ကိုယ်တော့်တို့ “ကဲသာမ
န်းဂီးတို့ ခွန်ဆောင်ဇာလိုဟု ဆိုဘီး သူးနို့တို့ ပြောဘီး သူး
ကိုယ်သူလည်း မေရှိယဖြစ်ဟူ မန်းဂီး ဖြစ်ဟယ် ဆိုဘီး
လူလေတို့ လမ်းမှားအောင် လောက်နေကြောန့် ကျွန်တော့်
ဟောင်းလေဟာ အယ်လူတို့ ဖမ်းလာဟယ်” ဆိုဘီး စွပ်စွဲဂေ
ဟယ်။

³ ပိလတ်ဟာ “နန်ဟာ ယုဒမန်းဂီးလော။” ဆိုဘီး ကိုယ်
တော့်တို့ မေးလေဟယ်။

ယေရှုဟု “မန်းဂီးမေးဟူတိုင်းဘဲ ဖြစ်ဟယ်” ဆိုဘီး မိန့်
တော်မူဟယ်။

⁴ အယ်ဘီးန ပိလတ်မန်းဟာ ယဇ်ပုရောဟိတ်ဂီးလေန
လူအောက်ဂီးတို့ “ငါဟာ အယ်လူမာ ပြစ်တခုလည်း ငါတို့
ဟု” ဆိုဘီး ပြောလေဟယ်။

⁵ အယ်ဘေမဲ့ သူးနို့လေဟာ “သူဟာ ဂါလိလဲနယ်ဟု
နေ အယ်နေရာထိတိုင်အောင် ယုဒနယ် တနယ်လောင်းမာ
သွန်သန်ဘီး လူလေတို့ နှိုးဆော်နေဟူသူ ဖြစ်ဟယ်” ဆို
ဘီး ပြင်းပြင်းထန်ထန်ဟောင်း ပြောဂေဟယ်။

ဟေရုဒ်ရှေ့တို့ ခေါ်ဆောင်ဟောင်းဟူကြောင်း

6 ပိလတ်ဟာ အယ်စကားလေဟို့ ကြားဟူ ခီမာ “အယ်လူဟာ ဂါလိလဲနယ်သားလော။” ဆိုဘီး မေးလေဟယ်။

7 ဟေရုဒ် အောက်စိုးဟူ နယ်ဟု ဖြစ်ဟယ် ဆိုဇာဟို့ သိဟွားဟူ ခီမာ ကိုယ်တော့်ဟို့ ဟေရုဒ်နားဟို့ ပို့စေလိုက်ဟယ်။ အယ်ခီမာ ဟေရုဒ်ဟာလည်း ယေရုရှလင်မြို့မာ ရှိနေလေဟယ်။

8 ဟေရုဒ်ဟာ ယေရှုဟို့ မြင်ဟူ ခီမာ ရရာတိုင်း ဝန်းသာဟွားဟယ်။ ဖြားဖြစ်ကြောန်းနူးဆိုဟာ ကိုယ်တော့်ကြောန်းဟို့ ကြားဟွားဘီး ကိုယ်တော့်ဟို့ တွဲရှင်နေဇာဟာ ကြာဘီ။ ယေရှုလောက်ပြမယ့် နိမိတ်လတ်ခဏာ တချို့ဟို့ တွဲရဟို့ မျှော်လင့်နေလေဟယ်။

9 အယ်ကြောန် ဟေရုဒ်ဟု ယေရှုဟို့ မေးခွန်းလေ ဘောငင်ဂီးမေးလေဟယ်။ အယ်ဘေမဲ့ ကိုယ်တော်ဟာ ဖြေဘဲနနေတော်မူဟယ်။

10 ယဇ်ပုရောဟိတ်ဂီးလေန ကျမ်းတတ်ဆရာလေဟာ ရှေ့ဟို့ တိုးလာဘီး ယေရှုဟို့ ပြင်းပြင်းထန်ထန်ဟွား စွပ်စွဲဂေဟယ်။

11 ဟေရုဒ်န သူ့ရဲ့စစ်သားလေဟာ ယေရှုဟို့ ထီလေးဇာလောက်ဘီး လှောန်ပြောန်ဂေဟယ်။ အယ်ဘီးန သူးနို့လေဟာ ကောန်းဇားဝတ်လောင်ဟို့ ဝတ်ပေးဘီးဟာ ကိုယ်တော့်ဟို့ ပိလတ်မန်းနားဟို့ ပုလန်ပို့လေဟယ်။

12 ရင်းရင်ဒူးဟု ရန်သူဖြစ်ဂေဟူ ဟေရုဒ်န ပိလတ်မန်းဟာ အယ်နေမာ မိဆွေလေ ဖြစ်လာဂေဟယ်။

ယေရှုဟို သေဒန်ခလဟူကြောင်း
(မသံ ၂၇.၁၅-၂၆; မာကု ၁၅.၆-၁၅; ယောဟန်
၁၈.၃၉-၁၉.၁၆)

13 ပိလတ်မန်းဟာ ယဇ်ပုရောဟိတ်ဂီးလေ၊ ခေါင်းဆာ
န်လေန လူလေဟို ခေါ်လိုက်ဘီး

14 “နန်းနိုလေဟာ လူလေဟို လမ်းမှားအောက် နှိုးဆော်
ဟူသူ ဖြစ်ဟယ် ဆိုဘီး အယ်လူဟို ငါနားဟို ခေါ်လာဂေ
ဟယ်။ ခု နန်းနိုလေရဲ့ ရှေ့မာ ငါစစ်ဆေးဘေမဲ့ အယ်လူမာ
နန်းနိုလေ စွပ်စွဲဟားဟူ ပြစ်တခုလည်း တို့ဟူ။

15 ဟေရဒလည်းဘဲ ပြစ်ရှာတို့ဘဲဟူကြောနဲ့ သူဟို နိုလေ
နားဟို ပုလန်ပို့လိုက်ဟယ်။ အယ်လူဟာ သေဒန်န ထိုက်
တန်ဟူ ပြစ်တခုလည်း ကျူးလွန်ဟူ။

16 အယ် ကြောနဲ့ အယ် လူ ဟို ကီ ဒန် ပေး ဘီး ဟာ
လွတ်လိုက်မယ်” ဆိုဘီး သူးနိုလေဟို ပြောလေဟယ်။

17 *

18 အယ်ဘေမဲ့ လူအောက်ဂီး တခုလောင်းဟ “အယ်
သူဟို သတ်ပါ! ကျွန်တော့်ဟားလေတွပ် ဗာရဗုဗဟို
လွတ်ပေးပါ!” ဆိုဘီး အော်ဟစ်ဂေဟယ်။

19 (ဗာရဗုဗဟာ မြို့ထဲမာ ဆူပူမှုန လူသတ်မှုလေတွပ်
ထောန်ကုလနေလေဟယ်။)

* 23:17 ၂၃.၁၇ တချို့ မူရင်းလတ်ရေးမူလေမာ ခန်းငယ် ၁၇ ဟို၊
ပသခါပွဲတိုင်းမာ ပိလတ်မန်းဟာ လူလေတွပ် ထောန်သားတယော့-က်ဟို
လွတ်ငြီးခွမ်းပေးလေ့ရှိဟယ်၊ ဆိုဘီး ထပ်ပေါင်းထဲဟားဟယ် (ရှု မာ ၁၅.၆)။

20 ပိလတ်မန်းဟာ ယေရှုဟို လွှတ်ပေးရှင်ဟူကြောင့် လူအောက်ဂီးဟို နှော-က်တခါ ပြောလေဟယ်။

21 အယ်ဘေမဲ့ လူလေဟာ “သူ့ဟို ကားစင်တန်ပါ! ကားစင်တန်ပါ!” ဆိုဘီး အော်ဟစ်ဂေဟယ်။

22 ပိလတ်မန်းဟာ “အယ်သူဟာ ဖြားပြစ်ဟို လောက်ဟူးနူး။ အယ်သူဟာ သေဒန်န ထိုက်တန်ဟူ ပြစ်လောက်ဟူးဟယ် ဆိုဇာဟို ငါ တို့ဟု! အယ်ကြောင့် အယ်သူဟို ကီဒန်ပေးဘီးဟာ လွှတ်လိုက်မယ်” ဆိုဘီး သူးနှိုဟို တတိယခါ ပြောလေဟယ်။

23 အယ်ဘေမဲ့ လူလေဟာ ယေရှုဟို ကားစင်တန်ရမယ် ဆိုဘီး သံကုလယ်ဂီးအော်ဘီး တောင်းဆိုဂေဟယ်။ နှော-က်ဆောင်းမာ သူးနှိုလေရဲ့ တောင်းဆိုရှင်းဟာ အောက်မြင်ဟူးဟယ်။

24 အယ်ကြောင့် သူးနှိုလေ တောင်းဆိုဟူးဟူတိုင်း ပိလတ်ဟာ ယေရှုဟို သေဒန်ပေးဟို ဆောင်းဖြတ်ပေးလိုက်ဟယ်။

25 ဆူပူမှုန လူသတ်မှုလေတွပ် ထောန်ကုလနေဟူ သူဟို သူးနှိုလေ တောင်းဆိုဟူးဟူတိုင်း လွှတ်ပေးလိုက်ဘီး ယေရှုဟို သူးနှို ဆန္ဒတိုင်း လောက်စေဟိုတွပ် အပ်ပေးလိုက်ဟယ်။

ယေရှုဟို ကားစင်တန်ဟူကြောင့်

(မသံ ၂၇.၃၂-၄၄; မာကု ၁၅.၂၁-၃၂; ယောဟန် ၁၉.၁၇-၂၇)

26 စစ်သားလေဟာ ယေရှုဟို ခေါ်ဆောန်ဟားဟူ ခီမာ တောဝါဟုနေ လာနေဟူ ကုရေနေမြို့သား ရှိမုန်ဟို ဖမ်း ဘီး သူထတ်မာ လတ်ဝါးကပ်တိုင်ဟို တန်ပေးလေဟယ်။ အယ်ဘီးဟာ လတ်ဝါးကပ်တိုင်ဟို ထမ်းခိုင်းဘီး ယေရှု နှော-က်ဟုနေ လိုက်စေလေဟယ်။

27 ကိုယ်တော်နှော-က်ဟုနေ လိုက်နေဟူ လူအောက်ဂီး ထဲဟု မီးမတချို့ဟာ ငိုကြွေးဘီး မြည်တမ်းနေဂေဟယ်။

28 ယေရှုဟာ အယ်မီးမလေဟို လှည့်ကေဘီးဟာ “ယေ ရှုရှလင်မြို့သူလေ! ငါ့တွပ်ငိုဂေန။ နန်းနိန် နန်းနိရဲ့ သား မီးလေတွပ်ဘဲ့ ငိုဂေ။

29 ဖြားဖြစ်ကြောန်နူးဆိုဟာ ‘မြို့နေဟူ မီးမလေ၊ သားမီး ဖူးဘဲဟူ မီးမလေ၊ နို့တိုက်ဖူးဘဲဟူ မီးမလေဟာ မင်္ဂလာ ရှိလေဟယ်!’ ဆိုဘီး လူလေဟု ပြောဟို နေရစ်လေဟာ ရှော-က်လာလေ့မယ်။

30 အယ်ခီမာ လူလေဟာ တောန်လေဟို ‘နို့လေထတ်ဟို ကုလဂေပါ!’ တောန်ဂူးလေဟို ‘နို့လေဟို ဖောင်းအောက် ဂေပါ!’ ဆိုဘီး ပြောဂေလေ့မယ်။

31 ဖြားဖြစ်ကြောန်နူးဆိုဟာ စီးစိုနေဟူပန်ဟို အယ်မျိုး လောက်ဟယ် ဆိုဟာ ခြော-က်နေဟူပန် ဆိုဟာ ဖြားမျိုး ဖြစ်လေ့မယ်နူး။” ဆိုဘီး မိန့်တော်မူလေဟယ်။

32 ရာဇဝတ်သား နှေ့ယော့-က်ဟိုလည်း ယေရှုနတူးဒု သတ်ဟိုတွပ် ခေါ်ဆောန်ဟားဂေဟယ်။

33 “ဦးခေါင်းခွံနေရာ” ဟို့ ရော့-က်ဟူ ခီမာ သူးနို့ဟာ ယေရှုဟို့ ကားစင်တန်လေဟယ်။ အယ်ဘီးဟာ ရာဇဝတ်သား နှေ့ယော့-က်ဟို့လည်း ကိုယ်တော်ရဲ့ ညာဖတ်မာ တယော့-က်၊ ဘယ်ဖတ်မာ တယော့-က် ထားဘီးဟာ ကားစင်တန်ဂေဟယ်။

34 ယေရှုဟု “ဖ! သူးနို့လေဟာ သူးနို့ ဖြားလောက်ဟယ် ဆိုဇာဟို့ သိဂေဘဲဟူကြောန့် သူးနို့လေဟို့ ခွမ်လွတ်တော်မူပါ”[†] ဆိုဘီး ပြောလေဟယ်။

သူးနို့လေဟာ ကိုယ်တော်ရဲ့ ဝတ်စားလေဟို့ မဲနိုက်ဘီး ခွဲဝီယူဂေဟယ်။

35 လူလေဟာ ရပ်ဘီး ကေ့နေဂေဟယ်။ ယုဒခေါင်းဆောင်လေဟု ကိုယ်တော်ဟို့ “အယ်လူဟာ ဘုရားသခင်ဝီးကော့-က်ဟားဟူ မေရှိယဖြစ်ဟယ် ဆိုဟာ တခြားလူလေဟို့ ကယ်တန်မျိုး သူ့ကိုယ်သူ ကယ်တန်ပါစေ!” ဆိုဘီး လှောန်ပြောန်ဂေဟယ်။

36 စစ်သားလေဟုလည်း ကိုယ်တော်နားဟို့ တိုးဝမ်လာဘီး ဝိုင်ရှင်ဟို့ တိုက်ဘီး

37 “နန်ဟာ ယုဒမန်းဂီးဖြစ်ဟယ် ဆိုဟာ နန်ကိုယ်နန် ကယ်တန်ပါ!” ဆိုဘီး လှောန်ပြောန်ဂေဟယ်။

38 ကိုယ်တော်ရဲ့ ထတ်ဖတ်မာလည်း “အယ်သူဟာ ယုဒမန်းဂီး ဖြစ်ဟယ်” ဆိုဘီး ရေးဟားဟယ်။

[†] 23:34 **၂၃-၃၄** တချို့ မူရင်းလတ်ရေးမူလေမာ ယေရှုဟု “ဖ! သူးနို့လေဟာ သူးနို့ ဖြားလောက်ဟယ် ဆိုဇာဟို့ သိဂေဘဲဟူကြောန့် သူးနို့လေဟို့ ခွမ်လွတ်တော်မူပါ” ဆိုဘီး ပြောလေဟယ်၊ ဆိုဇာဟာ မှေ့ဟု။

39 လတ်ဝါးကပ်တိုင်မာ ခိဆွဲဟူးဟူ ရာဇဝတ်သား နှေ့ယော့-က်ထဲဟု တယော့-က်ဟာ “နန်ဟာ မေရှိယ မှုဟု လော။ နန်ကိုယ်နန် ကယ်တန်ဘီး နို့လေဟို့လည်း ကယ်တန်ပါ!” ဆိုဘီး ကိုယ်တော်ဟို့ ကဲ့ရဲ့ဟယ်။

40 အယ်ဘောမဲ့ တခြား ရာဇဝတ်သားဟု အယ်သူဟို့ ပြစ်တန်ဘီး “နန်ဟာ အယ်သူမျိုးဘွဲ ဒန်စီရင်ရှင်းဟို့ ခံနေရတောန်မှ ဘုရားသခင်ဟို့ ကြော့-က်ဟုလော။

41 နို့လေဟု နို့လေလောက်ဟူးဟူ ပြစ်လေန ထိုက်တန်ဟူ ဒန်ဟို့ ခံရဇာဟာ တရားပါဟယ်။ အယ်ဘောမဲ့ အယ်သူဟာ ပြားပြစ်ဟို့မျှ လောက်ဟူးဇာ မှုဟု” ဆိုဘီး ပြောလေဟယ်။

42 အယ်ဘီးနု သူဟု “ယေရှု၊ ကိုယ်တော်ရဲ့ နိုင်ငံတော်ဟို့ ကြွလာဟူ ခိမာ ကျွန်တော့်ဟို့ အော့-က်မေ့တော်မူပါ!” ဆိုဘီး ယေရှုဟို့ လျှော့-က်လေဟယ်။

43 ယေရှုဟာ “နန်ဟို့ ငါ မှန်တိုင်းပြောမယ်၊ အယ်နေဘွဲ နန်ဟာ ငါနတူးဒု ပရဒိသုဘောင်မာ ရှိမယ်” ဆိုဘီး မိန့်တော်မူလေဟယ်။

ယေရှု သေဟူးဟူကြောန်း

(မသဲ ၂၇.၄၅-၅၆; မာကု ၁၅.၃၃-၄၁; ယောဟန် ၁၉.၂၈-၃၀)

44 အယ်ခိဟာ မွန်းဒဲ့ခိလော့-က်ဖြစ်ဟယ်။ နေဒန်ဇာ သောင်းနာရီထိ ဒေသတခုလောင်း မှောန်မိုက် ဖြစ်ဟူးဘီး၊

⁴⁵ နေရောင်ဟာ ကွယ်ပျော့-က်ဟူးလေဟယ်။ အယ်ဘီးဟာ ဗိမာန်တော်ထဲမှာ ခံဆွဲဟူးဟူ လိုက်ကာဟာ နေ့ခြမ်းကွဲဟူးလေဟယ်။

⁴⁶ ယေရှုဟာ “ဖ! ကျွန်တော့်ရဲ့ ဝိညာဉ်ဟို ဖရဲ့လတ်ထဲမှာ အပ်ပါဟယ်!” ဆိုဘီး သံကုလယ်ဂီးန အော်တော်မူဘီးန သတ်ချောက်တော်မူလေဟယ်။

⁴⁷ အယ်မျိုးဖြစ်ဇာဟို မြင်လိုက်ဟူ တပ်မှူးဟု ဘုရားသခင်ဟို ချီးမွမ်းလိုက်ဘီး “အယ်သူဟာ မှန်ဘွဲ့ ပြောန့်မတ်ဟူသူ ဖြစ်လေဟယ်!” ဆိုဘီး ပြောနေဟယ်။

⁴⁸ အယ်မူဇာဟို ကေဇာဇာဟို စုလာဂေဟူ လူလေဟာ အယ်မျိုးဖြစ်ဇာဟို မြင်လိုက်ဟူ ခီမာ ရင်ဖတ်ဟို ထုအိုက်ဘီး ပုလန်ဟူးဂေဟယ်။

⁴⁹ ဂါလိလဲနယ်ဟုနေ ကိုယ်တော်ဇော-က်ဟို လိုက်လာဟူ မီးမလေရော၊ ယေရှုန ရရာတိုင်း ရင်းနှီးဟူ လူလေရော ဝီးဟုနေ ရပ်ကေဇာဇာနေဂေဟယ်။

ယေရှုဟို သင်္ဂြိုဟ်ဟူကြောန်း

(မသံ ၂၇.၅၇-၆၁: မာကု ၁၅.၄၂-၄၇: ယောဟန် ၁၉.၃၈-၄၂)

⁵⁰ အယ်ခီမာ ပြောန့်မတ်ဘီး သူတော်ကောန်း ဖြစ်ဟူ ယောသပ် နာမယ်ရှိဟူ လွတ်တော်ဖွဲ့ဝမ် တယော့-က် ရှိဟယ်။

51 သူဟာ တရားလွှတ်တော်ရဲ့ ဆောင်းဖြတ်ချစ်န လောက်ဆောင်ချစ်ဟို့ ဘောတူဟဲ့။ ယောသပ်ဟာ ယုဒ ပြည်၊ အရိမသဲမြို့သား ဖြစ်ဘီး ဘုရားသခင်ရဲ့ နိုင်ငံတော် ဟို့ စောင့်မျှော်နေဟူ သူလည်း ဖြစ်ဟယ်။

52 သူဟာ ပိလတ်ရှေ့ဟို့ သွားဘီးန ယေရှုရဲ့ လောင်း တော်ဟို့ တောင်းလေဟယ်။

53 အယ်ဘီးန လောင်းတော်ဟို့ လတ်ဝါးကပ်တိုင်ဟုနေ ခုလဘီး ပိဖုလူန ပတ်လေဟယ်။ ကုလော့-က်ဆောန်ဟို့ ထွမ်းဟွားဘီး တခါလည်း သောင်းသေးဘဲဟူ သန်းခလိုင်း ဂူထဲမာ ထားလေဟယ်။

54 အယ်နေဟာ ဖိနေ ဖြစ်ဘီး ဒန်းနေလည်း ရော့-က်ခါ နီးလေဘီ။

55 ဂါလိလဲနယ်ဟုနေ ယေရှုနော့-က်ဟို့ လိုက်လာဟူ မီး မလေဟာ ယောသပ်နတူးဒု သွားဘီး သန်းခလန်းဂူဟို့ ရော၊ ယေရှုရဲ့ လောင်းတော်ဟို့ရော ဖယ်မျိုးထားဟွားဟု ယ် ဆိုဇာဟို့ မြင်ဂေဟယ်။

56 အယ်ဘီးန သူးနိုလေဟာ အီဟို့ ပုလန်ဟွားဘီး လော န်းတော်တွပ် ဆီမွီးန နံသာပေါန်းလေဟို့ ပြင်ဆင်ဂေဟု ယ်။

ဒန်းနေမာ သူးနိုလေဟာ ပညတ်တော်တိုင်း နားယူဂေ ဟယ်။

ရှင်ပုလန်ထမြော့-က်ဟူကြောန်း

(မသံ ၂၈.၁-၁၀; မာကု ၁၆.၁-၈; ယောဟန် ၂၀.၁-၁၀)

¹ နန်းနွေနေ့ မိုးလန်းစောဂီးမာ အယ်မီးမလေဟာ သူးနို့ ကိုယ်တိုင် ပြင်ဆင်ဟူးဟူ နံသာပေါန်းလေဟို ယူဆောန် ဘီး သန်းခလိုင်ဂူဟို သွားဂေဟယ်။

² သူးနို့လေဟာ သန်းခလိုင်ဂူဝဟာ ကုလော့-က်တောင်း ဟို လိုမ့်ဖယ်ဟူးဇာဟို တွဲဟူးဂေဟယ်။

³ အယ်ကြောန် သူးနို့လေဟာ သန်းခလိုင်ထဲဟို ဝမ် ဟူးဂေဟယ်။ အယ်ဘေမဲ့ သခင်ယေရှုရဲ့ လောန်းတော် ဟို တွဲဂေဟယ်။

⁴ အယ်ကြောန် သူးနို့လေဟာ အယ်ကြောန်းရာဟို စဉ်းစားနိုင်ဘဲ ဖြစ်နေဒူးမာ တော့-က်ပဟူ ဝတ်ဟို ဝတ် စားဟူးဟူ လူနေ့ယော့-က်ဟာ ရောက်တရစ် သူးနို့နား မာ ပေါ်လာလေဟယ်။

⁵ အယ်မီးမလေဟာ ကြော့-က်လန်ဘီး မုလေဂီးမာ ပျပ်ဝပ်နေဂေဟယ်။ အယ်သူနေ့ယော့-က်ဟာ “နန်းနို့လေ ဟာ သေဟူသူလေထဲမာ သတ်ရှင်ဟူသူဟို ဖြားဖြစ်ကြော န် လာရှာနေဂေနူး။

⁶ ကိုယ်တော်ဟာ အယ်နေရာမာ မေ့ဟု။ ရှင်ပုလန်ထ မြော့-က်ဟူးဘီ။ ကိုယ်တော်ဟာ ဂါလိလဲနယ်မာ ရှိနေ ဒူးဟု နန်းနို့ဟို ဖယ်မျိုးမိန်တော်မူဟူးဟယ် ဆိုဇာဟို

24:6 ၂၄.၆,၇ မ ၁၆.၂၁; ၁၇.၂၂,၂၃; ၂၀.၁၈,၁၉; မာ ၈.၃၁; ၉.၃၁; ၁၀.၃၃,၃၄; လု ၉.၂၂; ၁၈.၃၁-၃၃

အော့-က်မေ့ဂေ။

7 သူနို့ဟို ‘လူရဲသားဟာ ပြစ်သားလေ လတ်ထဲဟို အပ်ရှင်းဟို ခံရလေ့မယ်။ ကားစင်တန် ခံရလေ့မယ်။ အယ်ဘီးန သောင်းရစ်မြော့-က်ဟူ နေ့မာ ထမြော့-က်လေ့မယ်’ ဆိုဘီး မိန့်တော်မူဟူးဟယ် မူဟုလော။” ဆိုဘီး ပြောဂေဟယ်။

8 အယ်ခီမာ မီးမလေဟာ ကိုယ်တော်ရဲ စကားလေဟို ပုလန်အော့-က်မေ့လာဘီး

9 သန်းခုလိုင်းဟုနေ ပုလန်ဟူးဘီး တမဲ့တော် ဆယ့်တပါးန ကျန်လူလေ ဂူလောင်းဟို အယ်မူကြောင်းရာလေ ဂူလောင်းဟို ပြောပြဂေဟယ်။

10 တမန်တော်လေဟို အယ်မူကြောင်းရာလေဟို ပြောပြသူလေဟာ မာဂဒလဝါသူ မာရို၊ ယောဟနန၊ ယာကုပ်ရဲ၊ မိခင်ဖြစ်ဟူ မာရိုန သူးနို့လေနတူးဒု ရှိနေဟူ တခြားမီးမလေ ဖြစ်ဂေဟယ်။

11 အယ်ဘေမဲ့ အယ်မီးမလေ ပြောဟူ စကားလေဟာ ဓိပါယ်မော့ဘဲဟူကြောန့် တမန်တော်လေဟု ယောင်ကြည်ဂေဟု။

12 အယ်ဘေမဲ့ ပေတရဟာ ထဘီး သန်းခုလိုင်းဂူဟို ပုလေးဟူးလေဟယ်။ ရော့-က်ဟူးဟူ ခီမာ ငေါက်ကေလိုက်ဟူဇာ ပိဖုလူစဟိုဘဲ တို့ရဟူကြောန့် အယ်ဖြစ်ပျစ်ဟို အံ့ဩဟူးဘီး အီဟို ပုလန်ဟူးဟယ်။*

* 24:12 ၂၄.၁၂ တချို့ မူရင်းလတ်ရေးမူလေမာ ခန်းငယ် ၁၂ မှေ့ဟု။

ဧမောက်ဝါဟို လမ်းရှော့-က်ဟားဟူကြောင်း (မာကု ၁၆.၁၂,၁၃)

13 အယ်နေမာဘဲ ယေရှုရဲ့ နှော့-က်တော်လိုက် နှော့
ယော့-က်ဟာ ယေရုရှလင်မြို့န ခွန်နစ်မိုင်လောက်ဝီးဟူ
ဧမောက် ဆိုဘီး နာမယ်ရှိဟူ ဝါဟို သွားနေဂေဟယ်။

14 သူးနို့ဟာ ဖြစ်ပျစ်ဟားဘီးဟူ ကြောင်းရာလေ ဂူလော
င်းဟို ယော့-က်နယော့-က် ပြောနေဂေဟယ်။

15 အယ်မျိုးပြောဆို ဆွေးနွေးနေဒူးမာ ယေရှုကိုယ်တိုင်
ရှော့-က်လာဘီး သူးနို့နတူးဒု ကြွတ်တော်မူလေဟယ်။

16 သူးနို့ဟာ ကိုယ်တော့်ဟို မြင်ဘေမဲ့လည်း ကိုယ်တော့်
ဟို မှတ်မိဘဲ ဖြစ်နေဂေဟယ်။

17 ယေရှုဟာ “နန်းနို့လေ လမ်းရှော့-က်ရင်းန ယော့-က်
နယော့-က် ဖြားဇာလေ ပြောနေဂေနှူး။” ဆိုဘီး သူးနို့ဟို
မေးတော်မူလေဟယ်။

သူးနို့ဟာ ဝမ်းနဲဟူမျစ်နာန ရပ်နေဂေဟယ်။

18 သူးနို့ထဲဟာ ကလောဖ နာမယ်ရှိဟူသူဟာ “နန်ဟာ
ယေရုရှလင်မြို့မာ ဧည့်သည်ဖြစ်န နေထိုင်နေဘေမဲ့ အယ်
နေရစ်လေမာ အယ်မြို့နှိုက် ဖြစ်ပျစ်ဟားဟူ ကြောင်းရာ
လေဟို နန်ယော့-က်ဒဲဘဲ သိသေးဟုလော။” ဆိုဘီး ကိုယ်
တော့်ဟို မေးလေဟယ်။

19 ကိုယ်တော်ဟာ “ဖြားကြောင်းရာလေနှူး။” ဆိုဘီး မေး
တော်မူလေဟယ်။

အယ်လူနွေယော့-က်ဟ “နာဇရက်မြို့သားယေရှုကြောန်းဘဲဖြစ်ဟယ်။ အယ်သူဟာ ဘုရားသခင်န လူလေရဲ့ရှေ့မာ လတ်သတ်တိ၊ နှော့-က်သတ်တိန ပုလဲဇောင်ဟူပရောဖက် ဖြစ်ဟယ်။

20 နို့လေရဲ့ ယဇ်ပုရောဟိတ်ဂီးလေန ဘာသာရေးခေါင်းဆောင်လေဟ သူ့ဟို့ သေဒန်စီရင်ရှင်း ခံဟို့ ဆိုဘီး အပ်ပေးဂေဟယ်။ အယ်ကြောန် သူ့ဟို့ ကားစင်တန်ဂေဟယ်။

21 သူဟာ ကုသရေလလူမျိုးဟို့ လွတ်မြော့-က်စေဟို့ တွပ် လာမယ် ဆိုဘီး နို့လေ မျှော်လင့်ဟူးဂေဟယ်။ အယ်မူဇာလေ ဖြစ်ပျစ်ဟူးဇာဟု သောင်းရစ်ရှိဟူးဘီး။

22 နို့လေရဲ့ အောက်စုထဲဟု မီးမတချို့ဟာ နို့လေဟို့ အံ့ဩဟူးစေဂေဟယ်။ သူးနို့လေဟာ မိုးလန်းစောစောဂီးမာ သန်းခုလိုင်ဂူဟို့ သွားဂေဟယ်။

23 အယ်ဘေမဲ့ ကိုယ်တော်ရဲ့ လောင်းဟို့ တို့ဂေဟု။ သူးနို့လေဟု ကိုယ်တော်ဟာ သတ်ရှင်နေဟယ် ဆိုဘီး ပြောပြဟူ ကောင်းဂန်တမန်လေဟို့ ရှုပါရောင်မာ မြင်ရဟယ် ဆိုဇာဟို့ ပုလန်လာဘီး ပြောဂေလေဟယ်။

24 နို့လေရဲ့ အောက်စုထဲဟု လူတချို့ဟာ သန်းခုလိုင်ဂူဟို့ သွားဟူ ခီမာလည်း မီးမလေ ပုလန်ပြောပြမျိုးဘဲ တံတံကုလကုလ တို့ရဂေဘေမဲ့ ကိုယ်တော်ဟို့ တို့ဂေဟု” ဆိုဘီး ပုလန်ဖြေဂေဟယ်။

25 အယ်ဘီးန ယေရှုဟု “ပရောဖက်လေ ဟောဟူးဇာ ဂူလောင်းဟို့ နှလောင်းထဲမာ ယောင်ကြည်ဟို့ ရရာတိုင်း

နှေးကွေးဟူ လူမိုက်လေ!

²⁶ မေရှိယဟာ အယ်မျိုးဒေါက်ခခံဘီးန သူ့ရဲ့ဖောင်း သရေထဲဟို့ ဝမ်စားရမယ် မူဟုလော။” ဆိုဘီး သူးနို့ဟို့ မိန့်တော်မူလေဟယ်။

²⁷ အယ်ဘီးဟာ ယေရှုဟု မောရှေရဲ့ ကျမ်းလေန ပရော ဖက်လေရဲ့ ကျမ်းဂူလောင်းမာ ကိုယ်တော်န ပတ်သတ်ဘီး ရေးဟားဇာလေဟို့ သူးနို့လေဟို့ ရှင်းပြတော်မူဟယ်။

²⁸ သူးနို့ သွားနေဟူ ဝါနားဟို့ ရော့-က်ခါနီးမာ ယေရှု ဟာ ရှေ့ဟို့ ဆစ်ဘီးသွားဟူမျိုး လောက်တော်မူဟူကြော န်!

²⁹ သူးနို့လေဟု ကိုယ်တော့်ဟို့ ပုလန်ဆွဲဟားဘီး “နေဒ န်ဟားဟူကြောန် ညဉ့်ခန်းဇာရော့-က်နေဘီ။ အယ်ကြော န်နို့လေနတူးဒု တည်းခိုပါ” ဆိုဘီး ပြောဂေဟယ်။ အယ် ကြောန် ကိုယ်တော်ဟာ သူးနို့နတူးဒု တည်းခိုဟို့ လိုက် ဟားတော်မူဟယ်။

³⁰ ကိုယ်တော်ဟာ သူးနို့နတူးဒု ထိုင်တော်မူဟူ ခီမာ မူ ဟို့ ယူဘီး ကျေးဇူးတော်ဟို့ ချီးမွမ်းတော်မူဟယ်။ အယ် ဘီးန မူဟို့ ဖဲဘီး သူးနို့လေဟို့ ပေးတော်မူဟယ်။

³¹ အယ်ခီမာ သူးနို့လေရဲ့ မျစ်စိဟာ ပွမ့်ဟားဘီး ကို ယ်တော့်ဟို့ ပုလန်မှတ်မိဟားဂေဟယ်။ အယ်ဘေမဲ့ ကိုယ် တော်ဟာ သူးနို့လေရဲ့ မျစ်စိရှေ့မာဘွဲ ပျော့-က်ကွယ်ဟား လေဟယ်။

³² သူးနို့ဟာ “လမ်းတရှော့-က်လောင်းမာ ကိုယ်တော်

ဟာ နို့လေဟို စကားပြောနေဟူ ခီမာရော၊ ကျမ်းစာလေဟို ရှင်းပြနေဟူ ခီမာရော နို့လေရဲ့ စိန်လောင်းထဲမာ မီးလောင်နေမျိုးဘဲ ဖြစ်နေဂေဟယ် မူဟုလော။” ဆိုဘီး ယော့-က် နယော့-က် မေးနေဂေဟယ်။

33 သူးနို့ဟာ ရှစ်ရှင်းထဘီး ယေရုရှလင်မြို့ဟို ပုလန်ဟားဂေဟယ်။ အယ်နေရာမာ တမဲ့တော် ဆယ့်တပါးဟာ သူးနို့ရဲ့ ပေါင်းဖော်လေနတူးဒူ စုဝီးနေဇာဟို တွံရဂေဟယ်။

34 အယ်သူလေဟ “သခင်ဘုရားဟာ တကယ်ဘဲ ထမြော့-က်ဟားဘီ! ကိုယ်တော်ဟာ ရှိမုန်ဟို ကိုယ်ထန်ရှားပြတော်မူဟယ်!” ဆိုဘီး ပြောလေဟယ်။

35 အယ်ဘီးန အယ်လူနွေယော့-က်ဟု လမ်းမာ ဖြစ်ပျစ်ဟားဇာလေဟိုရော၊ မဟို ဖဲလိုက်ဟူ ခီမာ သခင်ဘုရား ဖြစ်ဟယ် ဆိုဘီး သံလိုက်ရဟယ် ဆိုဇာဟိုရော ပြောပြဂေဟယ်။

တမဲ့တော်လေဟို ကိုယ်ထန်ရှားပြဟူကြောန်း

(မသဲ ၂၈.၁၆-၂၀; မာကု ၁၆.၁၄-၁၈; ယောဟန် ၂၀.၁၉-၂၃; တမန်တော် ၁.၆-၈)

36 သူးနို့နွေယော့-က်ဟာ အယ်မျိုးပြောနေဒူးမာ သခင်ဘုရားကိုယ်တိုင် သူးနို့လေထဲမာ ရောက်တရစ်ပေါ်လာဘီး “နန်းနို့နတူးဒူ ငြိသတ်ရှင်း ရှိပါစေ” ဆိုဘီး

သူးနို့လေဟို မိန့်တော်မူလေဟယ်။[†]

37 သူးနို့လေဟာ ကသေဟို မြင်ဟယ် ဆိုဘီး ထန်ဘီး
ဟာ ကြော့-က်နေဂေဟယ်။

38 အယ် ဘေ မဲ့ ကိုယ် တော် ဟု “ဖြား ဖြစ် ကြော့ နို့
ကြော့-က်နေဂေဟယ်နူး။ ဖြားဖြစ်ကြော့နို့ နန်းနို့စိထ်မာ
သံသယဖြစ်နေဂေဟယ်နူး။

39 ငါ့လတ်လေ၊ ငါ့ခေလေဟို ကေ့ဂေပါ။ ငါ့ကိုယ်တိုင်
ဖြစ်ဟယ်။ ဖြားဖြစ်ကြော့နို့နူးဆိုဟာ ကသေမာ သားလေ၊
ရိုးလေ မေ့ဟု။ နန်းနို့ မြင်ဟူတိုင်းဘဲ ငါ့မာ သားလေ၊ ရိုး
လေရှိဟယ် ဆိုဇာဟို ငါ့ဟို စမ်းကေ့လိုက် နန်းနို့သိလေ့
မယ်” ဆိုဘီး သူးနို့ဟို မိန့်တော်မူလေဟယ်။

40 ကိုယ်တော်ဟာ အယ်မျိုးပြောဘီး သူးရဲ့လတ်လေန
ခေလေဟို သူးနို့ဟို ပြလေဟယ်။[‡]

41 သူးနို့ဟာ ရရာတိုင်း အံ့ဩဟားဘီး ဝန်းသာနေဟူ
ကြော့နို့ ယောင်ကြည်နိုင်ဘဲ ဖြစ်နေဟူ ခီမာ ကိုယ်တော်
ဟု “နန်းနို့မာ စားဟို တခုခုရှိလော။” ဆိုဘီး သူးနို့ဟို မေး
တော်မူလေဟယ်။

42 သူးနို့ဟာ ကိုယ်တော့်ဟို ငါးဂန်တပိုင်း ပေးဂေဟယ်။

43 အယ်ငါးဂန်ဟို ကိုယ်တော်ဟာ သူးနို့ရှေ့မာဘဲ ယူဘီး
ဟာ စားတော်မူလေဟယ်။

[†] 24:36 ၂၄:၃၆ တချို့ မူရင်းလတ်ရေးမူလေမာ “နန်းနို့တူးဒူ ငြိသတ်ရှင်း
ရှိပါစေ” ဆိုဘီး သူးနို့လေဟို မိန့်တော်မူလေဟယ်၊ ဆိုဇာဟာ မေ့ဟု။

[‡] 24:40 ၂၄:၄၀ တချို့ မူရင်းလတ်ရေးမူလေမာ ခန်းငယ် ၄၀ မေ့ဟု။

44 အယ်ဘီးန ကိုယ်တော်ဟု “နန်းနီနတူးဒု ရှိနေဒူးဟု ငါပြောဟူးမျိုးဘဲ မောရှေရဲ့ ပညတ်တရားကျမ်း၊ ပရောဖက်ကျမ်းလေန ဆာလံကျမ်းမာ ငါ့ကြောန်းဟို့ ရေးဟူးဇာလေဟာ ပုလဲဇောင်ဟူးဘီ” ဆိုဘီး သူးနီဟို့ မိန့်တော်မူလေဟယ်။

45 အယ်ဘီးန ကိုယ်တော်ဟာ ကျမ်းစာလေဟို့ နားလည်ဟို့တွပ် သူးနီရဲ့ သိဉာဏ်ဟို့ ဖွမ်ပေးဘီးဟာ

46 “ကျမ်းစာလေမာ ရေးဟူးဇာဟု မေရှိယဟာ ဝေဒနာခံတော်မူဘီး သောင်းရစ်မြော့-က်ဟူနေမာ သေရာဟုနေထမြော့-က်လေ့မယ်။

47 အယ်ဘီးဟာ သူ့နာမအားဖြင့် ပြစ်လွှတ်ရှင်းနဆိုင်ဟူ နော်ဒတရားဟို့ ယေရုရှလင်မြို့ဟုစဘီး လူမျိုးဂူလောင်းဟို့ ဟောပြောရမယ်။

48 နန်းနီဟာ အယ်ကြောန်းရာလေရဲ့ မျစ်မြင်သတ်သေလေ ဖြစ်ဟယ်။

49 အယ်ဘီးဟာ ငါဟာ ငါ့ဖရဲ့ ဂဒိဟို့ နန်းနီနားဟို့ ငါကိုယ်တိုင် စေလွှတ်မယ်။ အယ်ဘေမဲ့ ထတ်ကောန်းဂန်ဟု နေ တဂိုးဟာ နန်းနီထတ်ဟို့ ဆင်းလာခန်ထိ ယေရုရှလင်မြို့မာဘဲ စောန်နေရမယ်” ဆိုဘီး သူးနီဟို့ မိန့်တော်မူလေဟယ်။

ကောန်းဂန်ဘောင်ဟို့ ယူဆောန်ခံရဟူကြောန်း
(မာကူ ၁၆.၁၉, ၂၀; တမန်တော် ၁.၉-၁၁)

50 အယ်ဘီးန ကိုယ်တော်ဟာ သူးနို့ဟို ဗေသနိဝါဟို ခေါ်
ဆောန်ဟားဘီး ကိုယ်တော်ဟာ လတ်တော်ဟို မြွေ-က်
ဘီး သူးနို့ဟို ကောန်းဂျီးပေးတော်မူဟယ်။

51 အယ်မျိုး သူးနို့ဟို ကောန်းဂျီးပေးနေဒူးမာ ကိုယ်
တော်ဟာ သူးနို့နားဟုနေ ထွပ်ခွာဟားဘီး ကောန်းဂန်ဘော
င်ဟို ယူဆောန်ခံရလေဟယ်။

52 သူးနို့ဟာ ကိုယ်တော့်ဟို ကိုးကွယ်ဘီးန ရရာတိုင်း
ဝန်းသာဘီးဟာ ယေရုရှလင်မြို့ဟို ပုလန်ဟားဂေဘီးဟာ၊

53 ဗိမာန်တော်မာ ဘုရားသခင်ရဲ့ ကျေးဇူးတော်ဟို မြဲဒ
မ်း ချီးမွမ်းနေဂေဟယ်။

24:50 ၂၄.၅၀ တ ၁.၉-၁၁ § 24:51 ၂၄.၅၁ တချို့
မူရင်းလတ်ရေးမူလေမာ ကောန်းဂန်ဘောင်ဟို ယူဆောန်ခံရလေဟယ်၊
ဆိုဇာဟာ မွေဟယ်။

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1